

清代傳記叢刊·綜錄類②
周駿富輯

清史列傳

(五)

卷三十三至
卷四十一

清國史館原編



明文書局印行

清史列傳 卷三十三

大臣傳次編八

那彥成

那彥成章佳氏滿洲正白旗人曾祖阿克敦協辦大學士祖阿桂武英殿大學士一等誠謀英勇公俱有傳那彥成由乾隆五十四年進士改翰林院庶吉士五十五年散館授編修五十六年升侍講五十七年閏四月轉侍讀十月入直南書房遷國子監祭酒兼公中佐領五十九年四月擢詹事府詹事充日講起居注官十月遷內閣學士兼禮部侍郎銜嘉慶二年充崇文門副監督三年二月兼正黃旗蒙古副都統命在軍機大臣上行走五月遷工部右侍郎八月以教匪王三槐就獲下部優敘四年正月調戶部右侍郎兼鑲白旗滿洲副都統授翰林院掌院學士管理武英殿御書處事務尋轉右侍郎擢工部尙書兼崇文門正監督二月充實錄館總裁兼鑲白旗漢軍都統充經筵講官國史館副總裁賞戴花翎三月賜紫禁城騎馬五月總理工部處事務兼管咸安宮教習充教習庶吉士上以那

彥成三歲而孤其母那拉氏撫孤守志三十餘載表其門賜御書勵節教忠以榮之七月管戶部三庫授總管內務府大臣先是湖北白蓮教匪樊學明等叛於襄陽其黨張漢潮寇秦中詔參贊大臣明亮討之而成都將軍慶成陝西巡撫永保與明亮有隙師行不相顧八月命那彥成爲欽差大臣督明亮軍褫慶成永保職畀那彥成按治九月奏途次詢訪軍營將惰兵疲自四月至七月總未與賊接仗臣到後當力加振作若再有失誤軍機者將弁以下軍法從事諭曰軍營疲玩自當整頓將弁置重典當慎重辦理本朝經略大臣亦從無先斬後奏之事況欽差乎那彥成實心任事諒不致任性苛求然人命至重萬一稍錯所關匪細此正朕愛惜那彥成處那彥成當倍加詳慎十月劾明亮奏報誣罔事乃逮治明亮命那彥成領其軍明亮尋破賊誅張漢潮諭曰明亮因朕特派那彥成督辦不敢再似從前玩寇且聞那彥成已由西安入山是以上緊截剿獲此兇渠是那彥成雖未經臨行陣而先聲奪人故能得此捷音也那彥成旋奏張漢潮謀主冉學勝餘黨在陝宜亟除上是之十一月敗賊於五郎疏言軍餉前費八千餘萬兩有司圖軍需肥己將弁亦希分潤致事閱四年賊未殄滅臣欲清弊蔽刊刻糧單按程期赴

糧臺覈給以杜冒銷又言秦中前將帥各爲一路致賊乘間遁逸今臣等相機分合聲息相通使賊所至必有官兵追剿諭曰所論切中從前積弊今所辦甚是尋疏請五郎設重鎮子午谷黑水峪斜峪諸隘口分置小營控制增總兵一員編鄉勇於新營更置縣丞巡檢分防從之嗣以陳奏不及攻戰祇鋪紘終南山水且以精兵分布勢單飭之時賊竄秦嶺老林官兵由漁碭子蹋冰入賊三路迎敵我兵分道進攻自山梁下破之諭曰所辦甚好山險冰滑舍騎步行可謂辛苦備經那彥成旋奏賊倚老林爲巢窟叢刺阻隘槍箭難施臣五中焦灼憤不欲生必須臣親身入林督剿方不互相觀望卽糧運不繼臣等可尋覓包穀接濟疏入奉硃批不忍注目又諭憤不欲生之語實爲過當不獨那彥成不應冒險深入卽領兵大員亦不應令輕涉險地當萬分斟酌不可過於憤激十二月奏賊匿高關峪夾嶺我軍潛師夜擊賊奔鳳凰山中乃使將士夜縋下殲六百餘賊斃僞元帥黃爾雄等餘匪走平利檄總兵慶溥等亟截之得旨所辦甚是旋以張賊餘黨未殄致勁旅漸疲降旨切責尋破賊於秦嶺嗣以賊匪偪出老林復逸入楚豫有旨嚴飭五年正月賊匪二萬竄陝西略陽上以那彥成狃於老林致賊乘間闖入復切責之

是月破老林逸賊獲襄陽起事賊三十有奇殲逸賊百餘擒賊首高遇春等進兵至漢中因川匪鷓張入棧追剿上以其不拘畛域嘉獎之二月川匪至隴州乃出棧亟剿賊屯隴山鎮三戰大破之分道亟追斬俘三千餘殲僞元帥魏學林僞先鋒嚴士沛閻性擒僞副帥余禮等上嘉之授參贊大臣賜玉鞬金合佩囊下部議敘那彥成以經略額勒登保在隴應受其節制繳欽差大臣關防得旨俞允是月賊避官兵南走追及於秀金山敗之又敗於嚴家壩諭曰所辦甚好那彥成隴州殲賊後兵威已震士氣奮揚是以連次克捷會額勒登保疾作諭那彥成兼領各路兵賊陷文縣據卡狼寨我兵乘月夜渡河破其陣殲賊子狗兒暨賊匪李大旺等並殺賊千三百人餘匪南竄者近千上責其剿賊未淨致奔逸蔓延而保護卡狼寨功過相抵免吏議尋敗賊於龍泉溝又敗諸林江浦俘斬千餘追至毛峪山賊棄輜重遁奏入得旨褒嘉時方令西安將軍恆瑞回陝西協剿屢獲勝仗上以其遙合廟算內外一心賚予獎勵未幾賊首高二馬五糾六千餘人趨松潘官兵禦之奔岷州額勒登保病已帥師夜攻賊奔踞山那彥成率衆先登殲三百六十餘賊追越四山殺百餘遲明賊列陣何家衢設伏以待那彥成帥精兵奮擊賊敗

退伏賊左右起追數十里斬首千餘級執賊匪詹世貴等奏入得旨嘉許頒賜珍物四月敗賊於分水嶺尋以陝匪東趨近豫嚴飭之革花翎已而官兵嚴守禦賊不敢東乃復之川閏四月上以那彥成久不蕪功召還京將面詢陝中賊情尋以賊入川勢漸張乃那彥成玩縱所致又不剿賊於川轉隨額勒登保入陝致總兵施縉戰歿斥出軍機處南書房及紫禁城騎馬並罷所領館閣府庫諸職五月抵京陛見諭曰那彥成赴陝漫無布置致賊竄逸裹脅朕令回京細詢語添兵則以無用之兵添調何益語添餉則以虛糜不值語防堵又以爲兵疲無益昨復稱事關劫數劫數未盡卽健將精兵亦不得力此何語耶朕詢及額勒登保連次得勝那彥成復以所奏如不虛再得一二仗卽可將陝賊辦竣心懷妒忌欲朕猜疑且詢以川楚軍務據云恐亦不免虛誑那彥成游詞熒聽其心實不可問著將此旨宣示令其明白登答又諭曰那彥成外似有才中無把握不聽人言自以爲是雖有微勞不能掩咎著革去尙書講官都統花翎用爲翰林院侍講在實錄館效力尋襲騎都尉世職六年二月擢少詹事四月充日講起居注官九月充順天鄉試副考官升詹事七年二月遷內閣學士兼禮部侍郎銜五月充教習庶吉士六月

兼正藍旗漢軍副都統八月扈蹕木蘭射鹿獲之賞戴花翎尋調正紅旗滿洲副都統是冬命往江西輪巡撫張誠基被揭事未定讞會廣東永安客籍游民結添弟會與土民構鬪博羅諸邑匪徒響應總督吉慶討平之尋悔釋囚留擊且疑巡撫瑚圖禮密劾遂自戕上命那彥成往鞫之得其實時永安黃亞程等遁入鐵籠嶂復嘯聚爲盜八年二月那彥成率提督孫全謀等進攻卽日克之誅亞程及其黨數百人事平條上善後九事上嘉其辦理妥速調度得宜署吏部侍郎仍下部議敘尋赴直隸浙江讞獄七月擢禮部尙書兼戶部三庫事總理太常寺鴻臚寺樂部十一月鞫黑龍江將軍那奇泰私易奏摺事那奇泰等黜貶有差九年六月授軍機大臣兼鑲黃旗漢軍都統鞫河南嵩縣民王雷傳習邪教事未竣以秦隴搜捕餘匪命攝陝甘總督辦理善後事七月硃諭那彥成曰汝誠國家柱石之臣有爲有守惟有稍恃己之聰明不求人之謀議夫一己才力有限仕途邱壑難窮務資兼聽並觀之益莫存五日京兆之見八月奏南鄭縣鄉勇鄭忠祥等舉發趙恆裕張希賢潛結謀逆立擒之與其黨皆伏誅又奏籌遣南山游民均得旨嘉獎十一月調補兩廣總督十年十一月劾前巡撫百齡苛虐營私諸事鞫實免百齡

官十二月鄂羅斯國船求通市監督延豐率允入奏那彥成以越界貿易恐商夷因緣爲奸亟請止之諭曰此事與朕意相符所見甚是先是粵東土匪洋盜勾結日熾盜首李崇玉黃正嵩依朱瀆橫行海澨那彥成初至緝獲甚衆嗣以官兵不得力遂行間諜招撫降正嵩計擒崇玉檻送京師先後招降五千餘人悉賞銀幣率先降者予千總外委銜巡撫孫玉庭以濫賞劾之降藍翎侍衛充伊犁領隊大臣始崇玉正嵩歸命那彥成誘以四品服及守備劄事覺謫戍伊犁十二年正月授三等侍衛爲伊犁領隊大臣三月授喀喇沙爾辦事大臣五月調西甯辦事大臣時野番侵掠內地戕害兵丁故有是命八月偕將軍興奎總督長齡攻克沙卜浪番境悉平十月條上善後五事允行其四十三年三月擢江南副河道總督是秋河水溢九月輒工合龍下部議敘十二月以荷花塘復蟄降二等侍衛復爲喀喇沙爾辦事大臣十四年二月調葉爾羌辦事大臣授頭等侍衛爲喀什噶爾參贊大臣十二月以二品頂帶兼兵部侍郎補授陝甘總督十五年六月疏言前奏准六月陛見今甘肅被旱撫綏事重不敢拘泥遽行交代又請緩徵撥帑賑貧並疏陳施賑積弊硃批汝實不愧廣庭相國之孫又諭那彥成計及查勘撫綏事要

不拘泥前准陛見諭旨能知事體輕重其稱向來辦賑積弊所言俱切中竅要是月廣東洋盜肅清上念其任兩廣總督時巨盜李崇玉究由伊緝獲賞頭品頂帶八月奏吉蘭泰鹽筴請許新商得兼坐運兩商有所陳奏悉由山西鹽政以聞又議西安標綠營弁兵改隸撫提兩標別設總兵專司訓練兼轄附近營汛裁兵四十名十六年五月請禁交代倉糧折色之弊以重積儲均如所請行七月入覲賞戴花翎十七年正月請改西安道仍爲滿漢兼用缺十二月請定護送喇嘛改由外省逐程接護免派京員以節糜費皆得旨允行十八年九月河南天理會教匪李文成等謀逆陷滑縣犯直隸山東邊境命邢彥成爲欽差大臣加都統銜帥師討之賊屯滑城及桃源集道口十月邢彥成由衛輝進軍分擊新鎮丁欒集連破之道口賊出掠中市所邢彥成斷其歸路檄提督楊遇春等迎擊大破之賊造橋將渡河而西官軍截殺千餘橋毀不得遁賊蜂屯拒敵我軍痛剿飛越溝濠破道口殲賊萬焚其巢出難民八九千上深嘉之頒賜珍物獎勵下部議敘尋破桃源賊追道口餘賊抵滑城城中賊出應敗回城圍之桃源賊來援盡殲之堵滑城門十一月留固集八里營等屯賊紛至遣將弁分禦絕其外援時李文成潛遁輝縣

屯司寨那彥成遣副都統德英阿總兵楊芳率勁旅攻克之文成自焚死賊黨殲
戮無遺上嘉之優賚有差滑賊出斫營擊卻之擒賊首黃興罕尋於南門掘地道
密置地雷那彥成親督兵勇進攻地雷發城裂拔之殲賊一萬七千餘焚死七千
餘擒二千餘出難民二萬餘捷奏入諭曰此次掃除恶逆迅奏成功朕與天下臣
民同深慶幸那彥成統領師干不辭勞瘁允宜沛恩懋獎著加太子少保銜賞三
等于爵換戴雙眼花翎紫禁城騎馬並賞御用荷包一箇升伊子容照爲乾清門
二等待衛又賞黃面黑狐皮馬褂四喜玉扳指吉祥白玉牌鑲寶石帶扣黃辮大
小荷包翼日以渠魁牛亮臣徐安幘王道澁檻送入京復搜逸賊悉誅之釋脅從
愚民籌議善後請將滑縣知縣改繁缺道口鎮增置縣丞把總各一員大名鎮添
設官兵地遭蹂躪者復其賦卹賞死事官兵旌表義烈禁鋪戶私造刀槍清查販
產散鄉勇收器械官兵分別凱旋留駐悉從之是冬授直隸總督十九年正月巡
歷開州條陳善後五事是月抵京復命諭曰那彥成克副委任深堪嘉獎著在阿
桂墓賜祭一壇用示朕眷舊酬庸至意二月以保貪劣知縣孟圯瞻補滑縣革職
留任五月請撥宣化天津等鎮兵一千移置大名增置千把總外委九月請許因

荒賤售地以原直贖十二月請移東鹿縣縣丞分防小章莊大名縣衛河縣丞移駐龍王廟元城縣主簿移駐小灘鎮長垣縣管河縣丞移駐大黃集並從之二十年二月以緝逆犯祝見等久不獲革花翎鑄三級七月駕幸木蘭秋獮以蹕路橋梁大雨衝塌後繕完甚速復花翎十月以廢員王奎聚等混請捐復先令繳庫跡近專擅鑄四級十二月以灤州石佛口王姓世習白蓮教惑衆謀逆那彥成全獲誅之上以其辦理認真宥積次吏議賜御書福字暨上方珍饌畀那彥成母子度歲二十一年正月捐穀三千石倡勸興復義倉儲穀十萬六千石有奇二月以緝獲逆犯劉玉滌免鑄級三次時以新建運糧剝船二千五百籌議章程十條下戶工兩部倉場侍郎議行其九閏六月以前在陝甘與藩司陳祈商那賑銀津貼腳價等費並誣奏捐廉事褫職下獄論死尋以繳完賠銀改成伊犁留家終養九月丁母憂上念其滑縣剿賊功免發遣令閉門思過二十三年二月授翰林院侍講四月轉侍讀二十四年正月擢侍講學士充日講起居注官二月升詹事府詹事充會試副考官五月遷倉場侍郎二十五年七月以漕政著效賞戴單眼花翎九月擢理藩院尙書十月調吏部尙書兼鑲黃旗蒙古都統十二月賜紫禁城騎馬

道光元年三月兼理樂部五月兼翰林院掌院學士七月調刑部尙書管宗人府銀庫兼閱兵大臣調正藍旗滿洲都統九月充順天鄉試副考官十一月劾司員舒通阿等執法營私不稍徇隱下部議敘二年正月請定竊賊情急圖脫誤傷事主者量減爲極邊煙瘴充軍二月請定毆死期功尊長夾籤聲明與否總以有心無心爲斷皆如其請著爲令四月授內大臣五月議陵寢風水重地青椿外盜斫官樹罪名請以官山界址爲限明定科條六月議西山煤窯鍋火章程四事皆得旨允行是月以陝西渭南縣民柳金璧犯死賂免命邢彥成攝巡撫鞠得之誅貶有差十月復任陝甘總督時青海河北番賊犯窩卜圖卡擊走之因請移兵駐守議防卡條款清釐河南番族立什總百總百戶千戶領其衆初察漢諾們罕一旗移居河北煽野番句漢奸作賊邢彥成絕其糧窮蹙投誠諭曰該督不勞兵力不延歲月辦理認真可嘉之至十一月邢彥成六十生辰御書亮勳集帖扁額福壽字各一賜之賜如意朝珠蟒袍文綺陳設是月請改西甯丹噶爾主簿爲繁缺皋蘭河橋主簿爲簡缺下部議行十二月奏漢奸盤踞務盡根株並籌巡防會哨山內保甲諸事上是其議旋請改定沿邊營制增省將弁兵丁又言番族萬八千盡

回巢請酌移河南四旗蒙古皆允之三年三月以青海蒙古皆已復業下部議敘尋請定商民與蒙古市易章程並封閉邊外金廠四月請於循化廳增置主簿一員貴德廳增置照磨一員裁按察司照磨河橋主簿各一員改平羅縣石嘴主簿爲簡缺十月請增置青海正副盟長等官設巡防蒙古官兵皆得旨允行四年劾兵部題補武職違例舞弊命大學士托津等按之尋以兵部疏漏那彥成指參亦有誤各下部議處五年正月京察諭曰陝甘總督那彥成辦理西甯番案甚屬得宜著交部議敘六月請於邊要地撥添弁兵增設塘汛九月奏設甘肅各屬義倉皆如其請十月復調直隸總督是年江南運河阻滯南糧改行海運十一月疏陳海運漕糧剝運事宜下部議行六年二月請裁天津水軍以其兵移置大名鎮又奏清查旗地全竣酌議善後十二事五月以直隸竊匪日多請嚴竊盜治罪之例皆如所請行八月以海運速戡措理妥善下部議敘會逆回張格爾入卡犯喀什噶爾諸城檄東三省官兵剿之那彥成以過境兵丁口糧按例日給銀五分不足飲食請加五分又藥鉛火繩由京運解供應既難且恐雨濕請以甘肅籌備者充用並籌議兵行支應又以新疆遺犯積久人多夷民雜處易生事端請量地改遣

十月奏各屬徵收租銀勸懲勤怠並議追虧五條又請駐防滿洲挑補綠營兵丁允之七年二月請順天府四路廳裁減捕盜弁兵添設捕役以收實效四月請減豁內務府月檔租銀六月酌擬賊匪拒傷未持官票之捕役及捕役擅傷罪人加減治罪專條悉從之七月以直隸挂名吏役過多包差滋擾苦累閭閻裁汰二萬三千餘人酌應留名數冊報嚴明奏入得旨所辦認真甚屬可嘉著通諭直省照那彥成所奏章程辦理十一月回疆四城克復命以欽差大臣馳往籌辦善後事宜未幾張格爾就擒仍命往治其事十二月疏陳回疆積弊略言回人素恭順此次張逆煽惑各城響應半由平日撫馭失宜參贊大臣等三年換班其才具有爲者三年中辦理未必遽善次者祇存五日京兆之見不肖認真下此竟視爲利藪搜括甚工且各長其疆無維制考覈之分不相顧忌應請分隸考覈俾有所糾察至各官原設養廉不敷辦公懇稍議增並准各大臣一律攜眷俾得久於其事專心辦公上是其言如所請行八年正月京察諭曰直隸總督那彥成盡心職守操兵緝盜等事不遺餘力著交部議敘回疆之初平也揚威將軍長齡議暫添防兵八千那彥成至議減一千五百並議三年後酌減二千五年後再減二千以節糜

費請移甘肅涼州鎮總兵涼州中營游擊移駐莊浪三月請分葉爾羌添兵一千移置烏什四月請以柯爾坪添兵五百及拜城一營歸併阿克蘇又奏普爾錢以一當五今阿克蘇銅未豐旺請改鑄當十錢相間通行皆從之先是長齡等奏請斷絕各外人貿易並請禁大黃茶葉出卡命那彥成實力稽查那彥成疏言嚴禁於卡倫不過絕其流查察於各城方能清其源請於阿克蘇專員查覈至是又言安集延進販內地大黃茶葉硝磺接濟外人私於卡內置產安家竟敢相率助逆今查十年以內寄居與見販違禁物者逐出其餘暫准居住得旨允行又奏各城相沿陋規貪贖求取苦累回民今悉行裁革勒石永禁諭曰所奏甚是又硃諭行同鑿贛殊出情理之外非公忠體國之大臣孰肯和盤托出可嘉之至五月請移建葉爾羌於罕那里克六月請於喀什噶爾增置游擊一員都司三員守備六員千總十一員外委二十六員英吉沙爾葉爾羌和闐阿克蘇烏什亦各改置增省有差又請於喀喇喇哈依外之七里河築堡設兵六百防守並另建英吉沙爾城又疏言曩者伯克缺每以賄得補而大小伯克遂誅求小回子以取償嗣後請由本城大臣先儘有功及家口被害之人次死事人子孫次出力世家視其人才保

送參贊大臣驗看奏補又酌定回人難廢章程皆如所請行張格爾既誅其妻孥潛匿浩罕長齡傳檄索之浩罕使人詐投賀書同隙那彥成陳兵衛其出入不使與卡內安集延交接亦不犒賚使諭以逆屬在外無足重輕破其居奇之計並絕其貿易使不能藉天朝聳動外人諭曰所辦甚得大體與朕意相同可喜之至賜御筆畫扇一柄扇套香囊各一七月請於新建各城頒賜嘉名允之八月請將伊犁通烏什之徑酌議封禁又稽察私墾地畝徵糧以供換防官兵祿糈請於明約洛建貿易亭以便布噶爾巴達克山等通市皆從之是月繪像紫光閣御製贊曰剿辦滑城曾著勳績功成定後用長是擇嘉汝忠直殫心籌畫剿之撫之同一敷歷九月請酌撤換防滿洲兵歸伍籌議操兵章程又請回疆遣囚改役章京署駐防官盡許攜眷十月奏酌議茶課章程請設喀什噶爾等三城銀庫又請移改軍臺道路增給換防滿洲兵馬餉芻添設綠營差馬從之諭曰那彥成辦理善後事宜籌畫妥洽勞績卓著著賞加太子太保銜賞雙眼花翎紫韁元狐馬褂鼻煙壺荷包十二月奏招致附浩罕之額提格訥布魯特部落安置特依劣克達坂地上嘉之九年正月以那彥成使人出卡搜求逆屬有意召還京二月以妄給收撫之

布魯特翎頂歲俸嚴飭之六月入覲回直隸總督任十年五月省南地震分別卹賞請復磁州諸邑賦從之是冬西陲復不靖十一年二月欽差大臣長齡奏由驅安集延籍其家禁茶葉所致命禡那彥成職八月授盛京禮部侍郎會長齡等復奏浩罕申訴以前此籍沒安集延禁絕市易爲言諭曰前因那彥成辦理善後不能妥善未及二年又有逆回滋擾事將那彥成革職昨因那彥成於嘉慶年間曾在軍營出力道光年間兩任總督辦公無誤且念伊祖阿桂功仍授盛京侍郎本日據長齡等奏浩罕申訴五年以來斷絕貿易之苦累總以抄沒驅逐爲詞是逆回滋擾實由那彥成禁貿易逐安集延所致那彥成誤國肇釁著卽革職十三年卒諭曰那彥成服官中外宣力有年剿辦滑縣教匪尤爲出力直隸總督任內亦屬認真前因回疆辦理失宜將伊革職茲聞溘逝不忍忘其勞績著賞尙書銜照尙書例賜卹尋賜祭葬予諡文毅子容安原任正藍旗滿洲副都統伊犁參贊大臣自有傳容照馬蘭鎮總兵官緣事革職恩賞頭等侍衛容恩兵部員外郎緣事革職曾孫鄂素襲三等子爵

溫承惠

溫承惠山西太谷人乾隆四十二年拔貢朝考一等以六部七品小京官用籤分吏部拔貢用京官自是始四十五年以失察書吏舞弊部議降調捐復留部五十二年正月補主事九月遷員外郎五十四年四月遷郎中十一月授陝西督糧道五十五年丁母憂五十八年服闋補陝西延榆綏道嘉慶二年二月川陝楚三省軍興巡撫秦承恩奏派承惠於興漢一路團練防堵三月丁父憂奏留軍營九月加按察使銜賞戴花翎十月仍攝延榆綏道事會川楚竄匪犯平利安康承惠多方遏截屢有斬獲得旨嘉獎下部優敘方賊之擾平利城東也承惠恐其北竄馳往布置適山水暴漲承惠墜水遇救得免仍馳赴險隘扼之賊不能北遂獲捷奏入上特廬念降旨垂詢焉四年服闋諭曰溫承惠堵禦奮勉可嘉著以按察使銜補授延榆綏道五年正月擢按察使承惠奏言賊擾陝境已歷數年各路軍營兵數覈之原額不及十分之五賊東西奔竄牽綴官兵官運糧餉往往不及領兵大員不得不駐兵待餉賊得乘間遠逸請益兵以資剿捕至川楚陝三省邊境綿長派兵分守各卡斷無如許兵力莫如聚歸一處扼適中之地探賊所至卽取道邀擊如此以逸待勞聲勢連絡賊既不能深入自可痛加剿除其領兵大臣請飭各

分省帶兵以專責成至索倫吉林兵最爲得力數年來進山馬力多疲請飭鄰省協撥健馬豫備更替乘騎疏入命經略大臣額勒登保等籌酌具奏二月有川匪竄入安康承惠馳往迎擊擒賊數百殲賊首王金柱巡撫台布上其功上深嘉之賊逼洵陽承惠由漢江東下聞安康亦有賊擾卽馳往南北岸分布迎截復擊其半渡賊奔潰乃夜赴洵陽先後殲擒數百救出難民撥倉糧散給民心大定得旨褒獎下部優敘四月楚匪竄近平利承惠於黃花河等處擊斃數百人生擒數十人六月升布政使時川匪屢入陝窺楚承惠禦止數有斬獲六年六月敘修築堡寨暨捐購兵勇衣履功承惠與焉十一月諭額勒登保曰賊匪思趨楚境看來溫承惠在陝祇能防堵究不能跟蹤追擊又諭總督長麟曰溫承惠雖在平利安康駐紮賊至則帶兵堵禦賊去則安坐且文員亦未必能臨陣殺賊著酌量是否必需伊駐守若無須該員卽令其回省辦事七年正月長麟覆奏承惠在安康平利一帶防堵爲時最久頗爲熟悉請仍留協剿二月偕總兵喜明敗賊於平利八月隨巡撫陸有仁籌運糧餉捐廉置官兵衣履上嘉之十二月大功底定下部優敘八年調河南布政使九年衡工大壩合龍下部議敘十年擢江西巡撫以先年倡

修伊洛舊渠廣漑田畝並捐買渠田下部議敘十一年二月調福建巡撫會臺灣軍興三月承惠抵五虎門臺灣賊已退先是承惠奏請撥江西米石以備軍糈至是遂請停撥四月抵廈門將前所檄調軍裝糧餉悉行文停止上違之五月兼署閩浙總督請添設大同安梭船六十隻以資緝捕奉旨俞允時各海口水米禁嚴賊復竄入鹿耳門承惠飛移提督李長庚會剿調各將弁分帶兵船檄總兵許松年統率至海壇竿塘一帶扼要截剿具疏以聞諭曰與朕旨若合符節所見可嘉六月奏言濱海姦民通盜接濟於泉州興化漳州福州福甯各屬口岸分派員弁巡查三沙爲盜首蔡牽生長之區舊派兵三百名防守尙形單弱另委大員添兵駐劄防範以專責成上深然之十一月命以兵部侍郎銜調署直隸總督十二年五月以陵寢禁地紅椿界內盜砍樹株承惠未請處分命傳旨申飭下部議處尋議降調上改爲降二級留任福建巡撫張師誠奏前任未結詞訟有二千九百七十餘案上命將承惠等在任年月未結案若干起分晰開單具奏諭曰溫承惠到直隸省後查明積案甚多將藩臬兩司奏參而其前在福建卽多未結之案所謂責人則嚴自待則寬將來亦應懲處七月請濬豐潤玉田二縣黑龍河從之是月

因密雲縣虧短駐防兵米請通融支放上以承惠不早奏明屆支放之期始行籌及辦理草率下部議處九月以古北口應放兵米逾限缺欠承惠不先時運籌飭之上閱古北口官兵行陣整齊技藝嫻熟以承惠訓練有方實授直隸總督加兵部尙書銜承惠旋請開溫榆河上游濬運河故道以復漕船抵壩舊規從之十一月奏永定河埽數增加料物不敷購辦請酌添銀兩上以尋常工段動議加增易滋冒濫之弊飭之十二月以前任河南藩司時於例應迴避之員未經聲明部議降調上加恩改爲降二級留任十三年三月上幸天津閱視河堤以承惠經理妥協賞穿黃馬褂開復降留處分閱天津官兵行陣整齊賞賚有差時滏陽河運鹽道淤塞承惠請濬耿家莊等處從之四月千里長隄各工竣命戶部尙書德瑛兵部尙書劉權之勘驗如式上甚嘉之七月上巡幸木蘭蹕路先爲雨所壞承惠亟修治整齊下部議敘順天府尹鄒炳泰劾承惠於會商試署知縣彭元英實授不俟咨覆遽行具題上以其專擅下部嚴議降三級調用上改爲降四級留任上以永定河發源於晉省渾源州遇汛期加長應速行知下游豫爲防範是否可仿用皮混沌山水程馳報抑由驛馳報命與山西巡撫成齡會商覆奏永定河上

游晉省以大同爲總漚之區直省以懷來爲會歸之所晉省河道寬窄淺深不一且多沙灘亂石不能循軌順溜迨入直境更有崇崖峭壁一綫中流山徑濳洄時伏時見如仿用皮混沌環山觸石勢有難行仍以由驛馳報爲便擬於大同設立誌椿一遇水長卽由驛飛報直隸足敷遞送文報九月御史孔昭虔劾承惠於捐復候選知府張五緯違例奏請揀發諭曰直隸差事殷繁溫承惠前曾奏懇尙爲因公起見張五緯未便卽令補缺著於二三年後如果始終奮勉再行奏補以杜奔競十四年二月上謁裕陵承惠迎扈派藩司方受疇隨營上以保定無大員駐紮承惠又未豫行奏明下部察議五月肥鄉縣知縣萬永福呈遞封章言上年巡幸天津沿途設戲臺點綴肥鄉一縣派費三千兩命拔去花翎褫黃馬褂六月以密雲縣支放四月兵米六月中旬尙未放竣倉中並無存米命傳旨申飭七月以失察寶坻知縣單福昌東路同知歸恩署定興知縣顧准侵賑下部嚴議革職加恩降爲二品頂戴十月恭遇上五旬萬壽慶典開復降二級賞頭品頂帶十五年三月奏明年巡幸五臺蹕路向無行宮之處請添蓋板屋上命軍機大臣傳旨詢問承惠自認愚昧並請遵旨將向來一切點綴概行停撤得旨朕何難據奏將溫

承惠議處沽美名而邀衆譽朕不肯爲此後再如此嘗試亦祇得議處矣尋以固安民婦李張氏謀毒親姑承惠因公出率交清河道覆訊下部察議五月吳橋縣民蘇立全獄上諭曰蘇立全祇係懷疑誤控而黃錫五之死實因輾轉誣扳乃溫承惠於此案並未訊出別情輒照部駁兩次改擬覈其前後所敘案情並無殊致而於罪名生死出入忽輕忽重豈慎重刑名虛衷覈擬之道著交部議處部議革職特旨予革留七月以永定河漫溢四處下部議處知州麟昌推升泰陵禮部員外郎承惠奏該員熟悉口外情形請留原任遇地方同知直隸州知州缺出奏補諭曰不過以麟昌現補陵缺託詞規避殊屬取巧下部議處九月永定河漫口合龍仍賞戴花翎十一月古北口支放兵米遲誤諭曰溫承惠於現需兵米未能上緊籌辦豈竟令官兵枵腹從事乎著傳旨申飭是月又諭曰向來遣阿哥恭祭陵寢從未有遮道乞賑之事昨二阿哥三阿哥恭祭西陵回京據奏經房山縣境有民婦數百遮道乞賑隨至宮門同聲呼籲該縣於上月初九日已領賑銀半月有餘尙未給發玩視民瘼實出情理之外該督接據稟報僅以派員覈查有無遺漏具奏塞責竟將該縣疎玩視爲無關緊要又並未自請議處著傳旨嚴行申飭若

欽差到時有逃逸遲延情事定將該督一併治罪不貸尋降二品頂帶拔去花翎革職留任八年無過方准開復十二月奏查明初二兩次清查積欠上以其督催不力又不自請處分飭之又諭曰本年封印在邇溫承惠自必前來叩賀元旦伊近日辦事多不認真於地方未能整飭何顏對朕著不准來京仍不准妄行瀆請十六年正月奏籌每歲阿哥恭代祭陵並舉行秋獮前赴熱河沿途照料章程其東北路暨西路係馬蘭泰甯二鎮專管請令二鎮總兵接奉行知卽迎赴前途總查經理諭曰阿哥出京既有道將隨赴沿途照料若必二鎮親來則遇鑾輅經臨又何以加乎所議太過不知大體傳旨申飭二月奏永定河南北兩岸自上年異漲急需疏培另請於歲修項下添銀八千兩購料存工修防將來不得援以爲例從之閏三月上西巡五臺賞還花翎黃馬褂上駐蹕正定以沿途民婦歡迎淳穆可嘉承惠撫綏有素約束得宜賞還頭品頂帶從前八年方准開復之處改爲四年無過照例開復六月以漕運官撥船有名無實請添造一千隻嚴立章程以專責守戶部議駁停止承惠復請得旨允行尋以動撥款項聲敍含混飭之會杭嚴湖北等軍船於靜海遭風磕損承惠檄藩司方受疇督令修理請將升任道員沈

長春暫留幫辦諭曰沈長春業經擢授湖南臬司卽非溫承惠屬豈可任意派委差使直隸官員何至少沈長春一人傳旨申飭七月奏玉田雙城河淤塞請借帑興修從之尋請詣中關接駕上不許諭承惠以勞心爲本勞力爲末八月奏留丁憂知縣王德棻在工效力上以其違例下部議處十七年正月上以歲除得雪普錫春祺加太子少保銜尋奏永定河下口近多險工請加培隄岸挑濬引河及接築草土壩等工從之先是鉅鹿縣民孫維儉以倡立大乘教伏誅是年五月復獲散會首劉幘名等諭曰上年溫承惠將爲首之孫維儉問擬絞決從犯發遣九十餘名其餘散會首一千六百餘名存記姓名免究本屬寬縱所謂水懦民玩轉令易於犯法現在劉國名等仍圖興教描摹御寶私雕木戳必須嚴加懲創若再從輕該督不能當此重咎會樂州民董懷信等傳習金丹八卦教事覺獲入教名冊乾隆年間有二千二百餘人嘉慶年間有二千九百餘人承惠言人數衆多擬將董懷信及分管卦宮各要犯按名拏辦其僅止入教之犯請免查拏諭曰自乾隆三十八年至今始破案四十年來一味因循姑息實堪痛恨今董懷信等首犯俱經拏獲務須從嚴懲辦其分管卦宮緊要之人俱當按名查獲重懲不可又存姑

息既登仕版當以國事爲重豈可存婦寺之見吏部議上總督失察處分上以承
惠在任已閱數年惟此案經伊查辦始行破案改降一級留任六月刑部審訊孫
維儉案內有被誣之王肇興控直隸承審官刑逼教供分別定擬上以承惠辦理
此案本失之柔懦復被屬員朦蔽致案情屈抑命革太子少保銜拔去花翎褫黃
馬褂部議革職特予革留八年無過方准開復時建昌營添設新營募兵二百名
領餉後散去者八十名以承惠辦理未協虛糜糧餉下部議處七月請將鉅鹿永
清二縣繁簡互易上不許並以未候鄒炳泰等會銜下部議處八月以涿州歷任
虧空久未結案下部議處九月奏籌議建昌新營招募之兵由鄉地保舉令地方
官查覈擇其居住年久及其眷屬誠實可靠者方准加結移營從之十一月保定
縣販羊回民因踐食麥苗起釁爭鬪拒捕毆官諭曰密邇京畿竟有駭人觀聽之
大案朕實抱愧自督撫至州縣尙有何面目恬不知恥不思速辦不自請罪必待
降旨革職拏問耶尋以不能督率屬員稽查彈壓下部議處十八年六月奏撥天
津鎮左營外委一員暨大沽營裁守備原管兵八十名葛沽營馬兵三名歸新設
大沽營管轄軹河營外委一員暨海口營裁改把總原管兵八十名葛沽營馬兵

二名祁口汛馬兵三名歸新設海口營守備管轄建衙署給關防從之八月因失察大名武清巨盜夥劫下部議處九月河南滑縣天理會教匪滋事直隸長垣縣境毘連蠢動上命承惠爲欽差大臣賞還花翎偕古北口提督馬瑜往剿時東明縣城亦被圍命飛飭護軍統領富蘭帶兵趕赴堵剿承惠因陳直隸各縣守禦暨檄各路防堵諸策奏入報聞又奏籌備兵糈懇借通倉小米五萬石從之尋疏言兵力單薄不敷進剿請少寬時日俾得厚集兵力一舉掃除諭調吉林黑龍江兵各一千赴軍營協剿十月師次滑縣留固村殲擒二百二十餘名西至梁莊惡虎寨新寨三處與馬瑜富蘭分剿斬級百餘賊聚南湖北湖復與馬瑜等合兵並進殲五百餘名餘匪南竄時賊屯滑縣城內及桃源集道口三處道口爲河南糧運大道其西有運河賊設伏河西各村會楊遇春至與承惠合兵擊之賊敗溺死者無算殲賊六七百名生擒七十餘名進至道口賊來拒復敗之賊還走堅守不出上命陝甘總督卞彥成爲欽差大臣總統軍務以承惠爲參贊尋以林清傳教已閱八年之久承惠旣未能先事訪拏復不自請處分祇論門禁不嚴官兵皆應治罪及帶兵赴剿沿途逗遛至十月始抵滑縣接仗二次未獲大勝賊匪仍四出滋

擾而屢次奏報尙以兵力未厚不便進兵爲辭命褫職拔去花翎賞五品職銜責令辦理那彥成一路軍營糧餉十九年正月命以六部員外郎用七月河南睢工堵築大壩命隨刑部侍郎那彥寶赴工效力十一月補刑部員外郎二十年二月大工合龍奏請議敘諭以郎中用三月補郎中七月永定河下口移歸南岸故道命隨禮部尙書戴均元往勘留工次襄理二十一年充戶部寶泉局監督二十三年二月授山東按察使十二月巡撫和舜武奏承惠到任後審結積案五千四百餘起諭曰該省前此盜風甚熾現在匪徒斂戢行旅安然溫承惠辦事認真著有成效著加恩交部議敘二十四年八月巡撫程國仁劾承惠自以曾任督撫大員日益橫恣事多窒礙委令查辦隄工負氣推諉命革職回籍九月山東臬司童槐劾承惠在任冗積案牘濫禁無辜復令罪人充捕役擾民謫戍伊犁會河溢武陟罰措銀數萬助工需二十五年授湖北布政使道光元年二月諭曰溫承惠年力就衰著以六部郎中用九月補戶部郎中因疾乞假回籍十二年卒子啟鵬內閣侍讀學士啟封刑部郎中孫中彥內閣中書

高杞

高杞高佳氏滿洲鑲黃旗人祖高斌官大學士自有傳高杞由監生考取內閣中書乾隆三十七年充軍機章京四十一年改捐通判分發山西五十年以從堂兄伊桑阿巡撫山西迴避調赴陝西五十二年諭曰原任大學士高斌宣力年久伊之子孫皆經獲罪見在並無服官者著將伊孫候補通判高杞調取來京以內務府郎中補用以示朕眷注舊臣之意尋補都虞司郎中調戶部銀庫郎中五十四年授山西道監察御史五十六年命巡視北城五十七年正月京察一等閏四月轉兵科給事中七月命巡視西城八月授湖北襄陽府知府五十九年調武昌府六十年二月湖南苗匪石三保滋事隨總督畢沅赴常德等處辦理糧餉軍火閏二月升荆宜施道嘉慶元年正月湖北教匪聶傑人等滋事隨畢沅馳至枝江等處剿之二月教匪楊起元等陷當陽縣高杞偕原任副將黃瑞帶兵先進與豫省官兵合剿三月墮其東門匪衆由城缺衝出逆僧心愿率賊二百餘撲營高杞督兵以大礮斃之餘匪燔焉賞戴花翎七月擢按察使尋以克復當陽賞瑪尙阿巴圖魯名號並賜玉鞞大小荷包二年升福建布政使命俟軍務完竣再赴新任三年四月白號張漢潮股匪二萬餘竄至襄陽一帶官兵僅二千高杞與總督景安

先據白雲山山梁於左右山溝設伏賊至敗之其別股由山溝抄至復與景安分路迎截轉戰二日殺賊二千餘名上以高杞與景安設法布置能以少擊衆殲賊多名賞給金盒玉鞞大小荷包以示嘉獎尋擢湖北巡撫白雲山剿敗賊匪由武堰鎮東北逃逸高杞復偕景安連敗之於九宮山烏蛇嶺石門老虎溝等處五月賊竄至宜城圍攻縣治高杞等帶兵猝至擊斃多名賊復由新店麗陽一路往攻荆門州高杞遣將倍道赴援解其圍賊匪竄踞當陽之積山寺將奔荆郡圖掠沙市適副都統銜額勒登保荆州將軍興肇帶兵馳至夾擊大敗之又於南漳縣及穀城之章村棚疊次斃賊五千餘生擒九百餘名襄陽下游一帶俱就廓清高杞卽駐劄襄陽諭曰襄陽地方從前招撫投誠之人甚多高杞到襄後自應留心防範毋致復有勾結以期賊黨聞風解散方爲妥善六月奏稱荆州距城十五里之沙市鎮爲川楚水陸通衢賊屢窺伺當飭道府激勸商民於南面水次排列擋木東西北三面築立土堡堡外濬濠足資捍衛此外緊要市鎮亦飭做照辦理報聞八月蒲圻縣洋泉團教匪王添萬等滋事高杞馳往剿之立奪其卡諭曰外省習氣遇有地方搶劫小事往往張大其辭以爲邀功地步及至激成事端則又心存

畏蕙束手無策高杞新任巡撫尤當引以爲戒尋奏報擒斬賊首王添萬餘匪搜捕淨盡上嘉賚之下部優敘是月川省通江竄匪擾陝省將由石泉江岸東奔楚境高杞馳防巴東邊界十月張漢潮股匪經副都統銜明亮興肇等剿敗由川竄至巴東明亮等從開縣抄道追躡高杞與總兵王凱領兵合剿賊大敗仍竄回川境諭以仍當督率鎮將實力防範探蹤截剿四年七月荆門潛江等處被水諭曰川匪距楚尙遠見在荆門等處被有水災是巡撫應辦之事高杞著卽馳往撫卹辦竣後卽回武昌不必又至巴東軍營也九月以前調盛京官兵將次入境赴襄陽辦理軍需嗣與河南巡撫吳熊光會商楚省見無竄匪新調官兵應由南陽改道入陝高杞將豫備軍需各項改交南陽就近支放所調馬匹亦統行解豫諭曰吳熊光高杞能以國事爲重無分畛域不稍拘泥均爲實心任事可嘉五年正月奏賊匪經大兵痛剿到處狂奔復被闖入楚境並據道員伊精阿稟報德楞泰統領大兵已至陝西鎮坪地方自卽來楚會剿軍需甚關緊要藩庫無項可支請敕部撥銀八十萬兩以濟急需諭曰德楞泰經額勒登保奏稱業於正月二十日行抵褒城會剿甘省大股賊匪而高杞於二十一日摺內猶率據道員稟報遽爾入

奏不知楚省督撫所謂確探信息者何事可見伊等全在夢中尙望其能認真辦賊匪耶著卽傳旨申飭至奏請酌撥餉銀一節該督撫等當賊匪未經闖入境內之時於防堵漫不經心及一聞賊匪竄入邊界之信並不思如何剿辦輒以撥發餉銀奏請豈餉銀一撥賊匪卽可辦畢耶但伊等旣稱存項無多朕若不酌加撥給伊等轉以軍需不能充裕藉口難辦著卽於部庫內撥銀四十萬兩解往楚省備用又奏稱本省交辦控案現在趕緊催提審辦得旨聞汝頗有紈袴習氣若果如此是孤負國恩朕不能容汝敗壞封疆應深自刻責效法書麟之行爲時時加勉從儉去奢爲要二月授刑部右侍郎五月兼鑲紅旗漢軍副都統八月調戶部左侍郎十一月調鑲白旗滿洲副都統六年三月充會試知貢舉六月永定河水漫溢命督辦盧溝橋西岸決口工程並偕兵部右侍郎那彥寶等經理賑濟七月召回京偕工部右侍郎莫瞻菴查勘護城河及旱河等處工程奏請於戶工二局豫領制錢二萬串趕緊挑濬諭曰局錢經費有常一切工程豈能概行取給莫瞻菴係工部右侍郎錢局是其專管高杞雖未管錢局但見任戶部左侍郎於本局錢多寡亦應知悉乃率爲此請殊屬不曉事體命於內務府廣儲司撥銀一萬

兩交高杞等趕緊興工嗣因戶部奏稱七月搭放兵餉錢文六成見在局中存錢較少請於八月搭放三成九月以後搭放一成上以高杞亦復列銜具奏命軍機大臣詢問既知局錢不敷何以前奏請發錢文二萬串之多高杞尋偕莫瞻棻自請交部嚴議論曰伊二人於本管部務漫不經心其所請多發錢文不過自圖省便之計若人人自圖省便則那彥寶見辦河工請銀一百萬兩亦當奏請俱發錢文有是理耶似此再添數百卯仍屬不敷支給而添卯一事詢之戶部堂官僉以爲難行昨大學士等議覆御史汪鏞條奏請添卯鑄錢一摺亦均議駁高杞莫瞻棻均係與議之人是竟如御史游光繹所奏挨次畫題又安用此堂官爲乎戶工二部職任較繁高杞莫瞻棻憤憤乃爾豈能勝任高杞著調兵部左侍郎莫瞻棻調補禮部左侍郎所請嚴議之處著加恩改爲交部議處尋議罰俸一年九月署工部左侍郎十一月命偕莫瞻棻疏濬通惠河下游及大通橋至通州一帶運道七年授湖南巡撫八年四月偕總督吳熊光會題請以臨湘縣知縣周凝遠調補湘潭縣知縣經部以歷俸未滿駁之高杞與熊光均議罰俸八月高杞奏前請將臨湘縣知縣周凝遠調補湘潭見經部駁議以罰俸此案吳熊光並未畫稿不敢

不據實陳明上責其專擅錯誤寬熊光處分十月復請以周凝遠調補湘潭縣知縣十一月以耒陽縣知縣熊維培驗訊命案不實奏請革職諭曰昨已據吳熊光奏到高杞此奏遲矣高杞於此案本無欲行參辦之意及聞知吳熊光已另案將該員奏參始將此案參出因而不與會銜亦未可知看來該督撫於辦理地方公事竟未免心存蒂芥十二月吳熊光奏參高杞於湖南州縣紛紛調署卽如湘潭一缺豈通省無一合例之員乃以不合例之周凝遠調補並不商酌卽列銜具題迨吏部議駁又壓至十月俟周凝遠俸滿仍請將該員調補保無有任用私人藉爲擇缺情弊又採買倉穀旣經署藩司韓封稟稱綏靖兵米早經各州縣批解而該鎮魁保於八月下旬尙稱五月以來顆粒未曾解到見今該省控告短價淨買之案旣多而兵米仍復欠缺亦恐有那移虧空借採買以爲彌補之弊至已革耒陽令熊維培於濫禁監生胡世凝一案高杞旣已明知不加參究轉將調繁而於該革令承審徐顯森命案任意出入如果五月稟請覆審何以遲至十一月始行詳參顯係爲之開脫上命高杞來京候旨適欽差刑部侍郎賡音光祿寺卿邵自昌至湖南鞠案命將各情節詳悉確查秉公覆奏九年正月賡音等奏詳查三事

均無舞弊營私之處止於辦理遲延請將高杞等交部察議諭曰各省督撫於地方事件自應和衷妥辦上緊清釐似此因循廢弛吏治何由整飭賡音等僅請將高杞等交部察議未免過輕著交部議處尋議高杞降一級調用上加恩賞給副都統銜爲喀什噶爾幫辦大臣二月調烏魯木齊領隊大臣五月湖南巡撫阿林保奏稱湖南清查案內應追虧缺變賠倉穀五十萬九千六十餘石已買補穀三萬一千九百七十餘石未買穀四十七萬七千餘石經督臣吳熊光奏明各按時價追銀自行買補嗣經前撫臣高杞以時價長落靡常照六錢五分例價追銀仍於有穀之家按糧均買查州縣私虧倉穀非因公動用可比自應按照市價著追令該州縣自行買補若祇照例價追交復照例價派買在民間約計賠銀不下二十萬兩民力實有不支應請照督臣原奏辦理並酌定價每石追銀一兩交見任官買補還倉毋許派累百姓上命軍機大臣會同祖之望議奏如所請行諭曰此項虧缺變賠倉穀前經吳熊光具奏時特降諭旨准行不許顆粒派及百姓乃高杞輒議更張旣以例價追銀仍於有穀之家按糧均買按市價覈計民間應賠銀二十萬兩是以官之虧缺令百姓代爲賠補而原虧各員轉得以半價完款朘削

民膏莫此爲甚高杞辦理實屬錯謬交部嚴加議處卽著回京聽候部議尋議革職先是戶部右侍郎初彭齡奏參吳熊光得受沔陽州知州秦泰銀一萬兩及每年收受匣費銀六萬兩又將貨物密送回家交伊親家李世望營運三款高杞有應行質審之處命陝甘陝西山西各督撫查明高杞不拘行至何處卽派委道府大員解交軍機大臣會同刑部審訊七月由陝西遞至京師先是高杞由湖南巡撫來京上詢以吳熊光操守何如高杞奏稱熊光實屬廉潔願以身家相保旋經初彭齡奏參上究問彭齡此語得之何人以高杞對復召見高杞詰詢奏稱收受秦泰銀兩係湖北通判魏耀所言命湖北巡撫全保查奏尋以吳熊光實無貪鄙情事而魏耀向高杞所言亦堅不承認其匣費一項久經裁革吳熊光概無劣蹟覆奏並將魏耀解京與高杞對質耀以秦泰餽送一節係高杞先問隨口迎合實無影響所有匣費及李世望營運二款訊未得實高杞旋供稱彭齡將密奏事及面奉諭旨向其一一傳述上褫彭齡頂帶與高杞下軍機大臣滿漢尙書定擬尋擬高杞發往新疆效力贖罪初彭齡請旨定奪諭曰初彭齡本應革職發往新疆姑念其見有老親著革職加恩令其在家養親閉門思過高杞以二品大員本有

言事之責經朕再三詢問吳熊光操守既力保其廉潔而於魏耀傳說餽送之語當時不行陳奏轉向初彭齡傳述實屬巧詐著照議發遣伊犁交與將軍松筠派委苦差效力贖罪十二年賞三等侍衛爲葉爾羌辦事大臣十四年因病解任十五年三月病痊命以員外郎用七月補景陵禮部員外郎十一月授熱河道十六年擢浙江巡撫十七年給事中陸言疏稱浙江温台處三府麥豆收成無望糧價日增民食拮据上命高杞迅速查辦適高杞奏報全省二麥漸次結實雜蔬茂盛民情歡悅糧價尙非昂貴諭曰該撫於奏報糧價情形將温台處荒歉地方與各府一律籠統入奏詞意掩飾豈非有心諱匿若竟不知無能已極著傳旨嚴行申飭卽遵照前旨嚴飭温台處地方官將荒歉情形迅速查明實力籌辦如仍前玩泄必從重治罪不貸十八年三月授刑部左侍郎六月兼總管內務府大臣七月命署河南巡撫八月授熱河都統九月河南滑縣教匪滋事城陷直隸長垣山東曹縣均有教匪竄擾高杞行抵直隸臨洺關聞信卽馳赴大名一帶札調正定弁兵督率搜捕上是之並諭已派温承惠同提督馬瑜前往長垣一帶堵剿直隸地方無須高杞在彼督辦速行赴豫仍接署河南巡撫印務所有豫省查拏防堵俱

責成高杞悉心經理尋奏賊匪攻圍涪縣前經官兵殲斃數千名餘皆竄向李家道口滑縣等處連日仍來窺伺督同總兵色克通阿等殲斃三百餘名生擒著名賊目蔡成功徐夢林及餘匪五十餘名奪獲贏馬器械甚夥並搜出冊檔四本得旨嘉獎下部議敘又奏賊匪約二萬餘人附近村莊尙多潛匿豫省兵力單弱不敷剿辦上命陝甘總督那彥成爲欽差大臣率西安官兵赴滑涪一帶相機進剿十月高杞奏言賊匪旣退之後復聚集八千餘人潛分三股蜂擁撲營督同參將張拱辰首先迎敵斃賊六七百人其攻劫糧臺之賊亦經糧員帶領兵役奮勇擊退上嘉之十一月大兵攻克李家道口賊巢上以高杞等督率調度俱屬奮勉先行下部議敘賜高杞四喜扳指鼻煙壺大小荷包十二月克復滑城事平賞頭等輕車都尉世職紫禁城騎馬並賞給烏雲豹馬褂玉鞞鑲寶石帶扣大小荷包先是關中歉收南山木廂匪徒滋事諭令高杞一俟滑城攻克卽帶領西安滿兵並酌帶陝甘兵一二千名迅速前往交與長齡剿辦是月高杞馳抵陝省奏懇留陝幫同長齡剿辦諭曰陝西帶兵大員見有長齡楊遇春朱勳足資經理高杞此時毋庸前往惟甘肅地方緊要省城不可無大員彈壓著卽馳赴蘭州署陝甘總督

印務辦理地方事宜十九年正月調烏魯木齊都統仍署陝甘總督十月奏稱甘省嘉慶二十年應支兵米估撥不敷請撥銀五十五萬七千餘兩照數採買下部覈議經戶部查明甘省倉貯數目足敷支放得旨舍見存之糧不用轉請動項採買竟似從前按例冒賑甚屬可惡下部議罰俸一年十一月赴都統任二十年奏稱廢員奇玖管理鐵廠出力請援例酌減三年上以高杞摺內未將廢員在戍若干年方准奏請之例先行敘明朦混具奏殊屬取巧邀譽下部議降二級調用上加恩改爲降三級留任二十二年三月因甘肅已革知州沈仁澍盜賣倉穀侵蝕運腳經欽差工部尙書英和刑部侍郎帥承瀛查訊係高杞任內批准之事諭曰高杞爲人聲名平常再逐細查訪如有貪婪確據卽據實奏參四月英和等覆奏高杞無貪婪實跡惟於沈仁澍領運倉糧率行批准且以運腳銀數萬兩由藩司先行私發該督並未查究又於不應承運倉糧之知府黃方准令輓運以致該革員等私侵盜賣倉庫兩虧亦有應得之咎請交部議處尋議革職從之二十四年恭值六旬萬壽加恩以六部員外郎用二十五年二月補兵部員外郎十一月以前署工部侍郎派員承修奉先殿供奉孝淑睿皇后神龕甫屆二十年卽有軼朽

之處下部議處尋議降三級調用上加恩改爲降五級留任道光二年以年老休致六年卒

劉清

劉清貴州廣順人由拔貢生充四庫館謄錄乾隆四十九年議敘縣丞分發四川五十四年補冕甯縣縣丞五十七年升南充縣知縣嘉慶元年九月達州教匪徐添德等不靖清率鄉勇隨署總督英善赴剿十月攻克麻柳場賊寨餘匪竄袁家石壩尋來撲東山廟營卡遊擊尙維岳戰歿清急馳往援賊潰事聞命以應升之缺升用官兵旋克袁家石壩又敗賊於柏楊場賊欲由大東林水口偷渡清隔河拒之斃賊匪多名賊折竄茅坪張家觀等處十二月徐逆與東鄉教匪王三槐冷天祿等股合陷東鄉分屯曾家山張家觀及金峩寺清溪場等處二年二月官兵攻克張家觀曾家山復東鄉總督宜縣委清署縣事三月官兵分五路攻金峨寺清溪場清偕副將玉柱抵楊柳坪冷天祿糾黨來犯大營清等擊卻之四月攻克清溪場擒僞軍師王學禮訊之王三槐徐添德等均有投順意清親至賊營賊跪謁清知賊蹤詭秘諭以大義陽爲招撫令於十八日納降而仍設備以待屆期王

三槐於雙廟地方詭稱投降果有伏匪沿途接應將爲掩襲計我兵識其計大敗賊衆八月賊分青藍黃白等號羅其清稱巴州白號冉文儔稱通江藍號併聚方山坪而以蓋頂山多福山氈帽山爲障蔽我兵三路進攻清偕總兵百祥奪多福山賊卡復會各路兵勇同克方山坪賊竄通江巴州一帶與達州青號徐添德東鄉白號王三槐等股合十月羅冉二逆由南背山折竄江口清與參將阜常保分路截剿殲斃多名卽留駐江口以截賊衆竄回達州之路十一月羅冉股匪屯聚永興場經官兵敗之折竄鐵釘埡張家場會清率鄉勇馳至出其不意痛加剿洗賊退遁三溪口譚家嶺等處清復率鄉勇分路進攻賊遁入巴州之碾盤壩靈剛寺偵蹤追擊殲擒千餘賊窮蹙追擊營山之來定寺又敗之三年三月總統勒保以廣元縣爲北棧門戶委清署縣事四月諭曰朕聞川省剿辦賊匪州縣中有劉清平日官聲甚好每率衆禦敵賊以伊廉吏往往退避引去劉清如果始終奮勇民情愛戴著勒保據實保奏五月奏稱南充縣知縣劉清平日居官辦事深得民心自教匪滋事以來節次帶勇殺賊甚爲奮勉賊匪亦稱爲清官衆口如一得旨以同知直隸州用賞戴花翎九月襄陽白號高均德股匪由陝境竄廣元之旺蒼

壩副都統額勒登保由甯光一路迎剿清團集鄉勇於隘堵禦獲賊黨劉正名等三十五名四年正月上以勒保爲經略大臣諭曰同知用劉清平日官聲尙好著勒保奏明量予升擢以從民望尋奏請擢清忠州直隸州知州並懇賞加知府銜允之五月白號股匪張子聰藍號股匪冉添元在竹峪關爲參贊額勒登保剿散飭清於通江巴州一帶設法招撫先是三年剿辦王三槐時勒保議招撫之令清迭次赴三槐營宣諭三槐乃詣軍門勒保擒獲奏捷至是清招徠賊累至賊營懲三槐事不肯出以清廉吏亦不忍加害八月署總督魁倫據實奏聞賞加道銜時左副都御史廣興赴川留辦達州軍餉諭劉清隨同幫辦遇有道員缺出著魁倫奏請升補九月額勒登保剿辦青白各號股匪將連次擒獲被脅之人及自行投首者均飭清妥爲安撫上嘉其所委得人魁倫又以撫恤難民請交清覈實經理從之十月補建昌道五年正月冉添元張子聰合黃號徐萬富青號汪瀛線號陳得俸各股匪共五萬人搶渡嘉陵江魁倫退守鹽亭之鳳凰山以潼河上下三百餘里淺灘八十餘處令清於居民中團集鄉勇設卡防守旋將前派防河之官兵陸續撤回三月賊爲參贊德楞泰剿敗由泰和鎮上游之王家背涉淺偷渡事聞

魁倫褫職逮治並奪劉清職命署總督勒保查明賊匪偷渡之處如係劉清專轄亦應拏問閏四月勒保覆奏魁倫因賊匪竄至鹽亭令百祥薛大烈將沿河兵勇一併帶回又將參將張績所帶兵勇撤回大營王家觜地方祇有團勇百餘人防守亦未有責成專管之員劉清奉檄在潼縣一帶統率巡防王家觜非其專管會因太和鎮以上淺灘要隘鄉勇實難專恃稟請魁倫添兵未經批准劉清係總巡之員業經遵旨革職留於軍營劉清去年在通江巴州一帶招撫被脅難民夏秋間從賊內投出者實有二萬數千人因此黨與解散賊勢大衰茲查各股竄匪大半在通巴境內正當乘此被剿情急之時招歸安業臣見派劉清帶同候補通判劉星渠仍照上年所定章程認真招撫諭曰此事卽責成劉清經手專辦如果認真奮勉卽加恩將伊原官開復亦無不可十一月白號賊匪楊開第由陝境竄入通江之芝坪清飭縣丞銜劉炳從九品徐若瀛帶同前在鮮大川股內投首之王忠等假冒賊黨乘夜深入賊營猝焚賊驚遁追奔二十餘里斬僞先鋒杜星貴殲斃三百餘人投出者一百餘人六年二月黃藍白各號股匪由新鎮壩碑灣寺敗走巴州清率鄉勇進至恩陽河夜襲賊營殲賊百餘投出者五十四名德楞泰勒

保先後奏入諭曰前曾降旨將劉清加恩以知縣補用並准留營效力以觀後效今劉清辦理保甯一帶堅壁清野及招撫團練等事俱能認真出力節次帶領鄉勇打仗亦屬奮勉劉清著賞還道銜在川候補不必賞戴花翎仍帶革職留任俟四年無過再行開復五月白號餘匪高見奇等被陝省官兵偪入通江之西有溪清率鄉勇剿斃百餘名招出難民一百五十六名六月高逆又合陝省竄匪擾至南江之斜巖高廟子清率鄉勇追剿二十餘里斃賊二百餘名九月藍號賊匪李彬合王冉餘孽由巴州折竄通江清迎剿於謝家山尋李彬股內李元受帶賊目雷仕榮等十九名投首清令寄信賊營陸續招出男婦一百八十七名十一月額勒登保奏稱劉清帶領壯勇數百人於通江巴州一帶剿撫兼施節次斬獲多人招撫亦復不少百姓既聽其指使賊隊亦靡不信從連日隨臣在營臣察其辦理各事實心實力不辭勞瘁洵屬川北地方官中最爲出力之員仍懇量加鼓勵俾各員觀感奮興得旨賞還花翎十二月復授建昌道七年二月諜報李彬率衆竄至南江之鐵廠坪清豫派典史猶啟祥帶領寨勇遏賊西竄及入老林之路度賊敗後必走五方坪乃設伏以待清率鄉勇楊家霸策應別遣軍功李仕玉等從白

巖山直趨鐵廠坪賊猝不及防果走方坪伏勇齊出猶啟祥亦馳至遂擒賊首李彬及辛聰之弟辛文僞先鋒曹世連劉玉藩唐仕武等餘匪斬獲甚衆捷入賞加按察使銜並玉鞞荷囊諭曰前曾降旨令各督撫責成地方文武員弁遇賊匪在境內隨時認真搜緝分別勸懲今四川道員劉清所帶祇係鄉勇並無官兵能將首逆李彬及辛文擒獲得邀獎賞地方官皆當以劉清爲法三月白號張魏餘匪經官兵追剿竄南江之劉家坪清迎截於青趕渡殲斃多名四月又與遊擊馬績等擊賊於通江之貓兒壩賊竄入陝境尋折回廣元又偕總兵豐伸敗之於麻柳壩六月追剿藍號楊布青餘匪於通江之七星包斃賊三十餘人俘獲四名投出者三十六名上嘉其奮勉八月授按察使十二月敗藍號齊國典餘匪於兩河口清飭軍功臧青雲等抄赴南江之東渠迎擊賊竄黃草坪又奔沙溪場臧青雲乘夜追及擒僞元帥葛成勝會達斯呼爾岱達勒精阿所帶官兵亦至前後夾擊殲斃無算得旨嘉獎是月大功告成下部議敘八年閏二月陝西藍黃白各號匪徒從南山竄出棧道清馳赴廣元堵剿三月賊衆經參將羅思舉剿敗遣僧人通天至廣元報信投首清遣軍功李植德偕通天前往招撫旋被戕害諭曰劉清本當

治罪姑念其平日官聲清潔暫從寬免並著勒保嚴飭劉清認真搜捕儻再輕信賊匪之言仍事招撫致該匪得以延喘奔逃輾轉滋事必將劉清治罪不貸清尋遣臧青雲率鄉勇探蹤追剿藍黃白各號投出首夥共九十三名七月在南江之鑽天坡獲白號僞元帥邱高科十一月命勒保將糧餉搜捕各事交劉清羅聲舉遵辦九年正月清分派員弁兵勇搜捕零匪疊有斬獲九月陝省裁撤鄉勇過綏定者均經逐一清查或充當兵役或回籍安業以次散歸十月續撤鄉勇偕提督馬瑜一律妥爲安置十年入覲賜詩曰循吏清名遠邇傳蜀民何幸見青天誠心到處能和衆本性生來不愛錢有守有爲績昭著無偏無欲志貞堅空羣羨爾超流俗明慎咸中治理宣十一年丁繼母憂十三年服闋授山西按察使十四年七月升布政使十月署巡撫初彭齡審辦臨晉縣假裝銀鞘案清請將錢文石塊情節刪去經初彭齡奏參上以其袒護屬員計圖消弭下部嚴議尋議降四級調用得旨以從四品京堂補用先是清自陳才力不勝藩司之任懇請開缺至是奏入上斥其冒昧陳奏以員外郎降補十五年五月補刑部員外郎十月充熱河都統衙門辦事司員十七年授山東鹽運使十八年九月河南教匪李文成滋事煽及

山東賊黨朱成良糾衆蟻聚陷定陶曹縣清力請從戎巡撫同興派令偕參將馬建紀帶兵進剿抵定陶之髡山搜剿匪徒殲擒千餘名賊匪復出抗拒又敗之旋攻克韓家廟賊巢生擒賊首趙文祿斬獲無算餘匪竄曹縣扈家集上嘉其勇敢下部議敘十月官兵分三路進攻扈家集清偕協領哈哈岱馬建紀先由定陶攻其東面初賊以扈家集爲巢穴築牆樹柵外植荆棘周圍約四五里守護頗密猝不易攻清乃策勵官兵奮勇撲入賊退避屋內我兵乘風拋擲火彈倡賊出賊大潰餘匪奔竄適南北兩路官兵至合擊之殲二千餘人斃賊首朱成良擒僞副元帥王奇山諭曰劉清前在川省軍營著有勞績朕所深知今年逾六旬且係文職能身率士卒直取賊巢殲賊多名實屬勇敢可嘉著賞加布政使銜卽換頂帶並賞給四喜扳指一箇並大荷包一對小荷包二箇是月有賊匪數百由河南滑縣潛奔定陶之郝家集清偕哈哈岱馬建紀分兵截剿執賊目曹光輝殲僞元帥袁興邦僞將軍周姓斬賊匪四百餘人十一月賊平曹縣定陶金鄉及附近各縣難民漸次復業清偕充沂曹濟道熊方受督率州縣編排保甲並辦理撫恤事宜十九年五月授雲南布政使七月諭曰劉清在山東帶兵剿賊民情甚爲愛戴雲南

布政使一缺與伊不甚相宜著以二品頂帶仍留山東鹽運使之任二十一年四月因病奏請開缺諭曰劉清前在川省軍營著有勞績十八年剿辦山東教匪尤爲出力此次因病開缺伊籍隸貴州若回原籍調理病痊再行來京候補道路遙遠往返不易著於解任交代後就近來京醫治安心調理一經病痊卽具摺請安候朕賞給差使八月病痊特授山東登州鎮總兵二十五年調曹州鎮總兵道光二年以年老休致命在籍支食全俸七年卒諭曰原任曹州鎮總兵劉清於嘉慶年間由知縣洊升藩司獲咎後蒙皇考仁宗睿皇帝棄瑕錄用改任總兵曾在四川山東軍營出力服官三十餘年清勤素著道光二年因年老休致回籍經朕賞給全俸以養餘年茲聞溘逝殊堪惋惜伊孫兵部候補主事劉熾昌著加恩遇缺卽補文生劉瑩賞給舉人准其一體會試所有任內一切處分悉予開復其應得卹典該衙門察例具奏尋賜祭葬道光十二年奉旨入祀貴州鄉賢祠山東名宦祠子廷榛軍功六品頂帶前候選知縣孫熾昌二品廕生前官江西九江府知府緣事革職瑩欽賜舉人

方維甸

方維甸安徽桐城人父觀承官至直隸總督自有傳乾隆四十一年二月上巡幸山東維甸以貢生在良鄉接駕諭曰原任直隸總督方觀承宣力畿輔二十餘載懋著勤勞其身後每深軫念伊惟方維甸一子彼時尙在幼穉今年已及歲著加恩照襲曰修子行簡之例授爲內閣中書並准其一體會試六月補內閣中書充軍機章京四十六年成進士授吏部主事四十九年五月隨參贊大臣福康安赴石峰堡軍營十一月升員外郎五十年授坐糧廳五十二年推升郎中隨將軍福康安赴臺灣軍營十二月賞戴花翎尋遷福建道御史五十四年充廣西鄉試正考官尋擢禮科給事中五十五年授光祿寺少卿五十六年隨將軍福康安征廓爾喀五十七年四月轉太常寺少卿九月經福康安保奏諭曰方維甸隨營辦理毫無舛誤且自進兵以來衝風冒雨步行涉險實屬奮勉著賞三品卿銜十一月遷通政司副使五十八年十一月授光祿寺卿五十九年正月命偕刑部尙書蘇凌阿馳往山東審訊齊河縣民任祖三等控吏役挾嫌首告任祖虞等斂錢聚衆致傷官役案訊明定擬如律三月派稽察左翼覺羅學四月轉太常寺卿八月充順天鄉試副考官六十年三月充會試知貢舉四月授長蘆鹽政嘉慶元年三月

上恭謁西陵維甸隨營當差恩予議敘九月奏請長蘆鹽課緩至明歲奏銷後分三年帶徵經部議駁上加恩緩至明年奏銷後分二年帶徵是月長蘆商范光正赴部以商總楊秉鉞欺隱窩價呈控欽派刑部左侍郎張若淳工部左侍郎成德前往提審尋以楊秉鉞起意謀產估價多寡懸殊運司阿林保率據估值詳報維甸卽據詳具奏奉旨革職交張若淳成德秉公嚴審定擬具奏尋擬維甸發往軍臺上以所辦殊屬含混著令來京一併交軍機大臣會同該部另行審擬十月諭曰此案方維甸如有聽受賄囑情事不特發往軍臺尙當重治其罪乃張若淳成德並未審明案情率將方維甸問擬軍臺不足以成信讞是以令將全案人證送京經軍機大臣查對案卷並訊之各商該鹽政實無徇私袒庇等情咎止失察辦理不善所有原議發往軍臺效力之處著寬免方維甸係方觀承之子曾在軍機章京上當差有年著加恩賞給員外郎仍在軍機章京上行走十二月補刑部員外郎四年三月充會試同考官六月升郎中八月授內閣侍讀學士隨工部尙書那彥成赴陝西督辦軍務五年閏四月授山東按察使六年二月山東巡撫惠齡咨稱楊震德因瘋砍死楊五案情跡不實定擬錯誤經部題駁上以讞案係維甸

專責殊屬疎忽嚴飭之仍交部議處尋議以降一級調用奉旨銷去加一級免其降調十月擢河南布政使時楚省邪匪未淨恐其竄越江北維甸督率豫省兵勇六千餘名駐筭江岸分段設卡防守上嘉之七年九月奏大功告成裁撤鄉勇最爲要務須在裁撤官兵之前若陝西南山餘匪殄盡豫省西路防兵可以酌移則以兵易勇江岸鄉勇口糧亦可節省上是之八年五月調陝西布政使八月擢陝西巡撫南山零匪竄景峪維甸奏南山地方遼闊林深箐密最易藏奸不特四散零匪急須搜捕卽從前隨營長夫落後鄉勇流落南山內匪徒勾結乘機搶掠尤須弭患未萌上諭維甸督率各員搜緝十月以分派各員鼓勵寨勇逐路嚴搜並以臬司朱勳時往稽查董率具奏上嘉之尋將各路軍營糧餉及刪減塘站裁撤鄉勇有業無業派充壯丁雜役各事宜先後奏聞九年九月諭曰德楞泰奏報剿捕川陝邊界零匪全數肅清方維甸自擢任巡撫以來於搜捕零匪辦理糧餉及籌撤鄉勇各事宜均能認真經理悉臻妥協著加恩仍賞戴花翎十二月奏酌籌攤捐各款請司庫內賞借銀四萬兩作爲另款支用卽於司庫養廉內每年捐銀一萬兩歸款十年正月奏請將定遠廳所屬簡池壩巡檢移駐黎壩城內姚家壩

巡檢移駐漁渡壩城內皆得旨允行四月因審辦富平縣民魏跟隨兒毆官案擬魏跟隨兒斬決經軍機大臣會同刑部改擬絞監候維甸偕按察使朱勳自請議處奉旨朱勳交部察議方維甸寬免五月奏請陝西漢中府改爲要缺甘肅平涼府改爲中缺下部議行尋因拏獲悄悄會匪首犯石慈應寸磔擬斬決李世應肆應等應立決擬監候交部議處諭曰該撫擬定此案時自因上年辦富平縣毆官一案曾被參處因而有意從寬此則不可嗣後當遇事講求參酌得中不得因此次被議又復心存瞻顧動輒從嚴辦理也部議降一級調用罰俸二年上改爲降二級留任仍罰俸二年十一年三月失察延安惑衆匪徒高種秋交部議處部議降一級調用奉旨加恩留任又因賞給拏獲王廷登弁兵銀兩辦理遲延上嚴飭之仍交部議處部議降三級調用奉旨從寬留任六月奏川陝邊界前令提鎮帶兵會哨原因山內餘孽或有未淨須示軍威見在地方甯謐所有提鎮會哨應請停止仍令固原提督於每年十月到陝巡查山內邊界並閱營伍一次陝安鎮總兵每年二月巡查邊界營汛一次從之七月呈本內將塔爾巴哈臺參贊大臣誤寫大人甘肅藩司書作蘭藩諭曰方維甸近來辦理地方事務每多遲緩疊經降

旨訓飭今又舛錯有關體制除交部議處仍傳旨申飭尋議罰俸半年時甯陝鎮新募兵丁因停止米折藉詞滋事維甸接據稟報卽與將軍札爾杭阿密派滿營兵一千軍標兵一千撫標兵五百預備調遣並咨會各營分投堵拏又令總兵楊芳帶兵回陝奏入上是之命偕固原提督楊遇春進山督率辦理尋偕楊遇春奏賊兵三四百人由孫家梁竄向甘家碛西南卽四畝地華陽西江口各營汛及甯陝鎮屬內均有新兵若竄往句結復裹客民賊數恐致增多臣等一面帶兵進剿卽順道彈壓新兵安撫客民惟思見調之兵撫標兵見仗甚少且乏帶兵得力大員已飛咨總兵楊芳除昨調固原兵二百名外再挑二千三百名並飛咨河州鎮總兵游雲棟帶兵一千五百名來陝又延綏鎮總兵張鳳打仗奮勇亦擬咨調前來得旨所辦俱是又諭曰該撫等飛咨檄調適與朕旨相合但恐賊數增多不可無大員督辦見已降旨令德楞泰同札克塔爾帶領侍衛章京數員馳往督辦尋奏西江口新兵亦在江口營起事滋擾與賊匪響應已有數十人擾至八里關大道又賊匪潛分一股竄至洋縣東北攻擾其西城外復來有數十人放箭爬城而上又稱漢中新兵已經調出見在城守空虛當卽飛飭遊擊馬得等帶領軍標兵

一千名馳赴漢中以防該匪竄出又稱楊芳途中聞該匪竄擾各營輕騎先由斜峪關入山一路安撫新兵前進諭曰所奏殊不明晰江口營新兵另起滋事諸營兵丁共有若干名滋事者是否祇此數十人未據敘明洋縣爬城之數十人又係何處賊匪是否卽係江口營之數十人並未詳細聲敘且前據德楞泰在山西途次奏稱聞此次賊匪係苟文進爲首今方維甸業已馳赴剿擊距賊甚近自應確探首惡何人躡蹤圍捕乃摺內未曾提及一字亦未查明賊蹤見在竄往何處實不可解漢中係屬郡城前據探知賊匪向彼奔竄自應將該營兵丁酌留守城何以全行調出以致城守空虛此時轉須派撥兵丁前往防禦方維甸等或因漢中營係屬新兵慮有句結是以全數調出但既經調用又不令向前剿賊該兵丁等以奉調前來未邀差遣不免心生疑貳妄萌他念是則殊有關係又楊芳係總兵大員既經帶兵剿賊何以又忽輕騎入山是否因所帶之兵落後未能趕上未免過形草率看來方維甸辦理竟無把握朕心深爲廬念著德楞泰加緊趨行赴彼督辦八月賊匪竄向兩河等處有趨石泉縣之勢維甸令總兵王兆夢由漢江順流而下抄赴賊前擊退之先是維甸於叛匪滋事明飭地方官勸諭寨民人等將

寨趕緊修理以衛身家九月逆匪攻撲焦家堡永固等寨寨民均能自爲守禦且擊斃賊匪多名奏入上以維甸所辦甚是此次卽其明效尋命維甸回省辦理糧餉軍火及彈壓地方事宜維甸奏籌辦糧運情形并請本省所調官兵照防剿兵舊例一體支給鹽菜口糧上如所請行十月欽差大臣德楞泰率官兵剿擊賊匪賊首蒲大芳王文龍等縛獻甯陝營起事首逆陳達順陳先倫江口營首逆向貴乞降奏入諭曰方維甸因剿賊之時無須在彼同辦諭令回省見在善後事宜關係地方者甚多著卽帶同臬司素訥並酌帶妥幹道府大員馳往德楞泰軍營會辦悉心商酌維甸奏賊匪乞降後設令仍歸原伍聚處南山復留後患請於大兵未撤之時明白曉諭全收器械資遣回籍交本處地方官管束上以無此辦法飭之尋諭曰方維甸此奏必係聞軍營有此謬論不以爲然恐其計出於此是以預爲密奏傳旨申飭者非申飭該撫所奏之不當實欲使德楞泰於奉諭之後自知慚沮也德楞泰請將投出民人三千八百餘人給資回籍並擬將隨同滋事各營兵蒲大芳等二百二十四名遴選將弁分投管帶暫歸原營約束操防上以所辦錯謬命會同方維甸將叛賊嚴訊定擬具奏十一月偕德楞泰奏降賊業已歸伍

若按名拘喚又致驚恐或生反側請緩以時日相機辦理上以德楞泰畏難因循既已錯誤於前又思遷就於後實出情理之外命將叛匪傳集宣諭恩施貸其一死仍律以發遣之罪尋偕總督全保奏請將降賊二百二十餘名與各處未動新兵三百餘名以新疆換防爲詞分起調出到戍後新兵照例屯防其餘降賊分給各回城爲奴諭曰國家明罰敕法措正施行不值於此等頑愚馭之以術莫若徑行加恩卽令分赴新疆各回城充當戍兵不准換回以示屏諸遠方之意十二月疏言善後事宜一山內匪徒賭博應密派兵役嚴拏懲治一南山漢南一帶游匪派員清查做照保甲之法分別土著客民將姓名田產男女雇工詢明造冊填給門牌責令鄉約牌頭稽查一甯陝廳城右係高山難於守禦應擇地方另建留壩廳城土性夾沙秋雨淋塌地勢偪窄請另擇形勢改建甌城洋縣舊築土城土性不堅請改用灰土包築一撫恤難民請將軍務餘糧撥歸常平倉存貯就近查被賊地方有地之戶借給一月籽糧無地極貧之戶賞給一月口糧一甯陝孝義留壩定遠四廳鎮安鳳縣二縣各該處山境瘠薄民俗刁悍均須明幹之員方能勝任請改照邊俸之例以示勸懲一陝安兵備道請照例節制營員以符體制奏入

下部議行時因河東鹽務復歸商運阿拉善吉蘭泰鹽池亦歸公招商承辦上命侍郎英和內閣學士初彭齡偕維甸陝甘總督倭什布山西巡撫同興會議尋經英和初彭齡同興議以陝西之府谷神木葭州綏德吳堡清澗延川宜川等八州縣俱改食吉蘭泰池鹽十二年二月維甸奏稱府谷神木葭州三處向食鄂爾多斯鹽若改食吉蘭泰池鹽禁止鄂爾多斯蒙古鹽辦理多有窒礙請免其改食吉蘭泰池鹽又疏陳鹽務事宜一陝省鹽道自改課歸丁後移駐鳳翔今鹽課復歸商辦請仍駐省城以便經理印信改鑄管理陝西鹽法分巡鳳邠兼管水利道字樣一陝省漢中延安鄜州等屬地方及清澗一縣所領鹽引請由山西巡撫照各該處應領額數於領引之便一併咨部領回移交陝西巡撫衙門轉發鹽法道封發各州縣及土商領引行運所有額銷鹽引仍舊以二年一次俱由鹽大使截角統歸鹽法道委員解交由山西巡撫呈繳至額解西安藩司鹽課統由地方官徵收解交藩庫彙請奏銷榆林綏德吳堡米脂等縣向食土鹽由州縣發給小票請將小票裁撤一併由山西巡撫咨部領引移交陝西巡撫轉發以歸畫一而除積弊一西鄉分出之定遠廳民向食西鄉之鹽應令各該商分設子店售賣一酌撥

興安引張以濟民食請將邠州淳化三水三處每年行銷河東引領額內准照鳳
課例改食花馬小池鹽仍認銷河東引一千道撥入興安各府屬照例均勻代銷
仍照河東規例辦課一南山內山徑叢雜小民背負銷售行走道路應聽民便嗣
後以官店發票爲憑但有發票卽准銷售則南山肩負貧民藉資生計不致去而
爲匪而小民亦無食淡之虞皆下部議行八月奏綏德吳堡二州縣向食三眼泉
土鹽清澗延川宜川三縣向食定邊花馬大池鹽民情相安已久請無庸改食吉
蘭泰池鹽下部議行十二月奏寶陝局鑄錢低銅不敷請照嘉慶七年奏明之例
高銅與鉛各半配鑄從之十三年二月偕山西巡撫成甯奏酌改陝境鹽務事宜
隨時察看情形尙有應酌籌之處查鳳翔府屬一州七縣向食靈州花馬小池鹽
行銷河東引張各按丁糧攤納課銀名曰鳳課迨河東課歸地丁後多有民販潞
鹽運至彼處行銷嘉慶十一年復商案內將該府各州縣改銷潞鹽招商辦運奏
准遵辦在案今商民交稱不便實有難於經久之勢請將鳳翔八州縣仍食靈州
花馬小池鹽引領銷河東之引攤納課銀無庸設商經理漢中延安鄜州各屬並
清澗縣應領引張原不在河東額引數內應仍歸陝省請領內惟土商領引之處

遠涉未免苦累請俱由漢中府延榆綏道領繳其興安府屬引鹽雖有不敷但山路險遠試行之始商力亦須體恤前所議於邠州各處原領河東額引撥出一千道歸入興安行銷者請暫緩改撥榆林綏德吳堡米脂等處土鹽小票改領引張一併令延榆綏道請領散給榆林永樂鹽鍋衝刷短缺課鹽向令轉賣鄂爾多斯鹽請將鋪戶姓名及所發司帖隨時報部又邠州及淳化三水二縣自改食靈鹽後民情稱便惟該處地瘠民貧無人認充土商應照長武之例民運民銷按煙戶納課無庸設立土商下部議行尋偕西安將軍德楞泰等奏請將甯陝總兵移駐漢中裁汰漢中協副將一缺華陽營參將一缺甯陝營城守營都司一缺東江口華陽守備二缺把總七缺經制外委三缺各營千總四缺額外外委三缺命軍機大臣會同兵部議行九月偕陝甘總督長麟奏請移駐山內雜職甯陝同知前經奏准移駐甯陝新城仍設巡檢留駐舊治惟甯陝廳本有監獄向係巡檢兼管司獄今留駐舊治作爲甯陝舊城巡檢應將四畝地巡檢移駐甯陝新城改爲甯陝廳巡檢兼管司獄仍爲要缺在外揀調又留壩廳爲棧道扼要之地北至鳳縣一百九十里山路崎嶇相距太遠運餉解犯照料難周廳屬之南星地方在鳳縣留

壩之間地處適中請將青羊驛丞兼管巡檢移駐南星改爲南星巡檢仍歸部選下部議行十二月奏酌籌漢中鹽務事宜查南鄭等九州縣額引二萬五千道每年交課三千七百五十兩設有土商抽鹽辦課而各州縣內洋縣西鄉鹽法於康熙年間議定由各里攤捐課銀並不抽鹽此漢中向來辦理章程也嗣復設立土商抽鹽辦課漢中本無殷實大商並不持引運鹽皆係小販到境抽錢抽鹽謂之抽鹽辦課俟庫項交足卽將官引截角繳毀謂之定截引角措勒多收之弊在所不免且小販皆係無業貧民貨本甚微獲利有限土商坐分其利人情甚不帖服漢中一府請照洋縣西鄉章程一律攤納並請照鳳縣之例裁去土商永杜措勒之弊下部議行十四年正月奏前年甯陝新兵滋事洋縣被擾尤重懇將緩徵錢糧加恩蠲免二月奏山內乏食貧民懇賞給一月口糧均從之七月授閩浙總督八月因母老未能迎養赴閩奏懇於半年後簡人更代諭曰方維甸之母年逾八十平素母子相依朕所素悉惟因閩浙地方緊要見有剿辦洋匪等事簡用乏人不得已簡伊前往今伊母不能迎養赴任伊慮及日久遠離私心負疚自屬人子至情伊母已送回原籍居住方維甸應卽迅速馳赴新任一意辦公無庸內顧俟

明春二三月間著來京陛見彼時准其順道先往江甯省視到京後將伊母身體情形據實奏聞候朕降旨九月遵旨馳赴廈門查辦臺灣械鬪案件十一月奏洋盜朱潰經官兵礮斃伊弟朱渥悔罪投首船隻礮械全數呈繳其夥衆三千餘人請查照舊例分別遣散回籍安插其情願隨同緝捕者挑出精壯者百五十餘人分派兵船隨同出洋緝捕得旨允行時臺灣嘉義彰化縣械鬪已息復熾上命維甸渡臺督率辦理十五年正月拏獲械鬪首犯林聰等並從犯一百餘名分別定議具奏四月奏臺灣屯務廢弛請通行查勘體恤番丁以資調遣見在經過各社體訪番情甚屬艱苦其原設屯丁四千名亦不足數皆由各屯未墾之地每被奸民社丁人等串通欺詐誘令典賣越界霸占應徵屯租原係州縣收發前署臺灣府楊紹裘等議令屯弁自行徵收散給各丁不復官爲經理以致刁民抗欠甚多而屯弁又從而侵蝕屯丁苦累益甚見派員查勘分別清釐請照舊定章程辦理諭曰該處營汛兵丁應如何妥議之處著查明具奏於一切辦理後應卽起程內渡前經有旨准其來京陛見該督抵省後卽可奏報起程順赴江甯省視伊母卽行來京瞻覲可也尋偕福建提督許文謨奏請申明班兵舊例籌議章程一臺灣

澎湖等處戍兵稽查換班限期以免曠誤一班兵應覈實點驗按期派渡一臺灣班滿兵丁應分由鹿耳門鹿仔港兩口內渡毋許逗留一換班來往兵丁供支口糧酌定限制如班兵登舟後實因風汛不順又候半月者准借一次或班期已滿新兵未到又候一月者仍准借支其餘概不准借一遵例操演具冊呈報以資考覈一各營房見飭勘估興修竣後兵丁照例歸住營房以便約束一禁止坐扣班兵糧餉以杜影射一兵丁曠缺日期覈實查報除渡洋漂失不知存亡者仍暫留錢糧養贍眷族俟查無下落始行開除其餘遇有事故及脫逃革伍等卽日具報停支以杜侵蝕一調派兵丁緝捕彈壓請酌給口糧於臺灣生息銀兩內支給其擡運軍裝夫價應由鎮道府廳縣捐給一營員到臺應行試看以定去留疏入上命軍機大臣會同該部議奏尋議調兵派丁擡運軍裝夫價一體由官支給在生息項下動用餘皆如所請行五月偕許文謨奏臺灣各營汛地酌議歸併以便操防查臺灣南北各陸路額設戍兵一萬二千三百八十九名除存營存城外各營分派汛兵四千三百五十八名爲數原已不少特因地方遼闊負山臨海從前分派太多每處不過數名而緊要地方轉形單弱且分汛兵丁零星安設散處各方

難以調集操演茲據總兵武隆阿酌量情形妥議裁併臣等查近山險要及數縣交界之處路徑叢雜姦宄易於潛藏近海支港可通小船之處多有奸民私渡販運禁物其習俗獷悍煙戶繁盛村莊民情尤多浮競此等緊要地方或本未設汛或原設塘汛兵數太少不足以資防禦應請於偏僻零星各汛內裁撤弁兵增添移併將通德哈子蘭要路及查緝私礦要口裁撥增設其昔僻今衝安塘不均之處亦應酌改又如鳳山縣既於嘉慶十二年自埤頭移回舊治仍應將舊城分汛移回埤頭共計城守營左軍移駐外委二員裁移十汛兵丁併入三汛移改一汛右營移駐外委二員裁移十一汛兵丁併入五汛南路營移駐千總一員裁移三汛兵丁添入三汛移改一汛下淡各營移駐外委一員裁撤三汛兵丁併入一汛北路營中軍營共該把總一員外委二員裁撤九汛兵丁歸入四汛添設二汛二塘左營移駐把總一員外委三員裁撤十八汛兵丁併入六汛右營撤額外外委二員移駐把總一員外委一員裁撤三汛並城二汛兵丁併入三汛改移二汛艍舩營酌撥外委二員裁移二汛並撥本營兵丁併入一汛添設二汛滬尾各師營酌撥把總一員並本營兵丁添防移改一汛見在各汛兵房多坍塌裁移者可無

庸修蓋其餘建兵房歸案辦理疏入諭曰臺灣負山臨海道里表延向曾額設戍兵一萬二千餘名用備巡防而地方今昔異宜自應隨時酌定茲據該督等查明該處緊要地方請於偏僻零星各汛裁減弁兵增設移併各情形自係爲因地制宜起見著照所請行又疏陳約束械鬪章程臺灣民俗大抵好爭不但漳泉粵三處互相仇怨卽同籍之人亦以各縣自相仇怨習染錮蔽粹難化導惟有酌定章程申明約束遇事嚴懲於初起平時防患於未萌法在必行或可漸移惡習臣查臺灣匪徒最多如賭匪會匪等素以搶竊爲事間有械鬪不遵約束自來到處攻莊肆掠鬪案之所以蔓延者皆由於此卽林爽文陳周全蔡牽等滋事亦皆勾結此等匪徒爲羽翼欲求地方寧謐必先嚴緝匪徒請責成臺灣文武官員隨地隨時嚴緝查拏解送鎮道訊辦卽應問流遣之犯亦由該鎮道定擬彙案具奏庶辦理迅速人知警畏惟是鎮市村莊各有本保隸役嘉義一縣隸役又全係漳人緝捕人犯多由伊等故縱互相黨護應飭行各廳縣隸役聽官僉差不許擅自保不許同籍盤踞總董等無論職員生監悉聽廳縣調遣儻有怠玩稟請革究如敢包庇抗違卽照故縱罪人之例一體治罪並令每莊各僉約長大姓並設族長官

給戳記管束本莊本族如有私弊照總董例一體懲治各莊之事仍不許盡由總董指使以杜把持至各籍民人同莊雜處每多猜忌同籍各莊之中偶間一異籍村莊衆寡不敵易致欺凌應令地方官查明此等村莊責成總董約長族長等約束莊民毋許滋事並出保護甘結一有釁端將總董一併懲治遇有爭論難平之事稟知地方官秉公伸理曲直以平其心儻敢藉端糾鬪即使糾聚人少旋即解散尙未殺傷亦將爲首之人立拏究辦如此豫立禁約偶犯必懲自可咸知忌憚設或兇狡之徒瞽不畏法仍敢恃衆械鬪臣請於起初之時速令該鎮整兵前往不聽曉諭卽係亂民竟當相機剿捕大加懲創一處震懼他處皆可息爭較之彈壓往來旋止旋鬪似易於懾服再查地方官失察會匪例應降調失察械鬪若非全獲亦應降調失察例參疎防但臺灣惡習已經數十載會名約有四五種搶奪匪夥不下數十名械鬪黨與更不可以數計實非他省可比見在府縣更易新任蒞事未久勢不能驟挽刁風立時全獲若據實報出盡力查拏尙不免於吏議似不足杜因循之弊適以啟諱飾之端請嗣後如能查出稟報嚴緝查拏卽案犯未能全獲免其失察處分儻不稟辦卽照諱盜例革職庶使地方官咸知欺飾罪重

失察過輕竭力認真無所瞻顧諭曰方維甸奏請嚴禁總董及本保隸役黨護把持立法究治並僉設約長族長責令管束本莊本族等事均照所議行至所請酌減官兵處分一節該地方官果能隨時訪查據實稟報俾姦宄得以破露雖不能全寬處分該督等具奏到時朕尙可酌量加恩免其實降實革又疏稱商船貿易口岸牌照不符官穀難運酌議三口通行章程臺灣商船向來鹿耳門港口對渡廈門鹿仔港口對渡泉州蚶江八里岔港口對渡福州五虎門各有指定口岸然風汛靡常商民並不遵例對渡往往因牌照不符句串丁役捏報遭風既可私販貨物又可免配官穀八里岔一口又向無應運兵穀規避船隻尤多以致臺灣見在未運官穀積壓至十五萬餘石之多皆由商船規避所致應請三口通行據實填寫船照務令相符八里岔商船亦令配運官穀則船戶無所規避一切捏報遭風兵役需索弊端可以不禁自絕諭曰商船往來販易駛赴海口自應聽其乘風汛之便徑往收泊若必指定口岸令其對渡不但守風折戩來往稽遲且弊竇叢生轉難究詰嗣後廈門蚶江五虎門船隻通行三口將官穀按船配運並層層稽查互相考覈之處均著照該督所請行又奏請將羅漢門巡檢移駐蕃署察地方

從之又奏臺灣噶瑪蘭地方田土膏腴米價較賤民番流寓日多見查戶口漳人四萬二千五百餘丁泉人二百五十餘丁粵人一百四十餘丁又有生熟各番雜處其中以強凌弱勢所不免必須官爲經理方可粗安無事其未墾荒坡尤須查明地界劃分公平以杜爭端諭曰臺灣窳處海外諸務廢弛今方維甸到彼於地方營伍力加整頓酌改章程若地方官謹守奉行自可漸有起色第恐日久懈生且該處俱係漳泉粵民人雜處素性強悍總須時有大員前往巡閱使知儆畏嗣後福建總督將軍每隔二年著赴臺灣巡查一次用資彈壓六月奏請陛見諭曰本年木蘭秋獮九月初四日出哨初七日回至熱河方維甸計算程期於彼時前來熱河請安卽隨駕回京途次亦可頻頻召對也至七月十七日爲伊母生辰方維甸先赴江寧多駐旬日不特遂其省親私情亦可爲伊母稱觴祝壽並著賞方維甸之母玉三鑲如意一柄玉鑲玻璃杯一箇玉瑞獸一件瓷盤一件瓷瓶一件八絲緞二匹五絲緞二匹用示恩賚七月奏洋匪小仁幫相率乞投各將船隻礮械全行交出計首夥一千三百名大小礮一百六十餘門鳥槍器械等七百餘件請將蔡牽義子陳小仁牢監禁錮俟成丁時發往伊犁烏魯木齊等處安插文福

酌給滿洲蒙古漢軍大臣爲奴吳三地一犯曾與賊衆攻撲嘉義未便以自首稍爲輕減請仍照大逆謀反律凌遲處死翁吟一犯發黑龍江給披甲人爲奴其餘分別安插又以朱渥隨同舟師緝捕奮勉奏請酌量施恩上以維甸摺內分別定擬固屬按律辦理但所擬未免過重小仁文福二人雖係蔡牽義子但小仁親生父母均被蔡牽殺害其時小仁甫九歲不知原委直至蔡牽死後始悉前情日夜嗚哭又文福本係蔡牽船上舵工之子伊親故時尙在襁褓之中見在年只七歲此二人本非逆犯之子不必緣坐且髻齡被劫久陷賊中情殊可憫今皆自行投出自當免罪釋放妥爲安插吳三地翁吟皆可末減吳三地著發往黑龍江翁吟著發往伊犁其餘皆照所請朱渥著加恩賞拔把總以示鼓勵又奏酌議臺灣換防班兵支給餉銀及北路協左營水師兵與海壇烽火營水師兵對調各款諭曰臺灣換防班兵應支糧餉向例按四十月畫一起止該兵丁等於班滿日卽行停餉今議令班滿兵丁候代仍支餉銀一半其內地新派換防兵丁亦先予半餉俟新班到臺灣後再將舊班兵餉停止從此舊新更代之兵口食皆各有資於差操更爲得力著卽照依辦理至換防額兵停派漳泉府籍之人一事方維甸等覈計

閩省別府各營不敷派撥請仍循舊制復議請將北路協左營泉州水師二百五十名派往臺灣協以臺灣協之閩安海壇烽火營水師兵二百五十調往北路左營雖爲調濟起見但所慮尙未周密漳泉二籍之人各分氣類互相仇鬪地方官原應設法化導俾之積漸相安今因北路之水師二百五十係泉州人駐筭之地係漳莊恐其不能安處卽議全行更調是明示以漳泉二籍兵民不可並域而居劃分畛域日久必致該二籍之人愈啟參商莫若將此二百五十名兵額內酌換一半使其數少而彼此雜居仍不敢顯然樹敵再責成該管員弁隨時約束默化潛移自可冀鬪爭漸息積習湔除也九月至熱河陛見以母老情形陳奏諭曰據方維甸奏稱伊母上年自陝南旋緩程數月途中勞頓心神日形恍惚今年又兩次患病依戀情殷勢難刻離等語閩浙地方緊要方維甸在彼辦理妥協設此時海洋尙有緊要事務伊身膺重寄亦難遽行更換今該處洋面肅清巨盜均已掃除地方寧謐而方維甸母老多病兩地懸心其情甚爲可憫若將伊調任他省伊母仍不能就養兩江又係伊本籍與例不符朕以孝治天下不忍拂人子至情方維甸著加恩准其開缺回籍省親以示體恤時浙江巡撫蔣攸銛奏有呈遞匿名

揭帖訐告鹽政奇玖家人劉泰與商人俞廣東借銀弊混等款請將奇玖革職嚴訊上命維甸偕新任鹽政蘇楞額赴浙審辦十一月訊明按律定擬懲治十六年正月偕蘇楞額奏額引壅滯請於己巳庚午綱引日內各劃出三十五萬道作一綱統銷所有應完正雜錢糧分作十年帶納並請免交增價餘息又奏請公捐河工餉銀分作三年帶完上允所請四月諭曰方維甸回籍以後承歡侍奉伊母自己日就安健見在大學士戴衢亨母由臺灣偶患時病不意爲醫藥所誤遂於昨日溘逝朕心悼惜此時軍機大臣人少樞務至重朕於中外諸臣徧加遴選惟方維甸性情公直在軍機章京上年久熟諳事務人地相宜今特簡用爲軍機大臣將來卽補尙書用資倚畀伊母從前本在京師久住於北方風土素能習慣卽此時在江寧居住亦未必如京邸之服習伊若奉母來京於散直之餘朝夕侍奉豈不公私兩遂卽遇巡幸亦不令伊隨往朕於方維甸母子之間所以優加體念者實爲無所不至方維甸亦當仰體朕用人不得已之苦衷勉思報效伊將此旨告知伊母諒伊母亦必感激樂從但不知伊母見在身體情形究竟若何若果目下精神委頓實難遠行方維甸應據實陳奏尋維甸將其母情形瀝情覆奏諭曰據

奏伊母近日心神恍惚難以力疾遠行情詞懇切朕閱之甚爲憐憫見在天氣漸熱方維甸母子不能暫離若令其長途跋涉朕心殊爲不忍方維甸著不必來京仍在籍安心養親時屆端節並加恩賞給方維甸之母香珠一匣香袋一匣香牌一匣摺扇一匣維甸卽告知伊母俾其歡欣頤養十八年七月丁母憂兩江總督百齡奏聞諭曰方維甸歷任封疆均能勤慎盡職母老在籍侍養茲伊母吳氏病逝著加恩賜祭一壇派江寧將軍興肇前往奠醊並著興肇傳旨慰諭方維甸令其節哀守禮再圖爲國宣勞十月奉旨方維甸見在終養事畢在籍守制本應俟其終制後再行簡用但近因直豫東三省交界之處匪徒聚衆滋事謀逆調兵剿捕正當軍需吃緊之時且此時首逆林清輒敢豫蓄逆謀突入禁城尤爲從來未有之事刻下首逆雖已伏誅逆黨尙多而近畿一帶習教與謀之夥匪潛伏未剿者不少直隸地方緊要總督一缺簡用甚難其人朕再四思維方維甸堪以勝任該督此時雖未服闋第觀有軍旅之事古人墨經從戎義有權宜方維甸受朕厚恩值國家多事之秋若在家伏處於心諒亦不安所有直隸總督著方維甸署理在任守制該督接奉此旨卽馳赴保定接印任事抵任後將應辦各事宜經理數

月諸務妥協再行來京陛見其所穿服色蟒袍補褂無庸服用並無庸穿天青常服卽來京召見無論何日俱准其穿元青長褂俾得兼盡孝思想伊母九泉之下知其子移孝作忠亦所深願此朕用人不得已之苦衷非尋常奪情可比方維甸當勉體朕心仰副委任將此由五百里諭令知之維甸接奉諭旨遵卽起程奏請馳赴軍營隨同剿賊十一月諭曰方維甸接奉前旨能仰體朕衷力圖報稱據稱將伊母葬事趕辦完竣定於初七日起程可憫可嘉之至前次恐軍務一時不能告竣那彥成在彼督兵不能赴任是以降旨今據那彥成奏報連獲勝仗已將道口桃源二處屯聚之賊殲戮淨盡見已圍攻滑城指日卽可收復那彥成功成來京復命卽可就近赴任直隸總督之任見有章煦在彼署理方維甸卽趕緊前來接署爲期甚暫徒令多一番交代昨簡署方維甸時除面諭軍機大臣密發廷寄外並未明降諭旨事可中止何必使方維甸又抱奪情之戚耶至伊摺內請赴軍營隨同剿賊更可不必前旨內墨經從戎一語不過借文爲喻令其師古達權原因直隸地方緊要欲責令認真整頓若軍營帶兵殊不乏人況軍務已可計日告歲乎方維甸途間接奉此旨著卽轉程回籍守制伊感激朕恩欲具摺陳訴伊見

在制中難具銜名呈遞著自具奏摺在江南境內交百齡代爲呈遞行至山東境交同興代爲轉遞切不可親自來京俟伊終制之後再行簡用可也維甸於途次接奉諭旨懇請來京謝恩由兩江總督百齡代奏得旨方維甸仍遵前旨卽行回籍守制二十年六月卒諭曰前任閩浙總督方維甸由乾隆年間進士仰蒙高宗純皇帝鑒其器能疊加簡用試差鹽政在軍機章京上行走多年隨福康安前赴臺灣廓爾喀軍營著有勞績朕親政後優加拔擢由臬司用至總督所至之處俱能忠勤盡職清慎著名嗣因伊母年老多病懇請解職養親朕念其獨子破格施恩俯允所請伊今歲冬間服闋計其到京後內而尙書外而總督均堪倚畀乃伊母故後寢苦廬次漸染沈痾驟聞溘逝深爲悼惜著加恩晉贈太子少保照總督例賜卹任內一切處分悉予開復應賠銀兩均著豁免伊子舉人候補內閣中書方傳穆著賞給進士准其一體殿試並著江寧將軍穆克登布卽日前往奠醊以示朕軫卹勞臣至意賜祭葬諡勤襄子傳穆見官翰林院庶吉士

方受疇

方受疇安徽桐城人乾隆四十年由監生捐鹽大使分發兩淮補伍佑場鹽大使

尋捐升運判改發浙江四十二年補嘉松分司運判四十四年丁母憂留辦海塘工程四十六年服闋借補蕭山縣知縣四十九年以捕獲鄰境盜犯遷嘉興府海防同知五十三年遷直隸大名府知府五十四年調保定府尋遷清河道五十九年上幸天津差次賞戴花翎嘉慶二年定州知州劉兆清因調署簡缺控受疇收受節規並私借銀兩等款命解京交軍機大臣嚴訊惟借款鞠實褫職發軍臺效力三年贖回捐復原官四年命以道銜赴伊犁聽候差委九年授直隸通永道十年遷河南按察使十二年三月調直隸按察使九月遷布政使十三年上幸天津以所辦隄工穩固賞還花翎十四年五月以上年承辦天津差務苛派州縣銀款褫花翎七月因失察寶坻縣知縣單幅昌侵蝕賑銀部議革職奉旨改爲留任仍降三品頂帶十月上五旬萬壽復賞二品頂帶十六年三月上幸五臺以辦理差務妥協賞還花翎閏三月上回鑾駐蹕保定賜受疇詩泐石蓮池書院詩曰南邦昭世德首善作旬宣舊政勉能紹新猷務普延用人先有守圖治最無偏徙倚甘棠蔭臨風憶昔賢受疇爲前直隸總督方觀承姪故御製及之十八年二月擢浙江巡撫時觀承妻吳氏卒於家賞受疇假一月往治喪九月山東邪匪作亂陷定

陶曹縣受疇假滿入都在途聞警以曹州界連河南馳往歸德堵禦河南教匪李文成旋陷滑縣上命署巡撫高杞與欽差大臣溫承惠等會剿命受疇駐河南省城鎮撫地方督運糧餉十二月賊平疏陳善後事宜一滑縣自收復後撫綏化導非初任人員所能勝任應請改爲繁缺在外題補一所募鄉勇應令原保之人保回安業並收繳器械一禁鐵匠私造軍器一滑縣被賊村莊請將歷年積欠及本年錢糧俱豁免一查辦逆產勿任隱匿牽連一道口鎮應設立縣丞把總各一員一被戕文武員弁及陣亡兵丁請分別卹賞士民婦女守節捐軀者查明咨部旌表得旨允行先是睢州二堡河溢以軍興停工十九年二月命受疇會同河東河道總督吳璥堵築閘二月以賑務辦理未協饑民失所嚴飭之並下部議處尋議革職奉旨改爲留任三月請於滑縣增設都司一員並撥弁兵駐守從之十月以滑縣知縣孟圯瞻貪縱不法受疇誤行保薦下部嚴議尋議革職奉旨改爲留任八年無過方准開復二十年二月睢工合龍下部議敘五月請改荆子關協副將歸南陽鎮總兵轄歸德營參將爲撫標裁光州汛千總設光州營都司一員移鄧新營把總一員隨營協防撥荆子關協鄧新營馬守兵一百二十名並舊兵二百

八十名分防州城及商城息縣等汛尤之先是汝寧光州一帶舊有匪徒嘯聚名紅鬍子其地界連安徽湖北竄徙靡常受疇嚴飭地方官設法掩捕並移文兩省巡撫協緝先後獲犯數百名匪徒斂跡二十一年正月京察以綜覈錢糧並緝獲紅鬍匪犯多名下部議敘二月奏河工歲設搶險銀三十萬兩近年險工疊出每不敷用如俟奏明添撥緩不濟急請嗣後正項將次用完卽察看情形應添撥若干一面具奏一面行司提取霜降後如有餘存奏明歸款從之六月遷直隸總督八月上秋猶木蘭受疇以本年遇閏天氣早寒請與藩司姚祖同公捐縣衣二千件分賞兵丁上以其市惠邀名有乖政體嚴飭之二十二年以天津添建水師營受疇督造礮臺營汛等工遲緩部議降調奉旨改爲留任二十三年二月奏習教改悔民人請免治罪上允之三月以延請見任通判陳建幫辦幕務部議降調諭曰直隸督撫大吏不准以屬員幫辦幕務屢經降旨飭禁方受疇身任總督養廉優厚非不能延請幕友者乃令見任通判陳建入幕辦事旣曠職守又招物議實屬違制本應照部議降調姑念一時簡用乏人著改爲降四級留任七月上詣盛京恭謁祖陵以橋梁衝毀受疇剋期督造穩固賞穿黃馬褂並賞其子浙江嵗縣

知縣方秉知州銜二十四年以協濟河南馬營壩料物得旨嘉獎二十五年三月以延請已革知府沈華旭課士蓮池書院並與商推公事又失察家人需索屬員規費部議革職奉旨改爲留任八月上自熱河恭奉仁宗睿皇帝梓宮回京以受疇督辦橋梁道路一律妥善賞加太子少保銜道光元年請改大名協副將爲開州協副將增設大名鎮總兵轄大名廣平順德等營河間協副將令其常駐郡城增設鄭家口游擊專司催漕裁天津水師營總兵移大沽營參將駐新城統轄水師從之二年正月因病乞假命侍衛容照帶御醫馳往診視尋以病劇請開缺回籍允之六月卒於道諭曰方受疇前在總督任內仰蒙皇考仁宗睿皇帝優加恩眷嗣於嘉慶二十五年經朕賞加宮銜本年春間在任患病賜醫診視後因病久未痊陳請開缺特降旨准其回籍調理茲聞途次溘逝殊堪軫惜所有任內一切處分悉予開復應得卹典該衙門察例具奏

趙慎畛

趙慎畛湖南武陵人嘉慶元年進士改庶吉士四年散館授編修五年充順天鄉試同考官六年復充順天鄉試同考官七年改山東道監察御史十年三月充會

試同考官七月轉掌京畿道八月奏上年因災蠲緩過多各省買米籌補以致糧價增昂計見運抵通者已百餘萬石較蠲緩原數有盈無絀聞湖南尙議採買爲數有限無裨倉儲徒增市價諭曰前據阿林保奏請於湖南秋成後採買米五萬石撥交糧船搭運業經交部覆議今該御史稱採買之數覈計俸甲米檔僅足敷五六日之用而旗丁搭運轉未能攜帶貨物藉需餘潤且年歲豐歉不齊糧價賤無定若不通盤覈計恐致有妨民食著交戶部妥議看來阿林保奏採買之處格礙難行卽行議駁可也尋命巡視通州漕務十一年六月劾楊村通判廖雯菁昏憤不職縱令胥役家人勒索糧船起剝規費鞠實褫職十月遷刑科給事中十二年六月充江南鄉試副考官八月丁母憂十四年服闋十五年補禮科給事中十六年奏參湖南學政徐松乘轎入樞星門每試各屬發交詩文苛派重價需索紅案陋規縱容家丁凌辱士子所出題目割裂聖經各款上命工部左侍郎初彭齡會同巡撫廣厚訊明褫松職遣戍烏魯木齊十七年三月兩廣總督蔣攸銛奏慎畛品識兼優才可大用請特發粵省八月授廣東惠潮嘉道十九年遷廣西按察使二十年遷廣東布政使二十三年擢廣西巡撫二十四年劾桂林府大墟同

知趙椿刑訊婦女致傷自縊論如律先是兩廣總督蔣攸銛廣西巡撫慶復以賀縣界連粵東湖南水陸交錯盜賊出沒於二十年奏准暫添兵弁分駐各卡五年後察看情形酌撤二十五年九月慎畛奏盜匪根株未淨弁兵不宜遽撤仍請留緝以靖地方十月已革隆林營千總全玉挾該管官遊擊曾勝揭革之嫌謀殺其父曾謙審明請卽行正法均從之代理土田州州同郁獻琛將行竊未成賊犯濫刑致斃奏請革職嚴審上命查此外有無任性苛酷之處因訊出代理遷江縣時刑責婦人以致羞忿自盡郁獻琛遣戍新疆道光元年四月奏獲宜山縣聚眾結會匪犯廖五桂藍耀青等宜山有新舊二墟藍耀青居新墟結添弟會惑眾斂財屢擾舊墟廖五桂規奪其利擲龍虎會設平治大元帥通議司名目私雕假印編造逆示令富戶借給銀米與新墟角慎畛親往督辦悉伏誅時粵西各州縣匪徒結添弟會者甚夥慎畛飭屬嚴捕先後獲趙興奇蔣五益唐之莪姚廣王亞喜鄧望受趙宗義劉玉隴等寘之法上以直省攤捐易滋流弊命各督撫清查革除五月奏言粵西地瘠民貧州縣辦公經費不敷不能不酌議幫貼至窮員苦差共相依助亦所不免均視缺分之大小廉俸之多寡分別定數尙無虧那情弊但各官

養廉無多攤捐不宜常有減官吏一分之浮費卽留百姓一分之實惠報聞粵西營汛墩房每屆修理向於各州縣養廉內攤扣積款既多不免各圖省費遷延不報慎畛奏查各營房共一千二百四十二所坍塌者七百有四酌中估修需價三萬七千餘兩請動支庫存文職空缺歸公養廉一項停止攤捐下部議行六月劾代理全州州同王任遠濫刑斃命論如律二年擢閩浙總督三年二月兼署福建巡撫延平建甯邵武汀州四府山深地僻路徑紛歧漳泉江廣人租山蓋廠不下十餘萬奸民溷迹其中勾黨結會又有擔匪丐匪各種或受雇挑貨中道竊逃或假名求乞曠野肆搶甚至糾集衆多擄人勒贖商民咸受其害先經總督慶保奏准於海洋緝匪經費內撥銀六千兩爲陸路捕盜之用而州縣慮報銷駁減動致賠累均觀望不敢請領捕務日形廢弛四月慎畛奏緝拏匪犯按名懸賞購線以及兵役飯食委員薪水需用浩繁所撥銀數本屬不敷請仍歸海洋原款別於灑帑餘息內每年一萬兩由督撫覈給並免報部覈銷得旨允行絲是陸續奏獲首匪闕春喬大飯甌等分別正法尋劾浙江提督沈添華縱逸乖張難勝總統之任命浙江巡撫帥承瀛鞠實褫其職九月奏浙江雨水過多糧價增長閩省早收豐

稔臺灣餘米可以出糶請暫停海禁兼免征稅從之旋以朝鮮國遭風難夷赴京未經派員護送下部議處四年正月以噶瑪蘭處臺灣極北負山臨海地勢險要奏改艋舺營遊擊爲水師參將兼轄噶瑪蘭添設都司千總各一員外委二員撥臺灣城守嘉義艋舺三營兵三百駐防七月以閩安縣之琅琦島爲福州門戶島長三十餘里居民二千餘家奸徒私設牙行招引商船接贓濟匪奏移閩安協都司千總各一員兵二百巡察十月奏臺灣水陸官兵令臺灣道會同總兵管轄均如所請十一月奏閩省承造金州戰船天津剝船例價不敷每歲各道府州縣攤墊銀五千餘兩請於灑帑內撥六萬兩生息以資津貼免其派捐允之十二月奏彰化縣所轄水裏埔裏兩社係在生番界內地土膏腴生番不諳耕作又無農具招熟番往墾因而民人共生覬覦查生番地界向以堆築土牛爲限民人樵採例禁侵越雖熟番氣類相同而近來漢民與熟番交契結媼者頗多恐藉此展轉勾引溷雜難稽或因生番懦弱逞強欺占固非體恤番黎之道且生番野性難馴動輒爭鬪或致釀成巨案尤不可不防其漸見令各社屯弁將熟番槩行召回請於集鋪內木柵二處設專汛巡防毋許番民擅自出入從之五年正月奏明臣黃道

周應從祀聖廟兩廡下部議行九月調雲貴總督六年五月奏貴州古州鎮總兵馮聯科輕率任意降補都司貴州郎岱同知司爲善侵用官帑償鋪戶積欠旋因虧空被參以債主偪那稟請追辦經貴陽府知府色卜星額並無驚擾市肆滋累無辜蘇明阿劾以徇庇妄爲褫職上命慎畛覆鞫色卜星額並無驚擾市肆滋累無辜情事復其官是月卒諭曰雲貴總督趙慎畛持躬清介辦事勤慎由翰林科道出任監司前在嘉慶年間蒙皇考仁宗睿皇帝擢授巡撫朕御極後簡用總督旋由閩浙調任雲貴方以邊陲劇要特資倚畀遽聞溘逝殊深軫惜趙慎畛著加贈太子少保銜照例賜卹任內一切處分悉予開復應得卹典該部察例具奏伊子戶部候補主事趙敦詩著加恩於服闋後仍以戶部主事遇缺卽補尋賜祭葬予諡文恪入祀名宦鄉賢祠子敦詩二品廕生官陝西道監察御史降七品京官敦訓山西黎城縣知縣敦詒鄰縣教諭

胡克家

胡克家江西鄱陽人乾隆四十五年進士以主事用籤分刑部五十年補主事五十六年遷員外郎五十八年升郎中五十九年充廣東鄉試正考官六十年二月

京察一等三月充會試同考官五月遷廣東惠潮嘉道嘉慶七年博羅縣有重犯越獄知縣劉嘉楨匿報克家未行揭參部議革職上以克家罪止失察從寬改爲留任八年調河南開歸陳許道九年三月衡工合龍賞加按察使銜遷湖北按察使十一年遷江蘇布政使十四年二月兼署江蘇按察使三月擢刑部右侍郎六月授漕運總督七月因江蘇候補知縣李毓昌秉公查賑被山陽縣知縣王仲漢毒斃以自縊捏報事聞上以克家時署臬司此等重案未經指駁敕部嚴議尋照部議革職留河工效力十二月授江蘇淮安府知府十六年正月遷淮揚道五月全漕渡黃克家隨同催儻迅速賞加一級九月擢江寧布政使十二月挑築南河李家樓各工總督百齡請留克家在工督率上允之十七年擢安徽巡撫十八年因豫省逆匪滋事安徽潁亳一帶毗連豫省調兵防守奏請捐廉協濟軍餉得旨俞允賞加一級二十年八月因湖北訪獲麻城縣教匪孫家旺供出教頭李珠朱元等俱住安徽阜陽地方克家拏獲李珠究出匪黨王三保徐良璧張烈文等分別懲治奏入上嘉之九月教匪金悰有之徒方榮升等編造逆帖遣人散播經百齡於安徽地方訪獲克家以舊曾辦金悰有傳教之案至是將餘犯緝獲解交百

齡辦理復以失察奏請議處諭曰此案編造逆詞首從各犯皆在該撫所屬之和州巢縣一帶該撫未能早行訪出查拏該省從前曾經辦理金悰有傳習邪教一案此次散播逆詞之人卽其餘黨該撫亦未能先就舊案查覈跟蹤躡緝逮經百齡委員訪明已將首從各犯拏獲該撫始檢查金悰有原案內將原擬杖責之朱上忠等二十四犯悉數緝拏殊不知金悰有傳教之案前已辦結此次方榮升倡造逆謀其句結黨與其多不必盡皆前案擬罪之人如散帖之嚴士隴等皆不在此二十四犯之內其與知逆謀者雖前案無名必應嚴拏重辦其不知逆謀者豈能於前案枷杖之上又復加罪胡克家事前旣不能盡心查辦事後徒涉張皇何不曉事至此卽交部議亦屬虛文再不激發天良定治重罪愼之見在此案有百齡親自督審自能詳細窮究胡克家不必交部議處著在該省督率各委員一有百齡審出案內要犯卽迅速捕獲解交百齡歸案審辦毋稍疎懈總之方榮升謀逆散帖情罪最爲重大其金悰有舊案並非此案要緊關鍵該撫毋庸牽引枝節以自掩其咎也二十一年四月調江蘇巡撫九月以錢糧徵解延玩經戶部參劾諭曰江蘇各屬節年虧空銀兩上年甫經釐定章程未能立限彌補今本年應徵

上年新賦江甯蘇州兩藩司所屬又共未完銀四十五萬餘兩該省上年收成豐稔斷無如許民欠顯係各該州縣掩飾那移以完作欠該撫並不據實嚴參扶同徇隱胡克家著交部議處旋議降一級調用上從寬改爲留任二十二年五月署丹徒縣知縣楊超鐸因京口駐防閒散卹勒興阿之妾自縊身死一案超鐸串通丁役得贓致卹勒興阿亦情急自盡旋經被控奉旨將超鐸革職嚴訊克家復偕兩江總督孫玉庭奏請將該革員拏問諭曰此案前已降旨將楊超鐸革職交松筠胡克家會同嚴訊確情定擬具奏嗣因松筠回京該省督撫接辦所有案內行賄免驗各情形已據衆供確鑿楊超鐸恃無質證狡供不認該員業經革職儘可嚴行刑訊乃復專摺齎奏請將楊超鐸拏問豈非故延時日任伊彌縫實屬因循疲玩可惡已極此摺係胡克家主彙孫玉庭會銜胡克家著交部議處旋議降二級調用上從寬改爲留任九月卒諭曰胡克家供職多年曾經獲咎經朕棄瑕錄用復擢至江蘇巡撫茲在任病故無庸給予卹典念伊母年已八十有七家無餘貲著加恩將胡克家攤賠王營減壩未完銀二萬六千四百兩零悉予寬免卽令其子奉伊祖母回籍侍養以示矜卹

朱勳

朱勳江蘇靖江人由監生捐納按察使經歷分發陝西乾隆五十三年借補咸陽縣縣丞五十五年升咸甯縣知縣五十九年遷乾州直隸州知州六十年擢同州府知府嘉慶元年剿滅將軍山賊匪勳在事有功賞戴花翎五年二月升延榆綏道閏四月調陝安道七年大兵殲淨苟文明股匪勳辦理軍務出力賞加按察使銜八年授按察使十年以秋審罪名失入部議降調上加恩改爲降五級留任尋遷布政使十一年三月以失察匪徒高種秋等惑衆滋事下部議處尋議降調命改爲留任十一月丁母憂十四年服闋復授陝西布政使十八年九月護理巡撫疏請建陝西甯陝廳文廟學署從之十月實授巡撫十二月奏言岐山縣三才峽有匪徒持械掠食旋竄至熬厓縣濁谷河一帶裹脅至八九百人小王湖亦有賊衆三百餘人滋擾上命陝甘總督長齡帶兵剿辦諭曰該匪等藉荒歉爲詞輒敢糾集多人肆行搶掠但一經該撫出示曉諭該匪等卽行具呈申訴似尙有悔罪之心朱勳自當再行曉諭安撫俾匪夥立時解散不致大煩兵力勳尋奏南山匪徒裹脅至三千餘人各路分竄勢漸鷗張上命固原提督楊遇春前往與長齡協

剿長齡未到以前與勳會商剿辦十九年正月上以勳等意存招撫未能及早撲滅諭曰朱勳久任陝西藩司擢任巡撫南山距省甚近饑民乏食滋事該撫不能先事豫防治焚掠肆擾又未能立時剿辦意存招撫其所派招賊之人旋經被賊戕害辦理種種不妥亦與溫承惠長齡無異姑令戴罪自贖如果糧餉無誤防堵嚴密俾大兵得以迅速竣事尙可賞其前罪若怠玩貽誤不得寬貸矣二月剿除賊匪淨盡各路蕩平勳偕長齡楊遇春奏入諭曰朱勳在陝年久失察匪徒滋事咎有應得但念此次賊匪因陝省兵將遠出始生心滋事該撫辦理軍火糧餉毫無貽誤並在峪口督率防堵朱勳除將功抵過外仍著加恩交部議敘尋疏陳辦理撫卹情形得旨此次南山匪徒滋事皆由年歲荒歉饑民無所餬口因而聚集滋擾兩月以來就戮纍纍雖死者皆係亂民情形實亦可慘該撫不可不仰體朕意妥協經理二十年正月查拏孝義廳滋事匪徒並究出傳教首犯均卽拏獲上嘉之九月以捕獲傳教匪犯師未明下部議敘十二月年班回子伯克沿途行走遲緩查詢經過陝西等處並無護送大員上以勳因循疲玩怠忽遲延下部議處尋議降二級留任道光元年九月護理陝甘總督十一月以華陰縣民嚴文潮故

殺一家二命一案勦擬以斬決梟示經部依律改擬斬監候自請交部議處部議降二級調用上從寬改爲留任二年五月以屬員承審渭南縣民柳全璧毆斃人命重案乖謬得贓漫無覺察經欽差工部尙書文孚內閣學士辛從益奏劾諭曰朱勦歷任有年於地方人命重案任聽屬員顛倒是非舞弊枉法負恩溺職莫此爲甚必應先行嚴議部議革職命來京以四五品京堂候補十月賞三品頂帶休致九年卒子景刑部員外郎

曾煥

曾煥江西南城人乾隆四十六年進士改庶吉士四十九年散館改戶部主事五十一年丁父憂五十三年服闋補官充軍機章京五十五年遷員外郎五十七年京察一等授兩淮鹽運使嘉慶十年以失察楚省漢口岸擡價病民部議降三級留任上以漢口距淮稍遠咎有可原准其抵銷十二年升湖南按察使十四年正月調湖北按察使十二月遷廣東布政使十五年洋盜烏石太等被擒餘黨悉降煥在事有功交部議敘二十年擢貴州巡撫奏言黔俗苗獠雜處不知禮義謹於聖諭廣訓各條後附以解說刊發城鄉民戶廣爲化導又奏屯軍自乾隆二年按

戶授田護衛苗疆最爲良法日久曠廢軍田有與苗田界址不明者悉行劃撥擬定章程一稽察倉貯以免續虧一移居屯堡隨時編入冊籍一衛弁應酌定考察舉劾之法以示勸懲一各衛小旗散軍出缺歸廳員驗放以昭覈實一屯軍原授田畝應換給新照以杜隱混一各軍新墾畸零地土請免升科以示體卹又奏近黔之湖南芷江縣六里地方民人請改歸黔省管轄以免遺誤均奉旨准行二十一年以母老乞養歸尋因廣東藩司任內失察所屬交代逾限部議降三級調用上加恩改爲補官日降三級留任二十四年丁母憂道光二年服闋閏三月授兩淮鹽政仍准用二品頂帶五月奏請兩淮運庫臣前任運司時於嘉慶十一年清查一次維時庫貯無虧轉轄之款亦少迄今已閱十六年且節年滯銷商本竭蹶輾轉撥墊紛如亂絲請以臣到任之日扣起溯查至前次清查冊止覈明懸欠各款若干未運積引若干造具清冊依原定年限按綱分別帶徵嚴催各商請運庶殘積漸清庫款得歸實貯上是之八月奏准北行鹽章程向係三引併爲一包嘉慶二十五年改作兩引併包商力益疲請仍復舊章又請將新鹽兩引灑帶殘鹽一引合爲一包督各商搭運以廣行銷上俱允行三年奏清查各款完竣並立定

章程下戶部議奏諭曰自甲申綱奏銷爲始將該年正雜帑利等銀專疏具題至分帶積年銀款亦一律題報此後必須年清年款如再新舊牽混積壓惟該鹽政是問五年奏彙覈准南北綱食各岸銷鹽總數諭曰兩淮鹽務積疲已久近年以來曾經嚴立章程緝拏梟販官引自應暢銷乃此次各岸缺銷額鹽尙有二十餘萬引之多豈得以比較道光三年分較數稍有加增便可塞責該鹽政務當認真課運實力督銷以裕國課六年三月以引鹽加斤奏請展限先是淮鹽每引例重三百六十四斤因商力拮据奏准每引加鹽十斤以三年爲限至辛巳綱止煥以竈產未豐再請展至丁亥綱爲止從之四月召回京諭曰朕以曾煥前在兩淮鹽運十餘年又歷任巡撫藩司特命以二品頂帶補授鹽政期資整頓朕御極之初已將每年玉貢折價銀兩免其交納並免節年玉貢餘銀一百六十餘萬兩迨曾煥抵任後又奏請將商捐未解銀五百十四萬兩全行豁免其餘隨時奏請調劑無不加恩俞允原冀從此認真清釐庶鹽務日有起色且令久於其任俾得從容辦理乃曾煥在任四年有餘並未能設法整飭一味因循了事若稍有天良之人斷不致此著以五品京堂候補以示薄懲七年引病乞歸奉旨不准給假十一年

卒子協均內閣中書

康紹鏞

康紹鏞山西興縣人嘉慶四年進士分發兵部候補主事十年充軍機章京十五年補主事十六年升員外郎上巡幸五臺紹鏞進詩冊賞文綺十八年五月升郎中十二月擢鴻臚寺少卿會教匪林清等煽亂直隸奸民響應大名民司敬武馬泳幅等避赴錦州過山海關官兵執之指爲逆黨欲藉以邀功刑倡誣服副都統額勒金布輕聽入奏上命紹鏞偕內閣學士文孚往鞠之得其狀乃劾額勒金布等並論弁兵如律十九年二月遷通政司參議閏二月命偕通政司副使琦善詣江蘇鞠睢甯監生王璽京控命案將毆殺王塾之史嘉言依律處罪七月遷大理寺少卿尋外遷安徽布政使疏言皖省各屬倉穀虧短逐款查覈酌議章程諭確實查明分別追補二十一年四月擢安徽巡撫十一月以安慶等六府水災請賑恤並緩其賦允之二十二年四月請以全椒縣知縣楊國榮調宣城縣上以國榮曾屢呈吏議申飭之九月以臬司獄囚逸下部議處十二月請鼓勵清查倉庫局員時虧帑尙未補完傳旨申飭二十三年以太湖等縣被水請緩徵從之二十四

年二月以宿松縣民王金秀被盜劫案懸三載下部議處四月調廣東巡撫十一月奏歸善等縣水災請賑恤緩徵允之道光元年六月召還京八月署禮部左侍郎命偕吏部尙書松筠往浙江讞獄旋丁母憂四年服闋二月署禮部左侍郎三月授廣西巡撫九月因審那馬司土民黃添保等京控案請禁革土司科派擾累並懲土民土目之逞刁捏控者尋有匪徒許光勳等聚衆拜會誅之又奏粵西盜風未息皆由舊案逸匪潛匿勾結所致隨派文武員弁嚴緝獲逸犯二百餘名請鼓勵承緝之州縣佐雜上俱從之五年調湖南巡撫先是御史賀熙齡奏洞庭湖面請復舊規委員巡緝敕督撫查奏紹鏞偕總督嵩孚查勘湖面遼闊委員實難周徧且恐地方官恃有委員稽查轉致觀望懈弛請按照界址責成濱湖州縣營汛各於所轄段內督率兵役遇有賊匪互相堵拏並隨時遴員往察勤惰責成既專巡防日密可期匪徒盡除湖面肅清於六年十月奏入上從其議十一月奏醴陵等縣被水衝坍衙署倉庫籌款修建應賠倉穀銀兩酌議分限賠補允之十二月以起病知縣奏請調署苗疆要缺於例不符飭之七年奏辰沅永靖道轄苗疆距省較遠請將尋常遣犯交巡道勘明轉詳上以辰州府距省尙近命照舊辦理

餘許由道審轉八年十月以醴陵等縣被水請緩徵又屯田被旱請緩徵並借支儲穀濟困皆得旨允行十二月奏桂陽州屬石家巖長富坪二處鉛廠嘉慶年間定解鉛二十五萬斤近來產砂短少祇可採辦五萬三千斤請減額辦解得旨姑允所請嗣後仍照部議定額不得短絀十年正月奏屯田被水丁力不繼請將應運糧船暫停造運從之六月召來京九月授光祿寺卿十一年京察諭曰康紹鏞前在湖南巡撫任內諸事廢弛不能整頓著降四品頂帶休致十四年卒子兆奎正二品廢生刑部郎中

陳鳳翔

陳鳳翔江西崇仁人由監生充國史館謄錄議敘縣丞乾隆五十年揀發直隸河工差委五十二年補直隸新城縣縣丞五十四年升玉田縣知縣六月丁母憂五十六年以前在玉田縣任失察流犯田自桐逃逸鐫職五十八年總督梁冑堂奏令自備資斧赴豐潤營田效力五十九年永定河漫口奏委挑挖引河工竣送部引見奉旨著發往直隸以永定河沿河知縣用嘉慶元年四月奏補寶坻縣知縣十二月調天津縣知縣五年捐升知府閏四月經總督胡季堂奏留本省差委上

允之六年二月補永平府知府六月擢永定河道時大雨連朝盧溝橋一帶決口四處諭令鳳翔卽赴工次隨同侍郎那彥寶辦理堵築事宜九月二十三號壩工合龍賞戴花翎十月北上頭工合龍全河復歸故道交部議敘九月請假省親上允之八年三月回任供職十月丁父憂諭曰陳鳳翔每於差次召對奏及伊父年老多病實因身受重恩見司河防之責不敢遽請終養祭其情詞甚屬真切茲陳鳳翔已聞訃丁憂殊爲可憫著於直隸藩庫內賞給銀二百兩卽令回籍作爲料理喪事之費十一年六月兩江總督鐵保等奏請發往江南河工委用得旨允行七月因永定河隄工需員經理上以鳳翔辦理永定河漫工本係熟手仍授永定河道十月直隸總督裘行簡卒後署總督秦承恩未經接篆鳳翔奏永定河北岸五工漫口工程已經合龍並以前任道員朱應榮等在工出力奏請照例開復其餘出力各員奏懇恩施上以鳳翔越分奏請停其議敘十三年三月督辦康家溝抄河堵築合龍上以辦理妥速恩加一級七月永定河秋汛安瀾上以鳳翔防守得宜賞加按察使銜十四年七月擢河東河道總督九月奏黃河南北兩岸險工林立前任河臣吳璥奏請於歲料外酌辦備防稽麻以資搶險臣查水勢遷變靡

常工段亦平險時異與其普添十二廳備防之料以待險工之來莫若暫儲十二廳辦料之需以濟險工之用且防料之設原以濟歲料之不敷豈有十二廳均爲不足而均險工之理卽有險工儘可先用歲料俟用贖無多再爲採買雖價值稍昂較之各工分貯不急之需究屬稍省臣察看情形祇須於豫省藩庫撥銀八萬兩以五萬兩貯開歸庫俟桃汛後計用過歲料若干酌量添備或無需絲毫不准動用奏入命如所請行十月奏微山湖水勢短缺來歲重運經行不敷接濟請導引江境蘇家山閘黃水以濟運行諭曰所議啟放蘇家山閘仍係以黃濟運究非善策萬一湖底漸有淤墊是目前之獲益無多而將來之流弊滋甚自宜加倍詳慎著吳璈徐端會同陳鳳翔前往履勘尋偕江南河道總督吳璈副總河徐端奏如前議諭曰此事前經陳鳳翔具奏朕卽慮河身淤塞未可輕議舉行特交吳璈等會議伊等亦知引黃濟運亦滋流弊僅爲一時權宜之計殊非長策據云蘇家山閘黃水由毛村河紆折歸湖浮沙逐漸澄清不過湖邊受淤試思湖邊既有淤墊自必逐漸淤及湖身將來夏令雨水較多盛漲之際又焉能保其不挾沙而下日久湖身淤墊難以容蓄必致不能濟運關係匪輕著吳璈徐端會同陳鳳翔再

行悉心詳議或他處另爲疏濬以益湖瀦於來年重運無誤又不致淤墊微湖方爲妥善十一月奏會勘蘇家山閘引黃入湖濟運情形並擢節減估挑渠築壩銀兩妥速興辦諭曰旣據該河督等會同馳往該處細查情形悉心籌議尙不致有流弊著照所奏妥速辦理於開放蘇家山閘後務使沙泥停於引渠清流達於湖內得收澄清去穢之用以濟來年重運一俟湖水收足卽應將蘭家山壩蘇家山閘迅速妥閉爲要至應需工費准其於山東藩庫撥銀八萬兩解工備用十二月因河標遊擊李永清請補河標參將經兵部以該員原籍在五百里以內議駁鳳翔仍行奏請補用上責其非是申飭之十五年五月奏汶河水勢微弱請酌放蜀山湖閘以濟漕運諭曰蜀山湖瀦水向來俟江廣幫船到境始行開放今已先期啟閘將來江廣船來又何所恃以資接濟因思南河及天津運河見用疏淤器具爬沙頗有成效今發去圖式東河亦可做照行之未始非疏濬之一助至利運之道總以瀦蓄水源爲主該督等務當豫籌全局多瀦河湖諸水庶不致重運過境動形棘手六月以上河運通判馮召棠啟閉失宜致鎮江前後兩幫糧船行走遲延奏參諭曰陳鳳翔奏參該員啟閉失宜其咎實在應得殊不知該河督辦理蜀

山湖濟運一事啟放亦屬失宜蜀山水本應瀦蓄充盈以備江廣重船到時用資浮送今先行啟放將來江廣重船經臨又將如何接濟該河督仍當悉心講求多方籌畫俾糧船隨到隨行不可坐失機宜以致延誤干咎十二月調江南河道總督諭曰南河敞壞已久河湖受病日深而究其受病之源皆由底高閘墊所致蓋黃水挾沙而行非清水不能刷滌而欲多蓄清水非堰工堅固不能保無漫溢之虞此時全河大局全在蓄清敵黃去其淤墊使清水無旁洩之途黃河絕倒灌之路方能日有起色至蓄清要法則先須修復高堰隄工所有風掣石工四千餘丈亟須大汛前一律修整完固然後有恃無恐陳鳳翔到彼卽速購料興工將堰盱工程剋期辦竣庶將來清水力旺不致旁洩以之刷黃利運可收專注之功再此時禦黃壩旣議堵築必當時黃水涓滴不能入運方克有濟夫漕河本屬相需今因利漕先以病河權其輕重甯使暫時剝運渡黃必不可復用借黃濟運之計以致倒灌增病陳鳳翔惟當力持定見通盤籌畫勿稍遊移仍將河口積淤設法消除俾河身日低清水日高全力下注因勢利導實爲尋源探本之法十六年正月奏查明河湖水勢高低尺寸並僱辦挑運各情形諭曰陳鳳翔由知縣經朕施

恩拔擢不數年間用至河道總督伊素能實心任事朕亦深信不疑見在簡調南河任大責重伊到任後亦自必竭誠經理圖報朕恩總之此時扼要機宜全在蓄水敵黃四字湖水得蓄高之效使能全力敵黃黃水無旁洩之時自必迅速達海如此不但以清刷黃並可以黃刷愈深則黃水永無壅潰之虞湖水永無泛濫之慮卽運河之淤墊更當不空自除而其辦法全在隄堰堅固多蓄清水實爲緊要關鍵所有見在將寶應運河以下四十里挑挖淤沙及補砌高堰石工以及酌啟禦黃壩並豫籌堵備各事宜均著照所請辦理又奏自河口至寶應一帶應辦工程分別緩急儼辦情形一添禦黃壩外鉗口壩一挑禦黃壩內及運口以下河身停淤一修運口頭二三草壩壩門一挑寶應至界首河身淤墊一加幫運河兩岸埽段一加培寶應城外及淮關土隄一補砌臨湖甌石各工一挑邳宿運河一堵閉竹絡壩挑壩頭下引河仍盤裏裏壩頭以備啟放減洩以上皆刻不可緩之工見已派員分投辦理至裏河廳之徑河開揚河廳之黃浦開兩廳境內涵洞高堰大隄後之二隄皆應次第興辦奏入諭曰陳鳳翔所奏急辦各條均著照所請行至其餘所奏次第應辦之工內加培高堰二隄一事前經吳璥條奏發交廷臣集

議未經准行高堰保障淮揚自須加意籌辦從前碎石坦坡一事屢經議辦並曾試作有效祇緣臨湖取石甚難錢糧不無多費是以有分年辦理之說今欲改築二隄該隄形制本屬卑狹近數年來殘缺過多恐一時取土更難尤非可迅速集事著陳鳳翔再悉心體訪是否應仍辦碎石坦坡抑二隄籌辦土方尙可不致棘手通盤籌畫奏聞定議二月覆奏體訪培築高堰二隄情形碎石坦坡之制工費過繁曠日持久且上年試作坦坡處所大隄仍不免塌卸至加培二隄工簡效速今擬於一律加培之外再接再作千有餘丈得旨著卽照所奏辦理三月奏海口一帶自大淤尖起三十餘里內深僅三四尺至六七八尺不等形勢紆迴該處係在攔潮壩以外上年未能挑挖此時水淺溜水太小不無窒礙見擬將鐵籠鐵掃帚混江龍疏淤各器具雇船前往疏濬奏入得旨是亦辦理之一法但是否卽能疏濬深通暢達無阻之處亦著據實奏聞閏三月因糧艘連日行走順利上嘉其辦理妥速賞四喜玉扳指大小荷包尋奏催修洪湖石工並補砌腰洞海漫及補築掣刷土隄事宜諭曰本年糧船行走尙爲順利但藉黃水浮送究非正辦總須將湖水瀦蓄充盈能得暢出清口刷黃濟運方爲妥協而蓄清機宜全在高堰見在

陳鳳翔查催上年坍塌石工俱次第補修外復據查有土隄掣刷之處請一併派員趕辦欲使石工後有倚靠自應照所請辦理但金湯之固全在大隄該總督隨時查勘石工如有須補築之處宜加修砌勿稍怠緩庶保障更爲得力可以多蓄清水不虞旁洩五月重運糧船全數渡黃上以鳳翔專司河務濬導有方恩加二級旋偕兩江總督勒保奏禦黃鉗口兩壩已經堵合情形摺尾稱海口北岸並無人煙之地見在隄裏外面面皆水低窪之處水高於隄所有該處工程應俟秋間黃水消落時相機辦理諭曰黃水並力東注方能刷沙海口始不致壅滯豈可任其漫溢旁趨上年堵築馬港工程南北兩岸新隄係一律培築況北岸地勢本高何以轉有漫溢之水明係北岸隄工疎於防範又有缺口該督等前此諱匿不奏此時始漸於摺內透露殊屬粉飾黃河形勢全在海口深通方無他病今該處散漫若此海口正河必致日形淤阻去年挑挖工程豈不全歸虛擲乎究竟該處過隄之水係由何處漫越見由何處經行是否別有歸海之路抑仍繞歸正河入海其經由所在雖稱並無人煙亦當有確實地方著該督等卽據實奏聞見在黃河入海之路舍正河別無他途應如何趕緊堵築將水勢挽歸正河使不致海口受

淤之處著卽妥籌速辦勿再觀望遷延致滋他患六月奏海口漲水不消王營減壩土隄因大雨如注河水增長陡然坐墊口門塌開八十餘丈諭曰王營減壩於嘉慶十一年衝決後堵閉口門接築越隄以爲保障卽與大隄無異此次墊至八十餘丈之多陳鳳翔不能督率廳汛員弁先事防護其咎甚重乃本日摺內竟視爲尋常事件僅以一奏塞責並不自議處分又不將廳汛員弁嚴行參辦實屬負恩溺職本應革職治罪姑念陳鳳翔到任未久革去翎頂交部嚴加議處部議革職上加恩改爲革職留任尋偕勒保覆奏王營減壩旁注實由倡緊水無他路可行致有漫溢之患將來秋深水落只須修築王營減壩其海口之新隄請但保護南岸以爲民居田廬之衛其北岸毋庸修築以免偪水之虞摺內援引乾隆四十五年高宗純皇帝諭旨雲梯關外不必與水爭地等語諭曰從前雲梯關外盡係瀕海沙灘無居民村落此時馬港口外見有大廣莊小尖集響水口曹家圩張家莊等各村寨已非從前盡爲沙灘可比若如所奏將馬港口北岸無庸修築任其廢棄是使上年挑濬工程盡歸虛擲北岸居民盡付波流且北岸旣廢水勢旁洩設南岸又不能保護豈復任其廢棄置民田廬舍於不問耶設水勢散漫不惟海

口更淤卽全河亦必勢緩沙停爲惡更大其弊有不可勝言者卽如束水攻沙亦前人疏濬之一法又豈可以盡廢且雲梯關外正海口及灌河海口情形前於嘉慶十三年十二月內曾派吳璣托津等前往查勘繪圖貼說呈覽朕復加閱看馬港口以外村落瞭如指掌及本日該督所繪之圖只有竹屋數椽又無村落地名馬港口至小黃河形勢舊圖甚爲灣曲此則故爲取直顯係意存朦混希圖掩飾不能先事豫防之咎看來陳鳳翔竟有恃才妄作輕視要務光景如果雲梯關外無須挑河築隄陳鳳翔何以前此不行具奏並稱溜勢暢達上年未經估挑處所刷至十餘里可見海口並非高仰陳鳳翔並未身歷其境實因北岸業經漫溢致令海口淤墊見在束手無策反以從前挑河築隄皆屬非計之言相爲抵塞此事著交百齡會同陳鳳翔親赴海口及北湖河處所詳細履勘明確應如何辦理之處另行繪圖貼說據實奏聞七月兩江總督百齡奏王營減壩見在漫口水勢情形查河臣陳鳳翔謂上潰由於下壅海口不能通暢係據淮海道黎世序所言而詢之黎世序稟述情形又似下壅處在倪家灘新隄上下並非海口高仰之故諭曰陳鳳翔稱海口不能通暢百齡詢之黎世序則稱河身中段積淤三十餘丈其

自東窪至海口二十餘里見尙深通水深一丈有餘是陳鳳翔黎世序二人之言已不相同該處情形非親身目覩難以懸斷百齡見已起程前赴海口親歷履勘自能得其實據統俟查明熟籌妥計詳細具奏尋以徐屬邳蕭廳境縣拐山李家樓兩處因大風異漲河水漫隄塌墊請將專管各員交部議處並自請嚴加議處百齡奏查勘海口上年未經挑挖處所尙係深通惟中間復挑之處轉已涸成平陸詢之河兵土人等僉稱去歲挑河所挑之土卽在河灘堆積今春黃水漫灘衝刷土山坍塌仍淤河內又挑工盡處之攔潮壩一道放水時壩根起除未淨以致阻梗水中黃水泥沙俱爲填塞攔阻停淤特甚本年凌汛後淮海道黎世序卽屢次稟明陳鳳翔批令俟秋後再行籌辦諭曰陳鳳翔身任河臣本年三月四月倪家灘一帶既有漫溢之處卽應親往相度趕早籌辦及該管道員屢經稟請伊轉視爲緩圖以致河流不暢上游漫口實係該河督因循貽誤且見據奏報縣拐山李家樓復有兩處漫口陳鳳翔著交部嚴加議處尋經部議革任上加恩改爲革職留任八月奏縣拐山漫口堵築合龍見在馳赴蕭南查勘情形諭曰此時李家樓缺口已塌寬至五十餘丈水勢甚盛急切亦難以收功陳鳳翔到彼勘明情形

卽回至清江浦協同百齡先將挑濬王營減壩以下河道並堵築減壩口各事宜
妥速籌辦尋因前在東河時將宛平縣縣丞加捐布政使理問張士鑑於未經服
滿時調赴河工奏留東河以沿河州同補用部議違例奏留奉旨陳鳳翔著交部
議處部議罰俸九箇月時因李家樓漫口河南永城夏邑虞城三縣被水江南碭
山安徽宿州以下被災更重九月諭曰百齡甫任兩江此次河工貽誤於該督無
涉皆由陳鳳翔玩視河防及各工員平日辦工草率以致漫口疊開本應將伊等
斥革從重治罪但伊等轉得脫身事外置要工於不問所有王營減壩以下挑工
堵築事宜及李家樓以下挑工著陳鳳翔徐端二人分任其事陳鳳翔等自思此
數十萬生靈橫被淹浸皆由伊等貽誤所致此時朕不卽治其罪而伊等造此重
孽天地鬼神亦豈能寬恕朕可欺天不可欺河員已造重罪尙不亟思自救耶此
時惟有倍加奮勉早拯民困於國法則可稍贖罪愆於天理亦可稍寬孽報禍福
惟視伊等自擇尋偕百齡奏減壩以下至海口淤墊河身見在興工挑挖並籌議
分消清水刷河上命將王營減壩以下與李家樓以下挑工同時並舉並發給長
蘆備辦直隸水利銀五十萬兩粵東關撥銀五十萬兩解工備用尋偕百齡奏請

撥銀一百五十萬兩如所請行十二月偕百齡奏長河放水暢行減壩合龍穩固
下游諸工一律完竣諭曰陳鳳翔身任河督疎於防範當工程報險之時經道廳
等稟請施工該河督一味節省銀兩坐失機宜以致漫溢頻仍災及數省惜小費
而貽鉅患厥咎甚重前革去翎頂姑予留任已屬格外施恩茲雖著有微勞尙不
足以贖前過姑念河督職分較大伊見無頂帶無以資統轄而肅觀瞻著加恩賞
給四品頂帶以觀後效百齡奏查明玩誤河防文武員弁請分別懲辦上以陳鳳
翔前赴工次未能訪悉前情具奏著交部議處部議革任奉旨改爲革職留任十
七年三月偕百齡奏李家樓大工合龍長河放水暢行諭曰陳鳳翔身任河臣屢
經獲咎此次與百齡同在工次奮勉出力著加恩賞給三品頂帶仍交部議敘部
議加一級上加恩改爲加一級紀錄二次五月南糧全數渡黃上以陳鳳翔辦理
築壩濟運等事先期無誤著交部議敘八月百齡奏參鳳翔自李家樓回浦後安
坐衙齋數月於禮壩要工自四月開放後並未親往查勘迨至六月水已衝動壩
下土石樁木道廳節次稟報始經察看行至高堰仍不親身籌辦僅委遊擊陳岱
堵築鳳翔復藉查陳家浦埽工遠赴海口至八月初二日始行赴壩並查河庫所

發禮壩工銀至二十七萬七千餘兩之多仍未竣工。清水大洩下河州縣被水成災。諭曰：陳鳳翔在河督任內，上年王營減壩及李家樓各工漫口，皆其貽誤所致。乃於禮壩緊要工程不及早親往籌辦，因循貽誤，糜帑殃民，此而不加懲創，尙復何所儆懼？陳鳳翔著革職留於河工交百齡等差委令當勞苦差使，其禮壩工程所用二十七萬餘兩著罰賠十萬兩，其餘交該督等照數覈辦。時淮安揚州海州等屬田地受淹，邵伯一帶各村莊被水尤重。諭曰：此皆由陳鳳翔辦理不善，以致湖水旁洩過多，下游民田廬舍均被淹浸。陳鳳翔見在河工效力，伊於河工事措置乖方，從前曾任府縣，豈地方事務亦不能辦理耶？著卽令其前赴淮陽辦理災務。百齡奏禮壩急難堵合，清水宣洩過多，見辦減黃助清，並奏鳳翔急於開壩，遲於堵築，以致辦理棘手。請旨嚴加議處。並自請處分。諭曰：本年李家樓壩工合龍之後，河流暢順，海口深通，黃河兩大隄又俱保護平穩，溜勢直走中泓，再能清水暢出，刷沙則全河積病漸除，實爲南河極好機會。乃陳鳳翔不知守蓄清定見，怠玩乖舛，貽誤全河大局，殊堪痛恨。著百齡將陳鳳翔在禮壩工次枷號兩箇月，示衆如禮壩刻期堵合，再移往他工限滿，疎枷發往烏魯木齊效力贖罪。十月鳳翔

遣家人赴都察院呈訴被參緣由上命協辦大學士吏部尙書松筠戶部侍郎初彭齡馳往江南查辦十一月松筠初彭齡奏查訊情形前升任淮揚道黎世序稟開智禮兩壩鳳翔與百齡俱經批准又鉗口壩不應早開鳳翔曾經批駁有據又鳳翔查出葦蕩營柴束斤重短少之弊係百齡委用江甯鹽巡道朱爾賡額捏稱節省朦混並恐有冒銷工本等弊請將朱爾賡額革職拏問嚴訊諭曰前百齡奏稱所採蕩柴俱係堅粗適用今查明霉濕且夾帶雜草充數而斤重又大懸絕是前奏所稱節省銀四十餘萬兩俱係捏詞謊報朱爾賡額以少報多妄冀邀功顯有弊竇著革職拏問交松筠等嚴鞫至啟放智禮兩壩緣由黎世序稟請開壩百齡既有批示著黎世序呈出百齡所批是何詞語著松筠等查明秉公覈辦本年智禮兩壩彼時是否應開開放後陳鳳翔堵閉遲緩又於獲罪辨訴其咎固屬難道若百齡前曾批准迨奏參時並不聲敘全行委過於人含混入奏亦著據實奏參尋松筠初彭齡奏審明黎世序請開智禮兩壩百齡所批有預籌減洩甚合機宜之語百齡於初參摺內漏未聲敘所參陳鳳翔自李家樓回浦後安坐衙齋數月一款見經傳訊各河員僉稱鳳翔自三月回浦往來三閘三壩並禦黃壩等處

督催糧船渡黃又親赴中河搶險並到顏家河汰黃堆等處督工日期與陳鳳翔所供無異其朱爾賡額因運柴與鹽請放鉗口壩原稟陳鳳翔當經批駁嗣因准徐道王逢源又稟請開放百齡始行批准朱爾賡額辦理蕩柴捏詞邀功朦稟百齡毫無覺察且於原參陳鳳翔摺內未將曾據准揚道稟請開放智禮兩壩批示情節聲敘均有未合應請將百齡交部嚴加議處朱爾賡額發往伊犁效力贖罪諭曰陳鳳翔所呈蕩柴弊混一款見今松筠等查明朱爾賡額經百齡委辦蕩務捏詞邀功百齡被其欺朦率以節省帑銀數十萬輕改章程冒昧入奏已有應得之咎至敢放智禮兩壩百齡於黎世序稟請開放時批詞有豫籌減洩甚合機宜之語卽與陳鳳翔批准敢放無異迨後見湖水宣洩過多欲全委過於人具奏時並不與陳鳳翔合詞請罪輒將陳鳳翔嚴參僅自請議處而於曾經批准情節又匿不聲敘且所奏陳鳳翔自李家樓工竣後安坐衙齋數月不赴工次一節亦查訊在工各員事屬虛誣百齡陳奏不實著革去太子太保銜拔雙眼花翎准戴單眼花翎降爲二品頂帶陳鳳翔於獲罪後遣人赴訴若所控虛誣自當加重治罪今蕩柴弊混情形伊本工竣奏參因革職呈控全實餘亦實非虛捏陳鳳翔著卽

日疎枷仍發烏魯木齊效力贖罪朱爾廣額著在葦蕩營枷號三箇月滿日發往伊犁十二月鳳翔在清河縣地方病故經初彭齡奏聞並稱伊有上年罰賠山盱壩工及從前攤賠天津海稅剝船各款銀兩未經措完請將繳出田房契紙先行估變備抵餘飭家屬陸續設法措繳十八年二月諭曰陳鳳翔罰賠山盱壩工銀十萬兩除已繳五千兩外尙有未完銀九萬五千兩見在伊已身故念其家貧子幼除將繳出田房契紙飭交原籍地方官估變抵交外其不敷之數著百齡黎世序查明同案獲咎各員攤賠歸款其應賠天津海稅並剝船等項銀四萬四千餘兩本係分內扣抵廉俸見在亦未扣完並著溫承惠查明照例攤賠完繳

清史列傳 卷三十四

大臣傳次編九

伯麟

伯麟瑚錫哈哩氏滿洲正黃旗人乾隆三十三年由繙繹生員考取筆帖式三十六年中式舉人補兵部筆帖式四十三年擢右春坊右贊善四十五年轉左贊善四十八年二月遷右中允五月轉左中允五十年升翰林院侍講五十三年轉侍讀充日講起居注官咸安宮總裁五十四年五月遷詹事府少詹事七月升詹事五十五年充教習庶吉士五十六年四月兼公中佐領十月擢內閣學士兼禮部侍郎銜五十七年正月兼鑲白旗蒙古副都統八月遷盛京兵部侍郎十二月調盛京戶部侍郎五十九年兼管奉天府府尹事務六十年緣協領永書擅責巡檢管景穆均請解任質審上以伯麟袒護旗員下部嚴議尋議降調上加恩改爲降二級留任嘉慶三年正月調兵部右侍郎二月授鑲藍旗漢軍副都統四月授山西巡撫四年以山西巡撫例兼提督銜賞戴花翎五年請定口鹽池鹽運行界限

不使混入淮蘆引地下部議行時方剿辦陝西邪匪命調大同兵二千赴營協剿嗣以兵力疲軟且多逃逸褫花翎九年二月京察以久任封圻循聲素著下部議敘五月上以晉省鹽務自改歸地丁後鹽禁廢弛致蒙古鹽乘閒侵越諭伯麟籌辦尋奏改歸商運鹽價必增更恐販運貧民失業未便議復至蒙古鹽入口應於磧石上下派員嚴查從之七月擢雲貴總督十年因前在山西巡撫任內失察大同鎮總兵恩承阿侵扣馬乾銀部議降四級調用上改爲降五級留任時緬甸與暹羅屬夷戛于腊構釁求助於順寧府屬孟連土司土司刀派功私率土練往援遇害失其印伯麟以刀派功禍由自取勿用興師問罪惟印信係天朝所頒檄令查繳旋經暹羅繳回先後奏聞上俱譴之十一年緬甸遣土目孟幹呈請預期進貢伯麟知其爲求助地以非朝廷柔遠至意卻之後緬甸爲戛于腊所敗果來乞援伯麟拒弗應戛于腊旋亦敗走緬甸兵次車里土司界伯麟令守土者戒嚴並移文緬甸訓戒之緬夷遂退十三年緬甸四大萬頭日稟請九龍江三板納地伯麟以外藩頭目不得徑稟督撫飭屬駁回並示以十三板納俱屬內地毋生覬覦上嘉其得體十四年入觀賞還花翎十七年五月騰越邊外野寨頭目拉幹糾

衆焚劫傷斃兵弁伯麟派員率兵練進剿野夷將拉幹縛獻事平七月奏言邊外野夷猱匪乘閒搶掠從前設土練防範嗣經裁撤請於緬寧騰越等處要隘照額復設一千六百名撥給曠土耕種如所議行先是僧人銅金從猱犯李文明滋事後經悔罪投誠更姓名曰張輔國充南興土日至是暗招漢奸勾結猱衆肆行侵擾伯麟檄調不至馳赴緬寧督各土司會剿十八年正月進逼南興破其巢輔國就戮邊境肅清得旨嘉獎二十年請增設騰越鎮馬鹿塘大壩二汛從之二十二年臨安邊外夷人高羅衣謀逆脅衆至萬餘人在澧社江外肆劫復率衆偷渡窺伺內地伯麟馳往剿平之諭曰高羅衣係臨安江外夷民膽敢糾合夷匪漢奸封官僭號罪大惡極伯麟未及三月掃除淨盡調度有方著加恩賞加太子少保銜交部從優議敘六月授協辦大學士仍留總督任二十三年高羅衣堂姪高老五逃赴藤條江外糾衆搶掠復渡江窺臨安伯麟馳往剿捕生擒首逆殲除餘黨事聞交部議敘二十四年三月京察屆期諭曰協辦大學士雲貴總督伯麟兩次辦理軍務均能迅速歲事著加恩交部議敘二十五年五月召來京授兵部尙書兼正紅旗漢軍都統九月賜紫禁城騎馬充實錄館總裁疏陳滇黔邊務六事下雲

貴兩省督撫議行十二月充經筵講官道光元年授體仁閣大學士管理兵部二年正月調鑲藍旗滿洲都統閏三月充殿試讀卷官六月諭曰伯麟年逾七旬素患骸疾前在雲貴總督任內以協辦大學士來京供職朕御極以來特加簡任仍令管理部旗事務因其步履艱難格外體恤一切引見差使有時免其帶領此朕恩禮耆臣之心伯麟身爲宰輔自當循分盡職本日召見議及旬到事宜據奏將來旬到尙可調養半月勉爲趨事至明日御門典禮卽不能進跪御前因免冠叩首據稱若放外任差使不過坐辦尙能報效等語冒昧已極伯麟如果自揣精力就衰卽當因病求退乃既不辭免轉生出位之思試思以大學士出就外任非畀以封圻不可伊祇知督撫之養尊處優而不知任大責重以伊衰暮之年卽使加以簡任尙安望其稱職無忝乎人臣進禮退義原不應竊祿希榮伯麟意欲以要君之舉堅其戀棧之心膽大荒謬莫此爲甚若再事姑容何以飭朝綱而儆寮案著以原品休致其清文諳熟仍著充實錄館總裁並賞給半俸俾得敬專其事以示格外施恩三年八月萬壽聖節駕幸萬壽山玉瀾堂賜十五老臣宴繪圖紀事伯麟與焉御製詩有山右滇南昔受命今者懸車優禮彰之句四年四月仁宗睿

皇帝實錄成賞食全俸賜銀幣八月卒諭曰休致大學士伯麟自乾隆年間歷任卿貳嘉慶年間由巡撫擢授雲貴總督加太子少保銜協辦大學士朕御極後授爲體仁閣大學士敷歷中外宣力有年嗣因年老予休賞食半俸仍留實錄館總裁之任本年全書告成復給全俸茲聞溘逝殊堪軫惜著加恩晉太子太保賞銀五百兩治喪派大阿哥帶領散秩大臣一員侍衛十員前往奠醊並照大學士例賜卹所有任內處分悉予開復應得卹典該部察例具奏尋賜祭葬予諡文慎子穆克德起山西沁州直隸州知州

富俊

富俊卓特氏蒙古正黃旗人由繙譯進士授禮部主事乾隆四十四年承襲騎都尉五十七年升員外郎五十八年三月遷郎中十月遷內閣蒙古侍讀學士六十年遷內閣學士兼禮部侍郎銜尋授鑲藍旗蒙古副都統嘉慶元年九月調鑲白旗滿洲副都統十二月升兵部右侍郎尋命爲科布多參贊大臣二年授兵部左侍郎四年授烏魯木齊都統賞戴花翎尋調喀什噶爾參贊大臣六年奏喀什噶爾庫貯普爾錢九千串請酌留五千串在庫其餘四千串隨市易銀以備內地經

費兼平市價從之七年九月調葉爾羌辦事大臣十一月調烏里雅蘇臺參贊大臣尋奉旨回京八年四月署鑲紅旗漢軍都統五月署兵部右侍郎尋遷吉林將軍八月調盛京將軍十二月奏稱盛京戶部等四部庫使請照京城庫使考取之例由該處兩翼應考之官學生內每翼考取十餘名咨行吏部注册遇有缺出按翼挨名補用從之先是盛京清查民典旗地勒限一年准其首報其旗人首報者免罪免追典價民人照例治罪並追歷年租息入官民人首報者免罪免追租息其出典之旗人照例治罪並追典價入官如旗人公首者均免治罪免追典價租銀仍令民人佃種三年後將地入官交原業旗人承種輸租十年富俊疏稱自上年九月至今年業據旗民呈首者一千六百餘案應追典價租息不下萬人事閱多年輾轉接典頭緒繁多該旗民均係窮苦之人既各將地畝呈首其應追典價租息俱不免追呼之擾且尙有應得之罪情殊可憫請將應追典價租息併應得罪名加恩寬免得旨允行十二年軍政屆期諭曰盛京將軍富俊自簡任以來潔己奉公辦理地方諸務俱能認真於所屬營伍亦能勤加訓練前年朕恭詣盛京祇謁祖陵又閱二載該地方情形甚爲安貼自由該將軍經理得宜所致著加恩

交部議敘十五年盛京採澆創夫攬雜秧澆事發上命富俊查辦富俊收具局員
供結以委無情弊覆奏尋協領札布札那訐告侍郎貴慶有需索等情上命戶部
侍郎英和候補四品京堂初彭齡往訊貴慶並無需索情形札布札那於澆務案
內有向該處商人派捐銀兩等事一經查拏畏罪自盡並查出私種秧澆及局員
知情得賄各弊諭曰富俊在任多年漫無覺察前於降旨飭查時仍以委無情弊
冒昧覆奏該局員等恃有將軍爲之抵辨益復匿不吐實經英和等提證嚴訊始
將種種情弊全行究出此案局員札布札那實爲罪魁當英和等查有端倪奏請
將該員等解任時富俊自應立將札布札那傳提送案訊明得賊舞弊各情按律
定擬明正刑章以懲貪黷乃不卽時飭解致該犯乘閒自縊倖免刑誅富俊疏縱
之咎尤無可辭前部議降三級調用伊任內無級可降應行革任富俊於此案始
終迴護獲咎多端著卽革職發往吉林效力贖罪十六年六月御史韓鼎晉奏關
東三省賭風甚熾上召見內閣學士榮麟奏稱富俊前在將軍任內查拏認真稍
覺斂迹諭曰富俊前在盛京將軍任內辦理澆務因受局員蒙蔽致官澆有攬雜
等弊其辦理地方事件尙屬妥協嚴禁賭博尤屬認真著加恩賞給盛京驍騎校

遇缺卽補十二月擢盛京工部侍郎兼管奉天府府尹事尋命管理六邊邊門事務十八年三月疏稱奉天錦州屬廣寧縣向爲衝繁疲難要缺近年生齒日繁市廛稠密命盜詞訟日多地廣政繁求治非易請於新民屯地方添設撫民同知一員以資治理從之四月墨爾根城遣犯韓自有糾衆謀劫黑龍江將軍斌靜奏劾副都統明德辦理張皇上命富俊往訊韓自有謀劫屬實明德一聞首告全行拏獲惟未能審訊明晰全委之協領巴達爾呼等嚴刑拷問致將案犯拖斃請交部議處斌靜前至墨爾根城並不會同明德審辦率行指參亦屬不合上褫斌靜職命富俊爲黑龍江將軍十二月請定內外臣工三年更調並禁止奢靡講求武備列款以聞諭曰國家簡用臣寮量能器使其職事修廢必須隨時甄覈若概以三年爲期其稱職之員方資整頓何必亟於更調其不勝任者又安能曲爲姑容待其限滿乎所奏殊於吏治無裨至士民婚喪宴勞自應稱家有無隨宜成禮無如人情競尙浮華見侈靡者羣相歆羨轉以質儉者爲非遂至貧富相耀取非其有靡所不爲敝習相沿伊于胡底著八旗及直省大員善爲化導使人人知禮讓爲先廉恥爲重一切鮮衣美食縟節繁文俱無足貴庶幾崇實黜華風俗人心可冀

日臻淳樸其兵丁操演弓刀當以挽強爲尙縱不能悉挽八力以上若六力則頒諸令甲著八旗護軍前鋒健銳等營嗣後挑缺揀選務以六力弓爲合格其不入格者毋許濫充至東三省官兵技藝優嫻實堪嘉予俟凱撤回京之日著御前大臣等會同挑留二三百名分派京城各處當差以收相觀而善之益並著每屆五年奏請挑送一次卽以此次爲始著爲令十九年調吉林將軍奏稱拉林西北雙城子一帶地土沃衍應行開墾移駐京旗上諭議具試墾章程以進尋奏先於吉林等處閒散旗人內揀選屯丁一千名每丁給銀二十兩籽種穀二石於拉林東南夾信溝地方設立三屯每名撥給荒地三十晌墾種二十晌留荒十晌試種三年後自第四年起交糧貯倉十年後移駐京旗蘇拉時將熟地分給京旗人十五晌荒五晌所餘熟地五晌荒五晌卽給原種屯丁免其交糧作爲恆產一切農具耕牛分別採買齊備明春一律開墾上以所議章程尙屬周妥命如所奏辦理二十二年復調盛京將軍先是盛京每歲秋間奏派侍郎一員帶領官役巡查海口緝拏私濫至是富俊以事成具文奏請停止上從之二十三年正月奏大凌河牧場餘地試墾期竣勘丈於原墾續墾十一萬餘畝外尙浮多地五千八百餘畝均

地近海濱其中饒薄沙灘者多不能按原議照直隸旗租之例升科請照養息牧放試墾地畝之例每畝徵租銀四分作爲定額見存已徵穀一千七百八十餘石准其減價十分之三出糶價銀解交盛京戶部存庫備用允之八月奏議雙城堡開墾屯田並伯都訥圍場見有堪種荒田請飭查明備墾上命吉林將軍松林安議具奏九月上以盛京將軍事務較繁富俊年老精力恐不能周復調吉林將軍十二月奏吉林站丁典賣與民地一萬三千五百六十三晌請賞給額設站丁八百五十名每名十五晌九畝零作爲隨缺工食養贍津貼上命如所請行二十五年五月奏雙城堡左右二屯屯丁到齊比屋環居安土樂業又籌議中左右三屯應增條款一每屯應添井一眼以裕食用三屯屯丁戶婚錢債及爭鬪事由各佐領呈報協領訊辦人命盜案報解阿勒楚喀副都統驗訊轉咨將軍覈辦一雙城堡協領處添設無品級筆帖式二員委官二員三屯佐領處添設無品級筆帖式一員委官一員以資差委稽查一總屯達二十四人約束屯丁請給金頂並月給工食銀一兩一領催兵丁應得賞銀向由將軍衙門給發未免稽遲請准由管理三屯協領處支存就近給領得旨允准並諭曰富俊於吉林開墾屯田一事銳意

辦理今雙城堡所墾地畝已有成效旗丁視爲樂土紛紛呈請願往耕種其續行籌議各款亦俱周妥洵屬實心任事著交部議敘尋議紀錄二次上改爲加一級道光元年正月賜紫禁城騎馬復疏陳吉林屯田移駐京旗閒散章程諭曰八旗生齒日繁甲餉設有定額屢經籌議增加未能大有裨益惟因地利以裕民食乃萬年之長策富俊籌辦開墾阿勒楚喀雙城堡三屯地畝九萬數千晌見已漸有成效茲據奏旗地可移駐京旗人三千戶酌議自道光四年爲始每年移駐二百戶分爲四起送屯該處豫於道光二年伐木築室按戶給與房間地畝牛具盤費等項計畫至爲周備均著照所請辦理二月請於吉林之荒山子三道溝等處開採煤窯從之二年六月疏稱吉林白山書院教讀乏人請將發遣黑龍江廢員馬瑞辰改發吉林專司教讀上以所奏謬妄嚴飭之七月授理藩院尙書三年八月萬壽聖節玉瀾堂賜十五老臣宴上幸萬壽山富俊與焉繪圖紀事御製詩有勤勞三省心益壯不凋松柏歲方長之句十月復賞戴花翎四年二月復授吉林將軍六月奏請每旗屯適中之地建設義學並嚴禁該屯丁冬令過江樵採得旨允行又奏議雙城堡移駐京旗章程四條一京旗閒散有願赴雙城者著各旗於十

月報齊戶部具奏十一月初卽知照順天府尹直隸總督盛京吉林將軍正月初十以前定期啟行地方官計程籌備一移駐京旗大都無力覓工請將戶部應發銀兩俟抵吉林後由將軍衙門備用銀兩項下發給作爲雇工之用俾得全獲地利其荒地五晌亦可隨時開種一彈壓大臣改派年班仍令地方官隨同護送給與車輛分段遞送一每年應修住房百所於本年冬間備料以省運費上嘉納之十一月疏稱吉林伯都訥開墾屯田曾經奉旨俟雙城堡獲有成效再行議墾茲雙城堡三屯辦理完竣移駐京旗視爲樂土伯都訥圍場計二十餘萬晌荒蕪旣久地甚肥饒且可敏於成功儉於經費較之雙城堡事半功倍自應及時籌備上命如所議辦理五年二月奏吉林爲我朝發祥之地俗厚風醇八旗臣僕皆當以國語騎射爲重騎射而外當教以清漢文藝使知義方請賞發書籍清文條例以擴見聞從之先是部議雙城堡移駐京旗閒散隻身不准算戶將房間牛種器具給予半分上命富俊體察情形據實具奏尋奏隻身閒散到屯種地無人炊爨照看門戶並恐舉目無親隨意游蕩且每戶應得房間等物分作半分不能適用應將隻身閒散不必拘有妻室祇有父母子女或伯叔兄弟等情願同來者二三口

均准算戶照奏定章程給予全分上命如所議行六年正月諭曰吉林將軍富俊籌辦雙城堡移駐屯丁事宜妥協周詳見在移駐各戶安居樂業京旗人等聞信願往者益多該將軍經理其事不避嫌怨盡心宣力著有成效深堪嘉尙著加恩賞給太子太保銜以示優獎蓋臣之至意三月奏稱拉林向未設有防禦及筆帖式辦公之員請於寧古塔防禦十二員內移撥拉林四員其關防辦事無品級筆帖式二員卽於拉林領催甲兵內揀選添設從之五月奏請雙城堡移駐京旗每一旗五屯再添總副屯達各六名以資稽查從之又奏吉林副都統年班進京例應每年二員如遇將軍年班副都統亦來一員長途往返耽延時日署缺之員未免意存推諉殊於公事無裨請自本年爲始如值將軍年班副都統卽無庸進京如值副都統年班亦祇須輪替一員來京以重職守上是之如所請行七年七月授協辦大學士命來京供職尋兼理藩院尙書鑲黃旗漢軍都統充經筵講官閱兵大臣十一月署刑部尙書西陵讚祝官達桑阿等控告主事喀勒沖阿冒領錢糧私自侵用上命富俊偕侍郎英瑞前往易州查辦鞠訊得實擬結如律八年正月京察屆期諭曰富俊年已八旬精神強健辦事照常前在吉林將軍任內宣力

有年公慎勤勉克稱厥職著交部議敘是月奏稱近日京師外省風氣競尙浮奢官員兵丁人等一切冠履服飾以及冠婚喪祭等事載在會典具有品級等差因卷帙浩繁民間不能家有其書遂至任意踰制互相誇耀於風俗人心大有關係諭曰厚生之道首在崇儉惟承平日久生物滋豐以至踵事增華風俗日彫奢靡朕御極之初曾經降旨諄諄垂誡期於返樸還淳乃奉行不力日久仍成具文富俊所奏近日京師外省風氣競尙浮夸較前更甚所謂奢不見詰轉相高尙無有窮極誠不可不防其漸著內外各衙門將民間應用服色及冠婚喪祭儀制悉照會典所載刊刻簡明規條徧行曉諭二月署戶部三庫事務八月署工部尙書上謁陵命留京辦事九月調鑲紅旗滿洲都統兼署鑲藍旗漢軍都統九年二月奏請旗營設立官弓揀選時統較弓力覈實挑取先經值年旗議駁上命另行妥議并將管理值年旗王大臣等嚴加申飭尋復議准七月奉旨富俊年逾八旬著於理藩院及該管旗分加班奏事引見之日不必來園卽在本衙門辦事以示優眷耆年至意是月盛京錦縣武童姜殿魁以該縣知縣傅鍾瑑借差苛派赴京呈控上命富俊偕侍郎裕恩往讞之尋訊明錦縣差務向於鋪戶借用銀錢墊辦傅鍾

璩按照舊章尙無勒派侵漁情事惟於縣署設席邀請鋪戶實屬辦理不善請旨
交部議處十月奉旨協辦大學士理藩院尙書富俊年逾八旬著於該管旗分衙
門應行帶領引見之日俱免其帶領以示體恤十年二月上以盛京將軍奕顯有
演戲宴會之事命富俊偕侍郎保昌前往詳查得實將奕顯嚴加議處命富俊暫
署將軍任五月奏擬移駐盛京宗室眷屬回京章程上是之八月署都察院左都
御史充崇文門正監督十一年二月上謁陵命留京辦事七月命偕內閣侍讀學
士賽尙阿往查吉林將軍福克精阿被控各款訊實褫福克精阿職八月調工部
尙書十二月授東閣大學士管理理藩院事務命嗣後御門辦事富俊免其入班
十二年二月上謁陵命留京辦事四月充殿試讀卷官五月請將嚴禁僭用服色
條款出示曉諭並請飭步軍統領順天府五城嚴拏僭用服色之人按律治罪將
服物入官獎賞捕役又請一二品文武大員賞給家人虛金頂或一或二諭曰國
家尙儉去奢原所以挽澆風而臻上理然亦須化之以漸若一味束縛馳驟尙復
成何政體富俊前請申明舊例嚴禁僭用服色業經降旨准行此次復請將條款
出示曉諭朕詳加披閱亦屬會典所有至請飭嚴拏違禁服色用者治罪並請剝

拔入官以備變賣獎賞捕人則是開棍徒訐告之風而啟吏胥擾累之弊所請一品文武大臣賞給家人虛金頂二箇二品文武大臣賞給家人虛金頂一箇尤屬非是惟名與器不可假人此輩地處寒微不過給使令之役卽大爲防閑猶恐其倚勢作威若准其戴用金頂何所顧忌必至恃符滋事而後已其所稱窒礙觀瞻之處實屬自相矛盾所奏斷不可行六月奏稱年力就衰並因天時亢旱奉職無狀懇請休致諭曰秦漢以來往往有因災異策免三公之事詩書不載唐虞三代固未之聞我朝設立大學士卽古之三公居是職者亦未嘗因水旱愆眚陳情乞罷大學士贊治綸扉當此恆暘不雨宵旰焦憂尤當實心爲國佐朕勤求治理以冀默感天和何事遽求引退自卽便逸爲耶至奏稱年已八旬有四精力衰邁試思滿漢諸臣擢用爲大學士者雖不盡論年資亦必敷歷旣久宣力有年年齒雖高朕方倚畀而臣下轉藉詞乞身亦非以誠事君之道此端斷不可開富俊自請休致之處著不准行十月盛京商人有買賣空糧一案經署將軍奕顯訊明奏結尋兼管奉天府府尹裕泰等參奏奕顯審奏與案情不符上命富俊偕內閣學士賽尙阿前往訊辦得實擬結如律十一月授內大臣十三年三月奏請各部院衙

門條例定擬畫一俾知遵守上命如所請行七月奏請嚴禁陋習以端仕進諭曰
國家鄉會兩試原係求賢大典其主考同考各官特經簡派於文藝之優劣即可
知其品學之高下使得士皆砥行立名方合以人事君之道在獲中者感主司知
遇拜認師生原屬例所不禁衡文者總當以品學相規不得徒以恩情相接若如
該大學士所奏科甲所認師生凡遇一切事件無不暗爲關照及門生外升道府
州縣於師生同年處所必須留贈銀兩名曰別敬以致不計利息重輕甘受奸商
盤剝是服官之始已負重累尙安望其能清白自守克爲廉吏耶至在京部院司
員經堂官保薦京察簡放外任及外任各員經督撫保舉皆當秉公遴選務在得
人其拜認師生久經嚴禁儻以保舉爲市恩酬報地步是受爵公朝拜恩私室此
風斷不可長嗣後內外臣工於考試所取之士及保舉所屬人員務當破除情面
力挽頹風如有仍前餽送別敬者一經發覺定予嚴懲決不寬貸十月上以富俊
年逾八旬命無庸進內大臣班秋審旬到日期亦免其入班十四年正月上以富
俊年逾八旬前在將軍任內宣力有年簡畀大學士耿介公勤克稱厥職賜紫禁
城內乘坐車轎時屆京察諭曰大學士富俊宣力有年公勤清慎年已八十有六

精神頗健洵爲盛朝人瑞著加恩交部議敘二月卒諭曰大學士富俊性情爽直不尙繁華前在將軍任內宣力有年迨入贊綸扉清慎公勤克稱厥職朕因其心地樸誠精神矍鑠豐沛恩施深資倚任昨因病請假旋請開缺當經賞假一月俾得安心調理特派員前往看視方冀速就痊愈獲享期頤遽聞溘逝深爲悼惜著賞給陀羅經被派成郡王載銳帶同侍衛十員前往奠醊朕迴鑾後於三月十七日親臨賜奠並加恩晉贈太子太傅入祀賢良祠賞給廣儲司庫銀二千五百兩經理喪事所有任內處分悉予開復應得卹典著該衙門察例具奏尋賜祭葬予諡文誠三月奉旨富俊之子一品廕生恩成著俟服闋後加恩以六部員外郎卽補

孫玉庭

孫玉庭山東濟寧州人乾隆四十年進士改翰林院庶吉士四十二年散館授檢討四十五年丁母憂四十七年服闋四十八年充廣西鄉試副考官五十年大考二等五十一年京察一等授山西河東道旋丁父憂五十五年服闋選廣西鹽法道嘉慶元年升按察使二年黔省狎苗不靖地接粵之西隆州玉庭隨疆臣赴剿

兼治兵餉事平敘功賞戴花翎四年三月遷湖南布政使尋調安徽布政使五月調湖北布政使命密察安襄鄖荆道胡齊崙剋扣軍需前藩司祖之望扶同徇隱玉庭以實入告得旨嘉獎六年以軍犯書德發遣廣西求書屬安置善地案覺事涉玉庭部議奪職上念其平日官聲尙好改革職留任尋以楚省撤兵善後事宜辦理妥協加恩賞四品頂戴時湖北常平社義諸倉節年碾支八十餘萬石遠赴鄰省糴補玉庭以經費既難議加緩急尤恐失恃請循舊章於本地富戶分年採買從之七年擢廣西巡撫復二品頂戴會安南阮光纘爲農耐阮福映所逼斂關求內避命玉庭馳赴廣西會議比抵桂林福映已滅光纘遣使納款玉庭以夷情恭順代爲奏請得旨允准八年正月福映以其祖居越裳地本號南越請卽以名國上不許三月福映復請玉庭奏言福映先有越裳古地繼有安南若號以越南則百越之外皆夷地旣與兩廣地名有別而於肇錫嘉名之中仍存其舊旣於國家體制得宜而又不致稍開邊釁允之八月諭直省倉庫各陳短絀實數玉庭覆言粵西庫帑無虧倉穀已補完實貯有旨嘉獎十月調廣東巡撫粵中海盜土匪積年爲商民害玉庭抵任後獲巨匪楊亞鹽鄭亞訂等九十餘人會匪關念宗等

八十人置之法先是甯州盜首鄭一烏石二等劫掠洋面戕害弁兵命與總督倭什布籌議堵剿九年八月奏言洋匪來往無常兵船分則勢單合則顧此失彼且外洋捕盜全憑風信非如陸路用兵步伐止齊可以決勝故從古治海疆者有海防而無海戰應以添駐兵丁嚴守口岸爲第一要務諭曰注意防守爲保護之計不爲無見但所謂海防者非竟置舟師於不用仍應責成營員於海面梭織緝捕與防兵互相接應十一月仍調廣西巡撫時廣東潮陽鄭馬二族爭地仇殺玉庭督獲兇徒四百八十餘人問擬如律又故金鄉令孫映輝生員林哲庇族械鬪奏請褫職科罪有差十年四月以巨盜李崇玉逸自請嚴議上以遲疑逗遛咎在鎮臣特旨寬之六月復調廣東巡撫以失察南海番禺令逮繫無辜鑄三級時總督那彥成招撫洋盜給投首之袁阿明林亞發等頂帶銀兩玉庭疏言海盜投首多係購線招致並非真心悔罪今置盜罪不問而加以頂帶重賞兵丁備嘗辛苦欲拔一外委未可得盜則驟得千把總頂帶候補恐失兵民之心命解那彥成職按治之復以那彥成演劇宴飲玉庭與同城未劾鑄三級留任十一年正月以路臣洋船來粵求通市玉庭未察情僞率令回國又奸民林五通盜濟匪未與督臣會

翰輒先決囚均下部議鑄級二月奏潮高雷廉四郡秋審請由巡道勘轉允之十
一月上以吳川遂溪爲洋盜泊舟之所東海土饒地僻尤易藏奸命疆吏籌法肅
清十二年二月玉庭奏吳川遂溪入港處有獅子球激沙二門應堵塞再建礮臺
防守得旨勸勉十月御史鄭士越以粵東吏治廢弛列款條奏上命嚴覈懲治並
以玉庭不加整頓傳旨申飭之十三年九月英吉利兵船駛入澳門玉庭與總督
吳熊光商令英船退出乃許貿易上以邊疆重地洋人輒敢心存覬覦不此之慮
而惟鯁鯁於數十萬稅銀往復籌計懦弱不知大體嚴飭之十月調貴州巡撫十
一月以英吉利兵船前入澳門時吳熊光不親往驅逐玉庭未經劾奏鑄四級十
四年四月請裁貴州普安縣土把總安順府屬土千總把總外委等六員五月請
裁貴州興義縣千總均從之尋以兩廣總督百齡劾吳熊光於英吉利入澳門事
逾月始奏諸形畏葸玉庭不以實入告罷歸九月上五旬萬壽玉庭來京祝嘏諭
曰孫玉庭前辦英吉利一事近詢之韓封據稱玉庭曾力勸吳熊光迅速入奏熊
光不聽其言伊不行參劾失之輒弱尙非重咎著賞給編修在文穎館行走十五
年賞三品頂帶授雲南巡撫十一月偕雲貴總督伯麟雲南學政汪潤之奏請於

昭通府學加額取進文生二名武生二名增設廩增各四名蒙自縣學加額取進文生三名武生一名白鹽井學添設廩增各四名下部議行十六年三月奏改雲南大理府同知爲東川府巧家同知賓川州赤石崖巡檢爲普洱府他郎廳知事四月以玉庭視事一年小心無過命復二品頂帶旋以前在湖北布政使任內失察書吏陳文俊等夥用假印給照部議降二級調用上加恩改爲革職留任十八年兼署雲貴總督二十年調浙江巡撫二十一年五月升湖廣總督十一月調兩江總督二十二年五月給事中陸泌奏江蘇運漕旗丁於免費外復有借索上命玉庭酌定章程九月奏言江南漕糧大要在卹丁除弊欲禁州縣之浮收先杜旗丁之苛索欲減幫船之浮費先卹丁力之積疲應卹丁者一在無屯田之賠墊一在無漕委之滋累而弁丁刁難州縣者一在無故停兌開行一在勒措通關米結請籌款生息津貼無屯之丁減省漕委以杜擾累並令州縣於兌竣時以兌單先呈糧道飭令卽出米結不得過五日限命如所議行十一月劾歷任江都令虧帑上嘉其破除情面實力整頓二十三年四月山東巡撫陳預以修造戰船木料產自江浙請由南省成造運送來東玉庭奏言江蘇戰船木料遠赴閩浙採購廠員

賠累已鉅若將山東營船改歸江蘇分造無論各員賠累難支且物料並非產在江南工匠於山東海船亦非所諳請令東省照例自造以專責成上是之六月奏淮南河稽料江柴湖蘆湖溪石價俱酌減一成又奏定江西緝私章程贛縣磨角駐緝之通判移駐攸鎮安仁縣藍橋原派武員改駐長塘藍橋一卡改委安仁縣縣丞駐巡新城之杉關金谿之許灣等處委員向止駐筍一處私梟得乘間抵隙令輪流帶兵四處遊巡南康府屬之青山爲淮鹽入江門戶由省按季派委丞倅督率該處巡檢稽驗並防糧船夾帶私鹽於湖口縣之梅家洲北姑塘分別設卡派委員弁查放九月奏湖北宜昌府鹽捕通判分銷淮鹽向止有缺銷罰扣薪水章程請定情銷處分俾有專責並令宜昌鎮派弁督兵會同緝私又奏江蘇東臺漕糧米少船多請改歸興化通州鹽城三所分裝以節糜費並從之二十四年正月奏編查保甲章程諭曰言易行難言果符合何患叢脞勉之閏四月以沿途驛站勞費請將歲解機毛改由水路運京十一月請撥太湖營千總一員移駐徐州豐汛增置豐汛額外外委一員豐汛原設經制外委移駐趙莊集原設把總移駐蟠龍集夏鎮外委移駐雙溝集增馬良集經制外委一員楊家集經制外委一員

裁提標五營暨太湖福山等六營兵七十名添趙莊集兵三十九名蟠龍集雙溝集馬良集楊家集各三十名均如所請行二十五年六月以違例將在籍守制道員嚴烺奏補徐州道革職留任八月命加太子少保銜九月請增培黃河隄岸以工代賑十月奏狼山統轄外洋內河爲東南重鎮出巡弁兵資糧營中無閒款津貼查通州之小西洲新漲沙地四千三百畝有奇懇撥歸鎮營俾資墾牧皆允之又奏緝獲海州匪徒胡大成等首夥多名得旨褒嘉時奉諭清查各省陋規並諭令督撫等明定章程立以限制以期久遠可行玉庭奏言自古有治人無治法如果一省之中督撫兩司官得其人則大法小廉斷無虞所屬苛取病民儻不得其人則習爲逢迎朘削雖立限制仍同虛設弊且滋甚各省陋規本干例禁語云作法於涼其弊猶貪禁人之取猶不能不取若准人以取則益無顧忌勢必竭民脂膏而後已迨發覺治罪而民已大受其累府廳州縣祿入無多自昔以來卽不能不藉陋規以充辦公之需然未聞准其加取於民垂爲令甲者誠以自古無此制祿之經且不可於常祿外別開取利之門是清查徒滋紛擾尤失政體乞停止查辦則天下臣民幸甚疏入奉諭查閱所言剴切詳明此事不但無益於民生抑且

有傷於國體著卽明白宣示各督撫停止查辦惟在各大吏正己率屬獎廉斥貪如有苛取病民之事立加參革釐正則吏治澄清民生日臻饒裕矣先是涇縣民徐飛隴被創死於他人門口有司以假傷圖詐成讞屍屬徐玉麟詣京訟冤自牒刑部門外特命玉庭親鞫之玉庭廉得正兇審擬如律上嘉其不辭勞瘁不避嫌疑使數年不白之冤一旦昭雪卒成信讞交部優敘道光元年二月請停淮南北口岸鹽斤加價略言鹽務疲敝之端有四一積引過多一庫儲過絀一成本過重一商力過乏其故總由私鹽充斥惟減價乃可敵私銷引方能裕課章入上命通盤籌議復言正本清源必自輕減成本始前因南河工費加價三釐今工竣已久應將三釐減除從之尋授協辦大學士留兩江總督任三月入覲上語及淮鹽引壅課絀命籌議疏銷玉庭請變通楚岸輪轉之法略言楚省漢口爲淮南售鹽總岸向來鹽船到岸聽商店行販隨時交易是以年年暢銷自乾隆年間鹽道保定立封輪之法凡鹽船運到卽由鹽道加封按到岸先後挨次輪售商情不便私鹽得乘間侵越因臚陳六害請改復舊章得旨委曲詳盡深合機宜六月奏准淮安徐州二府改題缺玉庭之議漕務也以幫費不能盡裁陋規不能盡革浮收不能

盡去奏請酌定限制八折收漕尋御史王家相奏言事類加賦上命玉庭悉心體察不可迴護前議會戶部侍郎姚文田湯金釗皆陳其弊得旨著有漕各督撫通飭所屬杜絕浮收以清其源裁革陋規以遏其流務須官民旗丁均免擾累以肅漕政十月奏准江西南贛各屬秋審及軍流人犯歸巡道覈轉尋兼署江南河道總督十二月玉庭七十生辰御書平格延釐額撫循南國宣猷遠協贊黃扉受福多聯句并服物賜之以擒私梟李克標首夥并仗頭嚴興魯等數十人獲兵器私鹽無算得旨嘉勉二年正月京察上以玉庭整理地方察吏安民克副封疆重任下部優敘二月奏民間私造鳥槍立限收繳申明例禁酌免處分又奏泰興營汛官少兵單請循舊章置把總二員增置外委一員兵丁四十五名以資巡防三月請疏濬銅山境內荆山橋河道四月奏三省交界營汛酌定會哨章程六月奏准北收買餘鹽改運章程均如所請行又奏酌立減黃河埝修守章程得旨准於峯山河埝緊要處所添設千總一員協防二員效用二員河兵一百名其天然閘河埝著設把總一員協防二員效用二員河兵一百名并籌備歲修經費銀四千兩存儲府庫酌發千把總承領責令隨時督率協防兵夫周歷防護七月河南新蔡

教匪朱鳳閣與安徽阜陽教匪邢名章自新蔡起事突入安徽潁州境玉庭飭屬
剿捕不及旬日蕞事上深嘉之九月以秋汛安瀾下部議敘十月酌議變通堵緝
鄰私章程一原設巡卡請分別裁併增設一文武員弁請覈實考定功過一員弁
巡費請按獲私多寡分別扣發一嚴禁私梟請先指拏窩囤一兵役緝拏大夥私
梟請准酌帶鳥槍下部議行又奏山陽鹽城等縣應疏河道懇借款挑修允之十
一月奏獲洋面逸盜張扣二并販私各犯八十餘人暨船隻兵器得旨嘉獎十二
月奏江都縣瓜洲河道淤塞請撥款疏濬諭曰果於水利民生有益何吝多金總
在認真經理也勉之三年正月以衰老辭職上鑒其公誠慰留之三月請築宿北
廳夏家馬路并築土壩攔截相機啟放又奏徐州屬減黃河堰請分別讓地挑築
又請修培碭山護城隄工均如所請尋以巨梟穆鳳林劉忠信楊三岡宋五張建
禮等先後擒治上並嘉之是月又奏狼山鎮屬掘港營所轄林家墩濱海要隘距
營百數十里僅設防兵三十名不足彈壓請增置千總一員外委二員戰兵五十
名下部議行五月請將江南葦蕩右營草地仍改歸旗丁墾種又奏淮徐海三府
州屬秋審及軍流徒犯請歸巡道勘轉又奏駱馬湖官民灘地分別蓄草收租章

程六月奏潁州府屬阜陽亳州鳳陽府屬宿州與河南接壤時有紅鬃等匪竄入請將鳳穎捕盜同知移駐阜陽之艾亭集作爲撫民總捕同知宿州時村集增置巡檢一員並於艾亭集方家集暨亳州之減種店張村鋪宿州之時村集夾溝驛各增置外委一員并請添潁州營存城兵五十名艾亭集四十名銅陽城方家集各二十五名減種店張村鋪各十名夾溝驛十名以重巡防七月奏雲騎尉恩騎尉世職三年甄別距總督駐劄處遠者請由本省巡撫或提督就近考驗其附近總督鎮協各營有隸提標者徑送總督考驗以省勞費得旨允行八月萬壽聖節幸萬壽山玉瀾堂賜十五老臣宴玉庭與焉繪圖紀事御製詩有封疆重寄廉兼幹平成奏績慶河黃之句九月奏獲鄰省逃匪端金隴審擬如律十月奏獲海州鹽梟張從雲等三十餘人又獲玉富林等四船私鹽萬餘斤諭曰卿督率認真盡心公務文武員弁莫不用命可嘉之至又奏河道今昔不同請將原設儀徵攔潮閘稅口移駐新城鎮得旨允行尋報秋汛安瀾上以伏秋雨水過多疊見盛漲玉庭督率員弁搶護不遺餘力嘉之并下部議敘十一月奏清河縣水陸衝途請裁淮安府檢校另於清河澗橋置巡檢一員就近稽察十二月奏龍江淮關章程六

條一商販到關驗放宜速一扞量貨物宜平一保家錢戶宜革一繞越偷放宜懲
一胥吏措單查察宜肅一看關家丁選派宜慎均如所請行四年正月復署江南
河道總督二月奏河勢漸彎請挑直引從之三月給事中朱爲弼奏海口下流壅
塞上命玉庭往勘擇要疏濬五月上言古之稱三江者曰東江曰吳淞江曰婁江
迨後東江失其故道遂以江震下流濼泖一帶歸於黃浦之水當之此東南入海
之路也吳淞江西承江震運道東合黃浦尾閘此居中入海之路也婁江卽今之
劉河在太倉州境此東北入海之路也婁江之北又有白茆河在常熟昭文縣境
分承蘇屬之長洲元和吳縣常屬之江陰無錫諸水下注揚子江尾入海此三江
之外別爲一大支也以上皆太湖歸海之要道未可偏廢惟一時工鉅費繁請就
太湖下注黃浦一路先行疏濬餘俟次第興修上可其奏是月奏皖省鳳潁泗三
府州屬秋審及尋常流徒請歸巡道勘轉六月奏吳淞營濱臨大海爲頂衝扼要
之區請於坐落之寶山縣增置把總一員所屬羅店鎮增外委一員加派兵十名
南翔汛所管黃渡鎮增外委一員加派兵五名封家濱加派兵五名以資巡緝皆
從之閏七月授體仁閣大學士仍督兩江八月議上江西鹽務緝私章程如所請

行十一月以漕船回空遲延下部察議尋以河督張文浩治河乖謬玉庭不早參劾鑄三級留任會高堰十三堡及息浪庵兩處遇風決口石工掣場一萬一千餘丈上命尙書文孚汪廷珍往勘解玉庭職十二月文孚等以堰肝潰決情形入奏文浩遺戍伊犁玉庭有心迴護下部嚴議部臣議罷斥諭曰孫玉庭自嘉慶年間總督兩江公事妥協朕親政以來授爲大學士仍管總督事務數年來整頓地方不遺餘力卽如查拏盜梟匪犯節次緝獲數百名商民均資利益且其操守素好正己飭屬不愧封疆之寄本年因張文浩將禦黃壩堵遲致有高堰漫口之事孫玉庭不早參奏致誤要工咎無可辭本應革職姑念總督事繁河工究係兼轄著改爲革職留任並革去太子少保銜五年正月命偕漕督顏檢會辦重運五月玉庭奏裏河淤塞酌議盤壩接運需銀一百二十萬兩請就近撥發上從所請尋又奏在後幫船因河道淺滯不能挽抵原議之高坂頭等處就近盤壩諭曰上年高堰漫口清水洩枯致本年重運未能暢行是以勉從所請爲借黃濟運之策屢飭詳慎妥辦乃經歷三月之久僅過船二千八百八十隻此外未渡黃者尙有四十幫轉以盤壩剝運請帑至一百二十萬兩本日復據奏在後各幫不能挽抵原議

之處是孫玉庭等全無把握所入奏者無非塞責空談尙得謂之實力實心爲國
宣勞之大臣乎孫玉庭既不熟籌於前又復遲誤於後束手無策糜帑病民著交
部嚴議尋議褫職上以玉庭宣力有年賞編修休致六月玉庭等奏察看幫船盤
運情形恐致遲誤請援照成案截留存貯得旨以前後議辦情形層層貽誤坐失
機宜實屬溺職孫玉庭著卽革職以示懲儆方漕船未渡黃時廷臣有海運之請
下各督撫會議以窒礙議格戶部劾玉庭等不行海運並請帑不已借黃而黃轉
病濟運而運吏阻請將滯漕剝價責令玉庭賠繳七成嗣新任督臣琦善奏幫船
淤淺狀得旨孫玉庭身受三朝厚恩辦事至於如此自問當得何罪著不准回籍
交琦善督令將運河淤墊處挑挖深通所需挑費與魏元煜顏檢分賠九月琦善
奏運河請停挑辦諭曰孫玉庭旣免此項挑工賠款其前此淮城以上挑河切灘
銀四萬三千餘兩著與魏元煜顏檢分賠完繳十月以賠繳一萬兩運河亦刷滌
深通諭令回籍十四年九月玉庭以乾隆甲午舉人至是鄉榜重逢疆臣以聞諭
曰前任大學士孫玉庭因公鐫職在籍年逾八旬再遇鄉科洵屬藝林盛事著賞
四品頂戴准重赴鹿鳴筵宴用示朕嘉惠耆儒至意十月卒子善寶江蘇巡撫瑞

珍戶部尙書孫毓淮浙江按察使

蔣攸銛

蔣攸銛漢軍鑲藍旗人先世由浙江遷遼東國初入關居寶坻乾隆四十九年進士改翰林院庶吉士五十二年散館授編修五十三年充福建鄉試副考官五十四年丁父憂五十六年服闋補原官五十七年充貴州鄉試正考官五十九年充陝西鄉試正考官六十年充河南鄉試正考官提督廣西學政於嘉慶三年改江南道御史五年授江西吉南贛寧道六年八月上密諭巡撫張誠基曰察吏所以安民蔣攸銛江右之良才也汝其任用九月署按察使八年廣昌縣齋匪廖幹用等作亂衆五六千人攸銛奉檄督兵剿賊於寧都石城大敗之賊平巡撫秦承恩上其功時攸銛已丁母憂諭服闋後施恩十年三月特旨起復發往廣東差委六月署惠潮嘉道十一年三月遷江西按察使十一月升雲南布政使滇省銅廠錢局虧欠久歷任巡撫兩司咨追無獲攸銛奏請攤賠又於路南州開新廠得銅五百餘萬斤以裕京運十四年三月調江蘇布政使旋擢巡撫八月調浙江巡撫海洋自蔡牽亂後餘匪尙多攸銛檄定海黃巖二鎮率舟師捕之匪船遠竄洋面肅

清十五年授江南河道總督以不諳河務辭諭曰朕以蔣攸銛辦事認真河務雖未諳習必能盡心講求力圖成效所奏不准既之任復奏見雖接印恐貿然從事貽誤國計民生諭曰學而後入政非可以政學也蔣攸銛竟不必強之任事伊在巡撫任內整理地方官聲本好著仍回浙江原任十六年三月命與兩江總督勒保籌海運攸銛以爲必不可行者十二事一海運自元至元十九年訖明永樂十三年當時仍有河運今河運亦不能廢則禦黃壩仍不能閉運弁仍不能減徒增海運之費一江南至天津海道如吳淞口之陰沙黃河口之大沙五條沙山東之貓兒島沙門島皆沙礁叢雜天庾正供非可嘗試於不測之地一前代欲避外洋之險議由膠西開隆地逕通直沽海口勞費不貲雍正初朱軾亦奏開膠萊運道卒以工力難施而止一旗丁不習海洋必責成船戶又非如旗丁有冊可稽且不能設官出洋巡視必至偷竇缺額捏報沈失甚或有通盜濟匪諸弊一海行風信靡常遲速平險皆非人力可施一海運須籌經費至元間每石給中統鈔八兩五錢迨至大延祐間相距纔數十年已十三兩以古準今其費更大一海船載二三千石計造一船工價不下萬兩全漕需船一千七八百號卽需銀一千七八百萬

兩一造船既不能行必雇商船照民價給之則費不貲若祇給官價則在官支數已多而船戶猶以賠累爲辭必多規避況吳淞頭號沙船始諳海道數亦不敷粵省相距遠其船向不能北行浙省相距近無船可雇一元明海運米多漂失到倉欠交者每石自數合至一斗數升不等今生齒日繁人之所食浮於地之所產豈堪再有漂失一海運須設水師若令見有水師分段護送則兵船少而漕船多必至有名無實若每船配兵一二千名卽須增兵三四萬糧餉又復不貲一京師百貨之集悉來自糧艘若由海運斷不能多攜貨物將來京地物價驟騰亦礙生計一運丁所用兵工短絳等項總計八九萬人窮民資以爲生若由海運則須另募熟悉海道者而此常年運漕之衆一旦失業難保不流而爲匪奏入事遂寢是月署浙江鹽政海寧之南沙與紹興之山陰會稽蕭山等縣向爲斥鹵之區無業貧民往往刮淋私煎嗣設官廠收鹽招商配運因該處燒鹽用柔草鹵耗重商人虧本者多攸鈛以發帑收買不令商自辦官爲督率且民人與竈戶雜居村落散漫因令各竈戶聚處成團每戶一鍋一盤合竈煎鹽可以按團稽覈並酌裁私設渡船絕其販私之路命如所請行九月擢兩廣總督十一月入覲賞戴花翎十七年

二月奏言粵東劫案多與其懲於事發之後不若防於未發之先又必得其地以截伏竄之途得其人以收督捕之效臣查廣肇韶連各府州內河則汊港多歧陸路則岡嶺環互水嚴卽由陸竄陸嚴卽由水逃如順德花縣從化增城三水清遠英德高要鶴山等縣大者八九百里小者六七百里其中何處險要何處通達爲縣令者苟非熟於地徑則不能勝緝捕之任夫匪徒聚散無常必有窩藏之地當於適中要隘選派勤幹文武大員給以隨員居中調度益以兵役四路偵探一有賊蹤卽分投圍截而又以時飭州縣官親赴民間與紳衿耆老講明勸導使境內不得藏奸如此則刑教兼施文武用命拔本塞源莫急於此因劾三水知縣章家麟海陽知縣姜樹鶴山知縣馮克鞏靈山知縣彭應徵樂昌知縣勵世馨等不職舉三江協都司張仁南韶連鎮總兵何君佐可用諭曰能如此察吏方不愧督撫之職時三合會匪嚴貴邱等已獲被脅者多自首攸銛請予以自新之路嚴立再犯之條奏定懲創章程下部議行十八年三月諭曰粵東自洋面肅清以後惟內河及陸路土匪未靖經蔣攸銛督飭文武員弁緝捕疊獲七百餘名戢暴安良著有成效著交部議敘九月豫東教匪俶擾並有賊潛入紫禁城持械逞兇攸銛疏

言我朝聖聖相承田賦不加戶丁兵役不用民力誠史冊所未有皇上臨御以來
戡定四省教匪登斯民於衽席不意光天化日之下竟有此昏不知恩愍不畏死
之亂民以臣思之亦非盡地方官倉卒激變所致誠如聖諭變起一時禍積有日
始而萌孽方滋漫無覺察繼而燎原將熾尙冀消彌苟且目前規避處分以致水
懦民玩釀成亂逆此因循怠玩之弊咎在州縣而表率無方勸懲不力則督撫藩
臬道府之責尤重咎尤深欲防亂於未然首在甄別道府州縣近日州縣貪酷者
尙少而委靡者甚多該道府耳目切近非不知某員闖穴某員勤幹每以闖穴者
爲安詳勤幹者爲多事黑白莫分是非倒置督撫藩臬稍不加意卽受其欺蒙夫
闖穴之釀患與貪酷等臣竊以爲目前急務莫先於察吏而欲振相沿之弊曠當
用破格之勸懲凡貪酷者固應嚴參平庸者亦隨時勒休改用不必俟計典之年
始行覈辦其有守有爲勤能愛民者卽密奏請旨優獎以爲之勸道府得人則州
縣治州縣得人則閭閻安將禍亂之萌自消太平之福可致矣疏入諭曰此係非
常大變總由因循而成朕力除此弊必期振作知人安民洵至言也十九年閏二
月疏言天下道府由牧令起家者十之二三由部院外擢者十之七八誠以司員

持進退准駁之衡俾之練習日深通今不至於泥古然後敷施有本坐言卽可以起行聞近來司員少卓然衆著者非今之人必不昔若也一由滿洲之廢生太易一由漢員之捐班太多請飭部臣隨時考覈於部務不甚相宜者奏明以同知通判分發各省使之勉於猷爲以供器使而部曹亦漸疏通數月以來迭奉諭旨諄諄嚴甄別以汰衰庸減處分以全幹吏但恐汰之而復來者猶是等倫全之而進用者不無冒濫究無以仰副勤求治理之盛心今之才守克兼沈於下位者衆矣請飭公正大臣薦達皇上擇其名實相副者擢而用之使之連茹彙征相觀而善抑臣更有陳者任事之與專擅有義利之分若一人任事卽以專擅陷之則衆口可以鑠金官常樂推諉以苟全矣協恭之與黨援有公私之別若兩人協恭卽以黨援目之則立異可以遠嫌書吏得乘機而舞弊矣此近今之積習爲大臣者當力除之至於翰林固屬詞臣然務在崇正學抑浮華養成明體達用之才似不必專以文章課殿最科道爲朝廷耳目之官如果眞知灼見則地方大吏之優劣得自輿論者爲最詳也然同一敷陳能否得體均之糾劾是否爲公詢事考言難逃洞鑒其有識見卓越才品清正者似當由京堂而擢卿貳與翰詹衙門參用總之

有治人無治法而用人之道因才因地因時臣下無可市之恩君上有特操之鑑人無求備懲貪者不宥其瑕政在集思職要者弗撓於衆疏入諭曰慎簡乃僚勤修厥職俾賢傑奮興庶明勵翼朕實有厚望焉粵東瀕海例准洋船貿易時英吉利國護貨兵船不遵定制停泊外洋竟抵虎門攸銛示以兵威復召大班益花臣詰責之英人屈服遂揚帆去因請嚴禁民人私爲洋人服役及洋行不得建洋式房屋鋪戶不得用洋字店號清查商欠不准身家淺薄之人濫充洋商並不准內地民人私往洋館均如所議行二十年四月南澳鎮總兵羅鳳山巡洋疏失攸銛奏請革職上以事係革兵林勇鄭高挾恨搶船若罪鳳山則二人轉得快其私忿命傳旨申飭七月暹羅國王籲請中華商民代駕貢船攸銛不許先是商民陳金負該國王貨本銀三千餘兩攸銛於司庫閒款內墊給至是貢使來粵繳還墊項攸銛以旣經奉旨頒給卽係天朝恩賚若又准繳還轉非俯卹外人之道應卻之上嘉其得體二十一年英吉利國遣使人貢由海道赴天津攸銛請敕諭該國王嗣後入貢當照琉球等國定例就近由廣東北上不可冒風濤之險遠赴他處收口若不恪守章程船到天津不許登岸並不接收貢物此次貢使似當由陸路派

員件送來粵其餘仍由海道原船回國均不許逗留諭曰蔣攸銛於數千里外所論事理與朕前後飭辦情形無一不相脗合實能深知朕心遇事能見其大可嘉之至二十二年正月署粵海關監督閩皖茶商向由江西內河入粵時洋面肅清諸商利於海運攸銛恐其與外人通且私帶違禁貨物奏請禁之粵東屯田自改設衛所招民佃種可以照額徵輸者不過十之五六其衝陷應豁除者以新墾沙灘抵補土瘠不能足額丁多逃亡攸銛奏請覈實沃壤照上則徵收新灘則減之九月調四川總督諭曰西南保障疆宇寥廓五方雜處訟獄滋繁以清慎居心勤明任事察吏宜嚴治民以正切忌疲玩因循常思威克厥愛二十三年三月奏省標爲各營表率臣與將軍提督隨時操演復每日抽閱二三十名其戰守糧缺向由本營驗充者臣亦親閱期一兵有一兵之用上嘉之川民帶刀防身動釀命案攸銛飭各州縣查明境內鐵匠若干家鎮市以十家爲一牌鄉場以五家爲一牌如保甲法取其連環結一家有犯一牌連坐若孤村腰店有設鑪者必造刀窩匪之人卽逐之民以違禁物呈官者免罪川北囂俗尤甚請於廣元巴州各添遊擊營緜州添都司營設弁駐兵卽於營制中抽移抵補以節經費從之十一月署成

都將軍時御史程伯燮奏四川州縣有彌杆釣杆貼籠等刑諭攸銛查禁因奏川省前辦囑匪及教匪初平餘氛未靖之時不得不齊以嚴刑今承平日久聽斷自有常刑臣已嚴飭各屬銷毀非刑器具惟匪徒仍須按法懲治不得博寬厚之名留閭閻之害蓋匪徒之斂肆視州縣之寬嚴稍存姑息則水懦之患甚於火烈上深然之灌縣江都堰爲秦李冰所築析江流爲三分溉成都十四州縣民田惟歲修經費不足攸銛以官捐則恐藉口累民民捐又恐派收滋弊請動撥義倉租息幫貼堰工以民間自出之財爲民間至要之用上以事屬兩益如所請行二十四年諭曰川省地廣民稠從前教匪滋事閭閻被其蹂躪軍興之際小民不無勞費自蕩平之後十餘年來休養涵濡元氣已復本年朕六旬慶辰普免天下積欠蔣攸銛奏該省錢糧年清年款並無積欠可免蜀民踊躍奉公輸將恐後亦由該地方官撫綏化導督率有方甚屬可嘉本年京察蔣攸銛著賞加一級二十五年七月仁宗睿皇帝龍馭上賓上命攸銛來京叩謁梓宮特加太子少保銜諭曰汝爲守兼優自茲以往當加倍勉勵永矢公忠爲國之心上酬皇考倚畀深恩以副朕得賢之望道光元年二月雲南永北廳有勞些夷人讎殺漢民所至焚搶地與四

川之會理鹽源接壤攸銛選練材武治戰守具撤金沙江打衝河渡船諭沿邊民夷築寨禦之撫難民一萬三千九百餘人事聞上嘉之曰實力急公不存彼疆此界之念所謂大臣者不應若是耶十二月賜御書福字攸銛具摺謝諭曰我君臣當交儆圖治事務從實心毋縱逸以期永荷天禧茂膺繁祉也二年二月京察上以攸銛整飭地方克副封疆重任下部議敘松潘廳黃勝關外有果洛克野番素剽悍因搶劫玉樹番族羸馬及西藏巴雅爾堪布貢物頻年用兵是年八月提督桂涵深入夷巢擒耶結等四十六人悉誅之並破其唐凹唐玉達凹三寨番衆股栗誓受約束上以攸銛調度得宜下部議敘九月召爲刑部尙書十月管理戶部三庫事務十二月賜紫禁城騎馬三年四月授直隸總督諭曰蔣攸銛受兩朝知遇惟當力圖報效國爾忘家不准以身係旗人世居寶坻爲辭況伊歷任督撫皆能公幹廉明政聲彰著設令再四懇求亦不能俯從所請也爲國宣力其遵諭行時直隸久旱攸銛既抵任奏官民彫敝整飭與調劑兩難諭曰我君臣惟有以誠籲天以勤理政庶可迓祥和而安吾赤子也至於任內諸事而諭已詳卿之材力朕所深信凡察吏安民修武備平獄訟諸大端當注意焉六月以直隸頻年災賑

見值久旱繼潦田禾受傷恐糧價日昂農民艱於口食請截南漕四十萬石存天津北倉以備緩急從之時永定河因大雨連綿水勢異漲北三工南二工及北中汛先後出槽漫灘所在危險攸銛赴工督辦諭曰卿此行正當溽暑炎蒸辦公固不可稍懈身體亦當自重尋奏臣奉職無能致屢經漫口請交部議處時方興畿輔水利以服闋江南河道總督署工部侍郎張文浩董其事攸銛固請飭文浩赴工查勘以免貽誤奉諭所奏不爲無見但永定情形與南河異卿仍應留心不可以張文浩熟悉河務遂全然諉卸也又奏北運河亦有漫口請照歷辦成案由各廳汛賠修尋各險工平穩諭攸銛查辦災務既而通省百餘州縣先後報災攸銛請飭部速撥賑餉銀一百二十萬兩經費銀六十萬兩諭曰朕不德不能上感天和致我無辜赤子薦受災荒惟有返身修己盡力拯濟庶救顛沛之危但國家經費有常雖重帑用之於百姓原不稍惜若令奸胥猾吏趁機吞取則大不可卿受國家任用厚恩且才能素著任事實心俾災黎均沾實惠奸猾不得侵漁斯乃不負委任八月奏省城兵房坍塌請於見撥經費項下借銀修葺分年扣還諭曰見撥銀一百八十萬兩之多自以工賑爲要若另案先撥必形支絀且此次修理兵

房僅銀九千九百餘兩何至無款可支可見直隸藩庫空虛似乘此辦理工賑之時多請帑項豫爲彌補虧缺地步則今歲請工請賑恐有不實也以蔣攸銛之居心任事不應若是攸銛奏臣前請撥經費銀六十萬兩於借修兵房之數卽在其中並非另案工程見又詳查庫款並無虧缺分別劃除提解籌補追賠以歸覈實得旨所定章程尙屬明晰務要奉行無懈不可日久又有所牽混也十一月奏永定河自康熙三十七年始建隄工嗣因下游受淤至乾隆三十七年河已六徙此後沙積淤停去路不通屢有旁溢之患近見河流北趨方冬水涸尙不免潰隄蟄埽若不籌備來年汛漲可憂因勘估減水閘壩越隄等工請於浙江江西湖南江蘇廣東封存款內提銀五十萬兩解交藩庫以備支發下部議行十二月奏災歉州縣來春青黃不接之時須商販流通以資接濟請將奉天米船暫免納稅至災重之區春耕未齊必須展賑者三十八州縣不可使災黎失所又不可多糜帑項臣極意撙節尙須撥銀二十萬兩俱從之四年二月請修永定河閘壩以工代賑時流民出關扶攜塞路上切責攸銛令飭所在有司毋玩視民瘼攸銛奏近海東南一帶積水之區至今未涸災民得賑後仍赴奉天等處營生禁之適以擾民得

旨已飢已溺之懷不可忽諸時張文浩補江南河道總督上以工部左侍郎程含章代之攸銛與含章奏言治水之大綱有九一東淀一西淀一大清河一永定河一子牙河一南運河一北運河一天津海口一千里長隄此九者均不可緩之要工請飭部先撥銀一百二十萬兩從之閏七月命協辦大學士仍留直隸總督之任五年正月諭曰協辦大學士蔣攸銛自調任直隸以來通省軍務日見起色著交部議敘三月攸銛六十生辰賜御書宣勤篤祜扁額及福壽字並壽佛如意各物五月議上長隄善後事宜六條一千里長隄應責成各汛官率漢夫於支渠漢港疏其淤淺一隄工應歸民修每年大汛近隄邨莊民戶出夫巡防一瀦大川之水以淀爲蓄淀中葦已滋蔓漁戶簽樁下簷更壅泥沙今令挑淤拔簷嗣後嚴禁侵占違者治罪一東西兩淀舊有漢夫袋船裁於乾隆二十九年今應復設袋船百隻漢夫三百名一天津知縣舊管長隄三十五里事繁恐難兼顧應撥外委一員兵八名別爲一汛專管隄工移長垣縣丞駐任邱移唐縣主簿駐文安大城之間各添水手四名一隄工大半瀕河汛期風浪撞擊更恐上游盜決兵夫晝夜巡防無所棲止應於任邱文安境內各建堡房十座大城四座天津靜海各五座雄

縣保定各五座其新工最險之地如任邱鄭州四鋪以下迤北臨大港淀又天津杜家道口以下石家房各添防風埽以資保衛奏入諭速行六月授體仁閣大學士是年禦黃壩以南運道淤甚江廣各幫糧船留滯者一百九十餘萬石既盤運北來而天津北河至通州又多古淺新淤上以爲遲至冬令水落難行若北風驟起必連檣凍阻迭飭攸銛爲計十月奏接連滯漕已全數入直隸境上嘉之十一月召回京命在軍機大臣上行走管理刑部事務六年三月充會試正考官十二月充經筵講官七年三月上以河湖交敝運道不通命攸銛往勘尋奏清水不能敵黃督臣琦善因開王營減壩挑濬正河而下游關孟兩灘俱膠淤該督泥於逢灣取直成法並力主睢南同知唐文睿兩灘並挑之說致黃水倒漾糜帑殃民五月罷琦善兩江總督命攸銛以大學士代之攸銛具疏辭謝諭曰卿精力未衰才能夙著毋庸過遜遂奏言督臣兼河務自高晉薩載始以其由總河調任諳練有素也嘉慶十五年松筠任江督時奏准修工撥餉專責河臣督臣不與聯銜乃可稽查覈辦請如松筠例至常駐清江則始於鐵保徒掣河臣之肘而於地方公事轉多曠誤諭曰兩江總督兼轄河務尋常興工及一切隄防蓄洩自係河督專責

該督不過總其大綱至辦理要工鳩夫購料籌款撥項以及甄覈河員稽察弊竇該督必應會商毋得諉卸惟該督統轄三省若常駐清江轉於地方應辦事件無積壓著蔣攸銛酌量情形如無須駐工卽回署清釐庶務是年試行海運有效因請來年仍用其法並請將本年江南首進二進回空運船截留河北接運浙江安徽江西湖北湖南盤壩之米惟盤壩需費多如來春竟能開壩通漕則河北空船可以備而不用七月以西陲用兵四城克復加恩軍機大臣攸銛晉太子太保八月奏見距霜降甚近而黃水未降湖水雖有一丈五尺餘寸仍恐不能敵黃與其臨時束手莫若思患豫防請撥江蘇藩關各庫銀六十萬兩爲盤壩經費諭曰新漕抵壩正可乘黃水未漲之前照常北渡儻江廣重船到時汎水已發亦可仍用倒塘灌運之法省無數周折若沾沾目前不爲國是經久計則兩江重任盡人皆可爲之何必特加簡畀耶所請不准行又諭曰海運原非良策該督以河漕不能兼辦騰出河身疏淤導滯復以清刷黃之舊清水既能刷黃焉有不能濟運之理蓋意在一行海運清水卽毋庸多蓄高堰可保無虞明春清不敵黃又恃截留運船爲盤壩之用爲國乎爲身乎攸銛奏臣時以未能報國爲懼何敢自爲身圖

惟限於才識覩此不可測度之勢更不敢存僥倖萬一之想卽如本年黃水驟高禦黃壩遂不能啟而清水尙足倒塘灌運其在後軍船漸有黃淤已屬勉強而行至來春則黃水本高於清汛期必又加漲湖水本不敵黃經冬況又消減若強行灌運勢必高流倒漾淤墊運河同一倒塘之法難易迥殊故今日鯁鯁過慮萬不得已而請盤壩若空船悉數南回儻重運經臨倒塘竟不能行又無船接運臣一身不足惜奈國事何至海運之議詢之船戶皆稱一次可以運竣較上屆費省而速諭曰海運姑從所請盤壩毋庸再瀆未幾海運亦罷八年正月西師報捷生擒逆裔張格爾諭曰軍興時蔣攸銛尙在軍機大臣上行走贊襄軍務頗著勤勞著晉太子太傅銜五月以全漕渡黃下部議敘十月河督張井等奏中河廳補南岸繹道山盱廳添滾水壩揚糧廳移建昭關壩高堰山盱兩廳幫寬大隄共需銀一百二十九萬餘兩諭曰此項工程巨萬若辦理稍不如式仍於河務無裨蔣攸銛當嚴飭工員妥辦有偷減草率等弊卽應據實嚴參如不行糾參將來別經覺察惟該督是問尋奏臣服官中外有公是非而無私好惡在己從不迴護於人何肯瞻徇諭曰卿之公正朕所素知不然亦不畀茲重任矣九年四月署漕運總督十

二月署河道總督十年二月御史王贈芳奏陳課歸場竈之法事下攸鈺等會議攸鈺言臣與兩淮鹽政福森再四籌之有不可行者六兩淮竈埠客地多極貧之戶而嗜利之心十倍於畏法若買鹽之銀先入其手非以多報少卽有售無徵及欠課不完雖日日追比百不償一其不可行者一淮鹽引地最大如河南之光州汝寧湖北之襄陽宜昌荆門安陸湖南之衡州永州寶慶江西之贛州吉安建昌道遠則運艱商人必裹足不前鄰私益售官引益滯竈鹽積而不銷焉能使窮竈照額納課其不可行者二場竈透漏私鹽久矣今若不憑引日聽其轉販則透漏更多而販私無課人皆私而趨之場員官卑役少防範難周不但不能化私爲官轉恐驅官爲私而匪徒壟斷馬頭益無所忌其不可行者三向來鹽課歸商竈丁只納折色蠲緩之年在折色而不在鹽課若課歸竈戶則一遇偏災刁頑卽有所藉口額課幾歸無著其不可行者四鹽場數十皆瀕海斥鹵之區居民寥落場官旣難於徵更難於守若築城建庫不特無此經費亦且無此政體若隨徵隨解則日日僉差程程護課煩擾甚矣其不可行者五淮南之有根窩者每次給單十綱以單質銀得千數百萬爲辦運貨本若根窩廢則質單卽成廢紙恆業頓失生計

立窮其世業鹽務之捆工箕秤鈎槓杵帚等又不下數十萬人遽令星散必至流離亦非仰體聖主子惠元元之至意其不可行者六奏入報聞閏四月諭曰有人密陳兩淮巨梟黃玉林以儀徵老虎頸水次爲匪聚籌運之所以湖北之陽邏江西之藍涇爲屯私發賣之處大者沙船由海入江小者貓船由場河入瓜口器械林立輓轡轉運長江千里呼吸相通甚則劫掠官鹽每次以數百引計貲本旣多黨羽益衆立約束以要結人心且於大小衙門俱有耳目上官爲屬員蒙蔽下僚以畏葸偷安所獲者不過肩挑負販零夥小梟張大其詞藉此爲官弁升遷之地等語巨梟肆行地方官豈音毫無聞見若恐查拏激變相率容隱是不但爲害鹽務必致釀成他變蔣攸銛接奉此旨務當不動聲色先將黃玉林一犯拏獲嚴究黨羽盡絕根株旣不可輕率債事亦不可任令潛逃尋奏臣前以儀徵縣有梟販潛蹤請將沭陽知縣王用賓調署以其緝捕勤能也頃聞黃玉林聲勢已重非一縣令所能制而老虎頸濱臨大江若用兵力必走漏風聲非畏罪遠逃卽聚衆拒捕因密委常州營遊擊金萬全潛往誘擒諭曰該督恐走漏風聲然亦須酌量情形是否應派兵堵截蔣攸銛自能隨宜調度朕亦不爲遙制五月奏黃玉林率夥

犯八名船十二隻私鹽三萬七千斤赴官自首願立功贖罪兩淮私販甚多正須以次翦除若令黃玉林作線偵捕未始非靖私疏引之機揚州總散各商俱願聯名結保懇恩寬其既往予以自新如該犯不能立功仍重治其罪奉諭此係權宜辦理朕因緝私緊要姑允所請該督當籌計萬全不得遷就一時轉滋流弊六月因病乞假兩月許之八月假滿視事召來京供職時黃玉林復圖販私潛與其黨伍步雲書爲江寧協副將惠普恩所獲攸銛與新任總督陶澍聯銜奏請將黃玉林改發新疆復恐其到配潛回致貽後患遂單銜密奏請卽行處絞諭曰黃玉林反覆無常自外生成著卽行正法蔣攸銛辦理此案事前既無主張事後又復苟且以大學士膺封疆重寄者固應如是耶下部嚴加議處部議革職上加恩以侍郎降補九月補兵部左侍郎十月卒諭曰原任兵部左侍郎蔣攸銛前以大學士簡任兩江總督數載以來尙無貽誤本年因黃玉林一案辦理錯謬降補兵部左侍郎來京供職茲行抵山東平原縣途次遽爾溘逝殊堪軫惜念其歷任封疆宣力有年平日辦事尙屬認真著加恩照尙書例賜卹所有任內一切處分悉予開復應得卹典該衙門察例具奏尋賜祭葬子霖遠戶部員外郎爵遠貴州巡撫

汪廷珍

汪廷珍江蘇山陽人乾隆五十四年一甲二名進士授翰林院編修五十六年二月大考二等升侍讀五月擢國子監祭酒六十年上以祭酒有表率士子辦事之責廷珍人甚粗率不能勝任降補翰林院侍講嘉慶元年入直上書房三年三月大考二等擢侍講學士七月丁母憂五年服闋六年七月補原官十月充日講起居注官七年提督安徽學政九月任滿回京十年轉侍讀學士十一年十月提督江西學政十二月遷太僕寺卿仍留學政任十二年按試袁州府時萬載縣土棚兩籍童生尙未赴縣投考巡撫金光悌以聞上命會同學政籌議考試章程十三年二月廷珍偕光悌奏稱雍正九年舊例棚籍童生五十名取進一名最多以四名爲止不致侵占土籍迨乾隆二十八年學政周煌以各縣棚民應考無多奏請併入土籍考試惟萬載縣棚童本多以各縣棚額旣裁未便獨留亦遂同裁自此許訟不休萬載土籍童生一千數百學額止十二名加以裁去棚額棚民應試者日衆每次取進五六名復占土額土額愈覺減少雖經嘉慶八年加額四名而合額如故土民不能實受其益欲杜訟端須仍復分額舊例棚童二百七十餘名照

例應取進四名請卽以加額四名作爲棚童額缺與土額各分則爭端自息部議如所請四月升內閣學士兼禮部侍郎銜仍留學政任十五年任滿回京十六年四月充殿試讀卷官五月充教習庶吉士十一月擢禮部右侍郎十七年五月命充武英殿總裁官十一月復入直上書房侍宣宗成皇帝學十八年正月充經筵講官六月充浙江鄉試正考官八月旋授浙江學政九月轉左侍郎二十一年任滿回京復入直上書房二十二年三月署翰林院掌院學士旋擢都察院左都御史四月充上書房總師傅尋充玉牒館副總裁官殿試讀卷官八月以奸商運米出城經留京王大臣等訊明巡城御史伊絲奏蕭鎮貪婪得贓問擬如律廷珍未經嚴參下部議處尋議降三級調用上加恩改爲留任二十三年三月升禮部尙書七月署吏部尙書八月充順天鄉試正考官十一月廷珍以原任內閣學士兼禮部侍郎銜錢樾應否入祀鄉賢祠請旨上飭其不覈定准駁取巧推諉下部議處尋議降二級留任二十四年四月充殿試讀卷官八月署吏部尙書先是十四年十月上五旬萬壽九月二十七日孝慈高皇后忌辰常服不挂珠是年上六旬萬壽九月二十七日廷珍未授十四年故事聲請上責其粗率怠玩降補禮部左

侍郎二十五年三月復授都察院左都御史四月充殿試讀卷官九月充實錄館總裁官尋命廷珍專司勸辦實錄底本復授禮部尙書十二月以奏請停止清查各省陋規下部議敘尋賜紫禁城騎馬道光元年九月奏翰林院侍讀學士秦承業在上書房言語不謹上詰問廷珍不肯指實以陳奏含糊罰俸半年十二月復署吏部尙書二年正月京察屆期廷珍以品學兼優承辦實錄底本勤慎通達盡心纂輯下部議敘三月充會試正考官四月充教習庶吉士十月上謁陵命留京辦事署戶部尙書兼署翰林院掌院學士十二月命兼管國子監事務署都察院左都御史三年二月上釋奠文廟禮成臨幸辟雍諭曰禮部尙書汪廷珍於嘉慶十七年蒙皇考簡用上書房師傅與朕朝夕講論非法不道學問淵博迨至二十三年授任總師傅以來倍加勤慎考古證今談皆中道使朕通經義辨邪正受益良多又自朕親政後畀以左都御史尙書之任辦理均能妥協是汪廷珍於師道臣道之義可謂兼備矣本日臨雍講學因思曩者討論之功眷懷舊學用沛恩施汪廷珍著加太子太保銜伊子汪報原見回籍守制服闋來京時該衙門遇有員外郎缺出卽行奏補用示朕崇儒重道之意著將此旨鈔錄一道交上書房存貯

三月充會試正考官四年二月廷珍疏言在京各衙門郎中員外主事皆有題缺舊例由堂官揀選題補所以鼓勵人材今郎中員外之題缺仍舊揀選而主事之題缺挨次補授辦理參差應請飭下該部妥議章程以昭畫一疏入下軍機大臣會同吏部覈議尋經覆奏以主事候補人多越次揀選恐開奔競之門仍循舊章尙無流弊該尙書所奏應無庸議四月仁宗睿皇帝實錄聖訓告成上加恩在館臣工賞廷珍子報閏主事孫承佑舉人復命將監修總裁正副總裁交部議敘廷珍籲請停免許之六月命偕大學士托津等會同軍機大臣審訊侯際清捏報母老贖罪賄屬刑部官吏舞弊一案鞫實問擬如律十一月南河堰盱嬰工潰決褫河督張文浩職解大學士兩江總督孫玉庭任命偕吏部尙書文孚馳往查辦十二月奏稱逐加履勘詳訊工員僉稱張文浩一味固執於禦黃壩應閉不閉五壩應開不開措置乖方以致失事孫玉庭兼轄河務於張文浩辦理不善之處不能先事防救事後又不據實參奏有心徇隱迴護請將文浩發往伊犁效力贖罪玉庭下部嚴議上嘉其察奏甚屬明晰會侍郎朱士彥條陳南河事宜上命文孚廷珍詳細議奏尋奏言就原奏各條分析妥議一見在修補石工請於石隄外用碎

石拋成坦坡藉資保護則堰旰石隄永無塌卸之虞一高堰之內向有二隄較大隄矮至二丈必須增培與大隄平始足以資保障計需費二百數十萬而大隄歲修仍不能免若但酌量培補仍屬無益此次工程應請緩辦一江南黃河兩岸俱有宣洩之地南岸所洩之水遠近不一皆滙入洪湖北岸惟王營減壩距清黃交滙處不足二十里減漲較爲得力請將壩以內鹽河隄埽勘估加築以備大汛啟放俾不致偏注南岸一山旰五壩原以備減洩湖水見在仁義禮三壩自嘉慶年間移建於蔣家壩以南地勢高亢引河淺窄智信二壩又經擡高壩底以致洩水不能暢速請於仁義禮舊壩地方審擇形勢添建石滾壩一座以防異漲一海口並無疏濬之法惟有束水攻沙使之全力歸海查嘉慶十五年所築新隄下游無隄之處接生新灘河流至此收束不住趨海勢難迅速應於新隄之尾相機接築俟來年重運渡黃後由河臣勘明奏辦均如所議行五年正月京察屆期廷珍以人品端方部務熟悉下部議敘二月上謁陵命留京辦事署翰林院掌院學士六月命協辦大學士充玉牒館副總裁十二月以浙江監生徐晉鈔錄舊文中式後自行檢舉巡撫程含章奏請註銷舉人仍留監生下禮部議議如所請上以徐晉

應斥革該撫並應附參汪廷珍等有意輕縱嚴飭之廷珍下部察議尋議罰俸一年上加恩改爲罰俸六箇月六年二月上謁陵復命留京辦事尋充教習庶吉士十一月廷珍七十生辰御書耆宿承恩扁額福壽字及壽佛如意諸珍物賜之七年閏五月因病乞假命醫官診視並賞賜人漚七月卒諭曰協辦大學士禮部尙書汪廷珍人品端正學問淵博嘉慶十七年皇考仁宗睿皇帝簡用上書房師傅與朕朝夕講論非法不道迨二十三年授任總師傅倍加勤謹考古證今深資啟沃朕親政後畀以左都御史禮部尙書擢襄綸閣晉錫宮銜凡所陳奏均得大體本年閏五月間遘疾迭經賞假調理遣醫診視並賞給人漚派員署理部務猶冀剋期就痊倚任方長遽聞溘逝實深悼惜著加恩晉贈太子太師入祀賢良祠賞給陀羅經被派奉宸苑卿奕紀卽日齋往並派大阿哥於初十日帶領侍衛十員前往賜奠由廣儲司賞給銀一千兩經理喪事任內一切處分悉予開復所有應得卹典該部察例具奏伊次子候選主事汪報閏俟服闋後遇缺卽補以示朕篤念耆臣至意尋賜祭葬予諡文端九年江蘇巡撫陶澍請以廷珍入祀鄉賢祠諭曰汪廷珍學問淹通持躬端謹居官勤慎朕所素知前已加恩入祀賢良祠茲據

陶澍具題請將汪廷珍崇祀鄉賢汪廷珍著准其入祀鄉賢祠毋庸再交部議子報原一品廕生刑部員外郎報閩江西南安府知府

初彭齡

初彭齡山東萊陽人乾隆三十六年巡幸山東召試欽賜舉人四十五年成進士改翰林院庶吉士四十六年散館授編修五十年大考二等五十四年授江南道監察御史五十六年四月劾協辦大學士吏部尙書彭元瑞於胞姪良驛爲子頂買吏員知情徇隱又總理國子監事徇私將其壻監生饒文震咨送武英殿校錄翰寶降元瑞侍郎五月遷兵科給事中五十七年充廣東鄉試正考官五十八年三月轉吏科掌印給事中四月遷光祿寺少卿五月提督湖北學政六十年差滿回京嘉慶元年四月轉通政司參議十一月奏參江西巡撫陳准貪贖散法命戶部右侍郎台布會同兩江總督蘇凌阿按訊得實褫准職戍新疆二年二月遷太僕寺少卿九月轉通政司副使十月遷光祿寺卿十二月遷通政使司通政使三年提督福建學政四年擢兵部右侍郎仍留學政任三月轉左侍郎召回京夏授雲南巡撫十月上以前任總督富綱請罷官鹽改歸民運民銷命彭齡籌議以聞

十一月奏滇省鹽務官爲辦運日久弊生應如富綱議但原奏尙有未盡妥協之處宜酌加變通一原議奏銷時如有未完將井員參處此因各井定有歲額而言今擬不分井口聽民販運須俟試行二三年後再行咨部定額缺額者開參溢額者議敘一原議設立引紙以防偷漏查引紙例由部頒滇省距京萬里往返需時請由鹽道刊發一原議行銷地面各就近井配發但各井衰旺不同各屬行銷多寡亦難懸擬應令商販於領照後遠近聽其所之不至擡價居奇一原議酌借竈戶薪本今改令竈戶自煎自賣賣鹽之價即可爲煎鹽之資應毋庸接濟下部議行十二月以兵部侍郎江蘭前任雲南巡撫時於抱母恩耕二鹽井被水成災匿不陳奏致井口淤塞鹽課墮銷劾罷之六年三月以親老乞改京職上允其請調貴州巡撫伊桑阿代之七月途次劾伊桑阿在貴州巡撫任內驕奢乖戾苛派屬員又剿辦石峴苗匪飾詞冒功褫伊桑阿職命雲貴總督琅玕新授雲南巡撫孫日秉勘問得實寘諸法八月回京署吏部右侍郎旋署兵部右侍郎九月充順天鄉試副考官補刑部右侍郎七年四月充殿試讀卷官六月命偕副都統富尼善馳赴貴州查辦道員孫文煥濫用軍需究出巡撫常明拖欠鉛廠銀並私賣用贖

鉛丸及任聽幕友抽匿報銷案卷依律問擬有差七月轉左侍郎九月署貴州巡撫旋調署雲南巡撫十二月劾布政使陳孝昇迪西道薩榮安辦理維西軍務冒銷帑銀命兵部侍郎邢彥寶大理寺少卿章煦往讞得實治罪如律八年正月回京五月命偕戶部右侍郎額勒布清查陝西軍需查出浮支濫應各款自巡撫秦承恩以下罰賠降調有差六月回京調工部右侍郎十二月調戶部右侍郎署吏部右侍郎九年以誤聽前任湖北巡撫高杞傳述廷臣請照漏洩機密重事律擬斬諭曰大學又將召對時面奉諭旨向高杞傳述廷臣請照漏洩機密重事律擬斬諭曰大學士滿漢尙書及原審大臣會議初彭齡罪名據稱初彭齡冒昧參劾已屬陳奏失實此語非是朕從不因言事罪人至面陳密諭事件私向高杞傳述卽照漏洩常事律加等罪亦不過褫職遠戍何至引近侍官員漏洩機密重事律擬以大辟況臣工遇事敢言方可祛除壅蔽凡關繫弊端及臣僚不公不法等事既有所聞本應卽行陳奏候朕密爲查察若槩諉諸尙無確據勢必事已破露始行入告何如早行發覺轉不致釀成巨案乎初彭齡風聞不實原無可罪至於洩漏一節亦當按事之大小以定罪名輕重初彭齡所洩漏者尙非重大情事若遽照前律擬斬

設遇有漏洩軍國重務者其罪何以加乎且見在與議諸大臣中皆常經召對之人試各捫心自問豈盡守口如瓶毫無漏洩設有一二傳播之言被人指摘若俱照此例辦理既於政體有乖亦甚非諸臣之福也初彭齡本應革職發往新疆姑念其見有老親著革職加恩令其在家養親閉門思過十年十一月諭曰初彭齡前任御史時遇事直言不甘緘默迨擢任巡撫辦理地方事務亦尙認真上年參劾吳熊光操守平常係因高杞騰播浮言遂據以入告未免爲高杞所愚然其獲罪實不在此惟將朕召對時面諭之旨向高杞傳述漏洩之罪實無可辭今事已閱年餘念其平日官聲尙好本日所出右庶子一缺著加恩以初彭齡補授十二月遷光祿寺卿充實錄館總校官十一年二月擢內閣學士兼禮部侍郎銜時甘肅已革正寧縣知縣徐振鵬受賄故出人罪陝甘總督倭什布擬以遣戍振鵬遣弟振鶴來京翻控命彭齡同工部侍郎英和往獻坐振鵬誣枷示先是倭什布以山西大同等府向食蒙古鹽嗣因商人馬君選獲罪經理乏人移咨阿拉善王瑪哈巴拉速行遴派疏聞諭曰向來晉省池鹽由商行運蒙古鹽斤入口本有例禁嗣經奏明分定地界行銷迨將東河鹽課改歸地丁聽民間自行販運遂無一定

口岸蒙古鹽斤因此侵越內地此時蒙古鹽斤內地存積不多又因查拏馬君選之後並未撈鹽發運正是極好機會與其令阿拉善侵占何如令淮北越境暢銷必當趁此時熟籌妥辦從前晉省鹽斤所以改由民運者皆由地方官於僉商一事辦理不公商民畏累以致鹽課支絀是以定議課歸地丁聽民販運本非經久無弊之法見派英和初彭齡赴甘省查辦事件路經晉省令與同興會商妥議奏明候旨施行五月彭齡等議奏河東鹽務仍請招商領運又蒙古吉蘭泰鹽池產鹽豐旺蒙古人等性拙耽逸不能空運自馬君選獲罪嚴禁內地民人出口鹽池漸成廢棄請一併招商運辦上可其奏命偕倭什布及山西巡撫同興陝西巡撫方維甸籌議章程以聞旋奏瑪哈巴拉請獻吉蘭泰鹽池歸公上允之七月奏言河東鹽務前以賤價定爲常額故商人易致賠累嗣後請照每年收鹽豐歉成本重輕隨時定價不立限制並准舊商再保新商口岸暢滯不一者均勻分配至吉蘭泰撈鹽坐商必須熟習地利應在甘肅就近募充其運商則於山西殷實之戶募充三省所屬各州縣或食口鹽或食潞鹽劃清地界河東鹽政仍令山西巡撫兼管添設磴口運判一吉蘭泰及磴口鹽大使各一河口鎮批驗大使一下大學

士九卿議行九月回京授安徽巡撫十二年二月覆訊兩江總督鐵保審定壽州民張倫等猝中烘板蛇毒身死一案實係武舉張大有與胞弟大勳妻胡氏通姦因妒姦毒斃族姪倫及雇工李賡堂父子寘於法並究出蘇州府知府周鏞等受賄捏飾降革治罪有差諭曰初彭齡於此案悉心推鞠秉公查辦俾冤獄平反得成信讞實屬可嘉不負委任著加恩交部議敘五月丁父憂十四年五月授貴州巡撫以父喪未除且母老疏辭上允之八月服闋命署山西巡撫旋授刑部右侍郎九月劾前任巡撫成齡因閱邊需索屬員供應平魯縣知縣王敏樹左雲縣知縣孫耀藉口辦差那用公項及各屬倉庫錢糧均有虧空褫成齡職敏樹耀治罪如律各屬虧項仍命詳查十月臨晉縣知縣程安失察糧書舞弊將錢文甄塊假裝銀鞘解省署藩司劉清恐興大獄請刪減情節入奏彭齡疏劾之清降四品京堂安戍新疆十一月實授山西巡撫尋奏參署臬司張曾獻承審要案任意延宕汾州府知府王彜象孝義縣知縣葛拱宸抽換卷宗徇情枉斷文水縣知縣捐升知府陳廷圭失察捕役詐贓斃命復行賄和汾陽縣知縣李景陽延案不結致釀人命絳州知州楊映權陽曲縣知縣吳安祖官聲平常並查明各屬虧空請勒限

彌補免其參辦諭曰州縣倉庫既有虧短本應究辦但山西向係完善之區彌補較易見在虧短者既不止一處人數較多若將伊等參革治罪公帑轉歸無著此時姑免參辦務卽嚴飭勒限上緊彌補毋任延玩十二月調陝西巡撫十五年二月山西河東道劉大觀以彭齡在巡撫任內任性乖張列款揭參命戶部尙書托津刑部左侍郎穆克登額往按之飭彭齡回晉聽勘尋訊明彭齡審辦臨晉縣假鞫案因前任巡撫金應琦查看號簿怒斥其非試用知縣陶榮淦以受賂事覺畏罪自盡彭齡並未奏明又於署知府朱錫庚辦事乖謬知情徇隱均屬不合餘坐誣諭曰上年金應琦患病請假派令初彭齡前往署理山西巡撫伊陞辭時朕並未降旨令其密查金應琦任內有何款蹟乃伊到晉之後遇事搜求動形白簡計前後數月所參司道府縣等官爲數實屬不少其中固有實在應參者而其偏執已見任性憎惡率行糾參者亦正不免今閱托津等查奏各款其最甚者如金應琦查看號簿卽行瞋斥一款試思金應琦不過暫時患病之員並非解任去官不應妄行干預者可比伊查看號簿正係留心公事初彭齡自應將應辦之事與之商榷方爲和衷集益何至遽加憎惡甚至向司道前指斥其非其居心實屬褊淺

至於陶榮淦之死固緣賊私敗露畏罪輕生而該員身係職官何得隱而不奏此一節亦屬疎漏且既知朱錫庚辦事不妥已向司道告知並不即時參辦亦不免瞻徇初彭齡著交部嚴加議處尋議革職命以四品京堂降補六月以盛京吉林寧古塔所進濼枝違禁攙雜秧濼命偕戶部左侍郎英和赴盛京查辦尋訊明局員協領扎布扎那等得贓弊混及縱容奸商私種秧濼依律問擬九月回京十月補鴻臚寺卿十一月遷順天府府尹會南河高堰山盱兩廳隄壩潰決上以近年來鉅工林立費用浩繁一遇大汛卽有墊塌淤墊之事恐承辦工員偷減浮冒命偕戶部尙書托津馳赴工次徹底清查十六年二月奏查明銀米出入尙無虛捏惟支領後不能如式辦理致舊工未竣新工復生歷任河督亦未能經理得宜均難辭咎請將辦理草率之廳營各官四十八員悉予褫職仍留工效力其歷任河督分別交部察議議處從之五月命偕刑部尙書崇祿赴福建鞠在籍知府張祥雲被控案尋訊明祥雲圖占民人李維祺墾熟沙洲主使族人保來用鐵器傷斃維祺佃戶李輝賄買頂兇依律論絞七月遷工部右侍郎九月署浙江巡撫十一月湖廣總督馬慧裕奏參湖北臬司周季堂心術不醇妄作威福命彭齡往偕慧

裕按之復經給事中喬遠瑛劾季堂袒庇屬員等款褫季堂職併交彭齡嚴訊尋
翰無貪污劣蹟惟袒庇屬員及失察代書私收呈費並因田土細故濫票差提業
經革職法無可加其餘案犯依律問擬有差是月轉左侍郎十二月給事中趙慎
畛奏參湖南學政徐松需索陋規及出題割裂聖經等款命彭齡赴湖南會同巡
撫廣厚查辦翰實褫松職戍烏魯木齊十七年二月差旋行抵直隸會山東單縣
民人朱颺焯來京控胞伯賡渭毒斃其父賡泐命彭齡馳往研鞫坐誣治罪如律
四月回京五月調戶部左侍郎十月命偕協辦大學士吏部尙書松筠赴南河審
已革河道總督陳鳳翔控案先是鳳翔據前任淮揚道黎世序稟誤啟禮智二壩
減洩湖水致清水力弱不能敵黃且下游州縣均被淹浸經兩江總督百齡奏參
褫職枷示鳳翔遣人來京呈控以世序具稟時百齡亦曾畫諾今祇卸責一人又
百齡委用江寧鹽巡道朱爾賡額督率葦蕩營柴束短絀轉以節省工銀將朱爾
賡額保奏彭齡等查訊得實褫百齡太子少保銜並雙眼花翎降二品頂帶尋命
查勘山盱隄埝情形奏言洪澤湖全局能令暢出敵黃則爲刷沙之利澤啟壩旁
洩則爲泛濫之狂瀾應責成督臣河臣於冬春之際竭力疏通清口蓄清敵黃俾

無倒灌上是其議十二月署江南河道總督十八年正月奏高郵寶應等處地勢窪下爲上游水潦奔匯之區從前河道屢經疏濬今歲久淤塞請分別官辦民辦商辦籌款興修允之三月回京九月調倉場侍郎十九年三月兩廣總督蔣攸銛奏參廣西巡撫成林公務廢弛婪索屬員供應挾嫌彈劾成林職命彭齡往鞫得實並究出成林恣意聲色用度侈靡籍其家擬以遣戍六月擢兵部尙書命署江蘇巡撫查辦虧空八月疏陳清查密奏之弊略言各省虧空原應隨時懲辦乃各督撫因積弊已深往往密摺陳奏僅使分限完繳始則屬官藐法任意侵欺繼則上司市恩設法掩蓋是以清查爲續虧出路以密奏爲緩辦良圖應行飭禁上是之九月疏劾江寧藩司陳桂生江蘇藩司常格催徵新賦不力俱褫職旋以江蘇巡撫張師誠回任命彭齡以欽差會同查辦十月彭齡及百齡張師誠先後各擬章程入奏諭曰初彭齡百齡張師誠三人平日辦事俱尙公明是以此次江省虧空令伊三人會同查辦初彭齡等自應彼此和衷公同商酌卽稍有意見不同之處不妨據理折衷期於同歸一是乃初彭齡不待商定先於本月二十日自將章程入奏百齡張師誠亦卽於次日另將章程具奏彼此齟齬大乖公忠體國之

義俱著傳旨申飭十一月奏參百齡兼署巡撫時管關道員鍾琦幫貼摺差盤費銀一千二百兩又收受永豐壩泰壩委員餽送銀二萬餘兩師誠告假在籍差弁奏事及到任後遣人回家盤費俱濫支關稅又收受管關道員劉濤餽送銀二千兩命大學士托津戶部尙書景安往按之十二月復劾奏陳桂生冊報溧水縣虧缺銀數先後多寡不符有心弊混逮繫之並交托津等嚴鞠尋訊明所參百齡師誠各款均屬虛誣桂生先後稟報亦無含混隱匿情弊請將彭齡交部議處尋議革職上諭曰初彭齡秉性褊急素以糾彈爲能經朕屢加訓誡以嫉惡過嚴本屬爲公然輕於舉發不察虛實久之爲人窺測卽有造爲萋斐之辭賺令排擊者在己方以爲持正而不知適爲人所用藉以快其私忿此次所參百齡張師誠各款如果屬實試思伊等當得何罪乃率以無據浮詞飛章入奏殊屬輕躁部議降二級調用因伊任內有革職留任之案議以革任初彭齡尙不至廢棄著加恩照所降之級以內閣學士來京候補先是彭齡赴廣西隨帶司員茅豫及署江蘇巡撫仍請帶往佐理上以向無此例授豫知府在江蘇候補至是奏豫兩耳重聽代爲乞假上以豫係江省候補人員因病乞假應由督撫題奏彭齡侵占專權殊屬專

擅交部嚴加議處部臣如前議命以翰林院侍讀侍講降補二十年三月百齡奏參彭齡在江蘇巡撫任內沈湎於酒彙案率委茅豫畫諾並文致陳桂生罪名又將百齡前奏查辦虧空章程批回原摺私行拆閱見有不敢昧良辜恩之語謂百齡等將其參斥遂臚款將百齡等糾參至茅豫並未耳聾徇私捏報諭曰初彭齡兩經部議革職初次朕念其平日尙稱敢言且歷官資格較深加恩降爲內閣學士嗣又從寬宥過降爲侍讀侍講茲復查出種種謬妄本應革職發往伊犁以示懲創姑念伊母年已九旬朕所稔知原欲於今歲伊母生辰加以恩賚今初彭齡自罹愆咎不能仰承恩眷實爲不孝若其母因子遠戍晨夕思念或有意外之虞朕心殊爲不忍初彭齡著革職令在家閉門思過二十一年六月起爲工部主事充寶源局監督十一月丁母憂二十三年呈請入籍順天二十四年二月服闋十月上六旬萬壽加恩以六部員外郎用二十五年選刑部員外郎道光元年正月賞禮部侍郎銜旋署左侍郎七月補右侍郎八月擢兵部尙書十二月調工部尙書二年充殿試讀卷官賜紫禁城騎馬三年八月萬壽聖節賜十五老臣宴繪圖於萬壽山玉瀾堂彭齡與焉御製詩有宣猷昔日知耿介善善惡惡刻無違之句

並賞御書壽字及蟒袍如意諸珍物四年以年老休致賞食半俸五年卒諭曰原任工部尚書初彭齡由翰林洊升卿貳嘉慶年間仰蒙皇考仁宗睿皇帝恩眷外歷封圻內司部務旋因獲咎降調迨朕御極後復擢至尚書上年因其年老就衰降旨以原品休致並賞給半俸以養餘年茲聞溘逝殊堪軫惜著加恩照尚書例賜卹所有原任內一切處分悉予開復應得卹典該衙門察例具奏尋賜祭葬子銘峻候選鹽大使

姚文田

姚文田浙江歸安人乾隆五十九年上幸淀津文田由舉人召試一等一名授內閣中書尋充軍機章京嘉慶四年一甲一名進士授修撰五年充廣東鄉試正考官六年六月充福建鄉試正考官八月命提督廣東學政九年任滿回京十一年充日講起居注官十二年七月充山東鄉試正考官十月丁父憂十五年正月服闋五月遷右春坊右中允復充日講起居注官八月命提督河南學政十六年五月遷侍講九月轉侍讀十二月以豫省生員有詭充領催甲長者藉以交通官吏欺壓閭里奏請敕下撫臣通飭所屬嚴行禁止上如所請行十七年擢右庶子十

八年二月遷國子監祭酒召回京十月入直南書房十一月疏言臣竊惟堯舜三代之所以爲治本非有他道也無過教養二端而已蓋爲斯民廣衣食之源則各保其身家而自不致有爲惡之意爲斯民正趨向之路則各知有長上而自不敢干左道之誅臣竊見近日州縣苟有案牘不廢催科數多者卽大吏皆稱其賢又其次者惟取應對便捷行走輕利至於教養一事則上下官吏從未聞有措意者也南方之民患在賦重北方之民患在徭多一遇差徭至前卽里正胥徒僉派匹出假如官需車馬過十輛卽使備有損換亦不過再加數輛然胥吏藉此浮拏得錢買放常不至數十輛不止及其旣派之後當官非不例給口糧然皆百十年來舊定章程食物價值今昔懸殊本已不給於用又經家人胥吏層層剋扣則其入手更少不得不自備芻糧逐日祇候或遇乘用之人不加矜恤且並其車輛馬騾而困敝之夫此馬騾車輛皆小民所恃以爲養生之具也一困敝則其具坐失矣故官吏之斂怨於民未有如差徭之甚者也然在州縣亦有不得不然者何也督撫遇應辦事件不過下行兩司兩司又轉行府州府州又各行其所屬之州縣而已至於州縣無可更諉事事必須措辦其自一遞送一履勘下至薪芻油燭之細

無一不需錢應用所入廉俸卽盡支領亦不敷延請幕友況又多方減扣則每日經費更何所出故錢糧不能不額外加增差徭不能不民間攤派如遇歉收之歲該員循例報荒則徵收必須停止日費無出而公事亦皆束手故非至民力殫竭無可再徵之時必不肯輕言歲歉彼非皆殘忍性成實勢有所不得已也然小民偶有偏災卽加撫恤則根本未傷而元氣易復乃至十室九空之日始爲議及災荒雖復蠲賑疊施其何及乎此又因官貧以致民困之大槩情形也臣嘗再四熟思求一善術而不可得其策之下者則惟有省事一法卽如各省大吏無非皇上歷試信任之人其平日之才具優絀與素行賢否無不久在聖明洞鑒之中旣已畀以一省事權苟非舉措有乖似可無輕言更調臣竊見嘉慶四年以後皇上澄敍官方勸懲並至近日督撫藩臬實無不人知自愛然於迎新送舊之時如衙署之整理館舍之儲備無論其本管上司卽例以賓主情誼亦必不能盡廢及其旣履任後通省官員紛紛晉謁事又必不可已在該大吏一無誅求自以爲秋毫不擾而不知其耗費固已多矣且此於吏治固亦無裨也蓋大吏當抵任之初諸務尙未周悉所聽者屬吏之稟白書役之指撝而已迨其莅事稍久然後人才之

賢否以明風俗之澆淳以辨方將稍有設施而瓜代者已至則一無展布而去耳亦有更事未深之人纔一莅事動議更張以此博振作之名不知地方情形多未諳悉見爲極利而他弊已隨其後後雖自知悔亦無及故不如久於其任次第圖之之爲得計也其他苟無害於變通者隨事詳思可省則省務俾官有餘力然後可責以養民之政至所謂養民者不外孟子省刑薄斂深耕易耨數語於其田疇之當闢者闢之陂堰之當復者復之使災祲不至屢告卽閭閻漸有蓋藏由是廉恥可興而教化可行矣抑臣更有念者自古圖治之要惟以任人爲本故有官階屢遷而不改其職任者近日科條頗似過於繁密假如某縣得一循吏民情愛戴方殷忽有四參被議之案不能不立時罷斥其接替者或又不得人則善政旋廢矣又如地稱難理非得其人不能勝任然其才之優者或皆各有處分所合例者人僅中下亦不能不俾之受事是爲例議所格而吏治皆不得人似亦宜稍爲變計也奏入報聞尋遷詹事充文淵閣直閣事十九年正月疏言臣竊見皇上自御極以來躬理萬幾旰宵靡閒凡庶政庶獄無一不審慎周詳務求至當惟恐一夫不得其所孜孜求治之心雖堯舜復生必無以加於此然自嘉慶四年以至去冬

十餘年中無歲不有災祲之書無歲不下蠲賑之詔去歲畿南秦豫數省薦饑致有奸民乘機俶擾皇上引咎責躬疊頒諭旨愛民之誠流於肺腑實爲天下臣民所共頂戴者乃愆陽猶積雪澤未霑東南河流迄今爲患以勤恤民隱如皇上而人事尙如此者何也蓋天以德爲生以刑爲殺其在周易坎爲水爲律歲之不入水之告災以類言之皆刑獄太繁之象茲屆皇上恩祺普錫民物更新正宜式迓休和以光盛治臣伏思承平旣久戶口日滋天地所生不足以瞻其用於是不肖之心生而奸詐之事起將欲禁其奸詐而徒恃刑法以齊之其源不清其流必不能制也書言德惟善政政在養民唐虞之世未嘗廢刑然又曰與其殺不辜寧失不經何以聽其輕縱如是大抵下之於上不患其不畏而患其不愛任刑之世無過使民畏而已老子有言民不畏死奈何以死懼之夫民至於不畏死則又何法以理之乎漢文帝時網漏吞舟之魚而吏治蒸蒸不至於奸者民愛故也秦人專尙法律其勤至於衡石程書而一夫夜呼亂者四起由於但使民畏故也奸邪之人詐僞無所不至彼見獄詞可以聳聽則多牽引其所不快者以陷害之胥吏惟利是圖明知所牽引之人未必皆有連也而藉勢婪索可以肥其奸橐則又多方

株連以困阨之假如衣食粗足之家一經官訟連染雖立見昭雪而資產已蕩然矣國家設官大小相維各有專司親民之職在於州縣大吏惟聽其成而已自數年來開上控之端於是刁民得逞其奸督撫兩司又畏其有內控之舉不得不遇案親提彼所訐控不過一人而牽涉者常至十數農氓廢耕商賈廢業中道奔波受吏胥之折辱甚至瘐死而道斃者殆不可一言罄也彼雖處原告之人以極刑於被誣者抑又何補推國家慎刑之意亦曰恐有冤抑耳然一案未結而事外之被累者相繼如從前馬譚氏一案至今正兇未定指名而無辜致斃者已數十人矣是一冤未雪而含冤者且數十人也周禮有宥過之條王制有疑獄之議今一案至而立求定讞則其承問之官必刑撻橫加以期得實愚民不勝其苦且誣服以緩須臾之死其中冤抑正復多人如此而欲其感召天和豈可得乎頃者林清構逆渠魁悉擒然搜捕四出至今未已小人或意圖見長或因以爲利必不能無殃及無辜之事昨奉明旨嚴禁妄拏仰見皇上如天之仁無不覆被臣愚以爲事案愈多則紛擾愈衆莠民易逞其機謀而良善惟增其苦累應令各省大小官吏凡遇案牘可以早結者酌其便宜卽時速結無多株引以擾閭閻庶官民上下相

愛暴亂不作而休和可致矣所謂養民之政不能有外於農桑本務臣請以大江以南言之田畝丈尺之窄隘既不如中原之廣歲輸賦稅之繁重又不如北地之輕然每歲漕儲正供以東南一方之民力而京畿億萬生靈皆於是仰給者無他人盡力也兗州以北古稱沃衍之地河南一省皆昔殷周畿內燕趙之間亦夙稱富國今則小民自翻犁播種之後一無設施惟束手以待雨澤之至水至則田畝皆淹水去又乾涸立見地成曠土人盡惰民安得不窮困而爲盜賊哉不知久長之計者輒曰此事爲迂闊不思歲一歉收則必先以緩徵稍甚則加以蠲貸又其甚者不得不截漕發粟以賑恤之誠令合數十年而總計其所以耗國家之帑藏者何可算也且比年運河屢淤東南之漕實亦未可深恃若非早爲之圖脫有意外之虞又將何以處此臣見歷來州縣之保薦必首列勸課農桑其實盡屬虛談從無過問又大吏奏報糧價有市價每石昂至四五千而僅報二兩內外者其於收成則又虛加分數相習成風常不以實似宜飭令痛蠲積習亟圖裕民但使董勸有方行之一方面而收利獨饒則不俟號令自然爭起而相效數年之後田野皆闢水旱有資豈必盡資官帑然後善政爲可行哉總之民之犯刑由於不知率教

其不率教則又由於衣食缺乏而廉恥不興其次第實如此故養民爲首務也奏入諭曰姚文田奏請急農桑緩刑獄國家政在養民農桑者天下之大木朕親耕后親蠶躬行爲天下先誠以民生所亟一日不再食則飢終歲不製衣則寒布帛菽粟其事至恆而所關至鉅定例考覈吏治首列勸課農桑所以責望牧令者莫要於此古者物土之宜耕九餘三歲有豐歉民無凍餒近者膏腴之產多以蒔於倉廩所儲兼以釀酒地利未盡禁令復弛地方偶值偏災雖蠲賑頻施民猶不免飢寒本務不修無怪乎閭閻之貧且病也著通諭直省各督撫各飭所屬府州縣官務知朝廷重農貴粟之意以勸課農桑爲亟境內沃壤悉令樹植嘉穀有勤於南畝者勞之相之其糜穀病農者抑之懲之地產日豐蓋藏饒裕衣食足而廉恥興富教之政其庶幾乎至除莠可以安良刑者不得已而用之若訟獄繁興株累者衆其妨農者甚大著問刑官員遇有應訊案牘務速爲剖判曲直嚴懲誣枉不得拖累無辜以恤民生而厚民俗其各實力奉行勿怠閏二月遷內閣學士兼禮部侍郎銜五月教習庶吉士二十年擢兵部右侍郎二十一年四月調禮部右侍郎六月調戶部右侍郎二十二年三月充會試副考官尋轉左侍郎兼管錢法堂

事務七月以違例保送不勝外任之郎中錢學彬下部議處議降二級留任二十三年三月偕定親王縣恩等恭送玉牒尊藏盛京禮成下部議敘九月以前在禮部侍郎任內頒發科場條例恭載高宗純皇帝廟號刊刻有誤下部議處部議降四級調用上以文田在內廷行走勤慎且不能常川到署加恩改爲留任二十四年四月充殿試讀卷官九月命提督江蘇學政道光元年大臣有陳漕務欲禁浮收不如明予八折於民便者文田疏言竊惟東南之大務有二曰河曰漕比年海口深通南河目前光景甚安穩惟漕務法久弊生雖經督撫大臣數年以來悉心調劑總未臻實效小民仰沐我聖祖神宗生成豢養屆今百八十年愚賤具有天良豈有不樂輸將之理誠以東南之財賦甲於天下而賦額如江蘇之蘇州松江浙江之嘉興湖州其糧重尤甲於天下竟有一縣額徵多於他處一省者乾隆三十年以前並無所謂浮收之事是時無物不賤官民皆裕其後生齒愈繁而用度日絀於是諸弊漸生然猶不過就斛而浮取而已未幾有折扣之舉始於每石不過折耗數升繼乃至五折六折不等小民終歲勤動自納賦外竟至不敷養贍勢不能不與官吏相抗官吏所以制民之術其道有三一曰抗糧一曰包完一曰捏

交醜米賦額既極繁重民間拖欠亦勢所必有大約只係零星小戶及貧苦之家其墳墓住居皆須照例輸納又有因災緩徵新舊並積因而拖欠者是誠有之至如其家或有數十百畝之產既自食其田之所入而竟置官賦於不問實爲事之所絕無今之所謂抗糧者如業戶應完百石彼既如數運倉並外多齎一二十石不等以備折收書吏等先以淋尖踢腳灑散多方糜耗是其數已不敷再以折扣計算如准作七折便須再加三四十石業戶心既不甘必至爭執不肯再交亦有因書吏刁賴仍將原米運回者州縣卽以前二項指爲抗欠此其由也包完之名謂寡弱之戶其力不能與官抗則轉交強有力者代爲輸納可以不至喫虧然官吏果甚公平此等業戶又何庸託人代納可不煩言而自破者民間終歲作苦皆以完糧爲一年要事如運米石進倉其一家男婦老幼無不進城守待一遇陰雨溼露猶將百計保護恐致米色受傷如官吏刻期斛收卽歸家酬神祭先以爲今歲可以安樂過去故謂其特以醜米掙交殆非人情惟年歲有不齊則米色不能畫一亦間有之耳然官吏非執此三者則不能制人故生監則詳請暫革齊民則輒先拘禁待有補交然後以悔悟請釋已竟成一定不移之辦法臣自去歲至蘇

所聞金壇吳江等縣則已釀成事端其他將就了結者殆尙不乏不知踊躍輸將者實皆良民而非莠民此小民不能上達之實情也然在州縣亦有不能不如此者近年諸物昂貴所得廉俸公項卽能支領亦不敷用州縣自開倉至兌運日止其修整倉廩蘆席竹木板片繩索油燭百需及幕友家人書役出納巡防一應脩飯工食費已不貲加以運丁需索津貼日甚一日至其署中公用自延請幕友而外無論大小公事一到卽須出錢料理又如辦一徒罪之犯自初詳至結案約須費至百數十金案愈大則費愈多復有遞解人犯運送餉鞘事事皆須費用若將借用民力槩行禁止謹厚者奉身而退其貪戀者非向詞訟事案生發不可而吏治更不可問矣伊等熟思他弊一破勢必獲咎愈重不如浮收尙爲上下皆知故甘受民怨而不惜雖地方有瘠沃才具有能否其借此以肥身家者亦不能謂其必無要之不得已而爲此蓋亦不少臣見近日言事者動稱不肖州縣竊思州縣亦人耳何至一行作吏便至行同苟賤此又州縣不能上達之實情也州縣受培克之名而運丁陰受其益故每言及運丁無不切齒然其中亦有不能不然者運船終歲行走日用必較家居倍增從前運道深通督漕諸臣只求重運如期到通

一切並不苛察各丁於開運時多帶南物至通售賣復易北貨沿途銷售卽水手人等攜帶梨棗蔬菜之類亦爲歸幫時餬口之需乾隆五十年後黃河屢經倒灌未免運道受害於是漕臣等慮其船重難行不能不嚴禁多帶貨物又如從前商力充裕運船於回空過淮時往往私帶鹽斤衆意以每年只不過一次不甚窮搜近因商力亦絀未免算及瑣屑而各丁之出息盡矣丁力旣已日困加以運道之淺反增添夫撥淺各費且所過緊要閘壩牽挽動需數百人使用小有節省幫船卽慮受傷道路旣長期限復迫此項鉅費非出之州縣更無所出此又運丁不能上達之實情也數年前因津貼日增於是定例每船只准給銀三百兩然運丁實不濟用則重船斷不能開重船遲久不開則州縣必獲重戾故仍不免私自增給是所謂三百兩者乃虛名耳頃又以浮收過甚嚴禁收漕不得過八折然州縣入不敷出則強者不敢與較弱者仍肆朘削是所謂八折者亦虛名耳然民間執詞抗官官必設法鉗制而事端因以滋生皆出於民心之所不服若將此不靖之民盡法懲處則旣困浮收復陷法網人心恐愈不平若一味姑容隱忍則小民開犯上之風將致不必收漕而亦日無官長其於紀綱法度所關實爲匪細奏入上命

軍機大臣會同戶部議奏議上諭曰前據姚文田奏漕務法久弊生小民苦州縣之浮收州縣患旗丁之勒索而旗丁又因沿途需費浩繁勢必多索津貼恐前所定津貼旗丁每船銀三百兩及見在嚴禁州縣收漕不得過八折之法亦屬虛名請籌議兼全善術等語當降旨命軍機大臣會同戶部議奏今據奏運丁之疲乏屢經籌議津貼毋庸再議惟州縣浮收積習難返致累閭閻必任法而兼任人方能遵行無弊著各該督撫及漕運總督倉場侍郎通飭所屬杜絕浮收勒折以清其源裁革陋規以遏其流儻有不肖州縣陽奉陰違立即參辦或運丁勒索州縣沿途衙門勒索旗丁一併從嚴究治務使官民旗丁均免擾累以肅漕政二年任滿回京上以戶部堂官在內廷行走者較多命文田回署辦事不必在南書房行走三年充經筵講官四年七月擢左都御史十二月賜紫禁城騎馬五年充順天鄉試副考官六年署工部尙書七年七月擢禮部尙書十一月卒諭曰姚文田於嘉慶年間由修撰洊陟卿班入直南書房晉階卿貳朕御極後擢任左都御史本年復授禮部尙書久直內廷歷司部務清勤敬慎克盡職守方期益資委任乃遘疾數日卽爾奄逝聞之殊堪軫惜著照尙書例賜卹任內所有處分悉予開復應

得卹典該部察例具奏尋賜祭葬予諡文儔子晏二品廕生見任刑部主事

王引之

王引之江蘇高郵州人祖安國官吏部尙書自有傳引之嘉慶四年一甲進士授翰林院編修六年充貴州鄉試正考官八年大考一等擢侍講九年二月駕幸翰林院與諸臣倣柏梁體聯句引之與焉又以張說東壁圖書府五律分字賦之引之分得竭字禮成賜味餘書室全集暨茶綺箋硯等物尋充皇朝詞林典故纂修官三月京察一等六月升右春坊右庶子充湖北鄉試正考官九月丁母憂十一年服闋會皇朝詞林典故成下部議敘十二年五月補原官八月提督河南學政十三年五月轉左庶子十二月升翰林院侍講學士十四年轉侍讀學士十五年回京十六年充日講起居注官十七年五月遷通政使司副使十二月稽察右翼宗學十八年八月升太僕寺卿十月升大理寺卿十九年提督山東學政奏申嚴五童互結法令先期識認點名時挨次細認頂冒之劉雲漢等因是敗露治如律硃批以實心整飭士習勸勵之先是河南滑縣教匪煽亂山左多從逆者上命學臣撰論說以化之引之著闡訓化愚論見利思害說進御奉命刊布二十一年十

月還京十二月擢都察院左副都御史二十二年二月充會試知貢舉三月擢禮部左侍郎會福建龍溪縣知縣朱履中改教後因欠鹽課銀二千餘兩請以吏欠追抵不允遂訐藩司李賡芸任道府時有受陋規事總督汪志伊等劾賡芸解其職會鞠之知府涂以軼迎合志伊意偪令誣承賡芸故廉潔不能堪遂自縊事聞上命引之偕吏部侍郎熙昌往按白其誣乃褫志伊等職以軼履中遣戍新疆引之等復言閩省士民數百請爲賡芸建遺愛祠上以斯民直道之公聽其捐建八月還京奏江蘇高郵等州縣低地因洪澤湖水漲淹浸命疆吏履勘撫卹二十三年六月充浙江鄉試正考官十一月以禮部覈議原任侍郎錢樾入祀鄉賢祠不置可否率請欽定下部議處引之降二級留任二十四年三月充會試副考官閏四月署兵部左侍郎九月教習庶吉士尋以萬壽節前遇忌辰不於先期奏請輒照常素服降正三品京堂又以罪應戍邊廢員朱錫爵呈進萬壽頌冊禮部一律接收下部議處十一月補通政使司通政使十二月授吏部右侍郎二十五年七月進爵秩全覽繕寫譌誤下部議處九月充實錄館副總裁十月充武會試知武舉道光元年六月畿輔及山左旱蝗諭疆吏飭屬親勘搜除引之疏言捕蝗一事

惟在辦理得法若專任胥役則蝗蝻未除而農民反受騷擾之害蓋胥役一經奉票捕蝗則計畝派夫藉端取費及率人撲捕則又故踐禾苗偪令出錢無蝗地畝亦復肆行蹂躪是爲民除害之事轉爲貽害於民之事恭讀欽定康濟錄捕蝗必覽所載捕蝗十宜以設廠收買爲最要之策其法或錢或米捕蝗一斗給以若干捕蝻一斗給以若干使百姓捕蝗而得賞則趨之如鶩不假胥吏之催促非惟受效甚速且免作踐騷擾之患請將捕蝗必覽頒示直隸山東地方大員令其相度機宜速行籌辦上如所請行六月充浙江鄉試正考官八月充國史館副總裁十二月充經筵講官二年三月轉左侍郎閏三月充殿試讀卷官八月署刑部左侍郎三年三月充會試副考官四月仁宗睿皇帝實錄漢本告竣上嘉其恪恭將事辦理妥速賜紗一端旋充教習庶吉士九月充武會試正考官時聖駕恭謁西陵迴鑾抵黃新莊引之等乘轎近豹尾槍後轎夫誼嘩降三級留任四年二月禮部尙書汪廷珍奏題缺主事新例名實不符請確查更正下大學士軍機大臣吏部會議引之疏言題缺所以勵人才選缺所以敘資格乾隆九年定各部郎中員外主事題缺揀選保題行之四十年毫無流弊乃於四十七年御史李翮擲有請定

額外人員敘補之奏其意專爲捐納人員敘補易於得缺地步彼時吏部遽行議准摺內因有按其應得題選各缺一體統較先後挨次題補之語先後挨次應專指選缺而言題缺本無挨次之例不得含混牽入也迨四十八年吏部清書則例告成忽於除授門內增纂題補主事統較先後行走一條因譌成誤與揀選門內題缺本例相矛盾其實乾隆九年所定乃斟酌盡善之舊章四十八年所增乃沿襲譌誤之文也請如該尙書所奏會大學士軍機大臣以行之既久一旦更改事涉紛更議乃寢四月聖訓實錄告成上嘉其盡心編輯在館四年始終經理其事予其子候補主事壽昌遇缺卽補先是吏部奏請官員遇生祖母之喪父故在先本員爲庶長孫者令承重離任丁憂三年是年五月引之更定前議云孫之於祖服止齊衰一年嫡長孫父故在先遇祖父母之喪則持服三年蓋以承父之重與祖爲體宗祧大法於是乎在其於祖母從同者一本相承敵體之義也至庶祖母非祖敵體固不得以承重言矣卽如次子三子其受父母之恩與長子同若其身先死而父母後歿爲其子者不能代服三年之喪且爲人後者爲本生父母止服降服一年庶長孫之分原止儕於孫生祖母之恩不能加於父母蓋緣情則罔極

之恩卽終身不足以言報制禮則承重之義斷不能加於支庶嗣後官員遇生祖母之喪其父先故別無與父同母之伯叔本員於庶祖母爲長孫者無論嫡祖母是否見在槩令治喪一年許其離任從之十一月署戶部左侍郎五年八月署戶部右侍郎十月充武鄉試正考官六年充殿試讀卷官七年五月擢工部尙書七月充武英殿總裁十一月賜紫禁城騎馬八年七月承修文廟碑亭引之等勩估草率下部議處是月上而諭康熙字典間有譌字今重加刊刻自應詳考更正引之校正二千五百八十八條另輯考證十二冊進呈欽定八月署戶部尙書九年署吏部尙書十年調禮部尙書十一年七月署工部尙書十月充武鄉試正考官十二年丁父憂十四年服闋補工部尙書尋卒諭曰工部尙書王引之品行端謹學問素優由翰林洊躋卿貳擢任尙書方資倚畀茲聞溘逝殊深軫惜著加恩照尙書例賜卹處分悉予開復應得卹典察例具奏尋賜祭葬予諡文簡子壽昌河南按察使彥和安徽寧池太廣道壽同湖北漢黃德道

陳用光

陳用光江西新城人嘉慶六年進士改翰林院庶吉士七年散館授編修十三年

充河南鄉試正考官十八年升江南道監察御史時逆賊林清伏誅後詔求直言用光奏言臣深思致患之原竊以爲大端有二一則大興宛平之選吏未得慎簡之方一則山東河南之察吏未得舉措之道大興宛平屬於順天府而選大興宛平者第由直隸總督之題升府尹雖會銜而不能專主聞升此二縣大抵以資格深而闕冗無才者授之積習相沿數十年於茲彼既無才安能責以發伏摘奸之治臣度向來題升者之意必以京師之地百司具焉綱維所布固已條教詳明爲大興宛平者但能不失期會簿書之責卽爲稱職非若畿輔他縣差務殷繁必須才吏始能無誤然則雖升其官而不求其才寔失乎鄭重牧民之意臣愚以爲應請旨飭下直隸總督嗣後題升大興宛平不得徒循資格必擇其治行尤異者方與題升而順天府尹亦使之得兼保舉參劾之權則良吏必出矣山東河南之察吏未得其道者逆黨之謀匪伊朝夕其蹤跡如此之廣往來數年之間兩省守土之吏豈其絕無聞見先事之疎固不得辭其責近來州縣之保舉祇敍虛詞鮮臚實事臣愚以爲苟有其私雖循例之保舉未嘗不可以市恩苟其無私雖破格之超擢不必復疑其逾格方今山東已大就安謐河南軍務亦將次奏凱聞河以南

饑民頗衆可否特詔兩省大吏於所屬州縣中能撫恤饑民兼有解散盜賊之方者自州縣丞倅以及將弁准其保奏予以超擢則不獨激勸有方而亦可消患於無形矣奏入諭曰嗣後各直省首縣要缺該督撫遴選賢能之員專摺保奏除該員見有私罪處分吏部仍奏明飭駁外其任內一切因公處分均可無庸覈計著吏部詳定章程奏明頒發遵行以收推賢舉能實效其大興宛平二縣應如何責成順天府尹遴選賢否考課最善之處著詳議具奏尋議奏嗣後大興宛平二縣缺出請歸府尹於所屬之員詳加遴選出具考語奏請升調其外二十二州縣揀選題調均令府尹主彙總督會銜如順天府屬無可保題再咨行總督於通省揀選令總督主彙府尹會銜順天府屬佐雜各缺亦歸府尹專主辦理從之十九年閏二月命巡視西城三月充會試同考官八月轉掌廣東道監察御史十月奏正指揮署內黑夜有賊持刀之案上以用光未查明原委率據稟報之詞張皇入奏交部議處尋降編修二十三年充明鑑總纂官二十四年三月充會試同考官八月充順天鄉試同考官道光二年升國子監司業三年四月遷右春坊右中允十一月升翰林院侍講四年四月遷右春坊右庶子六月升翰林院侍講學士尋充

日講起居注官十二月充咸安宮總裁五年充江南鄉試副考官七年十月授詹事府詹事十二月充文淵閣直閣事八年二月擢內閣學士兼禮部侍郎銜八月提督福建學政十一年升禮部右侍郎十二年六月署戶部右侍郎兼管錢法堂事務九月充武會試正考官十三年正月提督浙江學政七月轉禮部左侍郎仍留學政任十四年奏言直省建立先賢專祠許其裔孫承襲奉祀所以發潛德之幽光示人倫之模範自非德行純粹忠節昭彰不得濫膺斯選宋臣孫覲其人本非端人查宋史所載孫覲受張邦昌僞命又查四庫全書總目內載孫覲劾李綱附和議以贓罪斥提舉鴻慶宮是孫覲品行有虧從前設立奉祀似屬過濫應請將伊奉祀生卽行裁汰以肅祀典下部議行十五年回京七月因病請假八月卒子蘭滋原任廣西上思州知州蘭第山西澤州府知府蘭豫甘肅高臺縣縣丞

玉麟

玉麟哈達納喇氏滿洲正黃旗人乾隆六十年進士改翰林院庶吉士嘉慶元年散館授編修二年四月充玉牒館纂修官五月充日講起居注官三年升侍講四年四月充實錄館纂修官七月升右春坊右庶子十二月升國子監祭酒仍兼實

錄館行走五年正月欽差祭告中嶽南嶽八月擢詹事府詹事六年正月充文淵閣直閣事二月授內閣學士兼禮部侍郎銜諭曰玉麟前派充實錄館纂修均屬妥協今升內閣學士官職較大未便令其仍充纂修官著授爲總纂官遇有陳奏事件並著列名在副總裁之後四月授正黃旗蒙古副都統八月命往上書房行走七年三月充會試副考官四月管理圓明園八旗包衣三旗官兵事務八月上幸木蘭玉麟隨扈行圍賞戴花翎十月調正白旗漢軍副都統八年七月升禮部右侍郎充經筵講官九月充實錄館副總裁十二月調正白旗滿洲副都統九年六月充教習庶吉士轉左侍郎八月充順天鄉試副考官十年五月復充教習庶吉士閏六月調吏部右侍郎充武英殿總裁十一月轉左侍郎管理國子監事務十一年三月派閱實錄正本四月署戶部左侍郎六月兼署鑲白旗滿洲副都統八月充左翼監督十一月兼署正藍旗滿洲副都統稽察會同四譯館十二年三月安徽壽州民張大有因姦謀毒雇工李小八致斃三命讞成經蘇州府知府周鏞長洲縣知縣趙堂元和縣知縣萬承紀覆審翻供改擬上命玉麟會同安徽巡撫初彭齡嚴訊究出謀毒屬實按律治罪府縣徇情教供遣戍伊犁奪按察使

遇昌職兩江總督鐵保下部嚴議又湖北省城官銀匠陳信義及其子士芳侵虧武昌通城棗陽穀城光化大冶等縣解省錢糧二萬四千五百餘兩陳信義以誤大冶棗陽兩縣兌期自盡事遂覺總督汪志伊巡撫章煦擬陳士芳斬候上以其輕縱五月命玉麟偕刑部左侍郎韓封往鞫將陳士芳卽行正法庫大使石萬泰議褫職總督以下各官分別議處有差八月充順天鄉試監臨官劾順天府咨送試卷遲誤兼管府尹鄒炳泰府尹宋鎔府丞熊枚治中戴修齡等均下部分別議處又奏士子坐號不敷新蓋棚號祇屬權宜之計不蔽風雨且稽查難周相度隙地可添號舍八百有奇奉旨著工部詳細履勘議增七百二十九間從之旋命提督安徽學政十四年調江蘇學政十五年署戶部左侍郎十六年四月上命玉麟偕刑部右侍郎朱理讞獄河南東河總督李亨特奏參開歸道林樹芳加扣銀兩借貸錢文赴工多帶委員騷擾河廳發賣酒物河南巡撫恩長奏參中牟縣上汛管河縣丞冒冠德稟訐賄銀指缺求升各案訊實林樹芳冒冠德均遣戍伊犁鄆城縣民常三多控父常廷鏊被人毆傷非自縊內黃縣民安清聘控差役誣良詐贓訊虛均如所擬罪六月授右翼總兵管理右翼宗學西洋堂事務署倉場侍郎

七月以步軍統領衙門緝拏賭犯限滿未獲交部察議命拔去花翎九月以吏部選補錯誤革去吏部左侍郎及兼管國子監事務教習庶吉士十一月補內閣學士兼禮部侍郎銜十二月萬安倉花戶張貴恆等舞弊在逃限內全數緝獲賞還花翎十七年二月授鑲紅旗護軍統領五月調左翼總兵七月充崇文門副監督十二月授戶部左侍郎充經筵講官十八年九月十五日恭迎聖駕自學警山至白湖先馳還京聞東華門賊匪滋擾經所屬兵拏獲五人時已交未卽督率八旗步營由中正殿夾道迎擊而南斃賊數名生擒天理教匪宋尙忠李二格二名由八百里馳奏尋諭以步軍統領門禁懈弛褫職十九年賞給三等待衛馳驛前往葉爾羌辦理事件二十二年賞副都統銜充駐藏大臣二十四年補鑲白旗漢軍副都統二十五年十月命來京道光元年八月授左翼總兵尋調鑲白旗滿洲副都統十一月命偕戶部左侍郎王鼎赴湖南訊寶慶府已革通判至善控揭衡州府通判孫齡虧空倉庫一案坐誣至善遣戍伊犁又命查河南儀工時河南閩鄉民人粟自修京控知縣朱重倫濫派累民得旨解交審辦訊實按律定擬又已革守備希朗阿稟揭大名鎮總兵德克金布剋扣兵餉訊誣坐如律十二月授兵部

左侍郎二年正月仍偕王鼎馳赴江西審結已革守備徐富國控星子縣鹽商送錢帖移縣未覆上司律以求索得財失實惟捏控規費清單交自該縣照舊革職承審各員下部議處二月調禮部左侍郎四月復至河南訊陳留縣知縣趙錦堂辦賑不實褫職戍邊五月調刑部左侍郎六月訊直隸高邑知縣范澍誣控本州挾嫌註考按律遣戍是月授都察院左都御史十一月署禮部尙書兼管太常寺鴻臚寺事務尋授禮部尙書三年二月署吏部尙書四月調兵部尙書八月署步軍統領四年閏七月充崇文門監督盤查戶部三庫十一月賞紫禁城騎馬旋命在軍機大臣上行走十二月管理戶部三庫事務署正黃旗領侍衛內大臣充武英殿總裁經筵講官五年二月上謁東陵命隨扈七月調正藍旗滿洲都統八月充順天鄉試正考官十一月以玉麟年屆六旬賜壽額六年二月命管理圓明園八旗內務府包衣三旗事務五月充教習庶吉士七月副都統長清甫至阿克蘇辦事大臣任卽能撫衆剿賊上以玉麟保薦得人復賞還花翎七年七月充上書房總師傅授翰林院掌院學士加太子少保銜八年正月重定回疆晉加太子太保銜繪像紫光閣御製贊曰回疆梗槩知之頗悉滿洲文臣特參宥密授以夏官

申以紀律不炫才能同資匡弼九年三月充會試副考官六月授伊犁將軍十年正月以各夷納馬多殘廢口老請嗣後另廠牧放續有倒斃每年每百匹報銷三分自道光九年始命如所請行五月奏霍罕將作不靖請暫緩南路換防兵大要有三一阿坦台汰劣克屢請投順包藏禍心巡邊添兵以備禦一伊薩克忠勇能事心思極巧能察該夷蹤跡責令乘機就獲一欲彌外患宜撫近夷布呼等愛曼恭順以重賞固其心則卡外動靜皆悉有旨所議三條均屬可採七月奏請籌補回疆動用倉存餘糧得旨前次回疆軍需由伊犁撥運小麥四萬九千石零粟米一萬石零係積年存餘備貯之項既經動用自應隨時籌補著照所請自本年爲始察看每年秋收後情形統限三年陸續買補俟補足六萬石之數再行專摺奏報時嚴禁茶葉出卡又奏哈薩克王江霍卓素稱恭順懇將封存買茶賞還允之八月安集延挾抄逐之嫌勾結霍罕進犯卡倫幫辦大臣塔斯哈遇伏陷沒玉麟馳奏前以回情反覆無常飛咨喀什噶爾參贊大臣札隆阿訪查原期有備無患乃汰劣克等詭爲恭順札隆阿深信不疑今變生倉猝聞欲棄喀什噶爾合兵退守阿克蘇請令長清成格籌糧儲哈豐阿帶兵進攻一面調伊犁兵勇四千五百

名赴南路協剿上躉其言命大學士揚威將軍長齡督師往剿十月伊犁參贊大臣容安阿克蘇辦事大臣長清等以葉爾羌附近各莊有朵蘭回子出沒奏令哈豐阿孝順岱帶兵由和闐草地進援玉麟奏喀什噶爾英吉沙爾被圍已及兩月回衆猶盼大兵往救可見賊勢尙單易於援剿今宜迅由大路直赴葉爾羌則二城之圍自解若迂道和闐計到葉爾羌須一月以後設或西二城日久不支賊衆蟻聚東驅恐哈豐阿等一軍未必得力且阿克蘇見集之兵不下萬人該大臣僅派三千餘人繞路進發轉留多兵坐糜糧餉實屬非計哈豐阿等如已起程卽另派官兵直抵葉爾羌朵蘭回子不過七八百人兩路官兵齊進不難立就掃除自九月以來札催十數次乃該大臣等始則以籌備糧運遷延多日後又稱吐爾扈特及民遺皆不足恃查阿克蘇至葉爾羌裹糧二十日已足用今烏魯木齊轉運之糧已源源而來前此克復四城民遺甚爲得力而渾巴什河之捷吐爾扈特兵力較多況近日璧昌等破賊數千尙能以少勝衆豈沿臺零匪轉不能就地殲除請旨將長清等嚴行申飭如所請行諭曰前此朕將玉麟簡放伊犁將軍因其在軍機大臣行走有年且諳悉回疆情形是以畀此重任茲覽所奏深愜朕懷著發

去人獲四兩俾資調攝該將軍當加意保養長爲國家宣力渥受朕恩以副厚望尋奏賊勢初起勢甚猖獗節經探訪漸形渙散見調官兵不止四萬計每月需糧一萬五千餘石運費需銀十萬餘兩請將續調四川陝甘兵數酌量停止並敕下回疆各城大臣採買糧餉較之戈壁轉輸節省不止倍蓰上嘉納之初逆夷張格爾之就擒也郡王銜伊薩克誘致之旣膺爵賞爲諸夷所怨九年冬兵民謀劫掠伊薩克事洩喀什噶爾參贊大臣札隆阿奏明誅爲首六人遂下令驅逐流民衆以爲伊薩克之意積忿愈深圍城中有自賊營逃回者述賊言伊薩克爲內應兵民咸謂非殺伊薩克城無以守會回衆避亂奔入新城兵民殺之札隆阿不能制遂將伊薩克看守以句結謀逆列款入奏玉麟奏伊薩克身膺王爵富貴已極若甘爲夷驅使豈非得不償失況其子孫在阿克蘇其家業在庫車豈無顧慮而蓄異謀今喀什噶爾甫解圍意外又生枝節若不確查致大失回衆心是外寇未除而內患復起也上交玉麟會同長齡審訊尋審明札隆阿以約束不嚴懼罪及冀殺伊薩克掩其迹並究出委員周彭齡商同捏奏章京金奇賢遂合承審通事阿布都吉里教供誣證各情按律分坐諭曰若非卿二人公忠體國何能平反此案

使內外夷回懾服可嘉之至十一年二月奏言閱固原提督楊芳添兵招佃奏稟稱四川總督鄂山有請將西四城改照土司之議伏思回疆自入版圖設官駐兵不惟西四城爲東道藩籬南八城爲西陲保障卽前後藏及西北沿邊一帶蒙古番子各部落皆賴鞏固若西四城不設官兵僅令回人守土誠恐回性無恆又最畏布魯特彊橫轉瞬卽爲外夷所有則阿克蘇又將爲極邊矣其迤東之庫車喀什沙爾土魯番哈密等城必至漸不安堵以形勢而論唇亡則齒寒以地利而論喀什噶爾葉爾羌和闐三處爲回疆殷實之區捨沃壤而守瘠土是藉寇兵而齎盜糧也楊芳所謂守善於棄實不易之論至論請將喀什噶爾參贊移駐阿克蘇殊非善計該處幅員狹隘不足爲重鎮且距喀什城二千里有鞭長不及之患其所陳招佃通商各條則爲治邊良法請用之上命偕長齡妥議具奏又將長齡密陳節略十條及內外諸臣奏議敕交玉麟悉心籌畫尋偕長齡奏霍罕安集延本烏合之衆不必采入窮追我兵有備待其至而痛剿之可寒夷膽諸臣所謂添兵招佃似屬可行但未親歷其境使兵勢聯絡如一亦有不能徑行之處喀什城地處極邊外夷由卡至城僅百餘里後路距阿克蘇二千餘里昔張格爾圍喀什城援兵不

至四城先後失守可爲炯鑒今議善後豈可復蹈前轍致令參贊大員坐困重圍不能制人而爲人制西四城見有滿漢防兵六千餘名即使酌增賊匪倉卒入卡由各城紛紛徵調孤軍遠涉不能迅至設賊匪抄截其後其患豈可勝言長齡前議撤兵退守喀喇沙爾查該城在八城之極東喀什噶爾在極西相距四千餘里彼此不能相顧若以西七城專付阿奇木管理設回衆力難禦賊勢必轉爲賊有以七十年已隸之版圖一旦棄之有傷國體爲今之計惟有量移統鎮以資控馭酌添兵力以壯聲威參贊總理八城葉爾羌爲扼要適中之地應請移駐於此該處地廣戶繁可以多駐官兵距喀什噶爾六站外夷進卡接見在不遠不近之間足資控制其幫辦大臣仍照例專管本城事務更移駐和闐領隊大臣一員聽參贊調遣喀什噶爾留換防總兵一員在彼統兵駐守英吉沙爾仍駐領隊大臣一員再請於葉爾羌阿克蘇適中之巴爾楚克一帶添駐總兵一員以爲樹窩子咽喉鎖鑰則六城相距均不過數百里聲勢易於聯絡和闐僻在一隅祇留領隊一員足資辦理其滿漢防兵額數西四城見有六千餘名再酌留伊犁烏魯木齊馬隊二千名陝甘綠營兵四千名共計舊額新增一萬二千名喀什噶爾擬駐綠營

兵三千統以總兵作爲前敵賊少不難擊退賊多則稟參贊援剿英吉沙爾擬駐伊犁馬隊五百綠營兵一千爲前後二城中權接應巴爾楚克駐綠營三千和闐止防兵二百餘今擬倍之此外滿兵二千漢兵四千餘名全駐葉爾羌徵調可期得力設有賊匪入卡喀什噶爾英吉沙爾兩城既有馬隊四千餘名足以抵禦更由葉爾羌撥兵接應又有巴爾楚克鎮兵續援樹窩子復有兵守賊不能抄襲後路東四城均可無虞參贊居中制外調度裕如嗣後邊防安靜新增兵額不妨隨時抽撤此時增兵需餉請於各省綠營兵額暫裁百分之二節省銀兩足備添兵之費俟屯田著有成效足支兵食補還暫裁之數以回疆物產供回疆兵糈經費既節疆圉可固再請大黃茶葉等物仍准外夷通商交易以示羈縻庶霍罕安集延等懷德畏威不敢復犯邊境又奏參贊大臣既移駐葉爾羌其印房等處各官應與喀什噶爾葉爾羌裁糧餉章京二缺各改設糧餉同知一員添設巴爾楚司牧事喀什噶爾葉爾羌裁糧餉章京二缺各改設糧餉同知一員添設巴爾楚克糧餉同知一員又於葉爾羌喀什噶爾英吉沙爾巴爾楚克等處各設巡檢一員同知管商民回子詞訟戶籍屯田巡檢管緝捕監獄稅課均作爲邊遠差缺由

陝甘兩省派往拜城距阿克蘇較遠請添設分防巡檢一員管理拜城賽里木二處商民回子詞訟亦由陝甘派往作爲差缺均從之旋奉上諭派兵過多增設職官儼於回疆添一省會失居重馭輕之道命玉麟等悉心酌減尋議減巴爾楚克防兵五百名葉爾羌滿洲兵五百名綠營兵一千五百名同知三員巡檢五員統計舊額新增各大臣官員兵丁書識歲需糧料合併西四城額徵折色糧石通融撥用已足供支毋庸津貼採買又據和闐阿奇木伊斯瑪依爾等呈請歲捐糧一千二百石供添兵口食烏什阿奇木木薩等呈請在寶興屯工地內捐築回城令屯兵歸城操演每歲額交糧石卽由回戶照數交納又西四城歲徵賦錢六千七百餘串除搭放外每年存賸普爾錢五千餘串見在減定暫留防兵五千餘名需餉不過十萬兩若將存賸賦錢以二百二十文易銀一兩可充經費銀二萬三千餘兩此項存賸賦錢向係各城儲備充公按年報銷用款不一不皆散在兵衆若將五千餘串全放兵餉則散有常期城市錢源益加充裕不致錢貴銀賤至安鑪鼓鑄祇阿克蘇一城普爾錢文行用止在回疆非內地可比額鑄之錢與歲俱增輾轉流通總不出八城地而斷無短絀之虞從之又奏開墾屯田見據喀什噶爾

大營駐紮處所名喀拉赫依延袤二百餘頃已招五百餘人認種將來逃散回戶歸來卽以見存叛產照數撥給嗣後續有承種民人於大河拐附近荒地酌量分撥葉爾羌境內毛拉巴什賽克三一帶荒地俟巴爾楚克接連樹窩子等處築堡設汛後廣爲招種其修渠引水牛具籽種按則徵收各事宜須試種一年再由參贊大臣璧昌詳議章程具奏得旨著照所奏辦理八月皇上五旬萬壽推恩近臣玉麟子恆昌二品廕生命俟及歲時以員外郎卽用十二年善後事竣上命長齡來京玉麟回伊犁將軍本任諭曰該將軍有統轄之責回疆一切事宜儻有貽誤惟玉麟與璧昌是問三月因碩德佐領凌善等私借官民倉穀事覺部議照濫保例降二級調用上加恩改爲降四級留任玉麟奏伊犁烏魯木齊均有駐防官兵伊犁根本要地三面臨邊例派換防官兵不下二千名存營兵力每形單少烏魯木齊換防滿兵道光八年停止勞逸不均請將伊犁惠遠城巴彥岱錫伯索倫四營例派塔爾巴哈臺換防官二十七員兵九百七十九名原額酌減改由烏魯木齊協派官十員兵四百名以均戍役伊犁所屬察哈爾額魯特二營例派塔爾巴哈臺換防官四員兵三百十九名該蒙古生計本不充裕出差過多有妨官牧查

塔爾巴哈臺所屬之巴爾魯克遊牧之察哈爾額魯特哈薩克滋生蕃衍其間散壯丁請令就近當差抵充伊犁派往之蒙古官兵差使節省此項換防鹽糧酌添巴爾魯克官七員兵六百餘名外尙歲有餘贖之數經費既省操防亦較得力詔如所請七月奏陳伊犁出征官兵經由冰嶺崎嶇短馬匹懇恩體恤諭曰伊犁滿漢兵丁應賠騎馬五分著照八年成案與駝馬一律准銷八分賠二分其民遣壯勇原領馬匹均已倒斃應行著賠之處亦著照上屆成案全行豁免九月命來京十月疏陳伊犁惠遠城南濱大河土性疏鬆易致塌卸見在大溜北趨將近城垣請復歲修以資保障得旨允行又疏請原任伊犁將軍明亮晉昌英德阿照例入祠奉諭俱著加恩准其一體入祠十一月疏陳伊犁土宇寬廣惠遠可種之田約計六萬餘畝巴彥岱可種之田約計一萬三千餘畝請將惠遠分析地畝租給回民耕種歲收地租抵充兵丁口食節省銀兩添補孤寡養贍壯丁差操之用巴彥岱地畝得水較難須開渠灌溉俟招佃得租亦照惠遠成案辦理命如所請行是月文廟告成疏請頒發扁額諭曰伊犁自入版圖文廟尙未經建立近年旗民習戎之外兼知讀書舊設敬業學舍棟宇傾敝據玉麟等鳩工修建殿廡門柱規

模備具足供祀事並於兩旁增建學舍仍爲敬業學訓課之所俾遠徼旗民敬教
勸學著照所請頒給聖協時中扁額交玉麟等敬謹恭懸用昭寰宇同文之治十
二月疏言伊犁派赴喀什噶爾應援官兵前於道光十年八月揀留防所扣至十
三年春二月有半較之換防班次轉多半年請及時更換以符舊制從之十三年
三月回京行至陝西長安縣病卒巡撫史譜奏入諭曰前任伊犁將軍玉麟以翰
林通籍歷事三朝宣力中外朕御極後由駐藏大臣召令來京洵擢正卿入直樞
務前因重定回疆懋著贊襄晉錫宮銜繪像紫光閣用酬勳績嗣以諳悉回疆情
形簡畀伊犁重任籌辦善後事宜萬里同心措施悉當見在邊陲安謐特命回京
方資倚任本日據史譜由驛馳奏中途偶因感冒遽爾溘逝披覽遺章中心震悼
斷不想未能晤面竟成長往揮淚歎息之餘祇有渥沛恩施飾終優賚以示褒榮
玉麟著加恩晉贈太保照尙書例賜卹入祀賢良祠伊子候補員外郎恆昌俟服
闋後遇有六部員外郎缺出卽行補用歸櫬將次到京朕再派員迎護到京之日
准其入城治喪朕至期親臨賜奠所有應得卹典著該衙門察例具奏聖駕親臨
賜奠五月予諡文恭十月伊犁將軍特依順保奏請入祠奉旨允行子恆昌見官

清史列傳卷三十四終

清史列傳 卷三十五

大臣傳次編十

和珅

和珅鈕祜祿氏滿洲正紅旗人由文生員於乾隆三十四年承襲三等輕車都尉三十七年授三等侍衛旋挑補黏杆處侍衛四十年閏十月遷乾清門侍衛十一月擢御前侍衛授正藍旗滿洲副都統四十一年正月授戶部右侍郎三月命在軍機大臣上行走四月授總管內務府大臣八月調鑲黃旗滿洲副都統十一月充國史館副總裁賞戴一品朝冠十二月總管內務府三旗官兵事務賜紫禁城騎馬四十二年六月轉左侍郎兼署吏部右侍郎十月兼步軍統領四十三年吏部尙書永貴等奏京察降革司員參劾事件免其隨帶和珅以扶同瞻徇降二級留任旋監督崇文門稅務總管行營事務四十四年命在御前大臣上學習行走四十五年正月命偕刑部侍郎喀凝阿赴雲南查訊按察使海凝控告總督李侍堯貪營各款鞫得實並奏滇省自李侍堯婪索屬員贓私狼籍吏治廢壞各府州

縣多有虧空須徹底詳查清釐積弊上以福康安爲雲貴總督赴任查辦和珅於定讞後回京未至擢戶部尙書旋命在議政大臣處行走五月復命奏雲南永昌府之潞江普洱府之磨黑兩地向立稅口禁攜帶絲紙針綢出隘但關外尙有騰越龍陵思茅諸處地闊民繁難免偷漏請改設以收實效又奏滇省鹽務緣川省私鹽偷漏味好價廉致官鹽難銷正課日虧宜在川滇交界處實力禁止並以滇省私錢盛行官銅缺少請設法整頓皆奉旨允行又奏緬甸送還蘇爾相等有同來緬子二人尙羈禁永昌似應釋回雲南開化府屬設立關口內地民人往交陞貿易者由藩司給以印票前交陞黃文桐滋事內地民人不從俱逃回經李侍堯拏獲有發遣者有因曾在彼處娶妻定擬死罪者聞粵省關隘亦有通交陞之處辦法又復不同似覺兩歧上諭福康安將二緬子釋歸其逃回人犯改擬具奏尋授御前大臣補鑲藍旗滿洲都統諭曰尙書和珅之子賜名豐紳殷德指爲十公主之額駙待年及歲時舉行婚禮六月授正白旗領侍衛內大臣請以內務府筆帖式歸八旗應考上不許十月充四庫館正總裁兼辦理藩院尙書事四十六年四月甘肅撒拉爾番回蘇四十三等滋事進逼蘭州上命額駙拉旺多爾濟領

侍衛內大臣海蘭察護軍統領額森特等率兵討之和珅帶欽差大臣關防同往又命大學士阿桂督師旋以阿桂有痒疾諭和珅兼程先進督辦一切和珅至蘭州訶賊踞八蜡廟雷壇等處掘濠自固因奏言分兵四路令海蘭察等從山梁進剿額森特等於丫口斜撲賊營提督仁和等直攻八蜡廟大樓和珅自偕西安將軍伍彌泰等由龍尾山梁策應時海蘭察已逼賊至山梁殲其溝中伏匪和珅率弁兵乘勢追逐斬二百餘人賊立坎深數丈小道皆掘斷不能度遂撤兵回是役也總兵圖欽保陣亡和珅匿不奏後請恩卹始及之上以其取巧傳旨申飭諭曰和珅在途次所奉諭旨甚多均未奏及豈不知朕於數千里外懸懸廬注乎再本日畢沅奏和珅在途次行走情形婉轉開脫措詞委曲此卽外省觀望習氣究於和珅之行走濡滯能逃朕之洞鑒乎和珅之未至蘭州也海蘭察額森特先馳至擊賊勝之和珅乃以二人不查賊形希圖僥倖責數之並奏其欺誑上曰伊二人先行打仗並無不是之處和珅遽形之章奏豈行走遲延者反爲有功乎若令朕顛倒是非申飭無過之人朕不爲也又以總督勒爾謹養癰貽患不卽參劾彙下部議降三級留任五月諭曰和珅於四月十七日始抵蘭州而阿桂亦於四月二

十一日續到所有籌辦諸事雖皆聯銜入告而自阿桂到後經畫措置始有條理此事阿桂一人已能經理妥協無須復令和珅同辦且恐和珅在彼事不歸一卽海蘭察額森特等隨阿桂領兵打仗阿桂之派調伊等自較和珅呼應更靈而朕啟鑿熱河爲期亦近御前領侍衛內大臣軍機大臣等扈蹕者現已無多和珅令速行馳驛回京尋到京復命奏陝西毗連四省形勢扼要而駐防兵單甘肅兵數以遷駐新疆未經補額存營者亦少皆須多爲添駐又請西安提督仍復舊制駐固原州而以固原鎮總兵遷駐河州其河州協副將改於安定或會寧駐紮方足以資控馭命下阿桂等行之十一月兼署兵部尙書十二月管理戶部三庫事務四十七年二月以軍機大臣審辦甘肅鎮迪道巴彥岱受賄徇隱事擬罪輕縱降三級留任四月御史錢澧劾山東巡撫國泰布政使于易簡貪縱營私命偕左都御史劉墉按訊既定讞命先回京八月加太子太保十月充經筵講官四十八年六月賞戴雙眼花翎十月充國史館正總裁十一月充文淵閣提舉閣事四十九年三月調正白旗滿洲都統四月充清字經館總裁七月甘肅石峯堡逆回張文慶等平以和珅首承諭旨再予輕車都尉世職歸併前職照例議襲旋調吏部尙

書協辦大學士管理戶部九月仍以平回匪功議敘封一等男爵五十一年六月御史曹錫寶奏和珅家人劉全服用奢侈器具完美恐有藉端撞索情事應密行偵訪嚴加懲創上命王大臣會同都察院查覈又意其欲劾和珅而又不敢明言故以家人爲由隱約其詞爲將來波及地復諭曰此案總期根究明白並非因此一虛言欲治和珅更非欲爲和珅開脫留京王大臣等不可誤會朕旨將曹錫寶加以詞色有意吹求使原告轉成被告亦無是理務須平心靜氣虛衷詳問如曹錫寶果能指出款蹟訪查得實卽一面從嚴審辦一面據實具奏不可因和珅稍存迴護若稍存迴護是乃陷和珅且自陷也繼復諭詳詢曹錫寶如果和珅有營私舞弊款蹟不妨據實指出朕必質訊明確將和珅治罪旣而王大臣等奏錫寶如有實據自應列款參奏今遽以無根之言冀博建白之名請交部議處旋議降二級調用上以其言官改爲革職留任閏七月授文華殿大學士仍兼吏部戶部事九月諭曰和珅於乾隆四十三年兼管崇文門監督迄今已有八載現係大學士亦不便兼理權務前曹錫寶參奏和珅家人一事未必非因此遂退去監督事又諭曰昨召見新放廣信府知府湛露年紀尙輕詢以清語亦屬生疎難遽勝方

面之任且伊係福長安之妻弟和珅於京察時將該員保送一等不無瞻徇之意殊屬非是和珅交都察院議處旋議降二級留任十月兩廣總督富勒渾縱容家人殷士俊等關通婪索事露諭曰富勒渾操守平常密諭孫士毅據實查奏時和珅卽在朕前奏稱不知將富勒渾調回徐行查察可不致遽興大獄是和珅未免意存消弭爲迴護富勒渾地步五十二年奏京師米價昂貴各鋪戶囤積居奇請嗣後飭禁毋得過五十石尋商人呈遞公狀未卽遵禁定郡王綿恩釋弗究諭曰和珅以京城米價昂貴出示禁止囤積而商人惟利是圖糧價仍未平減因查出鋪戶囤積米麥六萬餘石奏請交廠減價糶賣其應如何立廠派員稽查及作何減價平糶之處和珅並未酌定章程聲敘明晰已屬非是乃留京王大臣及綿恩所奏似以此事於商民均有未便辦理諸多掣肘又含糊其詞竟若因和珅係原辦之人爲之遷就彌縫委曲完事而言外以朕亦未免有迴護原辦之意有是理乎總之此事非迴護和珅竟是害和珅矣五十三年臺灣逆匪林爽文平和珅以承書諭旨晉封三等忠襄伯並賞用紫韁五十四年四月充殿試讀卷官五月充教習庶吉士五十五年正月諭曰大學士和珅著加恩賞給黃帶四開楔袍固倫

額駙豐紳殷德著兼散秩大臣行走四月充殿試讀卷官十一月以總辦萬壽慶典利坤同金簡專司其事命於所加二級外再加一級五十六年四月審訊護軍海旺等竊庫銀一案前鋒統領參領各官俱獲咎和坤以管庫大臣既經失察擬罪又失之寬縱上責令照數賠補仍下部議處旋議降一級抵銷十一月刻石經於辟雍命爲總裁五十七年九月廓爾喀平恩予議敘軍功加三級十月兼翰林院掌院學士充日講起居注官五十八年充教習庶吉士兼管太醫院及御藥房事務五十九年二月吉林人濩闕庫額命軍機大臣繕寫飭諭和坤瞻顧遷延未卽擬旨上責之降二級留任七月奏八旗立廐養馬原以備扈從行營之用但常時易致折騰請分給各旗官員拴養調習壯健較爲得力空出馬圈地蓋造房間給與窮苦兵丁居住如所議行六十年四月充殿試讀卷官五月充教習庶吉士九月朝審停勾命查明其情最重者請旨裁定而刑部理藩院於蒙古台吉圖巴扎布兇殘一案未先具奏俱干嚴議和坤以管理理藩院又軍機書旨始終迴護降三級留任十月廷試武舉發策命軍機大臣恭查實錄實錄例不載武試題和坤等率以文武試策總裁實錄對覆詢對如前上以護過飾非嚴飭之革職留任

先是京察屆期和珅屢邀議敘是年特命停罷嘉慶元年正月調正黃旗領侍衛內大臣六月調鑲黃旗滿洲都統二年管理刑部退去戶部事旋以軍需報銷仍兼理戶部三年邪匪王三槐就擒和珅以襄贊機宜晉公爵四年正月三日高宗純皇帝升遐仁宗睿皇帝令和珅總理喪儀科道諸臣以和珅不法事列款參奏上命王大臣公同鞠訊俱得實上乃諭曰和珅受大行太上皇帝特恩由侍衛洊擢至大學士在軍機處行走多年叨沐殊施諸臣無其比朕親承付託之重茲猝遭皇考大故每思論語三年無改之義如我皇考敬天法祖勤政愛民實心實政方將垂示萬年永爲家法何止三年無改至皇考所簡用重臣朕斷不肯輕爲更易卽獲罪者稍有可原猶未嘗不思保全今和珅情罪重大實有難以刻貸者設數年來廷臣中有能及早參奏必蒙聖斷立置重典而竟無一人奏及者內外諸臣自以皇考聖壽日高不敢煩勞聖心實則畏懼和珅箝口結舌皆朕所深知今和珅罪狀已著其得罪我皇考之處擢髮難數亦百喙難辭朕若置之不辦何以仰對在天之靈除在京王大臣會審定擬外著通諭各督撫將和珅如何擬罪並此外有何款跡據實覆奏旋據直隸總督胡季堂奏和珅種種悖逆不法蠹國病

民貪黷放蕩目無君上請以大逆論上紓太上皇帝在天之憤怒下快天下人心之積恨並查出和珅薊州墳塋僭妄踰制上乃申諭曰朕於乾隆六十年九月初三日蒙皇考冊封皇太子尙未宣布諭旨而和珅於初二日在朕前先遞如意洩漏機密居然以擁戴爲功其大罪一上年正月皇考於圓明園召見和珅伊竟騎馬直進左門過正大光明殿至壽山口無父無君莫此爲甚其大罪二又因腿疾乘坐椅轎擡入大內肩輿出入神武門衆目共睹毫無忌憚其大罪三並將出宮女子娶爲次妻罔顧廉恥其大罪四自剿辦川楚教匪以來皇考盼望軍書刻縈宵旰乃和珅於各路軍營遞到奏報任意延擱有心欺蔽以致軍務日久未竣其大罪五皇考聖躬不豫時和珅毫無憂戚每進見後出向外廷人員談笑如常其大罪六昨皇考力疾披章批諭字畫間有未眞和珅膽敢口稱不如撕去另行擬旨其大罪七前奉皇考敕旨令伊管吏部刑部事務嗣因軍需銷算伊係熟手是以又諭令兼理戶部題奏報銷事件伊竟將戶部事務一人把持變更成例不許部臣參議一字其大罪八上年十二月奎舒奏循化貴德二廳賊番聚衆在青海肆劫和珅竟將原摺駁回隱匿不辦全不以邊務爲事其大罪九皇考升遐後朕

諭蒙古王公未出痘不必來京和珅不遵諭旨令已未出痘者俱不必來全不顧撫綏外藩之意其居心實不可問其大罪十大學士蘇凌阿兩耳重聽衰邁難堪因係伊弟和琳姻親竟隱匿不奏侍郎吳省蘭李潢太僕卿李光雲曾在伊家教讀保列卿階兼任學政其大罪十一軍機處記名人員和珅任意撤去種種專擅不可枚舉其大罪十二昨將和珅家產查抄所蓋楠木房屋僭侈踰制其多寶閣榻段皆仿照寧壽宮制度其園寓點綴與圓明園蓬壺瑤臺無異不知是何肺腸其大罪十三薊州墳塋設立享殿開置隧道致附近居民有和陵之稱其大罪十四家內所藏珍珠手串二百餘較大內多至數倍并有大珠較御用冠頂尤大其大罪十五又寶石頂非伊應戴之物伊所藏數十而整塊大寶石不計其數且有內府所無者其大罪十六銀兩衣服等件數逾千萬其大罪十七且有夾牆藏金二萬六千餘兩私庫藏金六千餘兩地窖內藏埋銀兩三百餘萬其大罪十八附近通州蘇州有當舖錢店貲本又不下十餘萬以首輔大臣下與小民爭利其大罪十九伊家人劉全不過下賤家奴而查抄家產竟至二十餘萬並有大珠及珍珠手串若非縱令需索何得如此豐饒其大罪二十其餘貪縱狂妄之處尙難悉

數著將胡季堂原摺發交在京文武三品以上官員并翰詹科道閱看悉心妥議具奏如有自抒所見者另摺封陳諸臣俱言宜如胡季堂議上念和珅曾任首輔免其肆市賜令自盡以兩淮鹽政徵瑞前後餽和珅銀四十萬兩山東巡撫伊江阿知太上皇帝龍馭上賓奏摺中不及一字惟致書和珅勸其節哀辦事俱革職並諭故御史曹錫寶當和珅聲勢薰灼之際無一人敢於糾劾而曹錫寶獨能抗辭執奏不愧諍臣之職今和珅治罪後查辦劉全家產竟有二十餘萬之多是曹錫寶前此所劾信屬不虛自宜加以優獎曹錫寶著加恩追贈副都御史並將伊子照贈銜予廕既而上又通諭諸臣曰和珅所管衙門本多由其保舉升擢者自必不少外省官員奔走門下逢迎餽賂皆所不免若一一根究亦非罰不及衆之義大小臣工無庸心存疑懼況臣工內中才居多卽有從前熱中躁進一時失足但能洗心滌慮痛改前非仍可勉爲端士以副朕咸與維新之治時多言和珅財產甚多不止抄出之數者又諭曰朕所以辦理和珅者原因其蠹國病民專擅狂悖查抄所以懲戒貪黷初不計多寡而事株連嗣後臣工不得再以和珅貲產妄行瀆奏先是和珅在軍機時慮人舉發凡有奏摺令具副本關會軍機處至是奉

旨革除和珅又令各部將年老平庸之司員保送御史俾其緘默不言免於糾劾至是亦因副都御史賡音布奏命嗣後保送御史年無得過六十五以上又諭曰恭閱皇考硃筆有嚴禁內外大臣呈進貢物諭旨二道聖訓煌煌垂誠至爲深切祇因和珅攬權納賄凡遇外省督撫呈進物件准遞與否必須先向和珅關白伊卽擅自准駁明示有權而督撫等所進貢物皇考不過賞收一二其餘盡入和珅私宅是以我皇考雖屢經禁止仍未杜絕嗣後有將飭禁之物呈進者卽以違制論初乾隆五十四年山西舉人薛載熙覆試除名嘉慶六年載熙在燕郊迎駕命試以詩並諭曰從前薛載熙中式時覆試文理尙無大疵惟詩粗率奏請停科經皇考加恩寬免嗣和珅等議覆科場事宜以薛載熙覆試與中卷不符難保無代倩情弊請追革在案是薛載熙斥革本非皇考之意和珅辦理此事實屬有意從刻今薛載熙考試詩句較前稍勝著加恩賞還舉人其年又有湖北按察使李天培代福康安私交糧船分運桅木一事時和珅弟和琳爲巡漕御史劾奏之福康安因得嚴旨並帶革職留任至是上諭曰此案並非和琳秉公劾參實係聽受和珅指使爲傾陷福康安之計今和珅籍沒查出所蓋房屋僭妄踰制較之福康安

托帶木植之咎孰重孰輕尋湖廣總督倭什布奏漢陽府知府明保例應迴避諭曰明保係和珅母族姻親平日倚恃和珅勢焰在任聲名甚屬平常從前引見知府時卽蒙皇考鑒其人甚庸陋查伊出身履歷經和珅朦混具奏亦未令伊遞摺請訓徑赴知府之任皆朕所深知明保著卽來京以部員補用又諭曰近聞京師步軍統領衙門及巡捕五營所管步甲兵丁在和珅宅內供私役者竟有千餘名之多實出情理之外國家設立兵額原資捕盜緝匪之用豈可將歸伍之兵供私宅之役無怪乎兵數日少盜賊肆行也十九年五月國史館進呈和珅列傳諭曰和珅逮問伏法迄今已越十五年始將列傳纂進太覺遲緩迨詳加披閱其自乾隆三十四年襲官以至嘉慶四年褫職三十年間但將官階履歷挨次編輯篇幅寥寥至伊一生事實全未查載惟將逮問之後各諭旨詳加敘述是何居心不可問矣和珅在乾隆年間由侍衛洊擢大學士晉封公爵精明敏捷原有微勞足錄是以皇考高宗純皇帝加以厚恩奈伊貪鄙性成怙勢營私狂妄專擅積有罪愆朕親政時是以加以重罰似此敘載簡略現距懲辦和珅之時年分未遠其罪案昭然在人耳目若傳至數百年後據本傳所載考厥生平則功罪不明何以辨賢

奸而昭賞罰國史爲信今傳後之書事關彰瘴不可不明白宣示所有承辦和珅列傳之纂修官著查明參奏交部嚴加議處尋查明原纂官顧蕊因出差將稿本交館席煜續辦命將席煜革職審訊六月諭曰顧蕊原纂和珅列傳稿本載有事實四條皆和珅罪狀仰奉皇考高宗純皇帝飭諭加以譴責者葛方晉節去三條席煜節去一條其居心實不可問除葛方晉身故外席煜前已革職著卽行押解回籍交江蘇巡撫張師誠嚴行管束令其閉門思過不准外出並留心稽察如有怨望詩文卽奏聞將該革員拏問治罪初和珅於乾隆四十一年入正黃旗及得罪仍隸正紅旗子豐紳殷德乾隆四十五年賜名五十四年尙固倫和孝公主命在御前行走五十五年授散秩大臣五十六年二月管理御茶膳房造辦處事務四月兼武備院卿五十八年調奉宸苑卿五十九年擢正黃旗護軍統領六十年兼內務府大臣嘉慶元年總理行營事務二年二月兼鑾儀使八月授正白旗漢軍都統仍兼護軍統領監督崇文門稅務四年因父和珅得罪大學士九卿等會議革去世襲諭曰豐紳殷德係固倫額駙且公主最爲皇考所鍾愛自應仰體恩慈曲加寬宥若此時將豐紳殷德職銜斥革齒於齊民體制亦覺未協和珅公爵

因拏獲王三槐賞給應照議革去仍加恩留伊伯爵卽令豐紳殷德承襲在家閒居不許出外滋事尋於和珅家內抄出正珠朝珠詢之家人僉稱和珅往往於燈下無人時私自懸掛臨鏡徘徊對影笑語聲息甚低人不得聞奉旨正珠朝珠爲乘輿服用珍物豈臣下所應收藏家人供出和珅情狀竟有謀爲不軌之意今倖逃顯戮姑免磔屍其子豐紳殷德若知有此物不行舉發當照大逆例緣坐今經綿恩等訊究實不知情加恩免其追問但不應仍叨世襲著革去伯爵賞給散秩大臣銜尋上以和珅三等輕車都尉係伊高祖尼牙哈那巴圖魯軍功所得仍以豐紳殷德承襲七年三省教匪平諭曰固倫和孝公主下嫁固倫額駙豐紳殷德其品秩原與貝子相等嗣因伊父和珅身獲重譴是以將豐紳殷德一併革職旋經朕格外加恩授爲散秩大臣今當大功戡定恩逮親藩因念固倫和孝公主亦應一體錫予恩施著將豐紳殷德賞給民公品級仍在散秩大臣上行走俾公主同深歡感以示朕篤念推恩之至意八年內務府大臣縉布奏和孝公主府內已革長史奎福呈控豐紳殷德演習武藝謀爲不軌並欲毒害公主將侍妾帶至墳園於國服內生女各款命大學士董誥回京與留京王大臣及縉布會同刑部堂

官等悉心推究旋覆奏奎福所控各款惟豐紳殷德在國服內妾生一女審訊得實餘俱誣控諭曰和珅獲罪重大中外共知卽肆市亦罪所應得仍加恩賜令自盡伊子豐紳殷德旋授爲散秩大臣賞給公銜朕於和珅父子可謂仁至義盡在豐紳殷德具有天良自應感激無地豈有反生怨望之理此案縑布奏上時朕卽知事屬虛誣但所控謀逆情事案關重大朕若少露意旨卽使審訊實係誣控而外間無識之徒妄生臆度必以朕過於仁慈不忍遽興大獄而承審大臣亦似有心迎合轉不足以破羣疑而成信讞當卽特派董誥回京與王大臣等會同秉公研訊茲據王大臣等連日詳翰惟豐紳殷德在國服內侍妾生女一節業已自認不諱此外如公主疑心飲食下毒僉供實無其事額駙與公主和睦誣妄實屬顯然至演習白蠟桿始自乾隆五十九年藉以練習身體並非起自近日其私放利債尙非違例盤剝卽引進高陞鄭二戲耍棍桿亦止係少年不謹所作詩文經保凝等親至府內查出封固進呈多係嘉慶三年以前所作惟青蠅賦一篇係四年在墳塋栽樹聞外間傳說有大動工程之語憂讒畏譏而作詳細檢閱委無怨望違悖語句實係奎福因革去長史心懷怨恨捏詞誣控今爰書已定豐紳殷德並

無謀爲不軌之事其罪惟在私將侍妾帶至墳園於國服一年內生女實屬喪心無恥前已降旨革去公銜所管職任仍著在家圈禁令其閉門思過如此懲辦已足蔽辜其他俱屬輕罪不議總之此案如豐紳殷德果有悖妄之處朕斷不肯因公主曲法姑貸既經訊係誣捏朕又豈肯因其怨家造作蜚語遽將豐紳殷德寘之重典置公主於何地乎著將辦理緣由通諭知之十一年正月授頭等侍衛在大門上行走四月擢正白旗蒙古副都統賞戴花翎十二年二月調鑲藍旗滿洲副都統十二月軍政屆期賞給伯爵銜十五年二月因病奏請解任調理四月上念其平日小心供職賞給公爵銜尋卒諭曰昨因豐紳殷德抱病未痊特降旨加恩賞給公爵銜用示眷念今竟爾溘逝念係和孝公主之額駙人素謹慎著派英和帶同侍衛十人前往奠醮並齋賜陀羅經被賞給和孝公主銀五千兩俾資料理喪務仍照公爵銜給與卹典該部察例具奏尋賜祭葬豐紳殷德無子輕車都尉以和琳之子豐紳伊綿襲

恆敬

恆敬原名恆敏伊爾根覺羅氏滿洲正藍旗人乾隆五十三年由官學生挑補鴻

臚寺鳴贊俸滿以同知用嘉慶二年四月揀發雲南十月署大關同知因迴避雲貴總督富綱改掣四川八年剿捕三省餘匪承辦軍需出力補打箭鑪同知尋署廣安州知州擒獲川匪羅忠相等總督勒保奏請鼓勵賞知府銜九年六月委辦軍營糧務並帶鄉勇搜捕零匪擒殺多名十月署太平廳同知又於火石嶺拏獲土匪九年將軍德楞泰因川省大功告歲奏請獎勵得旨以知府遇缺卽補搜捕老林零匪獲僞元帥王世貴十二年補綏定府知府十三年趕山坪等十二支嶺夷闖入內地焚掠滋事進兵涼山剿辦恆敬在事出力賞戴藍翎十四年升湖南督糧道十八年升按察使十九年調江南按察使賞換花翎二十年丁父憂回旗二十一年授太僕寺少卿尋命署陝西按察使並承襲世管佐領二十三年服闋實授升江寧布政使二十四年兼署江寧織造二十五年命來京另候簡用道光元年三月奉旨以三品京堂候補七月授光祿寺卿三年賞副都統銜充哈密辦事大臣五年補正黃旗漢軍副都統六年喀什噶爾逆回張格爾滋擾七月奏言賊匪已入葉爾羌所屬之十三臺伊勒都地方戕害守兵文報梗阻派兵速赴阿克蘇救援會哈密安設糧臺請兵防範諭曰哈密爲新疆咽喉要地關外糧餉向

由辦事大臣經理恆敬前在四川軍營曾經辦理糧餉著在哈密辦理一切轉飭派出之道員等及地方官迅速轉運源源接濟毋得短絀遲誤尋奏留涼州鎮兵五百名駐守哈密並請各營官兵不分馬步每兵借銀四兩官弁借俸一年以資添補允之署伊犁將軍德英阿等籌議回疆鼓鑄事宜上命與恆敬會同籌畫妥議旋議請將阿克蘇喀喇沙爾兩處本年例解伊犁銅斤截留阿克蘇俾資添鑄以免往返解運之繁俟軍務完竣仍照舊章辦理從之九月奏烏魯木齊每月運送糧麩計口授食僅敷一月之需哈密回子郡王銜貝勒伯錫爾懇請親帶回兵二百名前赴軍臺聽候調遣又據籲請湊備回戶牛車一千兩輓運軍糧至吐魯番交卸諭恆敬與盧坤鄂山英惠等通盤熟籌會商妥辦至回王所備車輛如果得力卽留供輓運照例支給腳價十月以哈密爲新疆南北衝衢額設馬匹僅足供尋常差務見值大兵西下軍書絡繹不敷遞送請每臺添設馬匹人夫以資接濟上如所請復諭曰經此次增添之後軍需緊要差使自可迅速應付儻有遲誤惟恆敬是問七年二月上以烏什爲奇兵進發路徑轉運糧餉防範後路尤關緊要命恆敬爲烏什辦事大臣諭曰烏什地方緊要見在駐劄官兵爲數較少恆敬

多貴二人在彼控制尤宜加意防範儻布魯特等膽敢擅入卡倫肆行搶劫自當嚴緊懲辦斷不可喜事貪功帶兵輕出妄殺無辜四月上以長齡等克復喀什噶爾張逆乘閒逃匿恐竄入烏什一帶地方飭恆敬等嚴密訪捕勿得坐失機宜先是那彥寶奏擒獲布魯特回匪有附逆之庫圖魯克謀搶烏什上以所奏並無逆跡昭著統計殲斃者有六七百人之多諭恆敬秉公密訪是否所殺均係逆賊抑竟係無辜被戮斃者有六七百不實不盡將來別經發覺或致激成事端惟恆敬是問旋查明庫圖魯克實有附逆情事業已擒獲護解大營得旨嘉獎閏五月奏言烏什軍臺三處額設馬匹向係秋冬閒循例牧放見當軍報往來請每日每匹支給倉豆三升以資餵養俟軍務告竣仍照舊牧放從之旋以長齡等奏請赴喀什噶爾幫辦善後事宜七月授葉爾羌辦事大臣凱撤論功下部優敘八年正月奏言葉爾羌滿城地勢偏仄擬於舊城迤西罕那里克地方勘定城基並衙署倉庫兵房一體建造命侯欽差大臣那彥成經過時相度形勢定議尋那彥成奏請如恆敬議行又奏查出續墾官荒田地照較輕之阿勒板科則量減升科每歲所增糧石足供防兵二千名口食至西北隅躡出荒地一百餘里地土肥饒引水尙

易可以試墾諭照所議辦理三月恆敬以隨征出力將弁兵丁覈實分別奏請鼓勵上如所請四月命來京五月恆敬與那彥成等奏言葉爾羌回戶前年被搶被害情形與阿克蘇相等請貸口糧以示撫卹上矐之十月因病奏請開缺允之並許其緩程來京九月病痊署正白旗漢軍副都統十年三月授正白旗漢軍副都統九月授西寧辦事大臣十二年卒

穆克登布

穆克登布滿洲正紅旗人姓鈕祜祿成都將軍成德子乾隆五十四年成德入覲高宗純皇帝詢之曾經從征金川卽授藍翎侍衛在大門上行走五十六年出師巴勒布擢三等侍衛五十九年補副護軍參領六月授直隸提標右營遊擊嘉慶元年隨征湖北邪匪於翟家灣張家壩諸處接仗有功賞戴花翎二年擢山東曹州營參將三年四川總督勒保以剿賊奮勇奏加副將銜四年正月隨都統惠齡攻克麻壩寨生擒逆首冉文儔恩加總兵銜尋補清江協副將三月賜濟特庫勒特依巴圖魯名號十月授山西太原鎮總兵五年五月督兵赴陝剿辦伍金柱股匪在手扳崖等處直前攻撲殲賊甚多六月兜賊匪至銅錢窖殲一千餘名生擒

五百餘名逆首龐洪勝殲焉又於洋縣之茅坪剿斃逆首楊開甲七月攔截張添倫股匪於兩當之翦子巖追殺數十里多有斬獲八月在階州之佛堂寺截擊擒斬無算殲僞元帥曾印均有旨獎敘並賞扳指荷包有差六年正月冉學勝股匪將由陝之武關闖入豫境乘雪追剿並親率數騎直前衝擊賊衆潰竄二月於五郎江口截剿南山伍懷志股匪痛加殲洗命在乾清門行走六月賊首伍懷志在漢江北岸率其黨將由舊縣關東竄穆克登布先於黃官峪墮馬傷足仍徒步連夜督兵登山剿捕生擒首逆餘賊亦擒斬無遺旋以勞得病恩給雲騎尉世職七年三月調湖南永州鎮總兵八月擢甘肅提督十一月領兵追剿川省雲萬竄匪於青坪岡又於太平坎首先督兵搶上山頂擒斬多賊並生擒逆首劉景等有旨

在御前侍衛上行走加騎都尉世職仍賞扳指荷包有差八年二月分兵勇爲數路向巫山埡搜捕又親督弁兵取路巴峪關深入排搜逆首宋應伏就擒賊大震

懃三月赴太平通江剿賊以力竭歿於陣事聞恩給二等男世職予諡剛烈並命將伊父成德應賠巴勒布軍需銀三千八百餘兩全行豁免子頤齡襲二等男兼三等侍衛見在乾清門行走

葉世倬

葉世倬江蘇上元人乾隆三十九年舉人四十八年充四庫全書館謄錄五十年議敘知縣分發四川五十一年署長寧縣知縣五十三年以捕獲鄰省遠年越獄盜犯遷浙江嘉興府乍浦同知五十六年丁母憂五十九年服闋六十年正月選湖北德安府同知八月丁父憂嘉慶三年服闋四年選陝西西安府同知十二年遷興安府知府興安不習蠶織世倬教以樹桑畜蠶之法民利賴之名其帛曰葉公繭又擇律例中民易犯者九十餘條刊示各屬令長吏隨時講說府西萬春隄當漢水之衝爲舊城保障世倬屢加修築後值漢水漲發城賴以全興安鹽向聽民販負後定爲河東引地僉商行運貧民失業世倬請復其舊民便之二十二年擢福建延建邵道二十四年調臺灣道二十五年遷江西按察使道光元年二月遷山西布政使十二月署巡撫舊制山西丁銀地糧分款徵收以貧民艱於輸納節經奏准將丁銀歸入地糧攤徵者八十一州縣惟平定州孟縣等二十一州縣如舊是歲孟縣民人秦廷章籲請照改命前任巡撫成格覈辦未果行二年正月世倬疏言查丁徭久停編審從前丁少之戶今雖蕃衍賦額不加丁多之族今已

衰微追賠尙苦與其從傭工負販者按徵其丁何若於服田力穡者稍益其額請將平定州孟縣丁銀攤入地糧徵收其餘十九州縣俟次第查辦上允之旋擢福建巡撫閏三月御史董國華疏陳械鬪積弊命世倬嚴行查禁旋奏編查保甲卽可以禁械鬪前在陝西興安府任曾輯清查保甲說行之甚效一編戶冊在周知一夥之人凡親屬不同居者悉爲開載一設門牌在周知一戶之人凡同居者悉爲開載冊式宜詳取以備稽查也牌式宜簡取以備覈驗也又有編審之法聯十家爲一牌十牌爲一甲十甲爲一保逐戶編排不可紊亂每戶之鄉貫丁口鄰佑每口之田房生理親族皆可逐一查審爲刊布飭屬通行諭曰清查保甲爲除暴安良之法地方官果能實力奉行自可漸收成效著該撫嚴飭各州縣實力稽查不可日久生懈如有奉行不力之員卽據實嚴參毋得稍事姑息用副朕循名責實至意九月署閩浙總督十二月以糧道吳箎前任安徽太和縣知縣鹽引滯銷部議於見任內降二級調用旋經開復世倬未行出具考語送部引見並請嗣後凡係特簡道府前任內有公罪處分例干降調者部議入奏時聲明請旨並飭督撫密查如係賢員免其離任諭曰國家考課綦嚴豈容驟更成例朕澄敍官方升

降黜陟一秉大公並未豫設成見若如該撫所奏是特用人員於前任一切處分竟可置之不問甚至例干降調亦可以詢問平日居官了事則簡拔各員皆可倖逃吏議非特無以示懲勸並恐開奔競之門於吏治人心大有關係葉世倬率爲此奏變改舊例示天下以不公是誠何心想老悖不能承受國恩矣著傳旨嚴行申飭三年正月以年老休致九月卒七年護理陝西巡撫徐忻題請入祀陝西名宦祠十二年江蘇巡撫林則徐題請入祀鄉賢祠均允之子德豫直隸保定府同知

吳璫

吳璫浙江錢塘人父嗣爵吏部右侍郎璫乾隆四十三年進士改翰林院庶吉士四十四年丁父憂四十六年服闋四十九年散館授編修五十年大考一等擢侍講學士充日講起居注官五十三年充陝西鄉試正考官五十四年提督安徽學政召對後諭曰本日召見吳璫因伊係原任總河吳嗣爵之子詢及河務情形奏對甚爲諳悉人亦明白曉事以之補放河道可期得力吳璫著補授河南開歸陳許道五十六年遷按察使五十七年遷布政使五十九年八月巡撫穆和蘭赴懷

慶查辦賑務璫充鄉試監臨適黃錦灘河水暴漲出閘馳往防護上以其能知緩急獎賚之先是安徽太和縣逆匪劉之協緝拏未獲十一月河南竊案發訊有太和劉知協一犯關提赴豫行抵扶溝縣逸去璫請褫知縣劉清鼎職責令協緝並自請議處諭曰邪教一案通緝已將數月該縣豈未聞知卽云劉知協係因竊案關審但知字與之字音本相同有何分別此等劣員豈得止以革職協緝參奏完事吳璫著交部嚴加議處並罰養廉三年以爲玩誤地方者戒尋議革職上加恩改爲留任不予頂帶六十年署巡撫嘉慶元年八月官兵剿捕湖北教匪以璫轉餉安速復頂帶十月復以照料官兵經理得宜下部議敘十一月以漕運進行無滯復下部議敘二年三月逆匪齊王氏竄入河南境由汝寧舞陽焚掠而西偏省垣璫率官兵沿河防堵賊不得渡遂走內鄉入陝事聞賞大小荷包七月以協濟楚陝軍需及剿辦息縣匪徒籌備車馬均屬安速賞戴花翎旋丁母憂以軍興留任守制四年三月署河東河道總督六月請增河工料價歸入地糧攤徵諭曰河工需用物料價值例有正項開銷豈容輕議加增該督率以籌備幫價爲詞於地糧內按年攤徵銀十四五萬兩使豫省羣黎均受其害爲民上者豈忍出此且議

加之後不能復減竟永遠累及閭閻矣吳璥爲病官起見而不知病民實甚著交部嚴加議處尋議降調上加恩改爲留任十一月服闋實授旋請回籍葬親允之五年正月回任二月調江南河道總督十一月偕兩江總督費淳奏邵家壩工合龍疏入上深加獎許賞太子少保銜六年京察諭曰吳璥熟悉河工上年調任南河卽能將邵家壩漫口堵合著交部議敘七年二月奏改蕭碭南岸同知邳睢北岸通判爲要缺在外題補從之九月唐家灣民堰潰決興工堵築尙未合龍而璥以奏報安瀾下部議敘嗣稱霜降後河水復漲唐家灣急難堵合上以其遽報安瀾嚴飭之停其議敘十一月唐家灣工竣得旨嘉獎八年九月東河衡家樓漫口上念下游江南境內水勢消落來年重運北上必致阻滯命豫籌之十一月請挑通邳州宿遷汛內各閘再於宿遷桃源交界築束水草壩並挑挖淤淺使水有蓄蓄上嘉其深合機宜如所請行又言徐州一帶河水寬深並未消落係海口壅塞所致諭曰海口壅塞實屬全河大病若不疏通尾閘則河身淤壅水勢日見其高年復一年伊于胡底且海口不能暢行卽豫省剋日合龍河流暫復故道祇爲目前補苴之計而水無歸宿日久仍不免壅潰之患所關匪細著吳璥通盤相度設

法安籌十二月疏稱雲梯關兩灘之間下有暗灘橫阻灘內水深七八九尺而灘脊過水仍四五六尺尙非全被阻遏請將黃泥嘴兩灘相對之處挑挖引河導流迅注又吉家浦于家港倪家灘宋家尖等處挺出灘嘴一併挑挖得旨允行九年七月奏伏汛各工保護平穩並言察看洪湖異漲並未消落而仁智兩壩所過之水歸入高寶邵伯諸湖尙堪容納其下游之金灣六閘鳳凰壁虎等橋分洩歸江去路亦暢仁智兩壩暫緩堵築俾得分洩湖漲以保堰盱隄工一俟洪湖水落卽常酌看堵閉上是之時東河衡工初合龍九月清江浦河口淤淺回空糧船不能挽渡上以清水力弱由啟放仁智等壩所致要在蓄清濟運命刑部左侍郎姜晟協同籌辦十月偕晟奏請堵閉二壩及惠濟閘之鉗口壩使湖水全力東注刷通河口並啟放李工口門減掣黃水從之十二月諭曰朕聞吳璈近日多病本年清江浦河口淤淺漕船阻滯究因該河督辦理不善所致本有應得之咎今業據設法疏通幫船均已趲渡完竣是以加恩寬宥但河南一切宣防關係緊要恐其精神不能周到吳璈著來京另候簡用十年授兵部右侍郎尋調倉場侍郎十一年四月復授河東河道總督五月疏言北岸險工以秦家廠衡家樓爲最秦家廠地

居上游對岸爲廣武山所遏溜勢北趨秦家廠適當其衝又爲沁水入黃之處力
猛異常大汛時全賴一線長隄爲防守根本但沙土易於汕刷須用淤土包築堅
實又秦家廠後自沁隄尾至縷隄二堡皆北岸屏障應一律加培至衡家樓大壩
全河至此一束形勢極爲險要見將吃緊各埽工培築堅厚大壩後龍門深塘舊
埽幾至刷盡壩頂亦多塌卸又北首二壩埽工殘缺南首迤東八十丈向無埽工
俱應修補上以所言皆得要領如所請行九月以料物例價不敷請照南河按時
價報銷允之十二月復請將河工歲料幫價歸入地糧攤徵河南歲以三十萬兩
爲額通省攤徵山東歲以三萬五千兩爲額於兗沂曹濟四府州屬攤徵諭曰豫
省睢工幫價銀兩本年甫經徵完衡工幫價銀七百餘萬兩於明年始行啟徵今
再加以歲料幫價每年加徵銀三十萬兩山東兗沂等屬亦歲加徵銀三萬餘兩
是小民於常賦之外歲有攤徵永定爲額與加賦何異此非病民而何吳璈率行
奏請實屬謬誤著交部嚴加議處尋議降調上加恩改爲留任旋將未經奏明榮
澤等十四汛隄堰工需併入衡工善後各工題銷上切責之十二年以徵山湖蓄
水短絀請疏挑上游牛頭河從之十三年六月召回京擢刑部尙書十月充順天

武鄉試正考官賜紫禁城騎馬十一月江蘇金山寺僧赴京呈控民人王兆良等因爭墾沙洲糾衆戕斃僧人多命命偕戶部左侍郎托津往鞫之間擬如律先是南河雲梯關外陳家浦河水漫溢由射陽湖旁趨海口兩江總督鐵保江南河道總督戴均元以挑河費鉅徑由射陽湖入海較正河轉近議改河道至是命偕托津查勘旋勘明改道不便仍請修復故道接築雲梯關外大隄收束水勢得旨允行十二月復授江南河道總督十四年正月以籌議經費請酌增鹽價允之二月疏陳海口固須挑濬而大隄不能堅鞏則一經旁洩挑亦仍淤蓄清固屬至要而隄壩不能修復則一遇盛漲蓄亦必潰今開壩無減黃之路五壩無節宣之方均須亟爲救治上嘉其切中事機諭令盡心經理六月以前在倉場侍郎任內失察黑檔重領米石降三品頂帶革太子少保銜褫花翎仍革職留任七月賞二品頂帶九月因山陽縣境內狀元墩隄潰部議革任上宥之十一月以海口挑復正河費用浩繁兼恐次年桃汛前趕辦不及請仍就北潮河去路疏濬寬深權宜辦理允之旋以回空糧船阻凍降旨切責十二月請築碎石坦坡以衛高堰大隄詔如所請十五年二月偕兩江總督松筠復請修復正河諭曰海口修復正河誠爲正

辦但經理大事必須中有定見豈漫無把握動輒游移前吳璈差往南河時曾方
主挑復正河迨上年冬閒忽以工重費繁時日緊迫不能趕辦請先將北潮河入
海之路權宜辦理伊旣籌度情形力主此說因亦降旨允行今松筠到彼後一經
查勘會議仍請改挑正河並稱前估各工尙可刪繁就簡吳璈於上年十一月奏
到時已稱趕辦不及今又遲兩三月何以又可趕辦前後所奏自相矛盾似此工
用不繁又可迅速集事自應卽照所奏辦理惟是全河大局出海最關緊要吳璈
久練河工非松筠初到可比此次旣親勘會商奏聞辦理自係吳璈斟酌再四確
有把握將來總不得以此事係松筠主見爲推諉地步惟當認真督辦用收一勞
永逸之效旋以山陽縣平橋汛東岸隄工漫溢下部嚴議尋議革任上復宥之五
月請修復惠濟正閘王營減壩並於大汛期內趨辦堵禦黃壩允之七月以全漕
度黃復予太子少保銜賞還花翎八月因病乞假諭曰吳璈曉練河工年來經理
修防不辭勞瘁但見在病體委頓卽勉強視事亦於要工無裨著加恩開缺調理
並令伊自行酌量或就近回籍或來京養疴病痊之後以六部尙書補用十六年
二月命戶部尙書托津順天府府尹初彭齡查覈南河工程以璈任內失察屬員

草率誤工又挑挖淮北鹽河未經奏明且所辦工段已多淤墊疏劾之命分賠鹽河工銀復下部嚴議尋議降調諭曰吳璥在任年分最久因循貽誤又有挑挖鹽河應奏不奏一案伊見已衰病豈復能勝尙書之任著照部議降四級調用仍於補官日降三級留任七月命赴南河襄辦王營減壩暨李家樓漫工十七年三月減壩暨李家樓工合龍四月回京十一月補光祿寺卿十八年四月擢內閣學士兼禮部侍郎銜九月遷吏部右侍郎時河南睢州二堡河溢十二月命赴南河查勘湖河情形十九年正月奏江南邳宿運河賴微山湖爲水櫃近年上游泉渠積沙淤塞山水無路歸湖宜亟行疏濬允之尋授河東河道總督二月請於清口一帶估挑引河拆展各壩並於迎水壩外王營減壩毛家嘴等處擇要抽挑及加挑仁義兩壩引河各工皆允之五月命赴河南防汛並督辦睢工二十年正月擢兵部尙書仍留睢工二月合龍下部議敘命籌辦善後事宜十月回京復賜紫禁城騎馬十一月因病賞假遣御醫診視十二月病痊二十一年正月京察屆期下部議敘二月璥七十生辰命內閣學士福勒洪阿齎珍幣卽其第賜之七月命赴東河勘工協防秋汛九月回京二十二年三月調刑部尙書六月命赴東河查勘睢

工新鑲埽壩及山東運河尋署河南巡撫八月回京十一月江南河道總督黎世序請將蕭南廳民堰改爲官隄命往勘視並查清江浦禦黃束清壩工十二月奏民堰無庸議改束清壩外宜添築二壩以資收蓄均從之二十三年正月回京二月充經筵講官六月河南武陟縣沁河溢命署河南巡撫堵築漫口八月合龍下部議敘十月回京二十四年閏四月以病乞解任允之六月病痊署吏部尙書八月河南蘭陽儀封汛內河溢武陟馬營壩繼決命會同巡撫琦善堵築十月以購料遲延褫花翎尋請開投效事例允之十一月以籌備料物充足復花翎二十五年正月請酌增土方稽料例價攤徵歸款從之二月補吏部尙書協辦大學士三月馬營壩大工合龍得旨嘉獎復加太子少保銜尋南岸儀封三堡漫口革太子少保銜命署河東河道總督復以漫水下注洪湖命赴江南查勘五月請拆展束清禦黃各壩並啟放吳城七堡及桃源高家灣洩水溝得旨允行六月回京八月命赴河南堵築儀封漫口九月罷吏部尙書任以協辦大學士督工十月合龍下部優敘道光元年正月回京二月以病乞休諭曰協辦大學士吳璣供職多年從前兩河興舉大工疊蒙皇考仁宗睿皇帝派往督辦上年冬月堵築儀封漫口剋

期歲事因感受風寒回京後喘嗽增劇懇請解職節經賞假調攝茲復奏血氣兩虧精神委頓不敢遷延曠職伊已年逾七旬著加恩准其開缺安心調理八月回籍二年正月京察諭曰國家考績鉅典所以黜陟賢否朕釐工熙績一秉大公昨因吏部侍郎那彥寶屢辦河工聲名平常業經特旨降黜因思吳璥當時同往工次列名在前其不知潔己報效聲名亦與那彥寶相等事屬已往姑勿深究若竟以其致仕家居置之不議伊轉得濫邀章服之榮是與那彥寶同罪異罰不足以昭示廷臣協符輿論吳璥著卽革去翎頂以示朕甄覈持平至意十月卒子元凱二品廕生原任光祿寺署正捐升員外郎公亮捐納道員公謹一品廕生引見命以通判用見官山東平度州知州公弼陝西候補知縣孫若準道光二十一年進士見官掌江南道監察御史

曹師曾

曹師曾江西新建人父秀先禮部尙書自有傳師曾由貢生捐納郎中分兵部乾隆四十九年補官旋丁母憂服闋補原官嘉慶三年升鴻臚寺少卿歷升通政使司參議內閣侍讀學士太常寺少卿大理寺少卿太僕寺卿太常寺卿大理寺卿

十三年奏據直隸督臣咨送臣衙門揭帖稱竊犯趙廣在大興縣采育地方竊銀十四封由不識地方坍塌邊牆出口至建昌縣經差役盤獲員弁無從覺察應免置議臣伏查古北口設立關隘所以嚴稽查慎出入也卽有坍塌之處亦應派兵役巡查乃任匪徒攜贓偷越遽以無從覺察率請免議殊非慎重邊防之道請飭交該督詳查得旨該管官不時嚴密巡查毋任疏懈其趙廣一犯是否由關口混出亦著溫承惠查明具奏十五年升都察院左副都御史奏言每科鄉會試正副考官及同考官御史竟有不到午門祇候在家得信徑往貢院者殊非慎重敬事之道請添派御史稽查命如所請十六年奏言各衙門覈辦事件以例案爲憑近日往往將例文疑似之條緣飾辦案與例意迥不相符一經辦理之後遂致互相踵述轉以爲見行之例反置定例於不言以致混淆舛錯百弊叢生又有舊例已改而陳案未經查銷牽連援照更增歧誤諭曰部院衙門爲政事總匯之區慎守紀綱必以定例爲憑吏胥高下其手堂司意見參差總由於舍例言案蓋例有一定案多歧出也該副都御史所奏係爲釐除弊混起見著照所請交部院各堂官各率所屬將見行定例詳加查覈如有例所未備而案應遵照者卽檢明彙齊纂

入則例其案與例不符者造冊註明事由將原稟卽行銷毀若有例案不符而稟件仍有關查覈者著另冊登記鈐印貯庫辦彙時不得再行援引該堂官等務督飭司員加意清釐同矢公慎以杜弊源而歸畫一十七年奏請慎選賢能以重京察諭曰京察爲考績鉅典舉劾悉稟公正方足澄清仕路各堂官於保舉一等人員務當加意甄別擇才守兼優之員登諸薦牘不得以尋常供職者濫保充數用副朕慎簡賢良之至意十九年升內閣學士兼禮部侍郎銜二十一年遷兵部右侍郎兼署倉場侍郎二十二年署刑部左侍郎二十三年奏家置祠學義田懇官爲查覈上允所請二十四年轉左侍郎二十五年三月以兵部遺失行在印信命摘去頂帶交部嚴加議處部議革職得旨曹師曾著加恩以四品京堂補用十二月補太常寺少卿道光二年授通政司副使四月升太常寺卿十二月以呈進告祭奉先殿儀注并未詳稽舊例又不聲明請旨妄將元年告祭作爲比照輕率錯謬降四品頂帶罰俸二年仍留原衙門之任三年正月祈穀禮成上嘉其禮儀祇恪賞還頂帶七月奏請回籍修墓十二年卒子開業鹽運司運同

楊懋恬

楊懋恬江西清江人祖錫紱官兵部尙書自有傳懋恬乾隆五十四年拔貢五十五年朝考二等以七品小京官用籤分工部嘉慶元年留部作爲候補主事四年隨欽差大臣尙書那彥成赴陝西剿辦教匪五年回京充軍機章京六年以陝省軍營生擒首逆在事有功議敘卽補主事七年二月補官六月軍機處奏請議敘命以本部應升之缺卽行升用十二月三省大功告蕝下部議敘八年升員外郎九年二月京察一等四月遷郎中十年三月記名以御史用十月授安徽寧池太廣兵備道十八年升江蘇按察使十九年八月調山西按察使九月遷陝西布政使二十年調甘肅布政使以病陳請開缺回籍調理至二十三年病痊授江蘇布政使二十四年署漕運總督道光元年授湖北巡撫二年八月以湖北江陵縣倉廩朽壞奏請修理並採買倉穀以資收儲下部議行十一月緝獲均州逸犯向志恆治罪如律先是志恆爲圖財謀產妄指教匪仇殺左明倫等十八名遠颺二十餘年懋恬抵任後飭各屬嚴行保甲於興山鄖縣界獲之奏入下部議敘十二月奏漢陽天門漢川三縣淤田水積涸出之後正課錢漕民力尙可輸將惟花利一項戶經數易勢難代完請予豁免從之三年正月奏言襄陽老龍隄爲全郡保障

上年秋汛被水各段俱屬險要業經勘明加高培厚用資保衛天門京山等縣因襄水泛漲隄陔缺口其天門縣之護城隄向係民間自築見因被水力難修復應請借項興修以固隄防如所請行六月御史俞恆澤以荊州府枝江縣羊角洲地方西連巫峽東接江陵並通當陽襄鄖各處縣治太遠匪人出沒沿江盜劫船隻習以爲常請於阨要之區增置一汛或請酌量移設上命懋恬會同湖廣總督李鴻賓確察情形據實具奏尋議將宜昌鎮標前營千總一員移駐羊角洲撥兵三十五名並以枝江縣典史所管之董市鎮與江口相連去羊角洲地方未遠典史管理監獄勢難兼顧將董市撥歸江口巡檢管轄以專責成四年三月奏言新設白河口撫民同知一切勸建事宜諸多窒礙請卽改爲鄖陽府分防捕盜同知責令專司房縣竹山竹谿三縣緝捕不獨呼應較靈實於綏戢地方有益白河廳豐徑巡檢移駐常樂河作爲鍾祥豐樂縣河巡檢並裁白河廳照磨移駐張家集作爲穀城縣張家集巡檢以重巡防而專責守均得旨允行初湖北江面派委武弁帶兵巡緝試行二年頗有成效五年正月奏請議定章程永遠遵行因於兩標千把外委內揀弁帶兵在所管段內梭織巡邏其長江漢江兩處自十一月至次年

正月商船往來較多復添派都司守備督查期臻周密得旨依議妥辦不可日久視爲具文六年二月署湖廣總督三月以勘明湖南軍船潰淹未涸屯田坐落湖北沔陽州境請按股分別停運湖北安陸荊門等營坐落地方上年迭被水旱又衛昌營不通水路商販較稀見當青黃不接之時糧價昂貴兵食艱難請酌借各州縣倉穀接濟俾得盡力操防允之五月襄陽府屬節次添設義學八十餘處奏請分別獎勵九月復命署漕運總督十一月奏江南各幫旗丁應領行月等米向於豐稔之歲收買運通俾旗丁另購次米以濟口食本年江淮徐揚海州通州等處及安徽太平廬鳳各屬均被偏災糧價較昂請緩收買以卹丁力下部議行是月卒子熙簡二品廕生候選主事

徐忻

徐忻順天大興人乾隆五十七年舉人六十年乙卯科會試上命大臣覆校落卷得文理優者三卷忻與焉特賞內閣中書九月補官嘉慶三年丁母憂六年服闋補原官充軍機章京十一月丁父憂九年服闋補原官仍在軍機處行走十二月升內閣侍讀十一年奉旨記名以御史用十二年三月京察一等七月扈蹕灤陽

校射中三矢賞戴花翎十四年正月京察一等人員復帶領引見奉旨記名以道府用二月補福建道監察御史三月授江南河庫道八月署江寧布政使十六年王營漫口合龍圻在事出力奉旨交部優敘十七年因委查蕩柴情弊草率結案部議降三級調用上加恩改爲降四級留任十八年保薦卓異十九年正月署江寧布政使先是直隸教匪煽亂延及豫東擾滑城上從兩江總督百齡請命駐江南邊境籌辦防堵事宜事平敘功賞按察使銜二月授江西按察使四月調湖南按察使二十一年升陝西布政使二十二年正月護理陝西巡撫時有傳習邪教男婦具結首悔圻奏請免罪釋放諭曰此等入教莠民平日甘心邪慝迨被獲畏罪藉口改悔冀圖一時苟免釋放後仍將故智復萌該護撫槩予釋放殊覺漫無區別徐圻著傳旨申飭除自首之王瑞朋等免罪釋放外其拏獲之魏景昌楊德才等仍照所犯之罪分別問擬不准寬免二十五年調山東布政使道光元年正月上以東省倉庫錢糧三次清查仍有名無實命將歷次清查之案覆加詳覈四月署山東巡撫六月調福建布政使先是長山縣監生王鳳廷京控縣書多徵浮折上命圻偕山東布政使琦善會鞫得實長山縣令劉宗錫褫職遣戍論王鳳廷

等如律二年上聞斫養尊處優不理公事諭福建巡撫葉世倬訪察密奏九月召還京三年以三四品京堂候補授內閣侍讀學士六年四月授陝西布政使七月護理陝西巡撫時逆回張格爾滋事上命大學士長齡爲揚威將軍及提督楊遇春參贊大臣武隆阿統領大兵赴剿陝省撥解餉銀調派兵弁及照料過境弁兵諸事斫專司之八年正月諭曰徐斫自上年回疆用兵以來應付兵差一切妥速督辦年餘始終其事著加恩交部從優議敘二月因略陽縣城被水衝塌奏請在迤東文家坪移建新城並建文武員弁衙署倉廩監獄兵房等項籌款興修允之五月上以軍營俘解逆酋來京自阿克蘇各城大臣及陝甘河南直隸各督撫沿途委員護送一切妥協宜量予加恩斫得下部優敘八月授山西巡撫九年四月奏晉商行銷豫省引鹽請照舊設章程辦理得旨允行五月奏文浴河由文水縣西北發源故道久湮若議疏挑徒勞虛費惟有順水之性暢水之流或截灘偪溜以杜其旁溢或督率疏濬以納其來源其各村所築護村隄堰不得攔河築堰以杜爭端而資捍衛上如所議六月平定州民婦朱萬氏京控連斃三命放出正兇兩次具呈巡撫不爲申理上命侍郎史致儼鍾昌往按奏入奉旨徐斫著降二級

留任十年四月奏請常平倉穀出陳易新並暫緩採買而濟民食上從之九月調署陝西巡撫十月御史葛天柱奏參徐烝貪劣各款上命尙書松筠侍郎保昌往按解烝任赴山西聽候傳訊十一月松筠等鞫實人奏諭曰解任山西巡撫徐烝前經御史葛天柱奏參各款茲據松筠等奏該御史所參查閱營伍家丁勒索及題升調補委署各缺任意營私等款查明均無其事其門丁顧鴻如之服役人劉泳成已將屍棺開驗復詳訊供情實係因瘋自戕並無謀斃情弊惟徐烝當時不派臬司相驗訊辦又不專摺奏明致滋物議殊屬錯謬其秋審過堂時徐烝家屬在堂後隔簾看視管教不嚴亦咎無可辭徐烝著交部嚴加議處卽來京聽候部議尋議降六級調用復奉諭曰前因御史葛天柱奏參徐烝各款內有絳州直隸州知州呂士淳在省逗遛營謀情弊當交松筠等查訊茲據奏稱嚴訊該員實因奉調在省尙非無故逗遛並無營謀劣跡呂士淳著令回任徐烝前於劉泳成因瘋自戕一案未經奏明及管教不嚴咎有應得姑念其於呂士淳被參營謀該撫重款訊明並無其事已另降諭旨將徐烝加恩降補湖南按察使著免其降六級調用十一年正月召還京以四五品京堂候補十月以西安府同知衙門效力把

總投充錯誤圻會歷任陝西撫藩有失覺察部議降調上加恩改爲降四級留任十二年七月授太常寺少卿閏九月以前在湖南按察使任內失察逆獠趙金隴滋事降二級留任十三年督辦順天府清河賑務十一月署光祿寺卿十二月補光祿寺卿十四年四月因病奏請開缺奉旨允准尋卒子祖培兵部郎中承採二品廕生光祿寺署正捐升員外郎堦候選批驗所大使

程含章

程含章先世改姓羅雲南景東廳人乾隆五十七年舉人嘉慶六年大挑一等分發廣東署封川縣知縣時有竊賊臨時行強案久未獲含章抵任未能據實揭報迴護前官朦混具詳經總督吉慶奏參革職九年投效海疆十年廣東之南澳澄海一帶與閩洋毗連時有閩匪出沒勾結土盜含章出洋巡緝獲盜渠賴簡明等十一名救出難民許阿啜等七名巡撫孫玉庭奏請鼓勵得旨賞還知縣原銜十一年帶領紅單船隻隨提督師船巡緝至佛堂門洋面有被擄民人歐添爵等殺傷賊目赴船投首並縛送匪黨多名鞠實問擬如律十二年巨盜梁亞金等據陽江縣屬馬尾洋而含章率領兵役奮勇衝擊偪匪船陷巨浪中殲其渠擒獲無算

敘功居最送部引見奉旨發往廣東以知州用十三年署東莞縣知縣十四年署雷州府同知時洋盜烏石大等糾衆滋擾含章團練鄉勇出洋追躡疊有斬獲十五年以海洋一律肅清論功得旨補缺後以應升之缺升用十六年署連州直隸州知州尋補化州知州十七年陸路清遠從化一帶著名洋匪悉數成擒下部議敘十八年升南雄直隸州知州十九年因署連州任內失察連山縣知縣徐鴻飛虧短倉穀限滿未完部議革職尋以鴻飛虧項完繳開復原官二十二年勘丈南雄州屬地畝未兩年一律完竣經總督蔣攸銛保奏送部引見諭曰南雄直隸州羅含章於兩年限內查丈未清地畝全行勘明開墾荒田清釐積欠洵屬實心任事著准其送部引見二十三年十月引見發往廣東以知府用仍交軍機處記名十一月補惠州府知府二十五年七月調廣州府十一月擢山東兗沂曹濟道道光元年升山東按察使二年正月升河南布政使三月偕河東河道總督嚴烜會議馬營壩拋護碎石章程得旨馬營工挑壩一道藉以攔沁歸黃向用柴工未能持久著照所議閒段估拋碎石該署督等總當籌畫周妥爲一勞永逸之計閏三月查看河工情形籌議入奏略言欲治河南必以治河爲先務正本清源之道總

在河員大法小廉減一分浮費便添一分工程實心修築加意隄防果能料實工堅自能久安長治諭曰羅含章既於工程料物及工員才能尙可勉力察覈著於三汛後屆期前往河道協同嚴烺相機籌畫實心稽查務當同心共濟俾河務益臻完善五月以沁河南北兩岸及攔黃埝工程危險請於司庫河工扣出銀六萬餘兩內支用五萬七千兩趕緊興修以資保衛經河南巡撫姚祖同奏入允之六月升廣東巡撫陸見日自陳九世祖程文俊搜拏野賊懼禍改姓爲羅至今未復請仍歸姓程允之十一月拏獲疊劫賊犯胡亞賴等十九人置之法十二月調山東巡撫三年三月調江西巡撫以山東濟河禹城高唐等州縣被水歉收奏請減價出糶倉穀又以二里壩石隄年久淤塞請借支司庫節省項下興修均下部議行七月奏道經江西德化縣地方江水漲發田廬被淹請賑卹又奏九江南昌等府分設粥廠建設育嬰堂籌修白鹿洞書院增添膏火請將鹽商呈繳公費支放得旨所辦皆是依議速行十一月奏拏獲三點會匪賴贊章等遣戍如律四年正月奏請借項修築德化等處被水圩隄以衛農田從之又奏買米賑濟僅補救於臨時買穀貯倉可豫備於先事請於省城設立義倉遇有應行平糶等事酌量動

用以期經久諭令妥爲經理不可有名無實二月召來京署工部左侍郎辦理直隸水利事務尋奏言博稽直隸治水舊案自國朝雍正年間頻次大水欽差怡賢親王與大學士朱軾治之歷五年而竣事乾隆四年復大水直隸總督孫嘉淦治之歷兩年而竣事乾隆九年又復大水欽差尙書劉於義會同督臣高斌治之歷四年而竣事乾隆十六年直隸總督方觀承大修天津尾閘一次二十六七年又復大水方觀承治之歷三年而竣事以上四次共用銀數百萬兩自此水道通利者數十年迨嘉慶六年後漸次淤積道光二三年大雨滂沱被水州縣多至一百餘處則疏通河淀誠目下至急至要之圖矣蓋治水如治病治病者必先明受病之源流急則治其標緩則治其本循古人經驗之良方參今時變遷之證候然後病可得而治也以通省大勢觀之天津爲衆水出海之路若塌河淀若賈家沽若陳家溝若三岔河若興濟若捷地若筐兒港若王家務各減河皆所以洩水入海猶人之有尾閘也東淀迴環數百里全省之水停蓄於此若楊家河若揚芬港若臺頭若三角若勝芳若辛張河若三汊皆淀中之河道猶人之有腹囊也大清子牙永定南運北運五大川乃衆水之大宗也流貫淀中猶人之有腸臟也西淀容

納順天河閒二十餘河之水南北二泊容納正定順德廣平三十餘河之水猶人之有胃脘也而其下傳送之區若馬道若清河門若張青口若玉帶若會同若中亭若盧僧等河猶人之有胸膈也其上若十字若豬龍若殷家口若三岔口若新河若新豐河吐納各支河水之流注也淀泊猶人之有咽喉也各屬之支港溝渠導引積水入河猶人之有血脈也今則消洩之尾閘無不阻塞停蓄之腹囊無不淺隘流貫之腸臟無不壅滯收納之胃脘無不平淺傳送之胸膈無不淤積吐納之咽喉無不填闕流通之血脈無不凝滯加以各河淀之大小隄埝閘壩橋梁無不殘缺每遇霖潦大至有不泛濫淫溢者乎此直隸水道受病之部位情形也伏思自有直隸以來卽有此河渠淀泊前乎此者不聞頻患水災自康熙三十九年以後常苦水澇則永定子牙二濁河築隄之所致也昔孫家淦有言永定子牙河向皆無隄泥得流行田閒而水不淤淀自永定築隄束水而勝芳三角等淀皆淤自子牙築隄束水而臺頭等淀亦淤淀口旣淤河身日高則田水入河之路阻於是淀病而全局皆病卽永定一河亦自不勝其病總因濁水入淀溜散泥沈之故此又直隸水道致病之根源也伏查永定河自築隄以來於今百有餘年河身高

出平地丈有餘尺既不能挑之使平又不能廢隄不用雖明知病根仍在而無法可治亦惟見病治病多開閘壩以分其勢高築隄埝以禦其衝使不致潰決爲害而已至通省大局工段繁多自不能同時並舉惟有用治標之法先將各河淀之尾閘胸膈咽喉一律挑挖寬深挑出之土用以築隄使窪水得以暢然下注然後廓清腹臟通利腸胃俟大端就理然後用治本之法調理血脈將各州縣之支港溝渠逐一疏通俾民間灌溉有資旱潦有備三五年後元氣漸復此又見在辦理之先後次第也惟此番工程之大十倍於乾隆年間與其緩辦而費多不若速辦而費少與其零辦而費重不若全辦而費輕此案工費斷非一二百萬所能完事請寬給經費俾不致辦理掣肘上嘉納之七月補工部左侍郎閔七月奏修天津閘座隄埝各工九月奏修千里長隄以資淀水南趨均如所請行十月請修河道橋壩擇要興工略言治水在一導字欲治上游先治下游欲治旁流先治中流挑賈家口以洩永定子牙北運大清四河之水挑西隄頭引河以洩塌水淀之水挑邢家坨以洩七里海之水另開北岸一河以分層口之勢修復減河以洩白榆之源挑濬三河頭一帶並添建草壩爲東淀之扼要挑濬馬道河趙北口一帶爲西

淀之扼要十二連橋橫亙淀中亟應興修以利往來並修復增河以分白溝上游之勢修復窰河以分白溝下游之勢則水得就下之勢而支派旁流乃可次第導引矣上從之十二月授倉場侍郎五年三月因太平倉失火下部議處旋授浙江巡撫時德清縣民婦徐倪氏謀斃徐蔡氏捏稱自縊一案懸宕三年之久未能平反臬司王維詢檢訊甫得端倪以巡撫黃鳴傑意見不合辦理掣肘旋復自縊經閩浙總督趙慎畛御史郎葆辰先後劾奏命含章督同臬司祁墳按治之含章請偕督臣趙慎畛會鞫上以意圖卸責嚴飭之尋鞫實定讞坐徐倪氏謀殺律論死黃鳴傑下部議處原審原驗各員褫職鐫級有差嗣以徐倪氏畏罪自縊含章入奏諭曰程含章於此等要犯卽應豫飭該管官小心看守不應如此疎忽著傳旨申飭務將全案犯證速行訊結如再有疎虞恐不能當此重咎也五月御史錢儀吉奏劾浙江糧船水手恃衆行兇營汛府縣長蕙觀望御史王世祚陳奏糧船水手設教斂錢請飭查禁各一摺命含章嚴行查辦旋訊明習教滋事各情請嚴水手犯事之條重運官約束之責上深是之七月議奏水手兇鬪殘殺多命罪依械鬪律糾衆欺凌連弁橫索旗丁罪依惡棍詐財律下部議行八月奏海鹽縣未修

石塘請擇要分年辦理十二月奏請修復錢塘縣境袁家浦東江閘座均從之又奏監生徐晉錄舊中式自行檢舉請註銷舉人仍留監生原名應試上以不符定制下部議奪俸六年正月奏浙江鹽務溢銷多引庫貯寬裕得旨嘉獎二月以衰病辭職諭曰該撫年踰六旬精力並未稍衰著毋庸開缺卽在署好爲調養俟病全愈卽當奏聞以慰廬注五月奏浙洋劫案盜犯無獲劾黃巖鎮總兵羅光炤巡防廢弛請嚴議並捕務疎懈之遊擊張君昌等奪職撤任有差八月以義烏縣歉收請緩徵十一月調山東巡撫十二月奏棍徒徐鳳山聚衆鬧漕拒傷官兵已將要犯全數捕獲諭曰浙江仁和縣等處民情刁悍敢於開倉收漕時不遵示期蜂擁入倉拆毀棚廠搥毆書吏拒傷官弁兵丁實屬目無法紀非地方官日久因循何至有積慣鬧漕玩區名目此等匪徒豈不畏法若不從嚴懲辦何以警刁風而肅漕政著新任巡撫劉彬士親提嚴訊從重定擬具奏七年閏五月列款劾奏浙江巡撫劉彬士聲名平常批駁商綱各情上命閩浙總督孫爾準密查具奏尋查劉彬士莅任數月盡心庶務操守謹飭惟批駁商人一節應於認真之中寓休養體恤之道疏入諭曰朕行政用人一秉大公至正督撫大吏如果實有箝籐不飭

聲名狼籍者大小臣工原許風聞入奏朕從不肯顛預了事必將貪黷之員立即斥革然必須劣蹟昭著確有憑據豈容以捕風捉影之詞妄行參揭程含章率聽不根之言無端入告伊視朕爲何如主輒敢以此等伎倆巧爲嘗試耶程含章陳奏不實之咎實無可辭著交部嚴加議處卽來京聽候部議六月劉彬士劾含章提用商綱銀兩額外溢支並漏追餘價等情含章回奏各執一詞上命兩江總督琦善偕浙江學政朱士彥按之奏入諭曰程含章查無額外溢支及漏追餘價情節其回奏存留商綱一千餘兩聲紋舛錯且出貲捐辦各項於該商寬裕時照數提還實屬見小至甄別副將鄧宏泰參將吳賜及委令徐慶超李鶴松遞相接署具奏後始行知照提督亦與體制未協均應交部議處惟伊從前列款奏參劉彬士率聽不根之言妄行入告爲先發制人之舉其咎尤重經吏部議以革職本應照議罷斥姑念其平日居官尙好程含章著加恩以員外郎用以觀後效八年二月選刑部員外郎九月升福建布政使九年因病陳請開缺十年以福建藩司任內辦理五百兩以上工程未經照例詳奏又未將司庫盈餘申詳部議補官日降二級留任罰俸六箇月十二年卒子承休福建上洋通判孫洪源江西候補通判

戴三錫

戴三錫順天大興人原籍江南丹徒乾隆五十八年進士以知縣用籤分雲南親老告近改掣山西五十九年補臨縣知縣嘉慶三年二月因病回籍十一月丁父憂四年丁母憂六年服闋命發往四川以知縣用八年補南充縣十年升馬邊廳通判十四年調峽邊廳撫夷通判留省清釐積案歷署資眉邛各直隸州知州二十一年復署邛州州民黃子賢以治病爲名倡立鴻鈞教名目三錫捕獲之事聞上以三錫於稽查保甲之時能將邪言惑衆匪徒立時訪獲究辦尙屬能事命送部引見再降恩旨三錫先於十九年題准升署茂州直隸州知州至是併案引見實授茂州二十三年升寧遠府知府道光元年升建昌道尋擢按察使二年升江寧布政使旋以迴避本籍調四川布政使三年命以二品頂帶署四川總督五年正月實授四川總督七月署成都將軍六年正月奏整頓通省書院並添設義學諭曰國家化民成俗興學爲先經降旨令各省認真整頓書院務收實效至義學之設鄉曲愚民咸得令子弟從師教讀觀感奮興於風化大有關係據該督奏川省書院嚴飭地方官盡心督課膏火不敷者設法籌備添給並各府廳州縣按

鄉集城市陸續新添義學三千餘處洵堪嘉尚二月奏四川舊有民捐義田收租積儲以備賑恤如積穀過多即將穀變價添買良田歷年既久增置愈多若不量爲變通則通省膏腴將變爲公產於民食殊有關礙如將歲收之穀添置倉廩聽其增積則陳陳相因不特霉變堪虞亦難保無虧那之弊擬分別等差自三千石起至萬石止作爲定額除定額外即將最陳之穀於次年二三月青黃不接之時照市價酌量糶賣價銀解司存庫以備歉歲賑恤之用得旨允行七年新都奸民楊守一倡立邪教妄造妖書三錫派員擒獲立正典刑上嘉之六月奏蜀中田畝惟成都近地俱平疇沃野其餘則空谷巉巖多磽瘠之區每遇山水衝塞卽膏腴亦轉爲砂石惟有因地制宜多設渠堰旣資捍衛宣洩之功並收瀦蓄沈浸之利命依議行時越嚮生番劫奪商旅掠漢民婦女三錫捕狙黠者數十人置之法出被掠男婦資給安撫七月三錫七十生辰頒賞御書數猷篤慶扁額福壽字各一方並壽佛如意各物八年六月奏拏獲粵西會匪劉子耀等上嘉其不分畛域急公緝匪十月兼署成都將軍九年四月召來京八月署工部左侍郎十年閏四月諭曰戴三錫前在四川總督任內官聲尙好因其年逾七旬恐精神未周特召來

京另候簡用近見其年力就衰著以原品休致七月卒諭曰前署工部左侍郎戴三錫由進士歷任四川州縣經朕擢授四川總督嗣因年力就衰特召來京署理工部侍郎旋以原品休致俾得安心頤養用示體恤茲聞溘逝殊堪軫惜念其前在四川宣力有年辦理公務妥協官聲尙好著加恩賞加尙書銜照尙書例賜卹所有任內一切處分悉予開復應得卹典該衙門察例具奏尋賜祭葬子於義吏部郎中

阿霖

阿霖富察氏滿洲正紅旗人乾隆五十一年由繙譯生員考補內閣中書五十二年授四川順慶府通判五十七年升湖北興國州知州嘉慶元年湖北邪匪滋事檄赴荊州軍營隨巡撫惠齡剿平涼山覃正潮股匪敘功命以應升之缺升用二年偕侍衛江鼎塔什蘭等截剿竄匪於槐樹岡等處轉戰數十里殺賊二千餘人捷聞賞戴花翎四年遷黃州府同知尋丁父憂湖廣總督倭什布奏請留軍營差遣允之六年三月湖北提督長齡宜昌鎮總兵明亮擊賊於尹家坪水月寺俱大破之獲被擄難民李子彬等多名阿霖資以路費令各回原籍復業其無歸者亦

俱安插得所七月升鄖陽府知府七年五月湖廣總督吳熊光委阿霖齎餉銀赴參贊大臣德楞泰軍營卽留營辦理糧餉八月德楞泰剿辦冉添元黨蒲添寶於竹谿阿霖以催趲糧餉出力下部議敘九月丁父憂仍留軍營八年大功告竣詔給假百日回旗穿孝假滿仍署鄖陽府知府九年服闋實授十四年二月調武昌府先是軍興時興山縣守卡鄉勇李翠玉等謀殺良民多命誣指爲賊獄久不具至是湖廣總督汪志伊委阿霖訊辦六月坐審報不實部議革職十六年十月捐復原官十一月山東巡撫同興奏將阿霖發往山東委辦案件諭曰阿霖原係湖北知府與山東素不相習見在東省並無緊要事件若以審理詞訟爲名則何省不可藉口自係阿霖因銓選需時干求同興懇恩奏請豫爲得缺地步此端一開凡在部候選人員皆可夤緣親舊揀發省分大啟奔競之門於銓政殊有窒礙同興所奏不准行十八年揀發直隸十九年補保定府知府二十年以承審灤州石佛口王姓傳教惑衆案得實賞還花翎二十一年升熱河道初阿霖任保定府時滄州僧證法謀殺僧恆通及其母秦趙氏事覺知州趙希曾捕證法鞠治證法誣引胡四加功希曾遂坐胡四絞候獄上阿霖未及覆讞卽據原擬轉詳二十三年

四月直隸候補知縣顧玉書以前委審時曾廉得胡四誣枉狀保定府知府沈華旭寢其事不辦遣人赴京具控上命尙書和瑛侍郎穆彰阿往訊得實阿霖降三級調用八月直隸總督方受疇爲阿霖奏請捐復原官諭曰阿霖前在軍營出力曾賞戴花翎見以審案錯誤部議降調念其事屬因公尙可加恩錄用不必捐復著賞給知府留於直隸補用仍准戴花翎道光元年三月復授熱河道尋擢直隸按察使十月遷浙江布政使二年五月升江西巡撫九月以豐城縣所屬沿江雪公腦等處隄埽屢被江水衝刷奏請分別改建修復以資捍衛得旨允行三年四月偕漕運總督魏元煜奏言江西幫船水次兌米百數十年來議拈議派並無一定章程嘉慶十一年請援蘇松等幫三年一調之例遵辦至今惟蘇松幫見在議請自本年掣定水次以後每屆三年毋庸再掣卽隨上屆各幫挨次輪流受兌查江西各州縣每年徵漕後俱用小船運赴省城倉次各幫卽在省城領兌倉幫聚集一處丁吏資緣更易滋弊擬請視蘇松各幫領兌饒州府等屬漕糧相安已久又都昌縣漕糧每年輪派尾幫兌運卽令截留滄州兵米應循照舊章以順幫情其餘十一幫領兌四十餘廳縣漕米卽按照米數多寡坐落遠近均勻配搭掣定

某縣某倉照依新例運兌三年期滿不必再掣並按漕運則例所載江西省各幫次序三年一屆由後推前挨次輪轉如有船多米少則以後倉米數撥補米多船少則以後幫船數找兌各州縣閒有實緩應減船隻請照嘉慶二十年奏明調劑極疲一百三十四隻船內酌量添減帶徵緩漕年分准附本倉正額仍於通幫一律加裝以杜丁吏勾串鑽營之弊疏入上從其議尋以年力就衰召來京六月以原品休致六年卒

莫晉

莫晉浙江會稽人乾隆六十年一甲二名進士授翰林院編修嘉慶三年二月大考二等擢侍講五月充福建鄉試正考官八月命提督山西學政四年二月轉侍讀三月遷右春坊右庶子四月升翰林院侍講學士六年差滿回京七年充武會試副考官八年二月轉侍讀學士三月大考二等尋充日講起居注官四月調通政使司副使九年二月上幸翰林院分韻賦詩晉與焉七月擢太僕寺卿八月充順天鄉試副考官九月升太常寺卿十二月提督江蘇學政十年五月遷通政使司通政使十一年擢都察院左副都御史十三年正月疏言安民先在止訟獄訟

所以日繁由誣告者多誣告所以日多由有司平日疎於約束臨時又畏其居心叵測雖審明所控子虛猶且曲爲開脫由是刁風愈長奸民無所顧忌於官府官府轉顧忌於奸民請敕各省官員遇案情虛誣卽按律科斷不得藉端末減以清訟源上嘉之六月充江西鄉試正考官十四年丁母憂十六年服闋乞終養十八年丁父憂二十一年三月服闋十一月補都察院左副都御史十二月升倉場侍郎二十五年以各幫米色乾潔驗收無滯下部議敘道光二年偕侍郎和桂奏言部議倉儲章程內有望礙難行之處先是御史常賡奏請以放代盤不必按期派倉經部議自本年三月起三倉輪放按期放竣後再行接派三倉其見放之倉停進新糧晉謂以放代盤係嘉慶十四年舊例但今昔情形不同請緩至七月盤起欽派三倉先行開放俟明年正二月閒放竣三倉以後應否接盤奏請聖裁並請將新漕分進十一倉另廠儲存諭曰倉儲爲天庾重地以放代盤法歸簡易若新陳牽混仍恐易滋弊端著將京城十一倉全局通盤籌畫安定章程尋奏盤查防弊七事部議未准晉以部臣任意駁斥巧借以放代盤四字爲護身符而見定章程實已將嘉慶十四年成案紛更殆盡又劾戶部議事錯謬蒙混幾如隔壁講話

不知所云且詭譎欺飾肆意妄行無所不至尋經戶部逐條申辨上以所劾各款如確有指實必當澈底查辦不得以無據之詞妄肆詆毀命來京明白回奏晉奏言部議章程皆非舊例惟以放代盤四字爲舊例耳謂其巧藉此爲護身符似不爲過前常賡請盤查兩倉暫停進運戶部駁其必致囤堆及其自行定議轉少四倉謂非前後矛盾而何臣等議盤竣一倉之後接放一倉此乃一定事理乃部議駁爲窒礙難行無端生出三旗人等擁擠一倉等語眞乃謬以千里謂非隔壁講話而何部議五倉進米業經奏准迨見臣等奏駁明知五倉不敷進運翌日咨稱五倉不敷卽另倉收存顯係見臣等奏駁後立趕咨文以爲覆奏時掩飾之地卽謂部臣心術不應詭譎至此而其不自行請旨擅改章程謂非肆意妄行而何奏入上命大學士軍機大臣等會議尋議以放代盤徒有清查之名無裨實濟倉場歷次陳奏尙非無據之言惟籌議盤查之法亦未能切中窾要又不和衷商榷竟肆詆毀殊屬褊躁請交部嚴加議處諭曰莫晉於盤查事宜所論皆屬因公惟與戶部意見不同經朕令其明白回奏猶復負氣辯論殊失敬事辦公之道朕斷不肯因其負氣辯論挑斥於語言文字之間從重治罪此非施恩於莫晉深恐後來

言事者動輒避忌不實盡情於國是大有關係莫晉毋庸交部議處著降爲內閣學士三年以疾乞歸六年卒子鍾琪二品廕生刑部主事

慶祥

慶祥圖博特氏蒙古正白旗人曾祖拉錫官領侍衛內大臣祖納穆扎勒以靖逆將軍平回部盡節贈三等義烈公父保凝武英殿大學士乾隆六十年由監生授藍翎侍衛嘉慶四年升三等侍衛八年升二等侍衛十三年丁父憂襲三等義烈公在散秩大臣上行走十四年授鑲白旗蒙古副都統十五年兼正藍旗護軍統領十六年調鑲藍旗滿洲副都統旋調鑲紅旗滿洲副都統上校射所管副護軍參領人皆命中上以其訓練有方交部議敘旋授理藩院右侍郎十八年八月調工部右侍郎九月教匪林清李文成等句結謀逆李文成及其黨分擾直隸長垣河南滑濬山東曹定諸縣戕官據城上命慶祥帶火器營官兵前赴軍營隨欽差大臣那彥成剿捕河南賊匪時賊據滑縣分屯道口等處爲掎角十月大兵分三路夾攻道口慶祥在南路策應擒殺千餘仍整兵進剿殺賊萬餘遂破道口捷入命交部議敘十二月大兵復滑城河南平上以慶祥在事有功交部議敘尋管帶

京營官兵凱撤檻送賊日牛亮臣徐安國來京授正黃旗漢軍都統二十一年調熱河都統奏請勒限嚴催控案將屢提不解之知縣交部議處上嘉其實心任事二十二年疏請熱河行營左近山場地畝禁止墾種並山場餘地賞給額魯特游牧命如所請行是年調烏魯木齊都統二十五年四月授伊犁將軍九月回部逆裔張格爾率衆潛入喀什噶爾卡倫殺傷官兵搶奪馬匹幫辦大臣色普徵額帶兵剿捕賊衆逃竄出卡經喀什噶爾參贊大臣斌靜奏入命慶祥馳往剿辦並查斌靜有無激變情事尋奏言張格爾係薩木薩克次子因在浩罕窮苦無賴起意糾約衆逆搶奪喀地勢敗逃竄尙非由激變而成惟斌靜辦理草率且據衆伯克控告斌靜行止不端縱容家人凌辱回衆婪索多贓咎無可道色普徵額帶兵出卡毫無弋獲亦屬庸謬命逮問斌靜等交慶祥嚴審定擬各坐罪如律慶祥旋奏張格爾遠竄無蹤又值天寒大雪卡外道路荒遠難以窮追請懸賞設法誘擒上許之道光元年正月疏陳善後六事一驗放各城伯克請令參贊與幫辦大臣公同察驗聯銜具奏一伯克專理回民事務應擇回民敬信之人請令阿奇木伯克秉公保送首選功績次稽家世次論資格於履歷內註明以便揀選一請寬向來

例禁令喀城阿奇木伯克仍與浩罕伯克往來通信庶內地得知夷情且不使外夷疑慮一喀什噶爾防兵前於孜牙墩滋事案內調伊犁錫伯索倫滿洲兵三百名戍守奏定隨時察看停撤查喀城存兵甚少不敷彈壓驅遣所有防兵請永遠無庸裁撤一存城馬匹不敷徵調請增至一百五十匹常川餵養一喀城奸徒或代張逆斂錢或藉和卓之名斂錢肥己向來槩予駢誅未免不分輕重易致諱匿請分別定以斬遣枷責則案易破而人知儆又密疏言浩罕部落自乾隆二十七年通中國以來屢經入覲嗣伯克愛瑪爾兩次遣人求覲天朝一因差人到喀什噶爾之時在年班伯克起程後一因所遞夷字不合體制均經奏明駁飭並裁汰供給將貨物全行抽稅伏思化外邊夷殊方異俗但宜羈縻綏撫不必盡以禮法相繩況該部落屢遣使入京非不通中國之人一旦絕其通好焉有不生疑慮之理臣愚昧之見以爲擒獲張格爾等諸逆其事輕收復浩罕數年未通之情其事重況張格爾等窮蹙餘生無人附和亦斷不能成事嗣後儻該伯克差額勒沁陳請入覲天朝尙求皇上恩施逾格准令進京則夷心旣安邊圉日靖矣諭曰浩罕在乾隆年間曾經八次遣使入覲非未通中國者可比此時因朕登極初元懇請

朝覲則允其前來於事理俱順惟出於該伯克籲懇則可慶祥斷不可稍露招致之意轉以示弱若該伯克果遣使懇求慶祥當查照乾隆年間舊例一體供給悉做成規一面先行奏聞該將軍酌定行期令與回城年班伯克一同來京以符體制若該使臣別有要求舊例所有者不妨准行舊例所無者卽行斥駁於羈縻撫馭之道庶兩得之其查辦善後事宜均著照所議辦理四月回伊犁將軍任五年九月張格爾復來犯卡參贊大臣永芹奏幫辦大臣巴彥巴圖出卡剿賊全軍陷歿上革永芹職命慶祥爲喀什噶爾參贊大臣速往剿辦時張逆已竄往托古斯托羅地方慶祥遣員查探路徑以備進兵並曉諭效順之布魯特許以重賞令其設法擒獻六年四月張格爾遣其黨赫爾巴什潛赴綽勒薩雅克愛曼一帶糾合夷衆官兵擒斬之張格爾復因托古斯托羅糧缺令奇比勒迪至巴雅爾一帶開渠占地我兵設伏於雅滿山奇比勒迪至伏兵起斬之殲從逆數十人五月擒斬奇比勒迪之子胡達巴爾底與其姪伊斯瑪依爾及著名逆黨瑪呼里有旨嘉獎時張逆在卡外游奕日久白帽回衆潛與勾通六月官軍於阿爾圖回莊捕獲賊謀言張逆將於回子過節日進卡滋事方研訊聞張格爾已由開齊山突出入屯

於阿爾圖什回莊慶祥急令幫辦大臣舒爾哈善及伊犁領隊大臣烏凌阿分帶官兵往剿會夜雷雨張格爾潰圍出走我兵分投追捕而河色爾布依罕愛里克一帶白帽回衆紛起應賊張格爾復由大河沿等處合數萬人進犯喀城回衆亦多從亂慶祥急調戰兵及各卡防兵於城之西南分三營拒守賊氛益近領隊大臣烏凌阿穆克登布率三營之兵迎敵同時陣歿賊日夜攻偪城遂失守慶祥力竭自經死十月阿克蘇辦事大臣長清奏入諭曰慶祥在伊犁將軍任內兩次派往喀什噶爾查辦逆裔張格爾滋擾之事前任參贊大臣等種種辦理不善俱未能徹底查明據實奏參其平日在伊犁辦事尙屬勤慎迨授爲喀什噶爾參贊大臣已逾半載並未將張格爾在卡外游奕實在情形探訪明確以致該逆勾結煽亂占據回城茲據長清查奏賊匪圍攻喀什噶爾漢城慶祥督率將士盡力抵禦兩月有餘賊匪空通地道進城復經官兵巷戰拒殺多名因鉛彈俱已用完慶祥力竭自盡該參贊就地固守爲國捐軀朕垂淚覽之憫惜之至著加恩贈太子太保其應如何加賜卹典該部詳查妥議具奏再降諭旨並著該旗俟伊子百日服滿後卽行帶領引見其家屬回京甘肅陝西河南直隸各督撫派員妥爲照料並

加賞銀一千兩以示優卹尋晉一等義烈公加一雲騎尉世職賜祭葬予諡壯直入祀昭忠祠並於喀什噶爾建昭忠祠以慶祥等入祀御製憫忠詩勒石七年揚威將軍大學士長齡等克復四城生擒張逆西陲蕩平八年俘張格爾至京廷訊罪狀畢諭曰逆裔張格爾著卽寸磔梟示慶祥以喀什噶爾參贊大臣遭變被困力竭捐軀皆由該逆倡亂以致傷我大臣殊堪髮指著慶祥之子侍衛文輝同往市曹看視俾紓積憤並將該逆摘心交文輝於伊父慶祥墓前致祭用慰忠魂長子文輝襲一等公爵散秩大臣

福絲

福絲瓜爾佳氏滿洲鑲紅旗人乾隆六十年由官學生考取內閣中書嘉慶元年充軍機章京六年補官七年以川楚陝三省底定加恩內外任事諸臣下部議敘十年升侍讀十三年兼本旗公中佐領十四年授廣西右江道十六年以查獲會匪出力下部議敘二十年因兼署柳州府任內失察所屬融縣淹禁盜犯部議降三級調用命以六部員外郎用二十三年補工部員外郎道光元年升郎中二年二月京察一等授山東督糧道九月遷直隸按察使三年升布政使四年擢山西

巡撫五年奏河東鹽池時有匪徒搶竊拒捕巡役力難抵禦請於解州安邑縣並運城營內酌派弁兵巡邏官給烏槍俾匪徒稍知斂跡六年又言鹽池地勢最窪向有護池隄堰三十餘道近年被水衝激隄身單薄請動款發商生息爲歲修渠壩之需均允行八月御史吳傑奏參福縣生日府廳州縣大半上省巡撫衙內演戲酬謝上命禮部尙書松筠一品銜署工部左侍郎王鼎往按之尋覆奏該撫是日封門謝客豫禁拜壽送禮惟所屬公送挂屏業經書款勉強收受並無餽送苞苴情弊至所屬各員確有因公在省案據諭曰福縣於自己生辰既先事嚴拒不許拜壽又復收受挂屏設席酬謝總由率屬不能嚴肅所致本應交部嚴議姑念平日居官尙屬詳慎著降三品頂帶仍戴革職留任七年五月疏陳蒲州平陽二府及解絳兩直隸州所屬州縣距省爲遠遣軍流徒及秋審各犯跋涉拖累且地當孔道防護難周請歸巡道勘鞫詳咨巡撫臬司覈辦從之八月授倉場侍郎仍暫署巡撫十一月猗氏縣民間克己赴京控訴本縣知縣張珍臬勒罰偪命教諭典史等串詐得贓歷控上司不爲究辦命都察院左都御史湯金釗刑部右侍郎鍾昌讞其獄得實以聞諭曰福縣於串詐得贓重案既經屍親上控不卽親提究

辦殊屬不恤民情有玷封疆之任著交部議處尋議革職上加恩仍予留任十二月命來京候旨八年三月賞頭等待衛充庫車辦事大臣四月調庫爾喀喇烏蘇領隊大臣八月調喀喇沙爾辦事大臣九年加副都統銜充科布多參贊大臣賞戴花翎十年奏稱科布多每歲兵糧向於屯田所穫糧石支放該處蒙古不諳耕耘全賴綠營兵丁教令播種因班期全換恐誤屯務請酌留弁兵以資熟手俟下屆班期概行更換又以該處地處極邊屯田之外不產五穀官兵需用物價增昂奏請援案撥官駝一百隻派兵十名每年兩次赴古城置買食用等物以資分給如所請行十一年卒子文熙刑部員外郎文岳廣東惠州府知府

吳光悅

吳光悅江蘇陽湖人嘉慶元年進士以內閣中書用二年補官三年充順天鄉試同考官四年充軍機章京六年充山西鄉試副考官七年議敘以主事用十二月川陝楚邪匪底定以繕寫諭旨與有勤勞予軍機章京優敘光悅與焉八年補吏部主事九年遷員外郎十年記名以御史用尋充會試同考官十二年補浙江道監察御史十四年巡視中城十五年轉掌廣東道監察御史十七年十月調京畿

道十二月因飭禁庶民呈遞封章刑部議奏條例內有令本人將呈遞事件開具節略一併進呈一條光悅以奸民巧詐百出所開節略未必皆與封詞符合接收官無從查考轉致事無巨細俱以上聞應請嗣後凡涉封章無論有無節略概不准擅行投遞上以刑部所議本未允協諭嗣後如有呈遞封章接收之員一面將所遞封章具奏一面將該犯先交刑部押禁附於摺內呈明所有開呈節略一條著卽刪除十八年授安徽寧國府知府十九年桐城縣民汪儉萬毆斃徐仲書賄囑王松禮頂認正兇光悅承審未能究出實情降二級調用二十年捐復原官選授福建福寧府知府尋以親老告近二十一年授浙江處州府知府二十四年署嘉興府二十五年丁母憂回籍道光三年服闋補直隸保定府知府四年擢河南河北道五年遷湖南按察使七年閏五月升湖北布政使十月召來京授都察院左副都御史九年擢江西巡撫十年三月以江西各屬倉穀虧短奏請先行勒限買補再行抽查又各幫重運漕船借領天津道庫銀兩應於各丁新領之項扣還但儘數坐扣丁力未免拮据奏懇借項墊解於各丁名下分作二年扣還歸款俱允之四月奏南贛等處常有會匪劫搶先後拏獲四百餘人請酌加一等定擬以

示懲儆七月拏獲零都會昌安遠等縣會匪劉學洙等四十三名八月又於萬安等處拏獲朱光聞等九十餘名均治如律是年秋連旬大雨江水漲發南昌等縣民房被衝奏請借項修補次年帶徵歸款如所請行十二月高安貢生江方城赴京呈稱宜春縣吳家尖茶蘭巖等山產有銅苗情願自備貲本開採納課事下巡撫議奏光悅以此山曾經勘議封禁並無銅苗且開山採礦易致藏奸并於田廬有礙應請官爲封禁飭宜春縣添設卡房撥兵巡查以杜奸民覬覦十一年二月奏南昌等縣圩隄去年被水衝坍請借項修築均從之先是御史周作楫奏江西會匪每多挾嫌誣指該省皆聚族而居請飭族長出具甘結是月光悅覆奏查乾隆年間撫臣陳宏謀設立族正之法令合族公保一人族中如有乖戾之徒小則處以家法重則送官究治與此奏本自相符惟遴選不得其人易滋流弊應飭屬選舉公正族長照所議辦理其獲案實係無辜許其出結保領隨時訊釋疏入報聞三月遵旨覆奏萬安縣查鹽快船藉端滋擾因該處船戶貪載私鹽巡兵向查多有搜出私載遂及禁煙以致翻箱倒篋擾害行旅節經分別辦理惟是販私不可不禁滋擾尤宜預防應飭南贛地方凡雇船者責成船行查明並無私鹽方許

攬載並將船戶姓名於船旁首尾大書刊刻查船之兵各穿號衣書寫姓名俾被累者易於指明並諭商民如受擾害准其呈控疏入諭以該撫仍委員隨時查訪以重緝私而安行旅五月連旬大雨江水泛漲南昌等三十一廳州縣圩隄田產盡被淹決奏請分別賑恤仍請借款修築圩隄并懇動項赴川買米以資接濟復於南昌九江地方設廠放粥自十一月至十二月需米八萬餘石援照成案請截留漕米備用嗣因設廠後饑民雲集隨議給資遣回又因景德鎮工匠如林被水後客米到鎮稀少民食維艱請於鄰邑借給常平倉穀減價平糶又江西辦理漕運全仗屯糧并帶徵餘糧以應支放是年屯田被淹餘糧亦在緩徵之例請於藩庫借銀十萬兩以資辦公而肅漕運先後疏入上俱從之十二月卒

武隆阿

武隆阿父七十五由監生補健銳營前鋒嘉慶元年出師湖北剿擒賊目劉起隴二年正月補藍翎長八月補副前鋒校隨父七十五剿賊於四川達州累戰有功三年七月補前鋒校進攻仙人峒受石傷擒首逆王三槐九月升副前鋒參領攻川東之三台寨擒賊首李四貴殲其黨五年八月追剿股匪樊人傑於三溪溝殲

賊目羅成賊潰九月敗賊於豐城寨斬級四百擒賊目郝長壽等十一月以功擢頭等侍衛十二月賊匪辛聰由陝竄廣元與李炳合武隆阿扼之於銀磨壩六年正月隨父七十五破賊於三台山又敗之於鐵溪河殄其渠俘馘甚衆捷聞下部議敕二月追擊樊逆由竹峪關趨通江遇賊獅子嶺敗之上嘉其奮勇復下部議敕三月賊目陳潮觀魏棒棒等犯九龍三台兩寨武隆阿偕都司羅忠舉進討克之得旨以應升之缺升用五月攻賊於雙龍碕克卡三殲二百餘人賊走茅壩設伏破之六月追賊至茅家河殲擒無算湖廣總督吳熊光上其功賞阿勒精阿巴圖魯名號七月首逆湯思蛟劉朝選糾黃白二號賊匪分路滋擾官軍亦分道擊之賊竄花柳園尋潰走追敗之於溫水溝疊有斬獲經四川總督勒保奏入賞副都統銜時有股匪走奉節武隆阿奉檄追剿衝其中堅遂克之九月追躡於溫湯井乘勝進擊賊潰十月追白號股匪苟文明至凌洞壩山梁冒石仰攻屢有殲擒十一月敗賊於琵琶寺十二月擊賊於青岡渡賊敗走屯踞木耳巖武隆阿帥精銳攻克之殲賊千七年二月由火峯界嶺進兵遏零匪東折楚境之路賊西竄追敗之於上高坪三月截堵於巫山邊界賊走雲陽追擊之遇白號股匪於大昌殲

其衆四月青白號股匪自楚入川竄白果寺官軍三路掩襲武隆阿兵當其衝賊趨峪口追斬三百級殫其渠捷聞下部議敘五月圍賊於隻保山燬其巢復由茅山嶺間道掩擊賊大敗七月黃白號餘黨走蕭家渡武隆阿督兵連破之八月授鑲藍旗漢軍副都統迎剿賊渠蒲添寶遇於千里壩冒雨鏖戰賊遁進取滾子坪蒲逆窮蹙官軍分三路抄擊武隆阿帥前隊入老林窮追敗賊於百仞溝斬級百五十賊亂分竄南江河瓦屋溝我師攻之益急蒲逆懸崖樹死賊黨殲戮無遺股匪廓清奏入上以武隆阿奮勇可嘉命在乾清門行走仍下部議敘九月督兵防巫山邊界十月搜剿梁萬零匪敗賊於雙鳳山斬級三百掩殺至大溝壩賊逸復擊之於烏林垭等處十一月賊走太平謀入陝武隆阿乘夜襲破之賊竄洪口移寨通江以躡其後八年二月丁父憂回旗五月補公中佐領兼管健銳營事署鑲黃旗滿洲副都統尋署貴州古州鎮總兵九年調署廣東潮州鎮總兵十年正月諭曰廣東洋匪較多由於營伍廢弛綏靖海疆先以得人爲要卽如武隆阿素稱帶兵勇往是以調赴粵東然必需所帶兵丁同心戮力方可掃蕩賊氛著飭武隆阿嚴密查察設法整頓五月服闋實授十一月獲盜首李崇玉下部議敘尋按治

崇玉得招撫誘降狀初崇玉依閩盜朱瀆橫行海滋兩廣總督邢彥成行間誅誘以四品服並守備筭始歸命事覺削邢彥成職謫戍伊犁武隆阿坐不能力阻命解總兵職留巴圖魯名號降二等侍衛發往臺灣軍營差委十一年三月委辦營務翼長事先是洋盜蔡牽擾臺灣提督李長庚擊卻之盜艘往來剽掠爲海上患四月福州將軍賽沖阿奏請防堵洋匪得旨武隆阿係獲咎之員經朕特恩發往臺灣白當渡臺效力卽派令搜捕餘匪留心察看七月禦蔡牽於鹿耳門沈其船十一獲其船十執賊目林略傅琛斬級百十月賞頭等侍衛署福建汀州鎮總兵諭閩浙總督阿林保留心察看如果奮勉稱職一二年後再行奏請實授十二年十月調署臺灣鎮總兵獲朱瀆夥賊朱和等十一人十一月實授臺灣鎮總兵十三年六月阿林保奏朱瀆匪船竄臺分飭內地各舟師會剿時署總兵周國泰以舟師追朱瀆上命責成武隆阿周國泰二人合力殲擒九月劾臺灣府知府鄒翰畏避鋪張不務實政奪職逮問十月遊擊王贊擊朱瀆兵船陷於賊武隆阿坐防禦不力降二級留任十四年正月獲蔡牽之黨陳聰明張水二人又獲會匪張逆等四十四人均寘之法十一月以漳泉民人械鬪辦理不善陳奏遲延下部嚴議

尋議奪職上加恩改爲革職留任仍傳旨勛勉十五年四月誅洋匪李樞等五人十月劾都司熊瓊違玩捕務請褫職上韙之十七年獲匪犯高瑪達等十九年獲匪徒章霞等均按治如律二十一年奏澎湖偶被偏災請緩其賦如所請行二十三年以病乞假特允其請俾就醫省城二十四年病痊入覲仍回本任二十五年二月丁母憂回旗十一月賞副都統銜授喀什噶爾參贊大臣道光元年四月補正白旗漢軍副都統八月奏回城伯克例不筵宴擬發回諭阻其進京並酌賞緞匹物件上是之又奏喀什噶爾私越開齊之案請照伊犁辦理十月奏喀什噶爾英吉沙爾兩城請增侍衛二員以資差委又奏沖巴噶什布魯特潛回本地者請寬其禁頗提格訥布魯特卡外游牧請聽其便皆允行十一月條奏八旗生計請將各省綠營馬兵分半作爲旗缺令駐防子弟挑補上以案言亂政下部嚴議尋議革職得旨著加恩降二等侍衛仍留參贊大臣任帶革職留任處分八年無過方准開復二年九月調西寧辦事大臣十一月以審擬阿布都爾滿私鑄錢文案科罪錯誤嚴飭之三年五月召還京九月賞副都統銜署鑲白旗漢軍副都統十月遷內閣學士兼禮部侍郎銜十二月授直隸提督四年正月因在參贊任內給

二等侍衛阿布都爾滿私換地畝執照鐫秩留任四月請裁梅花車礮仍用九進連環陣式五年四月請挑派各協備戰兵丁仍照舊額一萬二千名均如所請行八月授江西巡撫旋調山東巡撫奏山東歉收請緩買補截留漕糧以裕民食九月十月疏陳海運章程一戰船巡洋不必拘三月九月之限一鷹遊門爲海防要地應梭織巡查一寄棧收泊島嶼應增兵駐守一沿海漁船出入應編號取結一沿海礮臺墩臺應設卡駐兵如所請行六年七月臺灣匪徒張丙等滋事命武隆阿往討尋以西陲不靖逆裔張格爾入卡滋擾授欽差大臣馳赴回疆參贊軍務八月奏調山東擡礮二十兵二百又請調川兵三千均從之諭曰見在逆回猖獗武隆阿到彼卽遵奉歷次諭旨與長齡楊遇春隨時詳慎籌辦務殲首逆迅奏膚功勿任竄逸方爲不負委任十一月上念邊外沍寒賜貂皮馬褂獺皮戰蓑十二月武隆阿馳抵大營七年二月自阿克蘇進兵張逆糾衆五萬在洋阿爾巴特迎拒我兵分爲三武隆阿帥右軍扼其前路賊敗走追至排子巴特殲萬餘人俘三千二百人奏入得旨嘉獎下部優敘賞翎管荷囊尋克沙布都爾莊乘勝追至渾水河賊數千來援武隆阿督兵追擊斬級千是役也擒斬不下五萬人斃賊目色

提巴爾第等捷聞復荷褒賞下部優敘師次阿瓦巴特賊設伏挑戰大兵分兩翼進討賊佯退擊以連環槍礮復令勁卒虎衣虎帽直前躍舞賊馬驚陣亂援賊從林箐中出我兵縱擊殲賊萬餘誅賊目阿瓦子邁瑪底那爾巴特阿渾獲馬匹器械無算敘功賞太子少保銜尋進攻渾河沿賊於南岸憑河列陣掘溝築岡復於空穴中列礮以抗我師勢張甚迨日暮西南風陡作官兵乘風潛渡上游以襲其後賊潰斬級六萬俘賊四千進復喀什噶爾城張逆已先期竄上聞諭曰上年逆裔張格爾滋事朕特命長齡楊遇春武隆阿馳往回疆督辦萬里之外調兵轉餉閱時既久始克會剿朕以天戈所指各城無難克期收復惟張逆係元惡大慙必應殲擒以彰天討而靖邊圉特降諭旨令同心合力奇正分途總須布置周妥無任竄逸不啻至再至三據奏大兵克復喀什噶爾張逆已先期竄逸辦理不善自應加以懲創長齡著革去紫韁楊遇春著撤去太子太保銜武隆阿著撤去太子少保銜三月武隆阿由英吉沙爾進兵葉爾羌中途疾作奏請暫回喀什噶爾俟疾愈卽馳赴軍營諭曰武隆阿病愈後不必前赴葉爾羌卽在喀什噶爾幫同長齡籌辦一切事宜查探張格爾蹤跡務期必獲迅速戡功四月病痊馳赴圖舒克

什卡倫尋以臂疾折回七月以偵探逆酋蹤跡迄無定所降旨詰責旋賞副都統銜充喀什噶爾參贊大臣仍諭隨同長齡辦理善後事宜並嚴緝張格爾以觀後效尋偕長齡奏請將逆裔阿布都哈里管西四城回務並給職銜上以長齡所奏紕繆武隆阿隨聲附和嚴飭之八月偵聞張格爾竄匿達爾瓦所督師擊之殲賊三百而官兵亦有傷損侍衛色克精阿等歿於陣奏入諭曰該將軍等探知張逆藏匿地方派兵追捕自應倍加慎重乃虛延時日老師糜餉竟令零星殘匪傷我官兵縱斬獲多名已屬不值長齡等調度失宜辦理不善咎無可辭俱著交部議處尋議褫職命從寬留任九月因病陳請開缺允之諭令在喀什噶爾安心調理十一月密陳善後情形略言留兵少則不敷戰守留兵多則難籌經費請留兵一萬二千分駐各城並以按年換防需費繁多請許駐防移眷糧餉加增籌撥不易請令屯兵開墾疏入會直隸總督那彥成授爲欽差大臣馳赴西陲諭曰武隆阿所奏不爲無見著那彥成抵喀什噶爾後會同熟籌妥議具奏尋那彥成覆奏回疆甫定非安設重兵勢難鎮撫請抽派陝甘兵六千五百分防各城仍循五年舊例分三班更換如所請行十二月武隆阿病痊署喀什噶爾參贊大臣八年正月

張逆就擒上念武隆阿嘗督兵進剿克復四城免積次吏議仍授喀什噶爾參贊大臣二月上以回疆用兵將士勞績卓著命武隆阿等繪戰圖以進四月奏革各省陋規勒石永禁上是之五月偕那彥成請移建葉爾羌城於罕那里克六月請增省回疆武職官制又請於喀喇哈依外之七里河築堡設兵並別建英吉沙爾城又奏定保送伯克章程均如所議行張格爾既誅其妻孥浩罕方傳檄索之浩罕詐投賀書以伺隙那彥成偕武隆阿陳兵衛其出入不與犒賞絕其貿易並諭以逆屬在外無足重輕宣示恩威破其居奇之計上以深得大體嘉之八月繪像紫光閣御製贊曰少從父征閱歷亦久溫宿進兵先驅恐後未獲賊酋蓋非時否數月疾瘳仍留鎮守九月偕那彥成奏請西四城安設官鋪並借項採副茶以濟兵食又奏揀補印房章京章程又奏撤防兵歸伍籌議校閱章程又請優獎忠蓋後裔及軍營出力之伯克回子等給與翎頂十月請改建軍臺道路增給換防滿洲兵馬芻牧添設綠營差馬又請設喀什噶爾等三城銀庫均從之十一月補正紅旗滿洲副都統十二月奏招致歸順之額提格訥布魯特落安置依劣克達坂地上以受降易撫降難諭以安撫機宜九年正月命還京時那彥成劾奏凱撤

陝甘新兵緣應領鹽糧各項悉照防兵例支發持械譁武隆阿拘泥成例幾至釀成事端疏入上命武隆阿明白回奏尋奏言此次凱撤新兵實仍照征兵例支發惟將部駁駝價銀每兵裁減三分何至激變祇以愚兵無知聞設立官鋪調劑兵丁遂因望賞誼譁非有他釁上諭那彥成曰武隆阿如此措置是否能資鎮撫該兵弁回人不致心存藐視儻兵將不能相安恐致別生事端朕心實深慮念著該督體察實在情形密速回奏那彥成奏言武隆阿久歷戎行衆咸知其奮勇惟多疑少斷未洽人心新兵誼譁因其專意節省拘泥辦理所致恐不勝參贊大臣之任七月抵京召對詞多掩飾特命廷臣詢問奉旨武隆阿居心含混不知愧懼於陝甘凱撤征兵一事又復辦理不善著降爲頭等侍衛在大門上行走伊子慶安遂出乾清門在大門上行走十月授和闡辦事大臣十年召還京十一年卒子慶安太常寺六品官慶寅廣東督標中軍副將慶容江南道監察御史慶寬戶部堂主事

舒爾哈善

舒爾哈善葛哲勒氏滿洲鑲白旗人嘉慶二年川陝楚教匪滋事舒爾哈善由吉

林前鋒委驍騎校隨署廣州將軍明亮等赴川剿辦逆匪姚之富齊王氏高均德等合衆西竄漢中屯於黃官嶺沿江窺伺欲乘閒北渡明亮等以兵扼北岸賊衆躡淺偷渡經官兵截擊舒爾哈善等衝入江心斬獲甚衆賞戴藍翎四年隨參贊大臣德楞泰大破賊衆於八石坪先後擒獲逆首龔文玉卜三聘等奏入賞換花翎五年補驍騎校六年復隨德楞泰追賊入陝大破首逆徐添德舒爾哈善以接戰奮勇賞舒瑪該巴圖魯名號七年升盛京防禦八年升寧古塔佐領十一年升布特海烏拉協領十八年河南逆匪李文成滋事陷滑縣大兵進討舒爾哈善帶吉林兵赴營隨剿時官兵圍滑縣首逆李文成及其黨劉國明等竄入輝縣之司寨舒爾哈善偕總兵楊芳等追剿攻破司寨殲斃賊目劉國明等文成自焚死敍功賞副都統銜二十三年布特哈革職佐領世襲雲騎尉富敏挾舒爾哈善劾奏之嫌列十二款控告經將軍松林訊明虛誣富敏坐罪如律舒爾哈善以統轄地方卡座未能徧巡又私借用稅銀部議革職道光元年命來京賞三等侍衛四年擢頭等侍衛充庫爾喀喇烏蘇領隊大臣五年九月回部逆裔張格爾句結薩雅克部落布魯特入卡滋事喀什噶爾幫辦大臣巴彥巴圖戰歿上調舒爾哈善充

喀什噶爾幫辦大臣命迅速馳赴新任十二月抵任六年六月張逆潛結卡內各白帽回衆爲內應率衆自托雲山東北直趨伊斯里克圖舒克塔什卡內屯於阿爾圖什回莊喀什噶爾參贊大臣慶祥令舒爾哈善率滿漢官兵爲前隊以領隊大臣烏凌阿爲後應馳往剿捕張格爾率衆千餘迎拒官兵奮勇進攻烏凌阿繞至賊後由山梁下壓賊衆敗退舒爾哈善身先士卒乘勢偪戰已負槍傷仍麾兵前進殺賊數百人餘匪竄回拒守舒爾哈善回城調養烏凌阿率兵圍其莊會夜雷雨張格爾潰圍遁去復合衆進擾喀城八月城破舒爾哈善被戕七年揚威將軍大學士長齡等奉命討逆克復四城張逆旋亦就獲西陲盪平上加恩死事諸臣舒爾哈善命照都統例賜卹予祭葬入祀昭忠祠並於喀什噶爾建昭忠祠與慶祥等一體入祀御製憫忠詩勒石廕騎都尉世職子德成額襲騎都尉官佐領德平阿官驍騎校

塔斯哈

塔斯哈瓜爾佳氏滿洲正白旗人嘉慶五年由前鋒補印務筆帖式九年擢副前鋒校十四年遷前鋒校道光二年三月軍政卓異引見交軍機處記名五月擢委

前鋒參領四年遷副前鋒參領五年升前鋒參領六年福建彰化縣匪徒分類械鬪乘機煽惑上命塔斯哈隨山東巡撫武隆阿赴閩剿辦尋臺灣軍事告歲得旨毋庸前往適逆裔張格爾脅同安集延布魯特回衆五百餘人來犯卡倫復命武隆阿爲參贊大臣帥師進討塔斯哈仍隨往七年四月進剿阿瓦巴特回莊依岡背河樹林環密賊十餘萬衆負隅抗拒我兵分爲兩翼一鼓齊進斬級三萬餘賊悉就俘擒塔斯哈在事有功賞副都統銜十二月授鑲紅旗蒙古副都統八年充伊犁領隊大臣十年正月調喀什噶爾幫辦大臣八月偵聞塔什干愛曼布魯特別什噶爾糾同浩罕安集延各回衆等撲卡倡亂塔斯哈禦之於喀浪圭副將賴允貴進兵明約洛一帶遇賊於苜蓿莊賊勢鷓張奮力鏖戰塔斯哈帶兵接剿克之賊以少誘衆塔斯哈乘勝追擊以後路山口爲賊所截力竭戰歿事聞命照都統例賜卹予諡壯毅賞騎都尉加一雲騎尉世職襲次完時以恩騎尉世襲罔替十一年諭曰長齡奏上年喀什噶爾卡外賊匪滋擾伊薩克以馬隊太少不可輕出向塔斯哈勸阻塔斯哈告以六月內具奏卡外無事之摺尙未批回見已有賊當時不聽我言致有今日等語可見塔斯哈從前並不敢捏稱卡外無賊具有天

良其慷慨捐軀深堪憫惻前已降旨將塔斯哈照都統銜賜卹其子應襲世職本應今冬引見著加恩交該旗將伊子卽行帶領引見候朕施恩以酬忠蓋于長瑞襲世職直隸天津鎮總兵長壽甘肅涼州鎮總兵長泰護軍校兼十五善射

盧坤

盧坤順天涿州人嘉慶四年進士改翰林院庶吉士六年散館改主事分兵部九年補官十四年升員外郎十六年扈蹕木蘭校射中三矢賞戴花翎十七年升郎中十八年二月京察一等記名以道府用十月擢湖南糧儲道十九年丁本生母憂二十一年服闋授廣東惠潮嘉道尋丁本生父憂二十四年服闋授山東兗沂曹濟道二十五年十一月升湖北按察使十二月升甘肅布政使道光元年護理陝西巡撫二年八月遷廣西巡撫九月調陝西巡撫十一月奏查南山情形包穀漸次成熟山內廂廠照常工作惟被水各廳州縣貧民乏食請賑卹並請將坍塌民房給費興修從之三年正月入覲二月抵任五月奏甄別試用各員略言親民之官責任綦重不獨貪廉爲小民身家所係卽勤惰明昧寬嚴之別亦小民休戚所關上躋其言七月奏鄜州倉廩被水衝塌借項興修十一月奏榆林綏德二府

州屬常平倉穀缺額籌款買補十二月奏漢中興安榆林三府屬尋常遣犯及命案徒犯俱歸巡道勘轉悉如所請四年正月奏勸捐社倉事宜諭曰必應辦理之事貴在詳慎妥實勉爲之二月奏鄜州倉穀被水漂失請將支贍兵糧撥補常平倉缺額四月會議營制請以鎮安營守備改爲千總撥經制外委一員抽撥漢中西安二鎮馬步兵一百一十八名移隸商州何家巖汛把總一員移駐略陽撥略陽營外委一員移駐何家巖舊汛陽平關守備一員外委一員額外外委一員西鄉營把總一員陽平關營馬步兵一百六十名移駐佛坪並請裁陽平關營參將改設都司一員又奏陣亡鄉勇按名入祀昭忠祠並停止未發賞卹銀兩以杜浮冒又奏勘估南山各屬應修城工及漢江石泉城南一帶江岸修隄築壩挑淤引流以資捍衛五月奏蓋屋洋縣適中之佛坪地方爲南山要隘請添設撫民同知一員巡檢兼司獄一員裁郃陽縣縣丞一員並改蓋屋縣丞爲鎮平縣丞鎮平巡檢爲袁家莊巡檢均如所請行五年正月奏修復咸寧長安涇陽蓋屋郿縣岐山寶雞華州榆林等處河渠水利因勢利導一律深通疏請鼓勵出力各員允之四月以湖南糧道任內失察書差私雕假印冒領庫項降三級留任尋丁母憂六年

七月因逆回張格爾入卡滋擾犯喀什噶爾諸城諭曰前任陝西巡撫盧坤見有交辦事件並非奪情起用著卽行令來京陛見毋稍遲緩尋入覲復諭曰新疆逆回滋事業經調派大兵剋日剿辦一切應用軍需糧餉駝載事宜最關緊要前任陝西巡撫盧坤熟悉陝甘情形著卽馳驛前往甘肅會同鄂山總理一切應如何派員籌辦及口內口外如何分段經理之處督率總局司道會同妥議具奏一面督飭該委員及地方官隨時妥速籌備務期源源接濟無得短絀遲誤九月馳抵甘肅命駐肅州扼要之地督辦轉運事宜得旨鄂山等務於大兵雲集之前籌貯三月之糧豫備支放將來大兵進剿各路軍需之費如稍有短絀遲誤惟鄂山盧坤是問尋會奏軍行以糧餉爲重請於山西買駝六千隻陝西買駝二千隻迅解肅州以備急需會阿拉善王進駝一千隻烏里雅蘇臺調撥官駝四千隻先後奏入諭曰山西省採買駝六千隻見有烏里雅蘇臺所撥及阿拉善所進者果能迅速解往原可稍從節省惟恐道路遙遠不能如期全解仍著福綏豫爲備辦斷不可拘泥遷延轉滋貽誤其陝西省採買駝二千隻亦應酌量購備聽候鄂山等知會與各處所備車駝通盤覈計務期足用無致浮多十月偕鄂山奏籌解備用軍

餉並調撥四川西安官兵進剿情形得旨所奏均悉汝二人係朕特簡之人朕亦深知汝二人公誠可靠是以授此重任務要相衷共濟成此大勳一切出納實心經理斷不可存避嫌遠謗之心勉之七年二月奏大兵進發請催各處糧餉迅速運供以資接濟又奏托克遜爲烏魯木齊糧運首站請以臬司方載豫前往督辦均允之先是條奏籌辦軍需章程臚陳十一事一大營軍糧寬爲籌備一兵丁口糧量予加增一籌給出口駝馬料草以資飽騰一買補缺額營馬以備續調一監造軍火器械以期堅實一撥運陝省制錢以平市價一添設臺站夫馬以速軍報一雇用車輛給發例價以供運送一請雇募護臺民夫以資防護一請賞出口征兵皮衣皮帽以禦嚴寒一請後路糧臺酌駐官兵防守以昭慎重疏聞議行其三仍諭體察情形妥酌辦理至是覈實覆奏上以此次回疆用兵遠在口外一切軍行駝載供支等事原與腹地不同悉如所議行七月服闋授山東巡撫命軍需事竣再赴新任尋克復四城敘轉餉功賞加太子少保銜仍下部優敘八月調山西巡撫十月請撤肅州軍需局以節糜費上是之八年正月首逆張格爾就擒大功告歲賞給頭品頂帶三月入覲四月抵任七月奏以軍火利器爲行陣最要請派

陝西撫標弁兵來晉教演速戰陣法八月奏復設岢嵐州考棚俾生童就近應試
以免勞費均得旨允行尋調廣東巡撫十月奏請復設陽曲縣主簿裁甘桃驛驛
丞歸柏井驛驛丞兼管十二月以省標教演速戰陣法漸臻純熟請飭弁兵赴大
同太原二鎮一體訓練所需擡礮火藥鉛丸等項請於辦銅幫項款內提借發商
生息歸於藥鉛項下支用又奏晉省撫標兵丁養贍不足請將岢嵐州等屬額徵
餘糧撥給省標三營支放本色以示體恤並請於河東道庫所存生息餘贖項下
提借銀三萬四千兩發商生息俾資運費均如其議是月入覲九年三月抵粵六
月奏各倉屯羨穀石存積過久請出糶充餉七月勘明被水南海等州縣請緩其
賦九月奏請豁免仁化縣歷年未完屯羨穀石及變價充公銀兩以除積累上皆
從之十年八月以寶廣局鼓鑄錢文向有餘息嗣因滇省辦銅轉運稽遲停鑄七
年有餘息銀短絀請免在外籌補以結塵案下部議行九月調江蘇巡撫十一月
擢湖廣總督時以兩湖鹺務狃於封輪之例以致引滯商疲疏請循前散輪之法
於漢岸建倉起存俾江船及早回空源源攬載後鹽以便民食有旨勸勉十一年
二月奏請籌銷楚岸積鹽並查出重斤罰令量減售價又奏荆門營地方歉收請

借倉穀以濟兵食四月奏請借項修築襄江南岸緊要隄工又奏湖南永興縣例食粵鹽粵商於所開子店多設熬鍋浸灌淮綱請定額以杜侵越又奏楚岸淮引滯銷由於內私外私之充斥請於江船聚集之塘角設立總卡並派丁役梭織巡邏保甲按船編號以嚴稽察悉荷允行又偕巡撫楊懌曾奏地方大概情形疏言圖治之要一在弭盜一在隄防得旨卿與楊懌曾均朕特簡之人畀以封疆重任務要和衷共濟爲國宣猷慎勉以副朕望六月以湖北省夏秋汛漲收成歉薄民鮮蓋藏鄰省售賣米船請循例免稅以資民食八月奏請酌借司庫銀十萬兩遴員經理發商分赴川省購買米石酌減平糶九月覆勘天門縣沈湖等垸被淹地畝難資耕種請減徵以紓民困十月以河道湮塞擇要疏濬請以原署兩淮鹽運使王鳳生來楚綜理水利事宜悉允所請尋因陝西巡撫任內失察西安府同知衙門濫給效力把總委牌降二級留任十二年正月奏以荊州府萬城隄工請歸知府辦理以專責成從之會湖南江華縣逆獠趙金隴糾衆滋事並句結粵東散獠互爲接應拒傷兵役多人總兵鮑友智先行率師進討攻賊於長塘寨續經巡撫吳榮光檄提督海凌阿率師會剿時坤聞報馳往查辦與湖北提督羅思舉行

抵永州賊勢蠡起偵知海凌阿及副將馬韜遊擊王國華守備吳鑑力戰死新田令王鼎銘亦同時陣亡坤以徵調官兵未能卽至賊北竄九嶷南奔兩粵聚則易殲散則難撲當於大兵未集之先遏其四出方可一鼓成擒檄弁兵分道防堵趙逆復至新田之楊家鋪其黨趙文鳳糾衆二千餘附之屢犯桂陽意在北竄坤令衆兵四面嚴防提督羅思舉合力進攻敗之於羊泉總兵霍隆武副將祥福參將王錫朋分道夾擊焚其巢殪賊三千餘人生擒賊子趙幅金趙幅銀賊弟趙金旺賊目唐發林趙文鳳李德明等及逆黨五十餘人捷入得旨褒嘉下部議敘並邀賞賚時提督余步雲奉旨統領黔兵一千前來會剿搜逐餘黨掃數盪平五月凱旋諭曰此次逆搖趙金隴聚衆滋事傷及大員官兵深堪痛恨茲據奏賊匪全殲當就生擒各犯及趙金隴子弟詳加訊問據稱該犯死於羊泉街內其爲趙金隴被殲尙屬可信該犯罪大惡極必應生擒解京盡法懲治方足以彰國憲而快人心今據稱殲斃未能生擒不滿朕望惟盧坤等此次剿辦一切機宜俱臻妥速且調度有方深堪嘉尙盧坤著賞戴雙眼花翎並賞一等輕車都尉世職尋廣東搖匪趙仔青糾合餘黨二千餘人復來滋擾坤會同提督余步雲總兵曾勝率領弁

兵兜剿敗之於濠江生擒賊目趙仔青磔於市會廣西逆猺盤均華亦犯楚境我兵敗之於芳林渡殲其渠獲逆黨多名置之法方趙金隴之煽亂也上命尙書禮恩將軍瑚松額來楚視師七月偕禮恩瑚松額會議江華善後事宜臚陳九條一籌撫卹一重官守一勤巡哨一清叛產一嚴保甲一察搖俗一懲奸棍一收火器一獎義勇如所請行先是上命疆臣裁汰文職閒員至是坤奏請酌裁施南府通判一員保康縣訓導一員允之九月奏改駐員弁添設兵丁以資捍衛請將理猺同知改隸錦田移提標右營守備駐錦田作爲遊擊中軍移提標前營把總一員駐大橋協同外委巡防改隸永州遊擊管轄永明中軍守備改爲分防城汛仍歸遊擊管轄酌裁馬四百一十匹所餘乾餉撥給增設步守兵四百名江華嶺東營守備改爲題缺改隸永州遊擊管轄辰州分防浦市汛守備改爲部推卽抵嶺東營守備缺又奏湖南各標營兵均資堵剿請免按額裁減均如所請是月調兩廣總督請將練習速戰之員弁由楚赴粵教演擡礮允之尋以保奏都司郭宏升請升三江協副將與例不符下部議處閏九月會籌連州排猺善後章程臚款具奏諭曰此次因趙金隴句煽匪徒蔓延滋事官兵大加剿辦旣懾猺膽而張國威惟

戢匪雖在一時而弭患當謀久遠所有善後章程自應准如所請惟在各地地方官實力奉行以安民搖而收成效不得視爲具文尋以任湖廣總督時失察趙金隴逆案鐫二級留任是月兼署廣東巡撫十月奏請酌裁廉州府同知一員肇慶府通判一員高州廉州二府司獄各一員南海縣河泊所大使一員長寧縣訓導一員始興縣訓導一員十一月奏廣西猺匪盪平請分別撤留防兵又請調楚省將弁數員赴粵訓練營伍皆從之十三年正月奏籌堵洋船章程請責成水師提督嚴督舟師官兵實力巡查堵截得旨此次明定章程該督等嚴飭將弁實力奉行儻水師官兵巡防稍有未周洋行各商貿易稍有不公在關經胥稅費稍有濫取卽行革究以示懲警尋以湖廣總督任內於湖北襄陽令阮克峻審辦積案奏請獎勵未將確數覈明遽行入告下部議鐫級二月奏廣東高州府屬信宜縣金垌墟地方移駐莊垌汛把總一員分兵十六名作爲專汛以資防禦連平州城移駐和平營外委一員作爲城守協防如所請行三月奏於夷洋狗頭山地面生擒越南巨盜陳加海並餘匪多名按治如律上以辦理妥速嘉之七月復兼署廣東巡撫九月奏改連山廳司獄一員宜善司巡檢一員爲邊疆佐雜要缺裁連山廳訓

導一員專設教諭一員改爲要缺部議以連山廳司獄缺應歸部選餘悉議行十月越南國內訂飭屬慎固邊防密陳籌拒該國請兵事宜上嘉其深識大體又奏拏獲香山縣積盜侯幅滿等八十餘人問擬如律十四年正月奏獲廉州滋事生黎符小二等並漢奸多名黎境悉臻綏靖得旨勛獎三月奏粵省鐵器請由內地輸餉開鑪鑄造農器鐵鍋者悉從民便下部議行又以濫保襄辦文案幕友候選州同宋緒請賞五品職銜經御史尙開模劾其違例濫保坤復援例覆陳上以曉曉瀆請卮屬非是飭之八月英吉利國人律勞畢來粵聲稱貿易輒令兵船二隻乘潮水漲發擅入海口弁兵開礮轟擊該兵船隨拒隨行仍停泊黃浦河面地方奏入諭曰兩廣總督盧坤稱於六月間咨商防堵並非措手不及事出意外者可比自應遴派得力將弁嚴行防堵何致任令該船駛入內河不能防阻是該督無謀無勇咎無可辭有損國威深負委任著革去太子少保銜拔去雙眼花翎先行革職仍留兩廣總督之任帶罪督辦如果辦理迅速尙可稍從末減儻因循貽誤致滋後患定當以軍法從事決不寬貸懍之慎之尋調兵建閘堵其進出之路英兵震懾軍威惶恐悔罪飭員押逐出口據實疏陳諭曰常該洋人進退兩難之際

何難立行剿滅但此等外人不諳例禁之處不值與之深較玩則懲之服則舍之該督等始雖失於防範終能辦理妥善不失國體而免釁端朕頗嘉悅盧坤著加恩賞還太子少保銜並雙眼花翎其前次疏防亦難辭咎著帶革職留任又奏獲興販鴉片煙李亞祖等並節次查辦情形有旨嘉勉旋以濫保千總金振聲下部議鐫級十五年正月奏校閱營伍請將訓練懈弛之員弁分別降革勒休上是之四月奏請添鑄礮位酌派各臺應用其施放之法自南山至大虎分爲三段與沙角大角信礮聲勢聯絡並請於省東中流沙地方建設礮臺以資保障六月條奏廣東南韶惠廉瓊五府州屬水陸營汛分別移改增設以歸周密一永靖營遊擊改爲南韶連鎮遊擊移駐始興縣城並添設外委把總各一員額外外委五員兵丁三百五十名四會營都司改爲永靖營都司遷駐石碁原駐南村之永靖營守備作爲四會營守備其南村汛酌撥永靖營千總一員駐守一南韶連鎮標中營千總遷駐平石帶兵三十名作爲平石營專防樂昌縣協防外委一員移駐三鞏橋帶兵二十名作爲平石汛協防一永安營守備移駐連平州城作爲連平營守備連平原設之千總移駐惠化銀梅二圖適中之地作爲分防千總惠來營精海

所汛把總一員移駐連平州之中村作爲中村汛專防惠州協分防老虎坳把總移駐鐵籠嶂并酌撥外委一員移駐老虎坳欽州那陳司巡檢移駐連平州作爲上坪巡檢那陳原村莊歸長墩巡檢兼管一龍門營水師副將海洋是其專責應將冠頭嶺礮臺歸龍門協管轄原設冠頭嶺千總與三汊附近應兼管三汊汛卽將原設三汊汛千總一員兵七十二名移駐冠頭嶺臺汛並將冠頭嶺臺汛餘兵二十三名廉州營存城兵抽撥十二名東路公館汛兵抽撥十五名改撥靈山縣城守兵二十四名廣平檀墟那隆太平四墟各設卡兵五名陸屋墟添兵六名分段巡防一水師各營移撥千把總各一員兵二百名作爲儋州水師新英港等處三臺兩汛併歸儋州水師管轄并請於海口海安龍安三營抽撥撈罾船四隻以資巡緝閏六月疏言防黎善後章程一查拏漢奸以絕煽惑一設立墟場以通有無一嚴禁越境以杜勾串一講求水利以免荒旱一籌撥經費以備緩急俱荷允行八月以濫保千總游光順下部議鐫級是月卒遺疏入諭曰兩廣總督盧坤老成練達明敏有爲敷歷有年久著勞績前派辦回疆軍需告歲後賞加太子少保銜嗣因首逆就擒賞加頭品頂帶續於湖廣總督任內因剿辦湖南猺匪調度有

方邊平迅速復賞戴雙眼花翎並世襲一等輕車都尉世職自調任兩廣總督以來辦事認真結實可靠朕方資倚畀茲聞溘逝殊堪軫惜盧坤著晉贈太子太師銜兵部尙書照尙書例賜卹任內一切處分悉予開復應得卹典該部察例具奏伊子戶部候補員外郎盧端黼俟服闋後以該部員外郎遇缺卽補尋賜祭葬予諡敏肅子端黼襲輕車都尉世職廣東雷州府知府

張井

張井陘西膚施人嘉慶六年進士以內閣中書用十一年呈請改歸知縣原班銓選十四年六月選授廣東樂會縣知縣引見命調補河南正陽縣知縣二十一年九月緝獲紅鬚匪犯張四馬猴等七十餘名經巡撫阮元上其功賞加知州銜十月卓異引見得旨准加一級回任候升十二月調祥符縣知縣二十三年升許州直隸州知州二十五年馬營壩大工合龍井以襄辦迅速賞加知府銜道光三年五月升汝寧府知府四年九月擢河南開歸陳許道十一月賞三品頂帶署理河東河道總督五年三月奏豫東兩省黃河南北岸隄工亟須增高培厚以資捍禦請動項辦理復以豫省蘭陽汛柴壩迎溜緊要之處請拋護碎石四月勘估東境

泉河等廳屬各汛土石隄壩均有坍塌奏請趕緊修築以資挽運均如所請行七月奏豫省武陟縣攔黃民堰對岸驟長新灘挑溜北注以致刷灘偪堰旋經搶鑲新埽八段河勢改向南岸行走大溜立見外開官工民堰化險爲平上覽奏欣悅又奏各湖宣濟收蓄事宜嚴啟閉以節虛消勤疏濬以利收蓄並斗門引渠淤塞處請早挑挖八月奏汶上汛永定單閘引渠迭經汶河漲水收納微湖挾帶泥沙淤墊最甚應估挑深通以利運行均從之九月秋汛安瀾實授河東河道總督十月熟籌河工久遠大局疏云黃河自昔屢治屢壞原無上策凡事理宜探本原圖功當計久遠今日之黃河有防無治歷年伏秋大汛司河各官率皆奔走搶救其竭蹶情形直有惟日不足之勢及至水落霜清則以見在可保無虞而不復再求疏濬河身之策漸致河底墊高清水不能暢出並誤漕運又增盤壩起剝及海運等費皆數十年來僅斤斤於築隄鑲埽以防爲治而未深求治之之要有以致之也當此河底未能疏濬之時惟仍守舊規以隄束水而水不能攻沙河身日形淤墊必得有刷深之方始可遂就下之性上以所言切中時弊命會同兩江總督琦善南河總督嚴烜河南巡撫程祖洛等議旋請赴江省會同勘議全河大局十二

月奏言捕河廳屬陽谷等汛長河紆灣曲折易致淤淺應將灘工舊存河形改挑南北直河又運河汶上等汛泃河廳屬沛汛均多停淤亟須挑挖深通以期來春重運及守凍空船遄行無阻得旨允行旋因東河在城閘官應汝楫捏報到任率行出結並違例保題降三級留任六年二月奏言黃河病在中滿淤墊過甚自應因勢利導擬照前任大學士阿桂改河避險之法導使繞避高淤卽由安東縣東門北而另築新隄以北隄改作南隄中間抽挑引河由傍舊河行走至絲網濱以下仍歸海口又無淤灘阻隔似可暢順東趨去路旣暢土必掣深得黃與清平立啟禦黃壩挑溜清水暢出刷黃滌淤自有建瓴之勢此時剋期趕辦秋初卽可開新河啟禦黃壩軍船依次南旋來春漕糧照常行走上嘉其於河務頗有識見如所請行調江南河道總督旋以豫省南岸蘭儀北岸曹考兩廳河底增淤奏請疏濬並將隄頂所存土件一律築攔子堰以期有備無患上令署河東河道總督嚴烺照議妥辦五月偕兩江總督琦善副總河潘錫恩議以改河避淤口門有碎石阻遏諸多窒礙奏請開放王營減壩可期減落黃水刷滌河身得旨照議辦理六月奏河湖長水較驟見在嚴守黃河隄埽籌減洪湖漲水並請將高堰石工膨裂

處一律加鑲圈越埽壩抵護外分別拋添碎石從之旋奏河湖漲減工程平穩上嘉其籌畫有方七月給事中楊煊奏以啟放減壩黃流湍急鹽河勢難容納疏入詔并詳慎妥議尋覆奏該給事中原係稽考成案於今昔情形似未周知查前次開壩漫口時在五月本年啟放定在霜後來源斷無續漲惟見據委員稟稱去路未見通暢是該給事中所奏亦不爲無見因思減壩放時水勢或可暢達堵合後全河仍必擡高恐徒深四邑之災無補全河之病請仍改河避淤諭曰改河避淤原係張井始爲此奏迨調任南河與琦善等會議則以改河諸多窒礙請放減壩見已勘估興辦而復請改河似此游移豈大臣事君之道該督等惟當遵照辦理減黃出清俾河湖不致有意外之虞八月奏報開放減壩黃水涌注溜勢極爲暢達卽可剋期堵合得旨嘉勉十月以黃運湖河安瀾下部議敘七年三月會奏減壩合龍穩固全河挽歸故道上嘉之尋以桃汛經臨黃水續長倒漾仍係黃高於清禦壩驟難啟放擬將漕船倒塘灌運并辦理失宜自請議處上以興辦大工不能掣水通漕數百萬帑金竟成虛擲命降三品頂帶戴罪自贖四月欽差大學士蔣攸銛工部尙書穆彰阿勘查黃河下游砌灘阻遏情形旋值黃水落低啟放禦

壩以重運軍船全數渡黃入奏五月蔣攸銛等查明覆奏上以張井等急於奏功泥於師古咎無可辭仍下部嚴議議奪職命革去頂帶仍留河督任以觀後效六月奏春間啟放新河附近關孟灘一帶所墊皆係浮沙嗣經拉濬日久刷出河流大溜奔湍直瀉全河溜勢迅駛長水尙能容納又奏源源疊次報長豫籌宣洩上令加意防範務保安貼九月報秋汛安瀾得旨張井從前挑河辦理不善功過僅能相抵無庸議敘十一月中河廳屬鹽閘上游漲發跌成深塘有礙啟閉請改建雙孔石閘以資經久從之八年正月疏陳應辦要工四條一黃河尙須接築海口長隄並於下游多作埽壩以資掣刷一洪澤湖宜添建滾壩將堰盱湖隄幫寬一南運河宜將昭關壩擇基移建加幫東西兩岸繹隄一北運河宜修復運河廳之劉老澗石滾壩補還中河廳之南岸繹隄命熱河都統英和往南河會同蔣攸銛勘查應否興辦尋以河庫積年墊款並各員欠繳銀兩奏請設局清釐二月奏江境黃河宿桃以下各廳隄工單薄請撥銀趕辦均允行三月英和等查明添作埽壩不能疏通積淤毋庸置議其海口築隄可從緩辦餘俱應辦要工疏入照所議行四月奏全漕渡黃完竣上嘉其辦理妥速賞三品頂帶七月奏洪湖水勢接漲

不消值西北風暴堰盱湖隄間有掣場邵伯一帶隄工漫水已啟智壩稍資減洩請集料接護以保目前添發防料以備將來允之九月秋汛安瀾得旨嘉獎賞還二品頂帶並諭相機辦理以冀河湖漸復舊制十二月奏南河利害全係清江必清水暢出助黃刷淤則河務漕行兩有裨益惟黃水積年淤墊卽相機啟放禦壩亦僅能通漕不足刷黃必清高於黃數尺又必啟壩時多閉壩時少乃能暢出滌刷見在縱遇清水能出僅能免於倒灌不誤漕行殊未易收刷滌之效上諭以當激發天良力圖補救九年正月以清高黃水尺餘淤沙稍資刷滌奏請開放禦壩允之八月會奏王營減壩挑河案內關孟兩灘砌灘銀兩可否比照漫工之例分別著賠得旨實屬辦理錯誤與疏防漫工者不同著琦善張井潘錫恩攤賠以示懲儆十年奏報秋汛安瀾黃河兩岸險要處砌灘取直築作石壩其長河溜勢極暢各工修防平穩上覽奏欣慰下部議敘十一年正月戶部侍郎寶興江蘇學政白鎔赴南河抽查料垛旋經查明覆奏各廳見儲之料尙無虛鬆情弊惟料垛尙未到齊與該河督勒限年前全數到工之語已屬不符其揚河廳繕道工程率用尙未驗收之料揚河廳舊料大半色黑質朽實屬辦理不善上責張井未能查出

弊竇下部嚴議三月部議降三級調用命改爲三品頂帶仍降四級留任六月洪澤湖水異漲堰盱隄工危險奏請開放林家西滾壩並擬接放高郵四壩方可減湖漲而保運隄惟下游州縣不免被淹旋以馬棚灣十四堡揚河廳永安汛掣場漫口卽令趕放以平水勢疏入命與兩江總督陶澍商辦並急籌撫恤災黎七月上以高郵湖河漫口倉猝失事并身任河督咎無可辭下部議處旋報伏汛安瀾洪湖水勢遞消隄工平穩九月奏永安汛合龍旋報秋汛安瀾下部議敘十二月兼署漕運總督十二年二月以山盱信壩跌塘過深礙難修復奏請移建信新壩一座九月桃源縣奸民聚衆偷挖龍窩汛官隄掣動全黃大溜奏入上責張井不能先事豫防命摘去頂帶仍戴罪在工效力下部嚴議議奪職命暫留本任閏九月御史鮑文淳宗人府府丞潘錫恩俱以黃水入湖恐妨運道奏請豫籌疏濬命偕工部尙書穆彰阿兩江總督陶澍會勘籌議尋覆奏黃水入湖卽由吳城七堡仍入黃河其靠隄受淤處並非湖身旣不能入東清壩不能灌入運口又何能淤及淮安等處見在湖水已消二尺俟再稍落卽堵閉山盱各壩湖水專力刷黃以收蕩滌之效其潘錫恩所奏全黃入湖爲從來未有之事將來堵合復故勢必全

湖俱成平陸查河南儀封及桃源司家莊各漫口均與見在情形相同並未淤成平陸該二員所奏應毋庸議並以見在正河乾涸請將桃南桃北兩廳之間大加挑濬除去中滿之患俾禦壩以上漸就底平實係一舉兩得從之命陶澍張井相機妥辦十月奏黃運兩河水勢稍落並堰盱埭石穩固得旨獎勵十三年正月會奏桃南廳于家灣合龍上以張井若無頂帶不足以資彈壓賞四品頂帶仍戴革職留任八年無過方准開復三月奏革員賠修壩工請借項趕辦上以其不能秉公持正一味見好屬員嚴飭之尋因病陳請開缺允之以新任河督麟慶丁憂命井署理原缺六月偕陶澍奏請裁減錢家集都司一員把總外委各二員兵一百四十名移駐洪澤湖以資巡防下部議行八月諭曰麟慶已百日孝滿著卽前往張井俟麟慶到任再行回籍調理九月報秋汛安瀾下部議敘十五年卒子漢南河候補同知

魏元煜

魏元煜直隸昌黎人乾隆五十八年進士改庶吉士六十年散館授檢討嘉慶三年大考三等改主事籤分吏部四年補官五年充四川鄉試副考官七年三月充

會試同考官十一月選員外郎九年二月京察一等七月升郎中尋授江南道監察御史十年三月以兩廣總督那彥成請發往廣東以道府用六月諭曰魏元煜前於簡發廣東具摺謝恩時當經召見卽奏稱伊父年老患病惟因粵東見當需人之際不敢懇辭俟稍痊卽行起程今據呈稱乞假三月情殊可憫魏元煜著仍在京供職俟有御史缺出該部卽行奏補俾得就近侍養遂其烏私是月仍補江南道監察御史九月轉掌湖廣道監察御史十月丁父憂十三年服闋補山西道監察御史尋轉掌貴州道監察御史十四年請將京察一等人員無論本衙門曾否題升准於復帶引見時一體保送諭曰向來吏部復帶引見由本衙門題升者概行扣除若一體復帶是該員已邀升轉復得遂其外用之心此奏近於沽名邀譽著傳旨申飭十七年調掌河南道監察御史十八年二月京察一等七月授江蘇江安糧道十二月以前在御史任內失察本省逆匪林清滋事降三級調用十九年五月捐復原官六月授浙江杭嘉湖道九月調江蘇蘇松糧道二十年遷浙江按察使二十三年遷廣東布政使二十五年擢江蘇巡撫道光元年疏言江蘇倉庫虧缺節年追補未清若不暫免處分州縣官多方迴護仍不免那新掩舊致

滋輟請將從前完解不足各州縣暫緩議處俟新賦提解如額再行覈辦上如所請二年授漕運總督三年四月以軍船領運漕糧某幫應兌某倉須有定制江西或拈或派屢次更張未免日久滋弊除饒州撫州兩幫便兌饒州府等屬漕糧都昌縣輪兌尾幫均循舊章辦理餘十一幫領兌四十餘廳縣漕糧請將各倉秉公搭配照幫分爲十一籤分別掣定自道光三年新運起三年一屆由後推前挨次輪轉不必再掣如船多米少以後倉米數撥補米多船少以後幫船數找兌從之十一月因江西鉛山幫空運過淮夾帶私鹽漕標中軍副將滿坤查明往捕以軍器戕斃三命上以元煜疎於查禁下部議處尋議降調上加恩改爲留任四年三月以漕船水手恃衆逞刁凌虐商旅並有隨幫匪棍互相勾串疏定章程嚴禁之先是上以漕船私帶貨物偷漏稅課命元煜查明喫水尺寸移會山東巡撫委員在東昌一帶照冊查驗四月元煜奏喫水尺寸自乾隆年間定制後以灑帶搭運等項逐漸加增不能做照舊制請自本年爲始江浙以三尺八寸爲度湖廣以四尺三寸爲度上允之十一月以本年禦黃壩堵閉遲延黃水倒灌洪湖高堰山盱隄壩潰決命吏部尙書文孚禮部尙書汪廷珍前往查辦旋罷兩江總督孫玉

庭任以元煜代之玉庭仍以大學士留工督辦河漕諸務調倉場侍郎顏檢爲漕運總督協同籌畫時清水宣洩過多明年重運經臨不敷浮送玉庭援照嘉慶年間成案倡借黃濟運之策元煜亦以爲請且言自清江上游至平橋一帶閒段淤淺非大加疏濬則引黃入運無以爲受淤之地見在估計興挑俟明年夏至前黃水尙未渾濁之時將軍船竭力趨挽埽數渡黃諭曰魏元煜奏淮水洪澤湖水勢情形兼籌及清江上下一律挑濬寬深引黃入運不致受淤意在權宜辦理朕亦不爲遙制但河漕全局關係重大若祇顧目前之計將來運河受病愈深挑濬愈難誰執其咎文孚等接奉此旨卽著會同細心察看籌及萬全務令軍船早日北來而運河亦無後患方爲至善文孚等尋亦如元煜所請上從之五年正月以南河運口及禦黃壩高堰山盱各要工同時併舉請調原任江蘇按察使林則徐河南河北道鄒錫淳等來工分段督催允之二月啟禦黃壩引黃入運三月運口淤墊軍船艱於挽渡借孫玉庭奏請封雇民船盤查起剝並請帑一百二十萬兩諭曰前已動撥工需銀三百萬兩今復以轉輸之正供多此虛糜之帑項轉瞬明年重運經臨又將如何設法該督等清夜捫心能不爲朝廷度支計耶此時姑允所

請惟當激發天良加意撙節凡今歲回空開年重運應辦事宜務當及早籌畫勿得昧於機宜又致臨事周章動輒請帑先是上以借黃濟運究非善策欲令江蘇之蘇州松江常州鎮江浙江之杭州嘉興湖州等屬漕船試行海運下元煜等議元煜以窳礙難行奏覆四月協辦大學士戶部尙書英和請暫雇海船以分滯運酌折額漕以資治河復下元煜等議元煜奏請仍徵本色至海運事關伊始如蒙宸斷施行再督飭司道詳晰妥議上以其意存推諉非實心任事之道嚴飭之五月以黃水消落禦黃壩內外停淤旋即堵合在後軍船不能挽抵原議之高坂頭等處諭曰魏元煜本係漕督經朕簡授兩江總督漕運河工皆其所轄未能籌辦妥協有誤漕行著交部議處尋議降調上加恩改爲留任復授漕運總督擢山東巡撫琦善爲兩江總督六月因裏河揚河運道淤墊請築壩蓄水浮漾軍船並於淮城以上停淤最厚之處挑河切灘上允之旋以水勢短絀尙餘漕船一百萬石不能盤運請於淮安揚州所屬州縣暫行存貯俟明年搭運諭曰孫玉庭顏檢並不通盤籌畫天良何在可謂喪心之至魏元煜前此會同籌議一味扶同遷就亦不能辭咎琦善係新任總督無所庸其迴護著將見在未渡軍船究能全數盤運

與否抑別有籌辦之法悉心妥議由驛速奏琦善旋詳陳黃運兩河淤墊及幫船淺阻情形諭曰魏元煜身任兩江總督不特有兼漕務之責且漕督是其舊任乃坐視事機之敝壞隱忍不言糜帑病民是誠何心著降爲三品頂帶暫留漕督之任以觀後效是月卒子亨達江蘇揚州府知府亨埏二品廕生候選通判升用知州

陳中孚

陳中孚湖北武昌人嘉慶六年進士改翰林院庶吉士七年散館授編修十三年授山西道監察御史十四年五月奏稱戶工兩部各庫向派兵丁巡邏值宿以重庫藏其該班之筆帖式庫使等員在庫值宿立法本爲周密無如日久弊生屢經審辦偷竊案件總由該班各員品秩較卑易與兵丁串通滋弊實非詳慎辦公之道請令該庫郎中員外司庫各員按日值宿所有在庫兵丁由該員等實力查察以杜包班頂替之弊上允之七月奏言捐納人員各上司往往濫行薦舉如侵蝕賑銀之革員單福昌謀毒職官之革員王仲漢及已革知府王穀皆由捐納佐雜出身遞邀薦拔該員等不識詩書罔知大義不過以朘削民膏鑽營上官爲事請

嗣後將濫行保薦之該管各上司照常例加倍嚴議諭曰國家登進用人原不能盡拘資格各直省州縣中由捐納出身者固有不肖之徒卽正途出身各員其篋篋不飭逢迎大吏者亦不能保其必無全在該管各上司平日留心訪察秉公覈實必係循聲確著之員方予保薦庶可選拔真才若將夤緣鑽刺之劣員濫邀薦舉一經發覺該上司處分定例綦嚴卽如王穀王仲漢單福昌等之殘忍貪婪見俱已審明定讞其該管各上司重者已革職遣戍輕者降黜示懲並未稍從寬假若因此追溯從前濫保之各上司查明加倍嚴議則未免過甚嗣後各督撫於薦舉各員惟當倍加慎重以保薦王仲漢等劣員爲戒儻再有似此濫保致干憲典者必將該上司從重懲治亦不在多設科條也八月轉掌山東道十二月疏言科場防弊各條一試差進呈名單宜禁止洩漏一各省鄉試調派內簾宜加慎重一禁止闈員餽送士子以防傳遞之弊一隨帶家人書吏代爲士子夾帶宜嚴加搜檢一各省士子交通謄錄宜行申禁請飭令各督撫嚴禁並責成謄錄所官實力究懲諭曰每次考差外閒卽有如此傳聞及加以根究又不能確爲指實將憑何辦理嗣後閱卷大臣惟當守口如瓶各知愧勵倍加慎密以息物議有則痛改無

則加勉以全朕用人之苦衷至於外省調派內簾應用科甲出身人員聞各省士子往往有豫先拜謁交通關節之事該督撫等尤應慎選素行端方學問優長方行檄派毋得濫行調取致啟鑽營之端此外如鄉會試入闈各員於熟識士子致送薪水食物親至號口接談代改詩文查取題目及隨帶家人書吏代爲夾帶交通謄錄找尋試卷諸弊皆應嚴行查禁嗣後著派出之知貢舉監臨及各省督撫等實力稽查有犯必懲以期仰副甄拔賢才之至意十五年遷兵科掌印給事中十八年授山西河東道二十年丁父憂二十二年服闋補浙江寧紹台道道光元年四月調福建臺灣道六月擢四川按察使十月調廣東按察使二年閏三月遷布政使六月調河南布政使十二月擢廣東巡撫三年因秋審人犯原擬情實經刑部改緩部議降一級調用上加恩改爲降二級留任五年八月授漕運總督十一月奏言各省漕糧令旗丁由水次長運抵通溯自會通河成以後迄今數百年來凡河治之時漕無不治上年堰圩掣隄洪湖瀦蓄殆盡清口淤塞本年漕糧見雖悉數抵通實已大費周章所有來歲新漕除試行海運一百五十萬石外尙有二百四十餘萬石仍由河運前經兩江督臣琦善會同江南河臣嚴烺暨前署漕

臣穆彰阿酌定提用本年首二進空船接運盤壩章程奏蒙允准臣思海運僅可暫試盤壩亦屬權宜誠不若專循舊制設法蓄清敵黃俾禦黃壩早開庶幾道通而漕可無阻抑臣更有請者漕宜速而先在恤丁力本年運河淺滯旗丁之例貨折本矣盤壩拋散旗丁之耗米無餘矣重空住守多日見又不能歸次旗丁食用一切無不浩繁矣臣愚以爲方今時事之艱鉅莫有大於此者必應通籌大局未可稍存遷就一時之見蓋治河非專爲利運而利運則必須治河年來堅守禦黃壩專爲治河而設然但議隄防未求疏濬通計全河利害口門不能宣暢恐致他虞已屬可暫而不可久卽以漕務一端而論堅守禦黃壩在來年春夏之交則可儻秋開則漕務種種掣肘丁力日疲糜費滋甚實屬無從經理再查本年山東微湖啟放過多見僅存底水八尺餘寸該湖向來存水六尺卽難外注以二尺餘寸之水濟運二百四五十萬石之糧其艱鉅情形不問可知亦宜先期籌備設法濬蓄諭曰來歲新漕除海運外尙有二百四十餘萬石提用首二進軍船接運此係一時權宜自不如仍循蓄清敵黃舊章俾禦壩早開全漕無阻至堅守禦黃壩原爲治河前曾降旨令琦善等會籌疏濬若但議隄防不求刷滌口門不能宣暢必

致他虞著陳中孚商同琦善嚴煨趁此水落歸槽迅速相度機宜悉心妥議應如何設法疏濬俾河流通暢清水得以蓄足刷黃治河利漕漸復舊規該漕督等於艱阻之候力求救弊之方務須和衷商推計出萬全方爲不負委任六年七月調署山東巡撫十一月卒諭曰署理山東巡撫漕運總督陳中孚嘉慶年間由翰林科道外用道員經朕擢授巡撫漕督並命署理山東巡撫辦事實心克勤厥職伊年力尙強方資倚畀茲因病溘逝殊堪軫惜著照例賜卹所有任內一切處分悉予開復應得卹典該部察例具奏尋賜祭葬

楊懌曾

楊懌曾安徽六安州人嘉慶六年進士改庶吉士七年散館授編修九年二月上幸翰林院分韻賦詩懌曾與焉八月充順天鄉試同考官十三年三月充會試同考官十二月丁母憂十六年服闋改江西道監察御史九月命巡視南城奏言向例各省蠲免以奉旨日爲始其已輸在官者准作次年正賦乃不肖州縣於部文未到前催比更急爲肥己地且有奸猾書吏藉名墊納加倍索價等情見在直隸江南浙江河南已奉恩旨施行請敕各督撫申明曉諭俾小民知蠲免分數則官

吏無從欺隱諭各督撫嚴查飭令各州縣遇恩旨頒到之日徧行曉諭十月奏言向來揀發人員督撫不得指名奏請近日兩江總督百齡指名奏請道府揀發河工已蒙恩准自因河工緊要是以俯允所請臣恐此風一開各省紛紛效尤於銓選分發各例多有窒礙而私競資緣之習因此而起請嗣後督撫及河工差委乏員不得指名奏請上是之十七年正月轉掌湖廣道監察御史四月奏言京師爲首善之區商賈雲集列肆貿易宜肅清街道無許侵占軌轍以便往來命步軍統領及督理街道衙門隨時查辦七月奏各館書帙告成奏請議敘恩獎本屬從優甄敘不容過濫前恭纂高宗純皇帝實錄告成奉旨飭部妥議一准公平近日會典館議敘較之實錄館更屬從優爲從來各館所未有請下部悉心妥議以昭畫一奉諭曰所奏甚是近日諸大臣市恩者多任怨者少於政治大有關礙著王大臣會同吏部駁改原奏詳定章程具奏十八年四月遷工科給事中九月河南滑縣教匪滋事官兵進剿懌曾奏言向來辦理兵差不能不藉民力見在各處官兵前赴軍營需用車馬皆由地方官辦理稍不慎重往往騷擾閭閻至兵丁過境均於店鋪買食約束不嚴最易滋擾請敕地方官及帶兵大臣加倍慎重俾閭閻安

堵民不知兵則人心安而弊端絕矣又奏賊匪騷擾毗連三省河南報捷於前山東報捷於後直隸又報捷於後揣其情勢是賊趨河南則河南進兵賊趨山東則山東進兵三省並無會剿之事臣思賊勢多延一日卽良民多一日之害飢餓者受其驅使素封者遭其焚掠官兵多駐一日卽糧餉多一日之費見在已涉虛糜將來更易開浮冒如必俟欽差大臣齊集會剿則各省弁兵究屬何用請敕下三省督撫及領兵大員迅速進兵四面圍剿際此天寒氣冷賊勢日蹙無難一鼓殲盡也至軍需一項最易冒開向來各省多借軍需開銷以爲彌補虧空之計請敕下各大員先爲清查虧空務令各款項俱有指實以杜將來冒銷之弊均從之又奏稱本年江南鄉試辦理不善遲至初九日巳刻始行封門並聞士子有擁擠受傷之人命江蘇巡撫朱理明白回奏旋奏雖無擁擠受傷之人而封門遲延究屬辦理不善監臨提調等官一併下部議處十二月奏稱安徽穎亳等處毗連河南陳汝一帶居民多聚衆燒香越省赴會此等劣習不惟愚民耗財且傳聞惑衆卽恐流於邪教請敕兩省巡撫嚴行禁止諭曰此等風氣不獨穎亳爲然亟應申禁著各督撫嚴行出示曉諭以端風俗而正人心十九年三月充會試同考官轉戶

科掌印給事中八月奏言本年安徽省缺少雨澤糧價增昂聞廬州六安等處多
米商囤積賤買貴賣請敕巡撫委員查明該商所積糧石定價平糶上從之二十
年升內閣侍讀學士九月奏稱訪聞安徽潁州河南陳汝一帶有著名積匪劉鬼
子蔡保等朋比爲奸擾害地方命交兩江總督百齡等查辦俱得實二十一年升
太常寺少卿二十二年正月孟春時享讀祝錯誤懌曾以不諳清語得旨免議六
月升大理寺少卿二十四年二月會議四川李何氏拒姦殺死圖姦之周得信一
案刑部照絞候擬覆懌曾籤商應據婦女悔過拒姦例比照減等酌改會奏上甚
是之懌曾以首先看出賞加紀錄三次九月命提督湖北學政道光元年五月奏
當陽縣西北五里爲關帝陵相距數丈卽係沮漳匯流處請敕督撫委員查勘捍
以石隄以資保護又請撥襄陽府舊存入官租銀准作襄鄖兩府書院膏火均如
所請行十月升光祿寺卿二年差滿旋京四年升大理寺卿八年擢都察院左副
都御史九年四月升禮部右侍郎九月充武會試副考官十年四月雲南騰越廳
生員黃廷琮以父廩生黃金輅被廩生何自凱謀殺具控上命懌曾偕侍郎鍾昌
往鞠究出黃金輅失跌受傷自戕身死將黃廷琮照例坐罪御史宋邵穀奏貴州

幕友劣蹟及稅務科場供給各情形交懌曾等查辦又命翰貴州荔波縣書役陳履安等浮收舞弊拖斃六命河南鎮平縣民人王飛熊謀殺誣姦湖北保康縣民婦王程氏夫死圖詐未遂羅織多人各案分別訊實定擬如律十一月授湖北巡撫兼署兩湖總督十一年五月湖北省雨水過多江河並漲武昌漢陽黃州安陸德安荊州各府並荊門州屬各州縣多被淹浸客販稀少經懌曾會同總督盧坤奏請免納客稅並酌借司庫銀遊員率商分赴產米價平處購買米石酌減平糶其紳商富戶情願捐資以備賑恤俟事竣後再請獎勵得旨允行十二年正月奏稱荊州府濱江有萬城隄爲闔郡保障向歸水利同知專管近年江底淤墊一經水勢盛漲在在險要以致歲修土方逐年加增該同知不司民事呼應不靈辦理實屬掣肘請改歸知府辦理以專責成三月又奏稱湖北省上年被水較重之江夏等十六州縣前請於加賑後設廠煮粥至本年二月止第入春以來天氣凝寒麥發稍遲若將粥廠停止貧黎無以資生應請寬限至三月底爲止七月又奏稱湖北入夏以來江水復漲沿江州縣又被淹浸據天門縣稟稱被水較重見飭藩司馳往督同府縣妥爲撫卹此外公安石首等縣亦經委員勘報如需藩司督辦

亦卽飭令馳往妥爲督辦奏入上均從之十二月給事中瞿溶以接據假名已參恩施縣知縣左章兩列款致書具奏上命工部尙書穆彰阿前往會同總督訥爾經額查辦尋奏嚴訊左章兩實無其事諭曰此案以無根之詞誣訐巡撫大員及地方官至十餘員之多仍復隱匿姓名詭託他人致書其鬼蜮伎倆較之尋常匿名揭帖尤爲可惡著訥爾經額隨時留心察訪並密向被誣之員詳細推求再根查筆蹟一得端倪卽行密速緝拏從嚴奏辦無使此等奸詭險詐之徒倖逃法網十三年卒子用濬廣西鎮安府通判

邱樹棠

邱樹棠湖北漢陽人祖籍福建嘉慶七年進士以刑部主事用十四年補官旋升員外郎十六年正月署兩江總督勒保奏請帶往江南差委上特允所請並諭如果實心任事三四年後以知府補用五月勒保請鼓勵催漕出力人員得旨邱樹棠棠遇缺卽補旋署徐州府知府適徐屬邳蕭廳境縣拐山李家樓河水漫溢樹棠賑災得宜民賴以安十七年正月補揚州府知府二月調江寧府先是江都縣民冷鶴鳴謀殺縣民陳時序時序妻王氏絕食死鶴鳴狡供漏網幾二十年樹棠訊

明抵罪十二月總督百齡奏入命旌王氏誅鶴鳴樹棠加一級二十年擒獲安徽巢縣邪教首逆方榮升特擢江南道二十一年調蘇松糧道二十二年七月升江西按察使尋調山西按察使十月以前任蘇松糧道時失察宜興荆溪二邑漕糧米質甚劣降二級留任二十三年遷布政使二十五年調江西布政使道光元年四月護理江西巡撫廉得嘉慶十八年清江縣民婦謝周氏因姦毒斃親姑謝尹氏及本夫謝奉遠工人謝高遠三命又清江縣民周近彩名彩謀殺其父周富祥暨前撫臣瑞弼所鞠聶載彥因其弟聶禹彥犯竊偪母自縊圖賴事清江一邑逆倫凡三案奏請整飭吏治得旨嘉勉九月奏鄉試同考官實缺人員考取不敷請候補中文理優者一并與選又奏高安縣知縣王敦史詳稱民人張州蘊等以古樓岡山內有金礦呈請開採納課江西爲東南腹地四省通衢該山附近省城一經開挖必致聚集多人奸良莫辨國課之所增有限地方之爲害無窮應不准開採上俱從之十月奏准南安贛州寧都三府州秋審及軍流人犯改歸巡道就近審轉十二月升山西巡撫二年六月興縣被水請撫恤八月歸化城薩拉齊二廳所屬被水請撫恤九月奏鹽池東西各堰被秋水衝缺請築隄保護三年請借耗

羨銀兩修築汾河隄堰並挑挖引河工程又請借項濬渠以衛鹽池又請修理興
縣城垣挑挖河道四年二月奏請將歸綏雁平兩道所屬州縣之遺軍流徒及秋
審人犯俱歸兩道審轉四月請將河東鹽經歷兼管批驗大使移駐會興鎮以資
彈壓均得旨允行時榆次縣民趙添中京控閻思虎強姦幼女釀命有司不爲伸
雪敕下巡撫親鞫樹棠仍以和姦定讞御史梁中靖劾之命解交刑部訊實諭曰
邱樹棠以特旨交審之案不卽親提審訊任聽屬員草率遷就顛預入奏實屬辜
恩溺職卽將該撫革職亦係罪所應得姑著加恩降爲按察使以觀後效尋授福
建按察使以迴避祖籍調江西按察使六年命以三品頂帶署刑部右侍郎八年
正月實授七月以世襲男爵侍衛恩緒毆斃家人刑部審訊遲延不奏降二級留
任九年調倉場侍郎十年御史范承祖劾倉場衙門舉措不公上命侍郎祁墳副
都統福泰往按之尋查明本裕倉監督高學治前經樹棠等以辦事罷輒兩次咨
部嗣於保留學治摺內並未據實聲敘又富新倉監督恆齡病不任事亦不甄汰
請將樹棠等交部議處部議降三級調用上以其有意徇庇降三品京堂候補十
一年卒子端二品廕生江西龍泉縣知縣

孫爾準

孫爾準江蘇金匱人父永清廣西巡撫爾準嘉慶十年進士改翰林院庶吉士十三年散館授編修十七年大考二等十八年京察一等十九年授福建汀州府知府二十年升鹽法道二十四年八月遷江西按察使九月調福建按察使二十五年升布政使道光元年六月調廣東布政使尋授安徽巡撫八月調廣東巡撫九月仍調安徽巡撫二年三月奉旨清查虧欠奏言從前清查僅就州縣報冊查辦今欲清其源必先將司案互相鉤考如有參差卽從此根究其掩飾之故如款數相符卽確查民欠有無捏混再將歷年歷任經徵各款清出除代解前任銀數及應領款項並因公動墊可以追還之款此外尙有欠交卽係該員實虧確數又言根查底案必得其實在致虧之由然後可以酌定追補之法以杜續虧之漸上躋之七月豫省匪徒邢名章等糾衆百餘人竄入潁州府岳家莊屯聚聲言爲從前伏誅之教首王百川復讎爾準時赴江寧監臨鄉試至南陵聞警檄按察使惠顯馳往剿辦經知府劉珊遊擊彭鎮川率兵勇圍剿格殺邢名章及王百川之子興仁興義等餘黨悉數殲擒爾準尋馳赴潁州審勘匪黨朱鳳閣劉洪悰等三十餘

名置之法疏請添調營兵以資防禦並查沿途被災各屬請分別蠲緩賑恤得旨允行先是御史宋其沅條陳賑務積弊毋得以銀折錢爾準奏災賑大口小口應領銀數零星剪鑿折耗必多分釐高下亦非易辦災戶急於售食非易錢不便行用請仍循舊章上如其議三年正月調福建巡撫因延建一帶山徑叢雜盜劫滋多奏請於鹽庫曬帑息銀項下歲撥銀一萬兩爲懸賞購捕之費先後獲匪首闕春喬鄭思應邱五妹等戮之四年正月渡臺巡閱時畿輔糧價昂貴御史佘文銓奏請採買臺灣米石下戶部議覆稱由官採買不免勒指需索諸弊請暫弛海禁招商於糖船酌載官給印票運赴天津海口呈驗各按時價糶濟民食所過免其納稅上命爾準察看臺地情形分晰奏聞爾準傳示商人運米十四萬石刻期到津上嘉商人急公分別獎勵爾準又奏臺地南北袤延千餘里郡城設於臺灣縣者緣其初祇有鹿耳門一口可通舟楫嗣添設鹿仔港八里岔兩口而鹿仔港沙淤淺狹內山溪水奔匯入海別開一港在嘉彰之間曰五條港寬約數里巨舟通行無滯請將五條港開設正口便於商賈又噶瑪蘭山峻路險負戴難行不通百貨該地並無出產取資外來其地有烏石港加禮遠港皆可通四五百石小舟亦

須設爲正口以通貿易而便稽查七月回省五年九月擢閩浙總督十月條奏開關噶瑪蘭事宜一番社墾耕埔地分給民人番民均便一田園租穀照原議徵收減免餘租以紓民力一地土瘠薄墾未成熟埔地請緩報升科一建築城署地基占用墾熟田園店屋換給埔地另列一款徵收以免淆混一歷年水衝沙壓之田園應請豁除租賦一籌存常平倉穀以資儲備一額編文武員弁廉俸兵餉役食就廳所徵供賦支給一裁移營制新添官兵俸餉在於年徵供耗餘租鹽課等項支給一酌留餘埔以資歸化社生番生計一分別添設隘寮以防生番一編設保甲設立族正以資稽查約束奏入下部議行時閩省米貴復奏暫弛海禁募商販運浙米籌備民食允之六年五月奏臺地五條港向屬彰化南投縣丞專管相距窵遠請改屬嘉義笨港縣丞管轄相距三十里可資彈壓又噶瑪蘭之烏石港係頭圍縣丞所轄加禮遠港係羅東巡檢所轄兩口相距十餘里凡船到加禮遠港必由烏石港經過祇須將烏石港設爲正口其加禮遠港毋庸另設口岸統歸頭圍縣丞管轄如所議行時彰化縣居民李通等因挾粵民搜賊之嫌糾衆報復附近羽徒遂造言閩粵分類械鬪乘機焚搶數日之間沿及嘉義諸處蔓延未熄值

水師提督許松年赴臺巡閱爾準令其剿捕又以提鎮重兵俱駐彰化南界羽黨勢必北竄淡水兵力未能策應檄副將邵永福等帶兵渡八里岔趨艋舺以阻北竄之路總兵陳化成帶兵渡鹿仔港防其逃遁入海自赴廈門調度策應又以兵力未厚掩捕未能迅速復檄副將佟樞都司聶標文等分赴彰化淡水搜山圍捕復偵知淡水所屬之竹塹中港復壟等處俱有亂民焚搶與嘉彰亂民互相煽誘拒傷兵勇且慮被焚村民無家可歸相從擄搶其勢益張六月奏請令陸路提督馬濟勝移駐廈門自帶各營及水師兵渡鹿仔港駐彰化城李通逃入山千總關桂擒獲之因奏查滋事根由實由造謠焚搶並非反叛當以強盜論淡水以此分類報復當以械鬪論俱定罪如律爾準移駐淡水令各莊舉報義首查拏餘黨使閩人捕閩粵人捕粵以化其黨護之習閩地漢奸有通番語而與生番貿易遂娶番婦者俗名番割爲首奸民黃斗乃黃武二溫阿罄等久經盤踞三灣潛出劫掠彰化亂民滋事時有粵人潛與勾串率領生番出山助鬪戕殺多人爾準密令參將黃其漢遊擊謝朝恩謝建雍等由斗換坪南港鹽水港分三路入亂民竄匿後山峭壁懸崖無徑可尋兵勇皆攀葛附籐而上生擒黃斗乃等二十一名戮之遂

抵臺灣郡城撫卹難民奏請賞給口糧籌辦善後事宜以全臺形勢彰化居南北之中南路設總兵以下二十餘員北路至艋舺地方幾五百里僅有守備一員巡緝難周請調南路遊擊一員移駐竹塹卽以竹塹守備移駐淡彰交界之大甲又調把總一員駐銅鑼灣外委一員駐斗換坪歸北路遊擊管轄聲勢可期聯絡又頭道溪爲生番出入總路請於該處築土城撥熟番健丁充屯丁守之慎選總董責令約束子弟改建淡水土城俾資鞏固上並從之十一月事竣內渡命加太子少保銜賞戴花翎七年三月入京陛見諭曰孫爾準由福建巡撫擢授總督在任數載辦事勤能上年臺灣彰化亂民滋事該督渡臺督辦迅速歲功善後事宜亦俱籌畫周妥茲來京陛見著再賞給緙絲蟒袍一件大卷庫緞二匹大卷紅緞二匹伊子廕生光祿寺署正孫慧翼著加恩以主事卽用以爲封疆大吏克勤厥職者勸五月回任先是爾準自臺回省過莆田順勘木蘭陂水利陂圯建於宋熙寧間灌溉民田四十萬畝築石隄一千一百餘丈以禦海潮歲久傾圯奏請修復上嘉之八年木蘭陂工竣請將圯陂首功宋長樂室女錢氏列入祀典得旨每年於東作方輿時飭令地方官致祭一次以慰輿情而昭祈報又奏請修理貢院增號

舍一千餘間九年三月工竣奏聞命官紳等量予獎勵十月署福州府糧捕通判
閩縣知縣張騰以各任內虧短捐雜銀兩被參因稟許督撫收受門包各款命禮
部尙書湯金釗刑部右侍郎鍾昌往勘張騰所控多虛坐誣許論如律爾準亦以
失察家人得受銀兩交部議降二級留任恩准抵銷十一年二月爾準六十生辰
特賞御書錫羨巖疆扁額及福壽字並朝珠各物命其次子兵部主事孫慧翼齋
赴閩省宣賜九月以病請假命給假兩月調理十一月假滿請開缺命再賞給一
月十二年正月卒諭曰閩浙總督孫爾準由翰林出身出膺外任擢至閩浙總督
宣力有年海疆劇要正資倚畀上年因患病懇請開缺當經賞假調理方冀醫治
就痊不意遽爾溘逝殊堪軫惜孫爾準著晉贈太子太師銜照例賜卹任內一切
處分悉予開復應得卹典該衙門察例具奏伊長子舉人孫慧惇著加恩賞給進
士俟服闋後一體殿試次子兵部主事孫慧翼著加恩俟服闋後以本部員外郎
遇缺卽補尋賜祭葬予諡文靖十二月福建巡撫魏元烺題請崇祀名宦諭曰原
任閩浙總督孫爾準由翰林任道府洊擢至閩浙總督辦事認真不辭勞瘁前次
臺灣亂民滋事迅速蒞功善後事宜俱籌畫周妥著准其入祀名宦祠毋庸再交

部議二十九年奉旨入祀鄉賢祠子慧惇山東利津縣知縣慧翼賞兵部員外郎
升郎中候選道

清史列傳卷三十五終

清史列傳 卷三十六

大臣傳續編一

長齡子桂輪

長齡薩爾圖克氏蒙古正白旗人父納延泰官理藩院尙書自有傳長齡由繙譯生員於乾隆三十八年捐納筆帖式四十年補工部筆帖式旋充軍機章京四十二年調理藩院筆帖式四十六年升主事四十九年甘肅鹽茶廳逆回田五糾衆滋擾隨欽差大臣阿桂出師剿辦以功下部議敘尋升員外郎五十二年臺灣居民林爽文倡亂隨將軍福康安往剿以收復斗六門功下部議敘旋克復大里杙賞戴花翎五十三年爽文就擒復下部議敘五十六年廓爾喀賊匪擾後藏復隨將軍福康安往平之五十七年攻克噶勒拉等處山梁論功命以郎中升用五十八年補郎中五十九年遷內閣侍讀學士充玉牒館提調嘉慶四年五月玉牒告成下部議敘旋賞副都統銜署鑲黃旗蒙古副都統尋補鑲白旗蒙古副都統管理火器營事務調鑲白旗漢軍副都統六月授右翼總兵五年七月川陝楚教匪

分號滋擾達州青號首逆徐添德折竄湖北命長齡爲領隊大臣率吉林黑龍江官兵赴剿八月襄陽白號股匪高二馬五竄陝命改赴陝西時長齡路經湖北房縣會藍黃白三股賊匪分擾卽偕湖北巡撫倭什布會剿由南漳進攻上詔長齡卽將所帶官兵自爲一隊會同總兵明亮追剿旋以太平黃號首逆龍紹周由房縣東竄陝之紫陽長齡以陝重於楚請改赴陝西迎剿疏上諭曰長齡自抵楚以來總未接仗今又棄楚省之賊遠踰千里赴陝迎剿捨近圖遠是何居心且明亮前因楚重於陝折回楚境此時長齡又以陝重於楚並不與明亮倭什布在楚會剿徑赴陝省顯係各懷私意互相推諉長齡甫經帶兵不應卽染軍營習氣著傳旨嚴行申飭十月奏龍紹周股匪由陝竄楚請於陝省洵陽堵其竄楚之路上以觀望遲延嚴飭之尋以高馬二逆屯聚洵陽王家坪長齡率兵分隊直撲繞上山梁斬俘甚衆是月調湖北宜昌鎮總兵旋以高馬二逆竄擾湖北大坪一帶長齡由鮑家店繞至賊前分隊衝壓斬獲千餘乘勝由陳家莊進擊分路窮追生擒僞先鋒鄒順賊目楊大順王興餘匪敗竄鄧家河我兵復繞前兜截斬獲五百餘嗣高二股匪由楚竄陝追敗之於白河十一月高二折竄楚境長齡由竹山房縣一

帶截之殲賊百餘擒賊日吳登科等寘之法十二月高逆由興山東趨交戰垓長齡繞道遠安迎頭攻擊殲擒無算尋以徐逆等由陝竄楚與高逆合乃由獅子巖分路迎截殲賊五百餘追殺四十餘里敗之於瓦房口擒斬千餘六年正月追擊高逆於楚陝交界之大花園殲擒甚多會徐逆仍在楚境肆竄長齡復回楚協剿敗其衆二月追及於黃沙河燕子溝等處敗之尋探知白號股匪苟文明藍號股匪李彬由陝竄楚長齡倍道進擊扼其東竄之路戮偽總兵卜興昂偽先鋒魏鍾鈞於陣時徐逆股匪圖竄襄陽長齡於高尖山設伏截擊俘馘千計上嘉之下部議敘是月擢湖北提督三月由穀城冒雨進攻擒教首黃正魁等百八十人又剿賊於茅倫山殲擒七百餘旋聞苟逆遁入房縣遂由紫竹兜剿向八卦廟繞出賊後斬擒甚衆四月進兵長房河誅賊日向大等於灣腰樹是月命署湖廣總督五月黃號股匪張萬林從陝東竄鄖縣長齡督兵進剿時藍號冉學勝亦由陝竄楚復迎剿於秦家坪克之六月先後敗賊湯思蛟劉朝選於黃土坡劉家灣等處八月青號夥匪王山由陝奔楚長齡由上龔繞至鐘鼓山截擊箭斃偽元帥李大年擒偽總兵蔣天受殲賊七百餘捷入得旨嘉獎十一月襄陽黃號賊首曾芝秀自

興山邊境折竄房縣長齡由紫竹迎擊至二層巖擒斬甚夥復追至連湖坪敗之旋以各號餘匪合竄老居溝長齡率兵迎捕殲賊四百僞軍師鄭三元僞元帥褚貴悉就擒十二月復擊賊於泉溪上以長齡等未能擒一賊首剿平一股賊匪嚴飭之七年正月殲賊於摩天嶺餘賊遁紅巖溝長齡乘夜火攻青號餘匪剿洗殆盡二月襄陽黃號首逆樊人傑合曾芝秀各股匪竄擾興巴一帶長齡由興山會剿敗之於高良坪三月賊竄房縣長齡親率兵勇追殺二十餘里曾逆中箭遁四月殲賊於瓦房溝復敗賊於火石嶺五月通江藍號股匪蒲添寶東竄羅溪河長齡冒雨攻之策馬渡河落水賴侍衛富瀚等救援獲全得旨獎慰尋偵知樊曾二逆竄漁沱長齡偕將軍賽冲阿等奮力逼剿樊曾二逆投河斃上嘉之賞雲騎尉世職七月追剿蒲逆於川楚交界之巴東通城一帶八月蒲逆墜崖斃長齡由房縣向五臺梭捕餘匪殲擒甚多九月患病命回京調治另候簡用長齡自剿辦教匪以來疊奉恩賞白玉喜字牌四喜玉搬指大小荷包鑲瑪瑙方盒扇套香袋等件六次下部議敘七次八年二月回京閏二月以提督銜補京營右翼總兵三月調左翼總兵五月授古北口提督九年二月偕直隸總督徐檢奏請以趙州營千

總移駐茨溝茨溝營守備移駐趙州並酌量添撥兵丁如所請行十一月授安徽巡撫十年調山東巡撫未之任以蒙城匪徒余連糾衆習教抗拒官兵遂帶兵馳剿殲其黨四百余逆就擒並獲教首李朝士等磔於市上嘉其撲滅迅速下部議敘十一年奏請以范縣營守備移駐鉅野鉅野把總移駐范縣並籌議撥添兵丁諸事如所請行十二年正月以違例奏請攤徵河工歲料銀兩部議降調上加恩改爲降二級留任五月擢陝甘總督六月入覲時西寧賊番滋事命長齡馳往查辦八月攻賊於七爾窪蕪其廬追獲賊目班珠爾貢格等寘之法上以其辦理迅速下部議敘十月奏議善後章程一撥兵駐守黃河北岸一嚴禁通事人等私人番地以免勾結一編查蒙古戶口一循貴兩廳務在得人 不拘旗漢允之十三年二月奏請將寧陝鎮總兵移駐漢中附近之營分隸該鎮裁漢中協副將並裁寧陝原設參將都司各一缺守備二缺千總四缺把總外委各七缺步兵五百六十四名五月請以寧陝廳同知移駐寧陝新城仍將原設巡檢留駐舊治四畝地巡檢移駐新城又以青年驛丞改爲南星司巡檢均下部議行十二月以山東巡撫任內餽送欽差大臣廣興銀兩鑄級留任復以任聽藩司邱庭澐動庫款爲廣興

辦差事發褫長齡職發往伊犁效力贖罪十四年九月賞藍翎侍衛充科布多參贊大臣十五年九月升三等侍衛調烏理雅蘇台參贊大臣十六年五月授河南巡撫九月以前在科布多任內收受伊犁將軍餽送馬匹濫與供支下部議處時江南李家樓漫口淹及豫境長齡奏請賑濟災區分別蠲緩從之十月以搶築中牟隄工下部議敘十八年七月烏嚕木齊領隊大臣恆傑誣控都統興奎受禮物虧庫倉等款上命長齡爲烏嚕木齊都統往按得實恆傑戍伊犁九月復授陝甘總督十二月岐山縣匪徒萬五等因木廠停工乏食糾衆滋擾命長齡帶兵剿捕以飭屬防堵遞奏遲緩嚴飭之十九年正月萬逆由太行竄熬崖山內長齡伏兵山坳擒萬逆磔之復殲股匪麻大旗等於陣二月生擒股匪陳四等三百餘名捷聞下部議敘尋殲賊黨吳抓抓於黃官嶺獲龔貴等於階州漢江南北一律肅清諭曰長齡前在河南巡撫任內失察李文成等謀逆本有應得之咎見在陝省匪徒滋事派令總統師干剋期蕝事自當宥其前愆加以懋賞著給予騎都尉世職並賞戴花翎閏二月籌議善後五事一酌留官兵一撫卹被賊地方一稽查木廠傭工一修葺寨堡編記軍器一嚴辦游手匪徒得旨允行四月籌撥寧陝裁兵餘

地由營員經理備支公用並請酌添兵食又議奏南山鐵廠章程五條均從之旋賞給都統銜作爲伊犁參贊大臣二十年九月回匪圖爾第邁莫特聽從首逆仔牙墩滋事經伊犁將軍松筠於拏獲後卽行正法上以案涉疑似命長齡前往覆訊二十一年二月訊明覆奏松筠坐專擅革職留任五月授伊犁將軍二十二年二月復授陝甘總督六月奏請封閉哈密小南路以重巡防從之二十三年偕巡撫朱勳學政蘇兆登奏請將鎮西府迪化州鄉試卷編聿中字號於陝甘兩省取中原額外增額一名甘州西寧二府照寧夏榆林丁木字號之例一科與通省合試一科仍編聿左字號照舊取中如所請行二十五年二月西寧道雒昂揭參西寧辦事大臣秀堃演戲坐轎濫用委員秀堃亦劾雒昂累民病商命長齡兼署西寧辦事大臣偕欽差刑部侍郎文孚按之鞠實秀堃雒昂均褫職遣戍上以長齡毫無迴護特旨褒嘉十一月奏青海野番隨時肆劫請酌派沿邊汛兵合圍驅逐道光元年正月以陝甘山嶺崎嶇請裁減額設馬兵十分之一改補步兵從之二月晉太子少保銜三月奏請裁甘省遊擊一員都司五員守備四員添設千總把總共三員及酌留歸併弁兵事宜如所請行五月命協辦大學士仍留陝甘總督

任九月請將石峯堡守備外委各一員兵五十名改撥定安營底店汛千總改撥富平汛從之十月奏請入覲適山西巡撫成格劾前任學政陳官俊毆差納妾等款解成格陳官俊任命長齡暫署山西巡撫秉公查辦十二月訊明奏入成格降主事陳官俊降編修是月到京二年正月署直隸總督以遵化州民稠事繁請改州同爲理事通判如所請行會河北九族野番及蘊依雙勿兩族勾結循貴四川番戶滋擾上命長齡馳驛回陝甘總督任相機辦理三月檄西寧總兵穆蘭岱涼州總兵馬騰龍等擊賊於克克烏蘇及博洛托亥等處連勝之四月復敗之於烏蘭哈達及幫隴山中賊走哈吸格我兵分路夾攻追至駱駝山盡殲之捷上賞換雙眼花翎下部優敘時上御養心殿對雨捷報適至親書御製詩扇賜之詩曰優霑竟夜復侵晨天錫康年惠兆民溜挂虛檐風乍爽泉飛古本韻偏真乘時洗甲還滋穀伏願驅炎更淨塵恰值西陲馳捷報綏藩殄暴獎勳臣六月條上善後八事一蒙古宜體恤屬下以期富庶一蒙古宜正其衣冠以防詭混一蒙番宜嚴查歇家以清盜源一蒙古宜亟籌生計以免流離一野番宜嚴禁渡河以靖邊圉一野番宜選立頭目以資約束一野番宜墾田地以裕生計一番地宜嚴禁硝磺

以重軍火如所請行旋授閱兵大臣文華殿大學士管理理藩院事務八月命來京供職九月補鑲白旗漢軍都統十月以青海野番於奏凱兩月後復過河搶掠命拔去雙眼花翎戴用單眼花翎仍交部議處十一月回京賜紫禁城騎馬三年正月命在軍機大臣上行走二月充經筵講官四月管理戶部三庫事務充繙譯會試正考官並充總諳達殿試讀卷官四年十一月稽察欽奉上諭事件處十二月以大學士授雲貴總督五年九月調陝甘總督十月署伊犁將軍旋實授六年六月回疆逆裔張格爾入卡滋擾陷喀什噶爾英吉沙爾葉爾羌和闐四城七月命長齡爲揚威將軍與署陝甘總督楊遇春山東巡撫武隆阿率諸軍討之十月師抵阿克蘇時烏嚕木齊提督達凌阿已敗賊於托什罕河張逆復遣其黨據柯爾坪阻進剿之路長齡督軍攻之殲其衆上以長齡初到軍營卽獲勝仗賞賚優加十一月上念邊外沍寒賜裘服尋奏籌撥伊犁存儲糧石請由冰嶺轉運阿克蘇得旨允行七年正月奏言卡外部落皆爲張逆煽惑未可以孤軍深入必須歸併一路改由中道出其不備突往圍攻庶可反正爲奇易於得手上是其議又請將熟習情形之阿克蘇阿奇木伯克伊薩克帶赴軍前差遣二月師次大河拐賊

屯洋阿爾巴特夜犯大營擊卻之越日由中路進剿殲賊萬餘追殺三十餘里擒三千餘人上嘉其忠勇晉加太子太保銜下部優敘張逆復糾賊十餘萬抗拒於沙布都爾莊長齡督師至渾水河痛殲之斃賊日色提巴爾第於陣旋偵剿阿瓦巴特三路掩殺俘斬二萬餘殲賊日阿瓦子邁瑪底那爾巴特阿渾復追至洋達瑪河搽剿淨盡捷聞賞用紫韁三月移師渾河沿克復喀城上以張逆竄逸嚴飭之四月收復英吉沙爾葉爾羌以張逆尙未獲革去紫韁五月賊屯毗拉滿迎拒大軍夾擊之殺賊五千和闐克復七月奏請將波羅泥都之子阿布都哈里賞給職銜管理回衆諭曰所奏紕繆之極著嚴行申飭八月奏言張逆逃往卡外達爾瓦斯之藏堪地方藏匿經參贊大臣楊遇春楊芳分途出卡窮追至塔克爾打板地方斬馘千餘協領都凌阿侍衛色克精阿先後陣亡上以零星殘匪傷我官兵縱將該逆黨斬獲多名已屬不值調度失宜咎無可辭下部議處議奪職思予留任九月命來京供職十二月偵知張逆奔喀爾鐵蓋山密遣楊芳帶兵追之生擒張逆餘匪殲滅無遺八年正月紅旗奏捷上覽奏嘉悅諭曰該將軍等督率官兵不避艱險於卡外臨陣生擒巨憝檻送京師與檄諭外夷設計縛獻者迥不相同

其在事將領官兵等爭先效命自係該將軍督率有方當渥沛恩施用昭懋賞長齡著加恩錫封威勇公爵世襲罔替並賞戴寶石帽頂兩團龍補服授爲御前大臣賞用紫韁換戴雙眼花翎見據該將軍等派誠端等押解張逆來京進關後著沿途督撫派令文武大員帶兵按站接替護送無稍疏虞長齡自赴回疆總統諸軍宣力年餘今得蒞此大功旋師奏凱著俟那彥成到彼將善後一切事宜詳細交代卽迅速來京展覲以慰厯懷三月授正紅旗滿洲都統時回疆平定遵旨回京上慰悅賜御製詩扇詩曰欣聞馬首已旋東與朕同心建大功宣力三朝清且慎揚威西極勇兼忠瓊樓繪像羣英冠鐵蓋垂名衆望崇先遣延年昭眷注邊風永靖播仁風五月首逆張格爾檻送京師上御午門受俘禮成加長齡太保銜賞換三眼花翎繪像紫光閣御製贊曰進剿渠兇授將軍印總統王師皤皤英俊欲生生擒揚威威震重定新疆褒封宜晉又命鄭親王烏爾恭阿禮部尙書松筠等前往良鄉迎勞六月入覲行抱見禮於勤政殿並賜御用珊瑚朝珠四團龍補服諭曰長齡年逾七旬若令照常趨直翌衛奔馳轉非所以示優異長齡著不必進內侍班用示體恤復授閱兵大臣充總諮達管理藩院及戶部三庫事務七月

充崇文門監督八月正大光明殿凱宴恩賞銀幣旋充繙譯鄉試正考官授領侍衛內大臣十一月長齡生辰御書功臣像贊平格功成扁額黃扉贊化星辰近紫閣圖勳劍佩高聯句賜之九年二月充經筵講官三月署兵部尙書四月署吏部尙書充殿試讀卷官六月署正藍旗滿洲都統旋以崇文門查獲私帶鴉片煙犯下部議絞七月管理健銳營事務十年三月署步軍統領五月署戶部尙書九月回疆逸犯博巴克糾結浩罕入卡滋擾圍喀什噶爾英吉沙爾二城命長齡爲欽差大臣前往督辦軍務十月仍授爲揚威將軍十一月烏嚕木齊提督哈豐阿甘肅提督胡超等先後統兵進援二城圍解長齡以從逆者應誅波累者應宥並以大局已定所調吉林等處各官兵應卽撤令歸伍以節糜費因籌議辦理情形以聞上嘉其詳備先是喀什噶爾參贊大臣扎隆阿誣劾伊薩克助逆十一年正月命長齡按之長齡以所奏未實奏解扎隆阿任並請解京欽派大臣審辦上命伊犁將軍玉麟會鞫得扎隆阿誣劾狀奏聞請治如律尋奏言喀什噶爾地處極邊外夷由卡進城僅百餘里後路距阿克蘇二千餘里前此張格爾之亂喀什城被圍援兵不至四城先後失守致令參贊大臣坐困重圍不能制人而爲人制查四城

見有滿漢兵六千餘名即使每城酌增賊匪倉猝入卡紛紛檄調孤軍遠涉不能
迅至惟有量移統鎮以資控馭酌添兵力以壯聲威參贊總理八城應請改駐葉
爾羌將和闐領隊大臣移駐一員聽參贊調遣喀什噶爾留換防總兵一員在彼
駐守英吉沙爾仍駐領隊大臣一員在於葉爾羌阿克蘇適中之巴爾楚克添駐
總兵一員以爲樹窩子咽喉鎖鑰則六城相距不過數百里聲勢易爲聯絡並籌
議裁添弁兵換防移駐諸事下軍機大臣等議行八月加太傅銜九月請招民開
墾回疆西四城間地以供兵糈十二月命管理兵部事務十二年四月奏免諸夷
進卡貿易之稅以示體恤九月回京上以長齡年逾七旬於該旗分各衙門應行
帶領引見之日免其帶領十月管理戶部三庫事務十一月補總理行營大臣管
理善撲營虎槍營事務復充總譜達十三年五月管理戶部事務十四年賜紫禁
城乘轎十五年正月以收受浩罕夷使土物降四級留任革退御前大臣並罷管
理戶部事務二月兼管理藩院事務四月充殿試讀卷官七月充崇文門監督十
六年四月充殿試讀卷官九月管理戶部三庫事務十一月調鑲黃旗領侍衛內
大臣十七年正月賞穿四開楔袍長齡自道光二年至是年四屆京察均蒙溫諭

襄嘉下部議敘七月因病乞休九月復瀝情入告上慰留之十月上親視疾頒賞珍物十一月長齡八十生辰命晉一等威勇公御書綸閣勳耆扁額嘉乃壯猷資勩相錫茲蕃祉念戎功聯句並諸珍物賜之十八年卒遺疏入諭曰大學士公長齡由部曹荷蒙皇考仁宗睿皇帝簡膺外任洊列封圻朕御極後特任綸扉令在軍機大臣上行走乾隆嘉慶年間屢經出師著有勞績道光六年逆回滋事復帶兵申討克復四城生擒首逆懋著偉功年來管理部院事務詳慎勤能克盡厥職中外敷歷無愧贊襄茲聞溘逝實深震悼著入祀賢良祠賞銀二千五百兩經理喪事任內一切處分悉予開復應得卹典該部察例具奏其一等公爵著俟桂輪百日孝滿後承襲尋親臨賜奠長齡之孫麟慶賞給員外郎俟及歲時當差賜祭葬予謚文襄伊犁將軍奕山奏請人祀伊犁名宦祠允之十九年得旨嗣後每次謁陵禮成後將原任大學士公長齡一併開列具奏派員賜奠子桂輪由廕生於嘉慶四年捐納筆帖式十四年襲雲騎尉世職十五年授整儀尉十六年升治儀正十八年授乾清門三等待衛道光元年擢二等待衛四年升頭等待衛兼尙茶正五年授奉宸苑卿六年七月上授長齡揚威將軍剿辦逆回張格爾命桂輪隨

赴軍營十二月擢內閣學士兼禮部侍郎銜七年三月隨參贊大臣武隆阿由右路進剿桂輪以馬隊追賊至排子巴特擒斬無算復於沙布都爾摻捕餘匪遂復喀什噶爾下部議敘八年二月授正白旗漢軍副都統三月命在御前侍衛上行走四月長齡白阿克蘇凱旋上命桂輪馳驛往迎六月管理御船處事務十一月授鑲白旗護軍統領九年二月兼武備院卿調鑲黃旗護軍統領七月調鑲藍旗滿洲副都統十一月授兵部右侍郎十月調正藍旗護軍統領十一年三月轉左侍郎八月調戶部右侍郎管理錢法堂事務十月調吏部右侍郎十二年署戶部左侍郎十三年授右翼總兵十四年四月授右翼前鋒統領七月轉左侍郎十二月轉左翼總兵十五年三月署鑲藍旗蒙古副都統兼署工部右侍郎管理錢法堂事務閏六月轉左翼前鋒統領十六年正月署步軍統領五月擢鑲白旗漢軍都統十一月管理嚮導處事務十八年四月襲頭等公爵九月稽察右翼宗學二十年復授左翼總兵二十一年八月授熱河都統十月奏請添設擡礮二十桿於八旗閒散內揀選礮丁六十名令烏槍營協領等訓練人給銀月二兩於生息閒款內動撥得旨允行時礦匪李長春挾回民架名偷竊之嫌糾高升姜保玉韓士

全張遇汝等毀平泉州回民房屋百餘間桂輪督員緝獲梟示餘分別治罪如律二十二年奏裁額魯特養鷹頭目如所請行二十三年調烏里雅蘇台將軍二十六年調杭州將軍二十七年五月入覲以病乞假命留京調理七月卒遺疏入諭曰前任杭州將軍桂輪由世職侍衛隨父出兵洊擢侍郎都統旋復補授將軍中外供職二十餘年辦事慎勤克稱厥職前召見時察其病狀特旨開缺賞假兩月令其安心調理因念桂輪先世舊勳耆臣後裔方冀病痊擢用茲聞溘逝殊堪軫惜著加恩照將軍例賜卹晉贈太子太保銜並賞給廣儲司銀五百兩經理喪事任內一切處分悉予開復應得卹典該衙門察例具奏尋賜祭葬予諡恪慎子麟興襲公爵烏里雅蘇台將軍

文孚

文孚博爾濟吉特氏滿洲鑲黃旗人乾隆四十六年由監生考取內閣中書五十五年充軍機章京五十六年補官六十年升侍讀嘉慶四年川陝楚三省教匪煽亂隨欽差大臣那彥成前往陝西督辦軍需五年調補戶部銀庫員外郎七年教匪蕩平大功告成八年七月上幸木蘭舉行秋獮文孚中四矢賞戴花

翎十一月調刑部員外郎十一年五月上以文孚在軍機處行走多年辦事勤勉命以四五品京堂用六月升內閣侍讀學士十二年五月遷鴻臚寺卿六月命偕宗人府右宗人慶怡赴歸化城審辦土默特驍騎校旺當等呈控綏遠城將軍春寧參領棍楚克受賄營私各款尋訊明惟棍楚克賭博宿娼屬實餘坐誣按律懲辦七月擢通政使司副使旋以綏遠城將軍春寧山西巡撫成齡奏請將綏遠廳之渾津黑河等處地畝改徵折色其不敷支放兵糧米石將大青山馬廠餘地招墾補額上命文孚等就近詳細履勘九月奏渾津黑河共莊頭十三戶每戶原認種地六十頃嘉慶四年以地畝蠲壞奏准豁免一百八十餘頃餘仍交糧分種今莊頭等復以地畝生蠲請改折色查生蠲之地不過十之一二若因此一二分蠲地並將無蠲者全行改徵不惟現在兵糧不敷支放且腴蠲混淆亦不足以昭平允應請按地認真覈計不堪種藝者悉予開除其並無蠲性之區仍令照舊交糧無許妄生覬覦至大青山馬廠除已墾六千餘頃尙餘草地二萬頃原可通融籌墾惟滿營牧馬亦關緊要誠恐招墾以後游民趨利逐漸偷開招之易而驅之難不可不防其漸請將從前開墾並此次奏開墾若干頃外查明未開草地各按四

至界址堆立鄂博或空壕塹嚴禁偷開庶兵糈足敷支用而馬廠尙留有餘俾資
牧放下部議行十三年三月賞副都統銜充西寧辦事大臣閏五月授正藍旗漢
軍副都統八月以護送堪布喇嘛回藏酌減官兵致被果羅克賊番劫掠降二級
留任九月偕陝甘總督長齡奏鄂倫布拉克地方防河官兵擬仍照舊安設以資
彈壓諭曰前邢彥成辦理番案事竣請於黃河冰橋結凍後撥兵梭巡原因番族
甫經懾服藉壯聲勢斷無以天朝官兵爲蒙古防守之理今據稱蒙古恇怯無能
恐啟野番窺伺之心此次姑照所請嗣後察看情形逐年減撤並諭知蒙古努力
自強永靖邊圉設將來番衆復出滋事亦不妨奏明懲辦也十一月疏言青海蒙
古番子重財輕命習尙相同向來命盜等案一經罰服兩造欣然雖有夙怨深讐
立時冰解若按律懲辦不特犯事之家讐隙相尋卽被害之家亦以不得罰服心
懷缺望此種積習不可化誨查番子內附之始於雍正十一年經大學士鄂爾泰
等議纂番例頒發遵行聲明俟五年後再照內地律例辦理嗣於乾隆年間疊經
展限茲復奉命詳議竊思番民等如果糾結滋擾或情同叛逆或關繫邊疆大局
自當從嚴懲辦至其自相戕殺及偷盜等案向係罰服完結相安已久一日繩以

內地法律恐愚昧野番羣滋疑懼轉非撫馭邊夷之道謹將原頒番例繕寫進呈
或有刪改之處應請由部覈定下軍機大臣等議行十四年奏上年路刼堪布喇
嘛之果羅克經四川官兵剿擒諸番震懾沿途安靖其護送官兵本非定例若仍
撥派該堪布不免恃護疎防應請裁撤以省兵費從之十六年十月召回京十七
年三月調鑲白旗滿洲副都統兼署鑲白旗護軍統領四月山西商人郭常新京
控巡撫衡齡於晉商誤運一案辦理偏枯無辜受累上命文孚偕內閣學士阮元
往鞠查明吉蘭泰拖欠鹽課原係該商應賠衡齡以該商存公之銀攤扣未完之
課並無冤抑郭常新不候查辦輒填砌多款具控擬罪如律又以吉蘭泰鹽務屢
經誤運虧課命就近體察妥議章程六月奏言晉省介休以南皆係河東引地當
年課歸地丁吉蘭泰無課之鹽由黃河南下既占潞引且衝淮綱暢銷不計其數
是以定議每年吉引八萬七千五百道正雜課銀六萬三千五百八十兩引課皆
屬過多後因河東復商稽察嚴密吉鹽遂不能暢銷如前以致商人賠累誤運虧
課請停止吉鹽官運改併潞商認額以潞引之有餘補吉課之不足其吉鹽照舊
許民撈販惟限制水運只准至皇甫川而止不使充斥潞綱庶商民皆無擾累帑

項不致有虧並酌議章程八條一奏銷宜各劃清一吉鹽引日宜前後接算一商辦章程宜逐層分晰一領引納課宜使便商一辦鹽官員宜加考察一廉俸宜歸河東給發一早歸運本毋庸起息一舊存商物毋許勒抵奏入下部議行尋擢內閣學士兼禮部侍郎銜七月署鑲黃旗護軍統領十一月升刑部右侍郎十八年三月充左翼監督旋管理圓明園八旗包衣三旗事務四月授鑲白旗護軍統領兼鑲黃旗公中佐領六月戶部奏請更換左右翼監督諭曰數日前文孚面奏管理左翼稅務三月有餘今屆更換之期恐令接管伊才短不能照料若俟題本後卽不能辭免爲此先行密奏殊屬非是人臣黽勉奉公事無難易惟君所使若事之稍涉煩難者卽豫爲推卸設使彼此效尤甚乖敬事之道況密奏爲公則可爲私則不可文孚著加等議處尋降四級調用賞給二等侍衛仍留公中佐領在大門上行走九月因山東剿捕教匪命文孚前往會同藩司朱錫爵經理糧餉十一月擢內閣學士兼禮部侍郎銜十二月山東省賊匪肅清召來京供職會山海關副都統額勒金布拏獲匪犯馬泳幅等解京經軍機大臣覆訊供詞翻異上命文孚偕鴻臚寺少卿康紹鏞前往查辦十九年正月訊明覆奏馬泳幅等委無謀逆

情事因教匪煽亂出關投訪親友官兵圖賞妄拏刑逼誣服論弁兵如律並劾額勒金布張皇入告得旨額勒金布來京聽候部議卽以文孚補山海關副都統二月奏言吉林黑龍江凱旋官兵到關浮帶雇工及幼孫多名已截留暫爲收養雇工應聽自謀生理幼孩可否給滿營官員分領上命黑龍江將軍富俊等查辦旋經富俊查出逆犯之子田金山一名照例緣坐其餘有家者解送回籍無家者妥爲留養不使失所上以文孚首先具奏加一級二十年三月調馬蘭鎮總兵兼管內務府大臣十一月所屬內務府主事巴彥圖與拜唐阿圖善互相呈控文孚奏交刑部審辦命兵部左侍郎禧恩往鞫訊出巴彥圖圖善係屬姻親因借貸不遂致相稟訐按律辦理上責文孚於此等細事不能審實有心推諉褫花翎奪俸三年二十一年正月馬蘭峪朝陽洞道士雙陽書寫符呪爲人治病經古北口提督徐錕緝獲訊出祝繇科書係千總趙廷弼所給六甲奇門書係尙茶正廣英所給上命文孚查訊旋查明咨覆徐錕徐錕據以入奏並將雙陽解部上以文孚於倡習邪教重案不行陳奏僅以咨覆了事謫頭等待衛充葉爾羌領隊大臣越日文孚奏至并將趙廷弼及廣英之子解送刑部質審諭曰馬蘭峪較古北口稍遠是

以徐錕之摺轉於先一日齎到文孚尙非應奏不奏惟辦事拘泥人地不甚相宜著調補錦州副都統二十三年八月上幸盛京校射文孚中四矢賞還花翎九月調鑲白旗漢軍副都統尋授刑部右侍郎十月調正黃旗滿洲副都統時御史唐鑑參奏湖南武陵令顧烺圻營私貪婪各款命文孚往按之翰實烺圻遣戍先是廣西巡撫葉紹楨入覲布政使富綸護理巡撫疏參桂平縣知縣史棻遲誤兵米並及署藩司程卓樑嗣紹楨回任查明卓樑實已稟揭在先富綸情詞支飾意存挾制請旨審理富綸亦劾紹楨迴護卓樑及廣西吏治廢弛等弊上命文孚偕兩廣總督阮元查辦訊明奏入紹楨富綸等降革有差二十四年正月命在軍機大臣上學習行走嗣富綸復遣家丁京控阮元刪減原奏朦朧誣參上命文孚提訊尋奏阮元參劾過當請將阮元議處旋回京八月充崇文門副監督九月充滿洲繙譯鄉試副考官十一月命偕刑部左侍郎帥承瀛赴山東鞠獄會河南蘭儀汛河決山東巡撫程國仁以張秋黃流穿入運河奏請相度情形豫籌漕運諭曰文孚卽馳赴張秋查看明年重運北來由該處東坡西坡孰爲順利先行具奏一而前往河南查勘引河高仰之處辦理情形若何順詣馬營壩點查運糶物料實有

若干堞琦善等督辦是否認真仍在工次暫住二十餘日專催物料如有玩延卽行嚴參尋奏言東坡地勢不平重運行走不能無礙西坡本係漫地本年漕船回空已有成效來年重運似可通行設西坡存水淺阻難資挽運卽將西岸民堰缺處搭橋以爲繹路簽樁以施犁纜仍令漕船由正河行走至趙王河再入西坡較之全由正河工費省半從之時已命河南按察使德奎督挑引河復諭文孚先赴蘭儀一帶閱看淤墊情形督催挑挖十二月奏言儀封三堡至五堡灘與隄平受淤最厚急應挑濬先是有旨命文孚馳赴湖北審案旋以工程緊要命無庸赴楚二十五年二月奏督辦下段引河全竣上嘉其妥速下部議敘三月調戶部左侍郎會西寧道雒昂詳揭參西寧辦事大臣秀堃演戲乘轎濫用委員秀堃亦劾雒昂病民累商命文孚由工次馳往偕陝甘總督長齡按之鞠實秀堃雒昂均褫職遣戍上以文孚等毫無迴護秀堃之處特旨褒嘉六月回京七月仁宗睿皇帝升遐命恭理喪儀八月賜紫禁城騎馬九月充實錄館副總裁官調工部右侍郎兼署禮部左侍郎尋以繕寫遺詔內有錯誤諭曰七月二十五日慟遭皇考大行皇帝大故彼時軍機大臣敬擬遺詔朕在諒陰之中哀慟迫切未經看出錯誤之處

朕亦不能辭咎但思軍機大臣多年承旨所擬自不至有誤及昨內閣繕呈遺詔副本以備宮中時閱恭讀之下未有皇祖降生避暑山莊之語因請皇祖實錄跪讀始知皇祖於康熙辛卯八月十三日子時誕降於雍和宮復徧閱皇祖御製詩集凡言降生於雍和宮者三見集中因令軍機大臣明白迴奏據稱恭查大行皇帝御製詩初集第十四卷萬壽節率王公大臣行慶賀禮恭紀詩註恭載高宗純皇帝以辛卯歲誕生於山莊都福之庭又第六卷萬壽節率王公大臣等行慶賀禮恭紀詩註相同至實錄未經恭閱不能深悉等語朕敬繹皇考詩內語意係泛言山莊爲都福之庭並無誕降山莊之句當日擬註臣工誤會詩意茲據軍機大臣等稱實錄未經恭閱尙屬有辭至皇祖御製詩集久經頒行天下不得諉爲未讀實屬巧辯交部嚴加議處遺詔布告天下爲萬世徵信豈容稍有舛錯故不得不將原委明白宣示中外著將此旨通諭知之旋經部議奪職得旨文孚仍留軍機處行走著降五級留任六年無過方准開復十一月升都察院左都御史十二月充經筵講官道光元年正月擢禮部尙書三月授鑲藍旗蒙古都統四月充考試八旗繙譯官五月署兵部尙書八月授正黃旗領侍衛內大臣二年正月

署戶部尙書三月調工部尙書閏三月命偕內閣學士辛從益前往陝西鞫獄先是渭南縣商人柳全璧毆斃朱錫林知縣徐潤得贓朦結復豐釀多命至是文孚等廉得其實均寘之法又以西安府知府鄧廷楨堅執已見巡撫朱勳漫無覺察致屬員任性妄爲據實劾奏上以其細心推鞠秉公持正嘉之五月署陝西巡撫六月調鑲藍旗滿洲都統旋調吏部尙書七月授總管內務大臣三年正月以修理圓明園工程整齊賞加一級二月命偕刑部尙書蔣攸銛查看順天府屬被水情形三月奏言文安積水未消不能布種請加賞一月口糧大城水涸過半請設廠平糶並將漫口速籌堵築以防伏汛如所請行四月恭進仁宗睿皇帝實錄漢本賞文綺七月充崇文門監督九月充武會試監射大臣四年四月仁宗睿皇帝實錄告成賞加太子太保銜旋稽察欽奉上諭事件處十一月以南河堰盱潰決褫江南河道總督張文浩職解兩江總督孫玉庭任命文孚偕禮部尙書汪廷珍馳往查辦十二月奏言黃水迅至無常近來堵閉禦黃壩俱在五六月間今張文浩於禦黃壩應閉不閉五壩應開不開蓄水過多湖隄不能攝納致石工掣場一萬一千餘丈應遣戍伊犁孫玉庭兼轄河務有心徇隱迴護請下部嚴議上嘉其

察奏明晰會侍郎朱士彥條陳南河事宜命文孚等詳細議奏五年正月奏檢查檔案體察情形就原奏各條分晰妥議一原奏高堰石工必先圈築越壩戽水見底方可興工又從前議用坦坡之法於堰外添砌碎石因河臣屢易事遂中止此次應估計興修查修砌石工凡拆修到底者估築越壩俾石根顯露驗明估修其拆砌層數出於水而者均不築壩見在工作方興必須嚴立章程以免工員草率並請於石隄外用碎石拋成坦坡則堰旰石隄水無塌卸之虞一原奏高堰之內向有二隄一道近已殘缺應行培補查二隄係靳輔築做未完之工較大隄矮至二丈必須培增與大隄相平始足資重門保障計需費二百餘萬而大隄歲修仍不能免若但酌量培補實屬無益應請緩辦一原奏黃河盛漲之時務當兩岸分洩查黃河兩岸俱有宣洩之地南岸所洩之水遠近不一皆匯入洪湖北岸惟王營減壩減漲較爲得力擬將該壩內鹽河隄埽勘估加築以備大汛時啓放俾不致偏注南岸一原奏山旰廳屬五壩原以備減洩湖水立有水誌以時宣洩前因五壩開遲以致水逾常格請嗣後謹守舊章查仁義禮三壩自嘉慶年間移建蔣家壩迤南地勢高亢引河淺窄智信二壩又經擡高壩底洩水不能暢速應於仁

義禮舊壩處所添建石滾壩一座以防異漲一原奏黃河下游無隄之處接長新灘河流散漫不能東注將有下壅上潰之懼查海口並無疏濬之法惟有東水攻沙使之全力歸海自應於新隄之尾再行相機接築俟來年重運渡黃後由河臣勘明奏辦如所議行六年二月管理健銳營事務五月授閱兵大臣八月復充崇文門監督七年七月回疆克復四城晉太子太保銜十二月管理戶部三庫事務八年正月以回疆底定首逆生擒晉加太子太傅銜賞用紫纒時京察屆期上文孚贊襄軍務業經施恩毋庸再行議敘四月黑龍江將軍祿成有派兵不公交站餽養私馬及家人短發物價各款上命文孚偕刑部左侍郎英瑞馳往查辦鞫實奏請褫職嚴訊復查出祿成家人徐添桂詐騙銀兩按律問擬祿成於取供後忿悔自戕文孚等坐失於防範下部察議五月繪像紫光閣御製贊曰和而不同公正以清掌乎邦治請託不行凡思對命守口如瓶弼予以治洵乎悃誠八月補十五善射大臣九年三月署戶部尙書四月充繙譯會試正考官十年五月署鑲紅旗漢軍都統八月署鑲紅旗滿洲都統復署戶部尙書十月因失察捐納房書吏蔡繩祖私造假照降二級留任十一年正月充經筵講官三月署正黃旗滿洲

都統十一月調正白旗滿洲都統充國史館總裁十二月以吏部尙書協辦大學士十二年三月復署戶部尙書四月以前在鑲藍旗都統任內失察馬甲唐八邪教降三級留任自二年五年十一年至十四年正月四屆京察均下部議絀六月管理戶部三庫事務九月以失察候選道淡春臺賄囑吏部司員書吏得缺降四級留任十月諭曰昨日健銳營官員引見衣服樸素一洗向來惡習箭皆中靶崇實務本不失滿洲舊風朕心嘉悅之至文孚賞加一級十一月擢東閣大學士管理吏部事務十五年二月管理戶部事務尋授文淵閣大學士三月兼署戶部尙書四月御史金應麟劾奏東河總督吳邦慶保舉過濫動撥過多又吳邦慶奏前任河督嚴烺收受各廳銀兩及告病回籍需索盤費等情命文孚偕山東巡撫鍾祥查辦五月奏查明吳邦慶違例奏撥河員屬實所參嚴烺受賄並無實據殊屬錯謬冒昧嚴烺不遵部議改撥河員亦屬朦混取巧請分別議處從之六月因審訊已撤山東陽信縣知縣孫恩福逞刁瀆控一案未能按律懲辦降四級留任是月充滿洲繙譯考試官七月陳請解職諭曰大學士文孚在軍機大臣上行走有年謹慎小心前歲因年近七旬奏請解職朕察其精神尙健未經允准昨日召見

面稱兩耳重聽間復健忘據實陳懇情詞愷切朕不忍再違所請文孚著以大學士管理吏部事務毋庸在軍機大臣上行走以節勞動而示體恤八月署工部尙書九月充繙譯鄉試正考官尋以上默特貝子旗台吉那遜巴圖等呈控該札薩克貝子德勒克色楞各款命文孚馳往熱河偕都統嵩溥訊辦十二月訊明德勒克色楞於打圍時乘轎又不能妥辦案件並因揀派印務致招物議據供劾奏上以該貝子應如何定擬示懲文孚等並未議及交部議處十六年二月署部工尙書三月署戶部尙書四月充繙譯會試正考官五月因正白旗滿洲進士慶廉以廢疾應試文孚係本旗都統率准送考命革去都統奪俸二年七月因病陳請開缺諭曰文孚在軍機大臣上行走有年簡擢綸扉謹慎供職道光十三年間因年近七旬奏請解職朕察其精神尙健未經允准上年召見時面稱重聽健忘據實陳懇特降旨令其管理吏部事務毋庸在軍機大臣上行走以節勞動昨因感受暑溼賞假調攝本日復據奏稱耳聾頭暈恐致誤公懇解職任若不允所請伊心轉有不安文孚著以大學士致仕賞給半俸用示朕眷念勤勞優禮者臣至意二十一年卒遺疏入諭曰致任大學士文孚由內閣中書在軍機章京上行走有年

仰荷皇考仁宗睿皇帝疊加簡擢襄贊樞垣朕御極以來優加倚任簡授尙書都統進秩綸扉仍參機務公忠佐治清慎持躬在軍機大臣上行走十有餘年密勿贊襄深資倚畀管理部旗事務悉臻妥協道光十六年七月以老疾乞休不忍遽令解退因其年逾七旬恐其繫心職守曲加體恤准予致仕並賞給半俸歲賜葭枝方期永享遐齡長承恩眷遽聞溘逝悼惜殊深著賞給陀羅經被派惠親王綿愉卽日帶領侍衛十員前往奠醑朕回鑾後於二十一日親臨賜奠並加恩晉贈太保銜入祀賢良祠賞給廣儲司銀一千五百兩經理喪事所有原任內一切處分悉予開復應得卹典該衙門察例具奏伊孫筆帖式裕瑛著於服闋後以主事卽補用示朕篤念盡臣恩施無已之至意尋賜祭葬予諡文敬二十三年庫丁侵虧庫銀案發經查庫王大臣載銓等議奏歷任管庫查庫大臣分成攤賠已故者子孫減半代賠二十四年得旨原任大學士文孚宣力多年居官清正且其見在子孫係承嗣所有代賠未交庫款著加恩寬免裕瑛候補主事

盧蔭溥

盧蔭溥山東德州人乾隆四十六年進士改翰林院庶吉士四十九年散館授編

修五十年大考二等記名以應升之缺升用五十一年丁父憂五十三年服闋五十六年大考三等改禮部主事五十八年補主事五十九年充山西鄉試副考官六十年提督河南學政嘉慶四年丁母憂六年九月服闋十一月充軍機章京七年川陝楚三省教匪蕩平大功告成下部優敘八年二月補原官十一月升員外郎九年四月京察一等記名以道府用六月充浙江鄉試副考官十一月升郎中十三年升鴻臚寺少卿十四年三月直隸南皮縣革生徐丹桂遣弟丹臺控知縣彭希曾貪贓受賄上命蔭溥偕都察院左副都御史長琇往治其獄徐丹桂等坐誣治如律四月遷光祿寺少卿六月御史陸言劾奏浙江學政劉鳳誥代辦監臨印用聯號命偕戶部左侍郎托津刑部左侍郎周兆基按治之廉得其實劉鳳誥褫職逮問戍伊犁縉雲縣民人周愈滿控呂景貴毆斃其姪周三洪並命訊焉得其服毒圖害狀治如律十五年二月復奉命偕工部尙書托津按四川生員易元鈞控土司婪侈攘剝民人黃映川控知縣屈抑民冤事均作誣時京察屆期諭曰光祿寺少卿盧蔭溥在軍機章京上繕寫諭旨尙屬妥協節經派往外省查辦案件均無貽誤著加恩交部議敘五月給事中胡大成劾奏勒保任四川總督時有

匿名揭帖指訐總督藩司款蹟寢息未辦仍命偕托津按驗得實勒保坐應奏不
奏罷大學士六月以粵洋巨匪烏十二等殄除淨盡賞加二級十一月偕刑部尙
書勒保戶部左侍郎英和往涿州房山縣一帶查辦災賑旋以熱河買補兵米熱
河總管穆騰額直隸總督溫承惠籌議兩歧諭蔭溥等確查妥議章程尋奏言熱
河官兵歲需米石向由承德府及所屬廳州縣領銀採買今以市價昂貴似應量
爲變通請暫在通倉撥米八千石分運古北口作爲貼補兵糈之用仍按年由藩
庫支項補買還倉下部議行十六年三月上巡幸五臺蔭溥扈蹕會山西巡撫衡
齡奏解任鳳臺縣知縣陳紹貴懷挾冤單自經死上以情節可疑命偕工部右侍
郎成格往鞫尋訊明陳紹貴被人挾制自盡委審官太原府知府趙鴻文下部議
處閏三月崞縣民人溫繼倫以溫聯騰毆斃其父溫玉林懸案未定民人溫宣以
溫爾泰挾嫌縱火連斃二命正兇脫逃各在臺懷道旁叩闈復命赴代州審辦讞
定歷任知縣均坐玩縱奪職七月命以光祿寺少卿加四品卿銜在軍機大臣上
學習行走旋擢通政使司副使十七年四月遷光祿寺卿十一月升通政使司通
政使擢內閣學士兼禮部侍郎銜充文淵閣直閣事十八年三月授兵部右侍郎

八月充順天鄉試副考官尋轉左侍郎九月調戶部左侍郎時逆匪林清勾結豫東教匪煽亂陷滑縣並遣其黨潛入禁城謀爲變立即撲滅林清尋就獲蔭溥以晝夜勤勞加二級官軍旋赴滑縣教匪平下部優敘賜紫禁城騎馬充經筵講官十九年二月以豫東教匪既平南山匪徒旋就剿除諭曰軍機大臣贊襄樞務夙夜勤勞宜沛恩施以昭優獎盧蔭溥之子盧本著加恩賞給舉人准其一體會試五月充國史館副總裁九月御史申啟賢劾滑縣知縣孟屺瞻收留難民之女爲妾並私匿叛產等款命偕戶部右侍郎成格往鞫得實褫孟屺瞻職遣戍二十年九月署刑部左侍郎十二月以刑部案件因循積壓部議奪職上以蔭溥在軍機處事務較繁暫署刑部不能到署辦事不過一時疏忽改爲降二級留任四月失察司員保齡聽囑得贓降二級留任六月調戶部右侍郎兼管錢法堂事務二十二年三月擢禮部尙書充國史館正總裁旋調兵部尙書六月兼署刑部尙書上以蔭溥夙夜勤勞實心任事賞加太子少保銜八月上秋獮木蘭命署行在刑部尙書九月調戶部尙書尋以郎中錢學彬朦混截取未經詳查率行保送降二級留任十一月署刑部尙書二十三年四月署吏部尙書五月以纂輯明鑑體例不

合罷原纂各官特派總裁官另行編輯蔭溥與焉九月上恭謁祖陵禮成加二級二十四年十月蔭溥六十生辰御書延禧介壽額並諸珍物賜之二十五年三月充會試正考官七月仁宗睿皇帝升遐命總理喪儀九月繕呈遺詔副本誤紀高宗純皇帝誕生處所上震怒軍機大臣皆下部嚴議事具文孚傳蔭溥經部議奪職得旨盧蔭溥仍留軍機處行走著降五級留任六年無過方准開復旋調工部尚書道光元年調吏部尚書兼管順天府尹事務上以蔭溥職任較繁不必在軍機處行走俾其專心進署辦事自嘉慶十八年至二年正月四屆京察屆期均下部議敘三月因前在工部尚書任內失察司員承辦工程得受工匠銀兩復囑託看冊司員朦混算銷部議褫職上加恩改爲降四級留任三年正月得旨朕於本年元旦御殿受賀闈惠覃敷左右近臣允宜特加恩澤吏部尚書盧蔭溥失察承修工程司員降四級留任加恩寬免三月上耕藉以執事整齊加二級四年命無庸兼管順天府府尹事務六年復命兼管順天府府尹事務七年七月以吏部尚書協辦大學士八月上調東陵留京辦事九月御史賡福泰劾刑部司員那清阿濫刑拷訊西城捕役命留京大臣審辦蔭溥等僅以那清阿疏忽定擬並不將

飭提未到之賊犯關二聲明入奏降一級留任八年正月回疆肅清蔭溥以兼管順天府府尹支應兵差妥速無誤加一級八月充順天鄉試正考官自二年三年至九年四月三充殿試讀卷官十月蔭溥七十生辰御書贊綸錫慶額福壽字並諸珍物賜之十年九月授禮仁閣大學士十月以前在戶部尙書任內失察捐吏蔡繩祖等私造假照降三級留任十二月管理刑部事務十一年八月充順天鄉試正考官十一月充文淵閣領閣事十三年以病久乞休諭曰盧蔭溥在軍機大臣上行走有年嗣因管理吏部順天府事務較繁令其毋庸入直專心職守旋擢綸扉綜理部務殫心竭力辦事認真一切悉臻妥協上冬因疾請假復兩籲懇解退職任朕屢經降旨寬予假期並賜濩枝俾得資調養茲復奏稱病已五月之久醫治未能速效力請乞休情詞肫切若仍慰留伊心恐曠官轉難頤養非所以示體恤盧蔭溥著施恩晉加太子太保以大學士致仕賞給支食全俸用示朕眷念勤勞恩禮耆碩至意十九年舉行己亥科鄉試蔭溥以乾隆己亥科舉人至是重逢鄉榜經兼管順天府府尹卓秉恬等奏聞諭曰盧蔭溥久贊綸扉勤勞懋著致仕後未曾回籍年登八秩重遇鹿鳴洵屬熙朝盛事著加恩晉加太子太傅銜准

其重赴鹿鳴筵宴尋卒年八十遺疏入諭曰致仕大學士盧蔭溥由編修改官部曹在軍機章京上行走有年仰荷皇考仁宗睿皇帝迭加簡擢進躋樞府密勿贊襄朕御極以來優加倚任特畀綸扉宣力五十餘年老成練達歷事三朝渥承恩眷道光十三年三月以老疾乞休不忍遽令解退因伊年逾七旬恐其繫心職守特加體恤准予致仕並賞給全俸歲賞濩枝時加存問本年重遇鹿鳴晉加太子太傅銜方冀迭沛恩施遐齡永享茲聞溘逝深爲悼惜著賞給陀羅經被派成郡王載銳帶同侍衛十員前往奠醊並加恩晉贈太子太師銜入祀賢良祠賞給廣儲司銀一千五百兩經理喪事所有原任內一切處分悉予開復伊孫盧光燮著賞給舉人准其一體會試尋賜祭葬予諡文肅二十五年入祀鄉賢祠子本戶部員外郎孫光燮更名慶綸翰林院編修

阮元

阮元江蘇儀徵人乾隆五十四年進士改翰林院庶吉士充萬壽盛典纂修五十五年散館授編修五十六年二月大考一等第一名超擢詹事府少詹事入直南書房充石渠寶笈協修日講起居注官十月遷詹事充文淵閣直閣事十一月詔

充石經校勘官五十八年提督山東學政六十年八月調任浙江學政九月擢內閣學士兼禮部侍郎銜嘉慶三年八月升兵部右侍郎旋調禮部右侍郎仍留學政任九月任滿回京仍入直南書房四年正月轉左侍郎署兵部左侍郎三月充經筵講官尋調戶部左侍郎充會試副考官七月兼署禮部左侍郎九月兼管國子監算學十月署浙江巡撫五年正月實授先是浙洋有安南夷艇及鳳尾幫水澳幫箸黃幫盜船數百隻出沒爲患元赴溫台督飭定海鎮總兵李長庚率兵攻剿並捐廉添設大船大礮以資攻擊陸路兵按三成挑選專司訓練得旨嘉獎二月檄黃巖鎮總兵岳璽剿箸黃幫獲船十二生擒盜匪一百七十餘人箸黃幫由是遂滅又訪獲南沙海濱疊次窩劫盜犯陳阿三等奏入諭曰阮元到浙未久於積年窩盜要犯卽能飭屬嚴拏具見緝捕認真任事實心克副委任著交部議敘又諭此等盜犯經刑部覈議亦斷無監候之理該撫審訊明確卽應恭請王命正法何必拘泥請旨俾要犯尙稽顯戮耶五月夷艇復竄至浙元馳赴台州請以定海鎮總兵李長庚總統溫州黃巖兩鎮協同策應並請調粵閩舟師會剿允之六月夷艇私入浙洋之松門山勾結水澳鳳尾各幫屯聚伺劫元駐師台州先布聞

謀令互相猜忌水澳幫駛退颶風夜起賊艇百數十號爲海濤衝擊覆溺無算元檄兵乘機奮擊棄艇登山元復檄各陸路兵赴山摻捕先後生擒八百餘賊得安南僞總兵印首從以下治如律難民及脅從者釋之黃巖縣知縣孫鳳鳴等擒獲安南僞總兵倫貴利磔於市自是夷艇鳳尾幫皆滅九月檄黃巖鎮總兵岳璽温州鎮總兵胡振聲會剿水澳幫於東白洋礮沈船一奪船二生擒三十餘人賊潰水澳幫亦滅十一月疏言清查倉庫彌補情形大略以本官尙在卽分別咨追若參革身故卽著見任次第彌補每年節省浮費按月解交以補本缺之虧次劃補同府州縣次劃補通省最苦州縣十年以外守此不變始能清楚得旨所辦是彌補之法宜緩不宜急於官有益於民無損日計不足月計有餘六年正月以兩浙所屬歷代帝王陵寢及名臣先賢祠墓舊冊罣漏甚多考訂補闕咨部註冊又奏温州披山洋礮沈侯齊添盜船一生擒十二人定海鎮游擊許松年雪夜入馬磧洋獲盜船一生擒十九人礁潭洋截獲盜船一生擒十人均報聞五月土盜張阿愷等九十名悔罪投誠奏請分別入伍安插七月請以蕭山牧地每畝減徵錢一二百文不等其課銀上中兩則者俱改爲下則請於牧租錢二萬二千二百五十

餘串內歲減三千三百串有奇竈課銀三千六百九十餘兩內歲減一千九十九兩有奇別籌生息以足旗營之用藉紓民力如所議行八月檄李長庚岳璽會剿盜匪蔡牽於三盤洋獲船二生擒十五人十一月疏報臨海開墾田六十四畝有奇升科七年八月請添設乍浦卡房增兵防守彩旗門西山觜添設大礮二門大劈山添設大礮八門得旨允行時有賣油幫土盜楊課等百數十人投誠繳鐵礮六十二門槍械百餘器奏請分別入伍安插十一月以南沙私鹽充斥請發帑官收皆從之八年正月偕學政文幹會奏創修玉環廳學並添設學額以温州府學訓導改爲玉環廳學訓導閏二月奏請立杭嘉等八府昭忠祠以歷年剿捕洋匪傷溺官兵二百九十餘人從祀上躋其奏嗣洋盜有黃葵者聚十餘船創名新興幫又稱再興幫在洋面行劫元檄黃巖鎮總兵張成捕之獲船三生擒七十餘人五月奏台州颶風玉環廳屬慘捕登岸洋匪八十餘人六月入覲賞賚錫宴有加上詢問海塘元奏經費不敷請以嘉慶五年所停西湖歲修銀及商捐存息銀統交商領生息歲撥一萬六千兩爲西塘掃工之用允之九月回任十一月總兵胡振聲夜襲蔡牽於南麂洋未獲參將李景曾等復襲之礮沈船三生擒九十六人

蔡逆遁元親往寧波檄提鎮分擊於南北甌洋礮沈船一獲船二生擒八十餘人先是給事中蕭芝奏請採買米石由海北運有旨命元議覆是月疏陳浙西地狹民稠蓋藏不足向皆仰食客商接濟連年荒歉買米補倉若再採買恐妨民食況海運經數百年不行猝支國帑輕試風濤非慎重之道米多則未能猝辦米少則於事無濟未便舉行報聞九年正月奏張成追捕黃葵幫於茶盤洋三蒜洋獲船六礮沈船二生擒百餘人二月京察屆期上以元有守有爲清儉持躬下部議敘六月偕閩浙總督玉德會奏海盜蔡牽滋擾請以提督李長庚總統閩浙兩省水師不分畛域合力兜拏是月總兵胡振聲率兵赴閩在臺灣陣亡元以遊擊高麒瑞救護不力請奪職八月奏提督李長庚率將弁攻蔡牽於定海北洋獲船一礮沈船一生擒五十餘人蔡逆自是遁閩時杭嘉湖三府水災元請借支帑項運川楚米減價平糶並倡捐賑恤分別蠲緩借給籽種緩徵漕幫扣項覈減鹽價皆如所請行時江南清口水溢元請漕船迎兌並採購運米十二萬五千石搭解通州得旨所辦俱妥十年三月黃葵幫盜首五百餘人以十船赴温州投誠繳械元以其人衆分別安頓黃葵幫自是亦滅奏入上嘉其辦理妥協又疏報定海縣開墾

塗田二千二百餘畝升科上軫念浙省偏災恩賞米十五萬石命元分派被水地方辦理平糶閏六月丁父憂十一年上以元將服闋命署福建巡撫兩江總督鐵保代元陳奏因病籲辭上命鐵保派員診視十二年十月服闋署戶部右侍郎十一月命赴河南審辦已革勒休知府熊之書控案讞定問擬如律尋補兵部右侍郎復授浙江巡撫暫署河南巡撫十三年三月赴浙諭曰阮元去浙江巡撫之任已及三年今復任其地務當認真籌辦以靖盜源洋面斷絕接濟爲制海盜第一善策如果查拏嚴密一切無從透漏盜匪劫掠商漁貨物亦不能上岸銷賊匪衆生路旣絕黨夥必日行渙散沿海姦民不能與盜往來無從覓利亦必各謀生路阮元抵任後應卽督同温州黃巖定海三鎮等於扼要口岸實力稽查不得空言駐守方爲有益七月蔡逆與洋盜朱潰合幫嘯聚百船擾定海洋面元馳赴寧波檄三鎮防剿令海口大船收入口內小船不許出洋以防被掠且杜接濟時將屆鄉試奏以學政劉鳳誥代辦監臨事八月以藩庫平餘銀八千兩修杭州石塘尋擊敗蔡逆遁入閩洋十一月蔡逆復由閩竄浙元赴寧波檄兵會剿敗賊於落伽洋礮沈船一生擒賊匪八人及之於馬磧山又乘勝追至黑水洋蔡逆棄船乘夜

仍遁入閩洋初元之在豫也餽送侍郎廣興銀千兩廣興因事被訐元以是罷吏議降四級調用上加恩改爲降三級留任十四年正月奏請以河莊山煎篷改歸許村場管轄黨山煎篷改歸錢清場管轄二月溶西湖時有土盜亞盧幫爲患海上元檄溫州鎮總兵李景曾捕之四月臨海縣知縣王維堉率鄉勇追捕定海鎮總兵朱天奇繼之先後共獲八船擊沈船一擒斬百數十人餘匪南遁尋滅元飭提鎮專注蔡逆分兵隔其餘船五月疏報寧海開墾沙田一千六百二十六頃升科六月修錢塘江岸七月奏福建提督王得祿浙江提督邱良功會剿蔡逆於寧波獲船一俘馘百餘人時御史陸言奏參浙江學政劉鳳誥代辦監臨舞弊上諭元曰朕聞劉鳳誥沈湎於酒任性妄爲罵詈教官生員以致下人肆行亂法等事汝係巡撫又係伊同榜必應嚴參以示大公於天下若意存徇庇恐汝不能當此重咎尋奏劉鳳誥實無使酒諸事惟代辦文闈監臨場規從嚴士子懷恨致滋物議得旨所奏皆非確事命侍郎托津周兆基光祿寺少卿盧蔭溥赴浙按問八月奏覆劉鳳誥代辦監臨時印用聯號屬實附參元查訪不確含混覆奏上以元袒庇同年不顧公議交部嚴加議處尋議上得旨阮元止知友誼罔顧君恩輕重倒

置卽著革職九月上五旬萬壽覃敷愷澤以元官聲尙好學問素優賞給編修在文穎館行走十五年四月擢侍講九月充日講起居注官十六年七月擢詹事府少詹事十二月擢內閣學士兼禮部侍郎銜十七年四月命偕內閣學士文孚赴山西鞫汾陽商人郭常新控巡撫衡齡案坐郭常新安控又議吉蘭泰鹽務章程以聞語詳文孚傳五月擢工部右侍郎兼管錢法堂事務命赴河南按林縣劉鳳翱控告知縣李道謙新收漕糧事讞定治如律八月授漕運總督十八年二月會同兩江總督百齡奏添海州揚州官兵俸餉令鹽商捐辦有旨嚴飭斷不可行仍交部議處旋降二級留任又奏微山湖水淺不敷濟運請加隄閘從之五月全漕渡黃以盤查迅速下部議敘又請修邳宿一帶河閘諭曰阮元奏請添閘所論甚爲通暢邳宿一帶每年因水淺加築草壩臨時多購土方事後又聽埧卸下年所挑之士卽上年所築之壩官員利每年開銷一經建閘水蓄舟行無可藉口遂多阻撓其實添建一二閘所費無多而年年轉可節省此事不可再有因循七月上以江廣各幫趨行較遲敕元督運事竣不必陛見卽督飭幫船迅速南旋趕兌新運十九年閏二月全唐文告成以元前在文穎閣行走議敘加二級三月調江西

巡撫九月奏獲謀逆姦匪訊出胡秉耀買得殘書內有陣圖及悖逆俚語卽向逆夥邱添澤楊易盧勝輝誇稱楊易以朱毛俚可以假託前明後裔邀赴謀逆僞封胡秉耀官職輾轉糾約入夥見往奉賢縣查辦上以元到任未久卽將鉅案立時發覺溫諭嘉獎賞加太子少保銜賞戴花翎並翎管荷囊賜之十二月獲傳徒匪犯鍾錦瀧等寘之法二十年正月奏獲進賢縣結盟擔匪曾文彩等擬罪如律二月奏停止官辦粵都煎磺又奏江西倉庫錢糧皆有虧欠清查之法可一試不可屢行州縣虛出通關膽愈大而辦理愈難國帑反多無著請立二法一則以交代爲盤查一則以比較驗彌補皆從之四月貴溪安仁兩縣首先拾獲逆詞鈐用九龍硃印有在江寧聚會等語奏入命交兩江總督百齡查辦旋獲逆犯方榮陞伏誅二十一年正月奏改南昌府爲衝繁難三字要缺請旨簡放贛州府爲題缺歸調南昌府同知爲衝繁中缺歸選下部議行六月禱雨廬山請以廬山列入祀典從之閏六月調河南巡撫十一月擢湖廣總督十二月入覲二十二年二月奏修省垣江隄七月建江陵范家隄沔陽州龍王廟石閘請移湖南沅州涼傘通判駐晁州改爲直隸廳通判移黔陽訓導一員爲晁州訓導苗民應考除去新童字樣

以民籍應試增定學額並添設巡檢一員下部議行八月調兩廣總督十二月奏建大黃窖大虎山兩礮臺二十三年正月請撥通省兵二百名以百名安置閩西把總領之八十名安置大虎山千總領之二十名添置焦門礮臺外委領之裁水師千總一員陸路把總外委各一員下部議行二月密陳豫防英人事宜略言英人恃強桀驁性復貪利以目前情形論似宜多鎮以威未便全綏以德否則所求或遂所望愈奢貪得之心曾無厭足倘敢擅入內洋卽隨機應變加之懲創一則停止貿易一則斷其食用買辦一則開礮火攻惟當嚴飭各礮臺備弁督率兵丁不動聲色暗加嚴備彼國伎倆惟恃船堅礮利一經上岸則無拳無勇與東倭不同或謂攻擊恐生事端此似是而非之論也疏入奉硃批總須德威相濟不可妄動慎之五月兼署廣東巡撫復密陳英人情形略言定例夷人貨船不准擅入內洋天朝界限極爲嚴肅向設各處礮臺正爲豫防偷越之用查英人懼強欺弱其伎倆長於水短於陸強於外洋弱於內洋汪洋巨海之中橫行無忌不值與之相角倘違例禁駛進礮臺地界則以石臺之礮攻木板之船使彼望而生怯其勢如魚困轍一人之力足以制彼數人蓋勢強則彼不敢輕犯理足則彼不敢藉口各

國商船皆知彼犯我禁非我輕啟彼釁也得旨國家撫馭外夷具有一定規制尺寸不可稍踰遵守者懷之以德干犯者示之以威如該英人不遵定制妄希進口亦先常剴切曉諭以杜其覬覦之心倘竟恃強不能不使懾我兵威總之懷柔之道當先以理勝使直常在我則彼無所藉口斷不可孟浪從事亦不可過示怯弱也又奏改廣州佛山同知爲要缺在外調補改瓊州同知爲簡缺仍駐本府毋庸駐崖州彈壓從之三十四年三月已革廣東布政使富綸遣家丁呈控元於柳城縣鄧學厚命案刪減原奏朦朧誣參上命刑部右侍郎文孚提訊尋奏言阮元審擬並無錯誤惟指富綸爲偏徇又署藩司程卓樑僅止會銜乃與署臬司宋鳴琦並請嚴議均屬過當請交部議處得旨阮元審辦鄧學厚一案均無錯誤不必再以詞語小疵責備原奏之人著無庸交部義處又以廣西六塘墟地方盜犯劉老晚連劫翁一恕等六家元坐失察部議降一級調用上以元駐紮較遠改爲降一級留任閏四月請築桑園圍石隄以衛民田添設豐順縣留隍巡檢一員裁稅課大使一員移黃岡司巡檢駐饒平柘林地方移大埔縣大產司巡檢駐白猴地方將同仁巖上三甲等處撥歸兼管六月請裁各營繪船彭仔等船改造大八獎船

爲深洋捕盜之用八月奏請疏通潮橋鹽商積引並展徵課項均從之是月復兼署廣東巡撫疏報南海嘉應等縣補墾沙田五千三百三十七頃有奇升科請飭學政以雷瓊二府歲科兩試連考俾士子少涉風濤之險用示體恤得旨允行十月來京祝嘏命與正大光明殿筵宴屢拜玉如意文綺荷囊之賜二十五年正月復兼署廣東巡撫七月奉命馳赴廣西查辦灌陽添弟會匪旋獲唐三莪等治如律道光二年五月奉命查閱兩廣營伍奏廣東省額設馬步戰守兵六萬二千八百十五名又添設六千四百九十名請於馬多營分酌裁馬五百三十五匹以馬兵作爲守兵廣西省額設馬步戰守兵二萬一千四百三十名又添設二千一百五十三名除地居邊要額設無多營分外酌裁兵六百三十名上九所請九月兼署學政兼署粵海關監督查禁夷船夾帶鴉片煙參摘洋商伍敦元頂帶二年二月請撥存庫馬甲銀一萬兩生息爲駐防八旗文武舉人會試之用得旨著照所請每名給二十兩外再加三十兩其驍騎校領催前鋒及筆帖式進京引見各員除原賞二十兩外亦著加恩加賞三十兩是月拏獲高要會匪陳亞等實之法先是英人護貨兵船泊外洋伶仃山登山汲水與內地鬪毆互相傷斃英人延未交

出兇手三月元飭弁兵封該夷貨船禁止貿易尋呈請畏服元諭嗣後護貨船俱有大班管束定爲例閏三月入覲賞文綺三年正月復兼署廣東巡撫七月請建肇慶南門外礮臺又奏改平樂府通判爲平樂縣縣丞移駐沙子街地方以資彈壓均下部議行四年正月請定洋米易貨例諭曰粵海關向准洋米進口糶賣免輸船鈔糶竣回國不准裝載貨物近來該夷因回空無貨壓艙難禦風濤且無多利是以米船來粵者少自應量爲變通著照所請准原船載貨出口徵收稅課以示體恤二月奏廣東沿海匪徒肆擾民居勒令給錢名曰打單辦案例無明文請援恐嚇取財例分別首從從重治罪五月請於番禺縣屬添建倉屋二十四間並女監提牢等房凡外解命盜人犯及罪止軍流者均歸監禁令河泊所大使就近兼管皆允之六年調雲貴總督七年三月添設安順府屬郎岱廳學增定學額移永寧州訓導爲學正以滇省產鹽子井衰旺不齊雲龍等五井缺額在石膏等井代徵抵補又以新開鹽井試辦期內向以溢課充公請於奏銷款內歲撥三千兩爲公費於奏銷時造冊報部均如所請十月籌邊費一萬兩招募猓猓三百戶駐騰越廳屬邊界給以山地屯種以防野匪從之八年二月奏滇鹽溢銷諭曰阮元

奏滇鹽大有起色上年鹽課奏銷溢餘銀一萬五六千兩覈計本年較上年溢餘數倍之多請將此項銀兩酌撥量濟邊費所辦甚好嗣後於每年奏銷時查明以一半報部一半存庫以備邊用三月奏獲謀刻石篆寫造逆詞匪犯王士林等寘之法八月請於昆明改建新倉以一米易二穀存倉又奏運銅官沿途支借水脚其項每至虛懸請加給運費得旨增給運費由湖北江寧二省藩庫各半發給作正開銷滇省於請撥銅本銀內扣除免其入冊報銷十二月入覲賜紫禁城騎馬十年三月龍陵廳芒市土司放承恩所屬夷人波岩翦滋事元檄官兵剿捕餘匪潰散十一年奏騰越廳邊界原駐猓猓夷練三百七十戶以防野匪每年公項本數支用得旨准於司庫備邊項下先借二萬兩飭發該府廳置田招佃其銀由本省捐廉分補十二年六月奏黎平各屬離省較遠秋審之案請歸貴東道審勘移報臬司以免拖累九月奏裁雲南曲靖同知一員彌沙井大使一員曲靖大理永昌三府司獄三員順寧府知事一員裁貴州盤石司巡檢一員錦屏縣知縣典史訓導各一員所管地丁糧米撥歸開泰縣管理添設教諭一員作爲錦屏鄉學歸開化考試添設錦屏縣丞一員悉如所請行是月命協辦大學士仍留雲貴總

督任十三年正月請於雲貴兩省才具較優之遊擊遇有題升參將缺出兩省互爲升調下部議行二月入覲時元七十生辰御書亮功錫祜額福壽字及珍玩文綺賜之三月充會試副考官十四年四月奏普洱府思茅廳所屬車里土司刀繩武遠逃地方安靖撤回兵練另請襲職如所請行十五年三月召來京擢體仁閣大學士管理刑部事務旋管理兵部時越南保樂土州目農文雲內鬩爲防兵追捕走死事竣奏撤兵練八月來京上以元年老免帶引見十二月兼署都察院左都御史十六年二月充經筵講官四月充殿試讀卷官教習庶吉士十七年三月上詣丫髻山拈香命留京辦事十八年三月上恭謁西陵復命留京辦事五月以老病請致仕諭曰大學士阮元由翰林洊陟封圻敷歷中外經朕簡任綸扉綜理部務盡心職守清慎持躬前因病請假復經具摺籲懇解職朕疊予假期俾資調養茲復奏稱老病日增醫治未能速效力請開缺情詞肫切若再慰留伊心恐曠官轉難調攝非所以示體恤阮元著准其開缺以大學士致仕加恩賞給半俸用示朕優待耆臣至意八月奏回籍日期諭曰大學士阮元敷歷中外宣力五十年清慎持躬克盡職守前以年邁多病再三懇請解職已俯如所請准其致仕在家

支食半俸茲據奏明擇定行期朕心彌深眷注著加恩晉加太子太保銜從茲怡志林泉善自靜攝俟辛丑年朕六旬萬壽慶辰屆時身體康健卽行來京祝嘏以慰厯念二十三年元八十生辰御書頤性延齡額敷歷宣勤嘉茂績優遊養福錫蕃釐聯及壽佛如意諸珍物頒賜之二十六年舉行丙午科鄉試元以乾隆丙午科舉人至是重逢鄉榜諭曰大學士阮元品端學醇勤懋著現在年逾八秩重遇鹿鳴筵宴熙朝盛事著加恩晉賞太傅銜准其重赴鹿鳴筵宴並在籍支食全俸七月具摺謝恩得旨覽奏均悉願福壽日增以待三賦鹿鳴之盛事也二十九年卒遺疏入諭曰致仕大學士阮元由翰林洊躋卿職久任封圻朕御極以來優加倚任特畀綸扉宣力中外五十餘年學裕識優勤勞懋著道光十八年以老疾乞休因其年逾七旬曲加體恤准其致仕並在籍食俸丙午科重遇鹿鳴筵宴晉加太傅方期恩施豐沐永享遐齡茲聞溘逝殊堪悼惜阮元著加恩照大學士例賜卹所有任內一切處分悉予開復伊子候選知府阮祐著俟服闋後遇有知府缺出卽行選用廕生阮孔厚及伊孫舉人阮恩海均著俟服闋後交部帶領引見候朕施恩用示朕篤念蓋臣優加節典至意尋賜祭葬予諡文達咸豐二年三月

入祀鄉賢祠九月入祀浙江名宦祠元淹貫羣書長於考證嘉慶十二年奏進恭注御製味餘書室隨筆二冊所著有經籍纂詁十三經校勘記山左金石志兩浙金石志石渠隨筆疇人傳小滄浪筆談定香亭筆談廣陵詩事學經室集又編輯皇清經解一千四百卷子常生直隸清河道福甘肅平涼府知府祐候補知府孔厚一品廕生引見以員外郎用孫恩海舉人以主事用

王鼎

王鼎陝西蒲城人嘉慶元年進士改翰林院庶吉士六年散館授編修八年大考二等升詹事府右贊善充實錄館纂修十年擢司經局洗馬十一年升翰林院侍講十二年轉侍讀十三年三月充會試同考官時高宗純皇帝實錄告成下部議敘五月遷詹事府右庶子十四年二月轉左庶子三月升翰林院侍講學士十一月轉侍讀學士十七年二月授詹事府少詹事四月稽查右翼宗學七月升詹事十二月提督江西學政十八年四月擢內閣士學兼禮部侍郎銜十九年升工部右侍郎兼管錢法堂事務均留學政任二十一年六月調吏部右侍郎七月轉左侍郎二十二年四月充殿試讀卷官五月充教習庶吉士六月廷臣有以山西藩

司習振翎年老健忘接見屬員皆需家丁指告謁見巡撫私帶門丁竊聽公事錄底存貯以備詢問又將忻州吏目費鈞調入藩署幫辦幕務等款入告命偕刑部右侍郎成格往按得實振翎褫職遣戍巡撫衡齡失察罷任十二月署刑部左侍郎二十三年二月兼管順天府府尹事務三月以畿輔亢旱糧價加增請撥倉麥一萬石設廠平糶允之七月署工部右侍郎兼管錢法堂事務旋派查三庫十一月刑部已革書吏劉錦江以主事余繼生爲四川劍州牧呂兆麟消弭處分勾通書吏莫泳泉等裁割彙本等情具控命會同軍機大臣按治之鞠實余繼生遣戍餘俱按律治罪二十四年四月充殿試讀卷官閏四月調刑部右侍郎六月充浙江鄉試正考官九月調戶部右侍郎兼管錢法堂事務十二月復署刑部左侍郎充經筵講官兼管順天府府尹事務二十五年四月因審訊兵部行印被竊日久未能定讞降三品頂帶旋審明行印確於前次秋圍在巴克什營地方遺失賞還頂帶九月充實錄館副總裁十二月署刑部右侍郎道光元年二月命偕工部右侍郎那清安赴直隸按大名府知府王履泰河南押運同知陸有恆挾優飲酒一案鞠實治如律五月山東齊河縣知縣蔣因培以前任臬司童槐調缺不平在官

廳咆哮巡撫錢臻參奏命偕戶部右侍郎成書往按之尋訊明蔣因培因兗州府屬調補州縣疑有私弊欲行稟阻被劾後輒敢刊刻稟呈詩句肆行傳播實爲狡詐擬遣戍軍臺錢臻辦理草率童槐向錢臻面稟情形訊非誣捏惟回奏諱飾擬議處分察議有差上以錢臻年老平庸降補湖南布政使餘如所議行時河南原任鄭州牧降補佐貳阮文燾以見任知州孫傑隱匿錢糧捏欠冒豁等情赴京呈控詔往鞫之廉得其實孫傑坐監守自盜例擬罪阮文燾認回攤捐之款尙欠銀一千二百餘兩巡撫姚祖同奏請降補尙無屈抑第交代實無虧缺且控告孫傑得實請以佐貳赴部選用時有直隸永年縣民郭萬清京控知縣馮鈺浮收釀命命往審辦旋訊明得實科罪如律九月詔審完縣監生劉天保京控知縣黃觀藉差苛派押斃人命各款尋訊明黃觀於辦道派夫額外加增罔恤民隱請褫職遣戍二年正月升都察院左都御史二月偕兵部侍郎玉麟赴江西鞫獄先是江西巡撫瑞弼劾守備徐富國求索得財而富國則以文武各員得受鹽規承審官袒護不辦等詞赴京呈控至是訊出星子縣青山鹽店向有餽送各衙門規費徐富國署南康營都司時於商人致送錢文移縣查辦並無絲毫入已斷難坐以贓私

該撫計贓擬徒實非其罪應請註銷其所控規費等情俱經得實本應量予開復惟曾與商人私相往來且將教諭黃中理所交規費清單任聽營書捏添通稟又指爲知縣邵自本所交希圖挾制情殊狡黠業經革職應毋庸議餘俱按坐如律四月回京行至直隸會河南陳留縣訓導朱成勳京控知縣趙錦堂給賑不實命回豫審辦五月奏查嘉慶二十四年黃水漫溢陳留縣被淹成災趙錦堂承辦災賑於所屬之韓岡集各處並未親往查勘任聽地保開報致有遺漏應褫職遣戍六月復偕玉麟赴直隸鞫高邑令范澍捏控趙州牧李景梅挾嫌出考獄成范澍坐誣控奪職戍新疆李景梅訊無挾嫌不公及收受規禮情事惟於密出屬員考語致有洩漏實屬疏忽應下部嚴議均從之尋以河南儀工奏銷有以少報多之弊解巡撫姚祖同任詔往查辦七月署河南巡撫九月奏查明儀封大工計用銀四百七十五萬餘兩迨辦理奏銷覈與部例成規不符是以查照歷次奏過工程並奏過料物土方價值合之豫省成規互相增減將稽料引河等欸增銷銀一百三十萬兩夫工麻斤各項下減銷銀一百三十萬兩報銷雖有通融而銀數仍歸實用疏入諭曰儀工用項該省歷經辦有成案委無含混支飾著卽令覈實報銷

十月丁父憂五年四月服闋命以一品銜署戶部左侍郎五月命在軍機大臣上行走賜紫禁城騎馬六月充浙江鄉試正考官時有德清縣民婦徐倪氏謀斃徐蔡氏捏稱自縊一案懸宕三年未能平反臬司王維詢因與署巡撫黃鳴傑意見不合自經閩浙總督趙慎畛參奏有旨著王鼎出闈後偕巡撫程含章提集嚴審尋鞠實坐徐倪氏謀殺律寘之法黃鳴傑下部議處原審原驗各官褫職鑄級有差六年三月充會試副考官九月補戶部尙書十二月有大興縣民陸有章等呈請於宛平等五州縣開採銀礦經戶部據呈具奏諭曰各省銀礦向係封禁況畿輔重地且附近易州一帶詎可輕議開挖戶部堂官並不詳加體察隨同畫諾著交部議處旋議降二級留任七年二月以六十生辰御書宣勤受祉額福壽字並諸珍物賜之七月充教習庶吉士尋因回疆克復四城得旨一切軍報承書諭旨軍機大臣夙夜殫心勤勞懋著王鼎著加太子少保銜十二月充經筵講官八年正月回疆底定首逆俘擒賞戴花翎尋繪像紫光閣御製贊曰國之大臣先乎品行命贊樞機謙謹申敬職司度支精勤報稱靖共乃心以襄庶政三月長蘆鹽政阿揚阿奏鹽務疲累日深商欠日重請停議改樁另籌歸補帑課經戶部查明所

奏加價帑本等款多有未符上命借戶部右侍郎敬徵馳赴天津確查妥議四月
疏陳察訪蘆商積疲情形若照限起徵必致那移懸墊弊竇叢生若再量加展緩
是仍爲苟且目前之計伏思整飭鹽務首重年清年款先將節年帶款逐加釐剔
則見年正款自不難按額清完查原奏以道光二年以前未完銀九百餘萬兩作
爲舊欠三年以後未完銀二百餘萬兩作爲新欠分別歸補爲緩舊徵新按年清
款起見惟所擬歸補章程請以堰工加價二文全數給商實屬漫無限制擬自本
年六月爲始將每年所收加價以一半解部充公以一半抵完商欠俟新欠抵清
再將舊欠接續抵完其未完道光六年七年加價銀二十七萬餘兩請於本年八
月起按半年一提分五限徵完解部惟八年春夏二季應徵加價係未經滿限之
款未便壓後帶徵應令本年照數提完以免延宕至蘆商生息帑本內有直隸水
利銀趙北口銀兩項均非經費歲需應准其援照成案停利三年限滿後加一倍
利本息一併完繳其舊有拔繳水利帑本息銀一百十七萬餘兩應停徵三年統
於道光十一年起每年徵銀十萬兩以五萬兩完繳舊拔本息以五萬兩完繳新
拔本息以恤商力再近年商力疲乏不能豫買生鹽存坨新鹽質嫩易消致多滷

耗請每包於定數外加鹽二十斤免其交課俾資貼補一俟商力稍寬卽行停止從此款目既清自當年清年款經久可行又奏嘉慶十七年舊加鹽價一文係以一半歸商一半交官完欠除完過銀十九萬餘兩尙有未完銀一百八十四萬餘兩查明實因銀貴虧折請予豁免其半文加價並請賞給該商貼補成本奏入均下部議行尋回京八月充順天鄉試副考官九年四月充殿試讀卷官十年十月長蘆商人華長裕等赴京呈稱運資短絀懇請調濟復命偕戶部右侍郎寶興前往查辦旋奏言蘆商疲乏總以錢椿賠折爲詞查前次清查案內業經豁免舊欠又將堰工加價一半歸商彌補積欠並於舊定斤數外每包酌加鹽斤免其交課仰蒙聖恩已屬至優極渥無可復加何以甫經兩次奏銷卽行竭蹶復思變計是該商等妄生希冀以爲宕課地步自未便徇其無厭之請致於帑課有虧所有呈請調濟之處應無庸議時兩江總督陶澍以淮鹽疲敝已極疏陳積弊情形命偕寶興前往江南會同籌辦十二月會奏詳覈淮綱全局力求課歸場竈之法大要有三而皆有窒礙之處一由竈丁起料竈丁皆瀕海貧民先納課而後賣鹽力有未逮若令先賣鹽而後納課設遇歉產之日勢必課宕丁逃此一難也一由垣商

納課竈鹽歸其經理惟竈戶以己業而聽命商人情必不願竈不樂以鹽歸商商亦必無資完課此二難也一由場官收稅但每場應徵銀數十萬兩鹽場微員豈能任此巨帑况試行之初額難懸定若聽其儘收儘解難保不匿報侵欺此三難也至於就井抽稅兩淮場地延袤八百里非若滇省一井一官卽能查察未易倣照辦理惟有卽舊章大加釐剔使射利者無可借端欠課者無可藉口似較課歸場竈確有舊轍可循謹擬定章程十五條一裁減浮費一議減窩價一刪減繁文一慎重出納一裁選商總一酌覈帶銷一積欠宜緩一竈丁宜恤一實給船價一嚴究淹消一疏濬運道一添置岸店一亟散輪規一整飭紀綱一淮北應請籌款收買竈鹽以濟竈丁口食疏入均允其議又奏鹽政無管轄地方之責疏銷巡緝難期令行禁止請將鹽政一缺卽行裁撤其兩淮鹽務改歸總督辦理較爲妥善從之尋以失察捐納房書吏蔡繩祖等私造假照降二品頂帶十一年正月京察屆期諭曰王鼎久任軍機贊襄勤慎著交部議敘二月御史梁萼涵劾山東海陽令張兆祥信用家丁斁法詐贓詔王鼎於經過山東時提訊旋訊明張兆祥借用鋪戶銀兩又於伊母生日收受紳矜餽送審理詞訟不知慎密致門丁乘機指撞

所辦案情錯謬是非顛倒擬革職遣戍尋署直隸總督八月恭遇五旬萬壽賞還一品頂帶十二年七月因前署直隸總督任內失察清河縣民尹老須習教鑄一級留任十二月管理刑部事務十三年正月復署兼管順天府府尹事務十四年正月時屆京察上以王鼎承旨精詳匡襄是賴下部議敘十五年二月命協辦大學士仍管理刑部事務十二月刑部堂印被竊部議革職旋因人印並獲加恩改爲降三級留任尋命在南書房行走十六年三月充會試正考官十七年正月京察屆期得旨協辦大學士王鼎克勤克敬不愧贊襄著交部議敘二月七十生辰御書靖共篤祜額綸扉協贊承恩近煙閣圖勳受福多聯句福壽字並諸珍物賜之八月充順天鄉試正考官十八年五月授東閣大學士仍管理刑部事務先是守護景陵輔國公景綸等奏獲縱火要犯孫三等請敕交刑部審訊尋訊明孫三等均無放火情事因屢被熬審情急供認諭曰此案情罪有關出入該部能悉心研究平反得實該堂官著各加恩賞加一級二十年正月賞加太子太保銜時京察屆期諭曰王鼎矢公矢慎贊襄攸賴著交部議敘五月充教習庶吉士八月充順天鄉試正考官二十一年三月充會試正考官七月河南祥符汛河決褫河督

文沖職詔鼎偕兵部右侍郎慧成前往籌辦八月署河東河道總督九月劾河工疏防員弁開歸陳許道步際桐等奪職遣戍有差二十二年正月工次猝遇大風河溜併力南趨兩壩口門刷深數丈險工迭出鼎因不能先事豫防下部議處尋議褫職上加恩改革職留任二月奏報合龍得旨王鼎等在工實力實心經理得宜允宜特沛恩施以示獎勵王鼎著晉加太子太師銜仍交部從優議敘開復革職留任處分旋奏陳病久難支請緩起程諭曰王鼎著俟會議事竣後緩程來京俟病體全愈再行具摺請安三月回京覆命賞假調理四月卒年七十五遺疏入諭曰大學士王鼎持躬正直植品端方體用素優忠勤懋著嘉慶年間荷蒙皇考由翰林洊擢卿貳朕御極後見其心地澹樸辦事認真日加委任俾入贊綸扉十餘年從無過失上年派赴河南辦理祥符大工鉅任獨肩剋期蒞事晉加太子太師銜以獎其勞覆命時見其精神疲乏特降旨賞假兩次旋因奏請展假復賞假一月令其安心靜攝方冀調理速痊藉資倚畀詎意數日間遽於園寓溘逝遺章披覽悼情殊深著加恩晉贈太保照大學士例賜卹入祀賢良祠賞給陀羅經被派成郡王載銳帶領侍衛十員卽日前往奠醮並賞給廣儲司銀一千五百兩經

理喪事准入城治喪任內一切處分悉予開復伊孫王琮王瑛王瑩俟及歲時由吏部帶領引見候朕施恩應得卹典該部察例具奏五月得旨大學士王鼎靈柩入城著派何汝霖代朕賜奠謚文恪二十三年九月陝西巡撫李星沅題請入祀鄉賢祠諭曰原任大學士王鼎居心誠篤植品端方懋著公忠克孚令望允宜特沛恩綸俾資矜式王鼎著准入祀鄉賢祠毋庸交部議奏子沆見官翰林院編修

戴均元

戴均元江西大庾人乾隆四十年進士改翰林院庶吉士四十三年散館授編修四十五年充江南鄉試副考官因錄取駢體拔冠榜首下部議處四十七年丁母憂四十九年服闋五十三年充湖北鄉試副考官五十四年提督四川學政五十八年轉湖廣道監察御史五十九年轉京畿道監察御史六十年提督安徽學政嘉慶三年以胞姪戴衢亨見任侍郎例應迴避命以鴻臚寺少卿補用四年遷光祿寺少卿奏言外省州縣設立常平倉穀原爲賑恤平糶之用近年多有缺額其實儲在倉者十無二三請敕各督撫通行所屬勒限買補疏入上嘉之五年正月遷大理寺少卿提督山東學政五月擢詹事府詹事六月升內閣學士兼禮部侍

郎銜均留學政任七年正月管理樂部事務十月署刑部右侍郎八年二月署刑部左侍郎閏二月擢工部右侍郎兼管錢法堂事務六月監修裕陵隆恩殿工程尋調刑部右侍郎十二月以奏事日期錯誤降五級留任時河決河南衡家樓命偕理藩院左侍郎貢楚克扎布馳往查辦九年正月調戶部右侍郎二月會奏啟放引河溜勢順暢旬日內計可堵合三月奏衡工大壩合龍河歸故道得旨嘉獎四月回京充教習庶吉士六月充江南鄉試正考官七月轉左侍郎九月以監修裕陵隆恩殿工程完竣得旨開復三級仍留降二級留任十二月命承修萬年吉地工程西陵贊禮郎清安泰訐總管大臣盛住於陵寢青椿以內開採山石及虛開廩餼點放煙火朔望委員行禮各款命偕戶部左侍郎英和往鞫得實盛住遣戍烏魯木齊十年正月調吏部右侍郎十月命赴南河會同河道總督徐端豫籌河口蓄清濟運事宜十二月奏言河防實無一勞永逸之計祇可因時調濟以蓄清敵黃東水攻沙爲不易之良法並請挑濬王營減壩以下鹽河等工如遇黃水盛漲相機啟放庶黃減淮強湖水可以暢出不特於濟運有裨堰工亦藉免著重又奏疏通清口請將義壩改作隄工均允行十一年二月奏言上游徐城南岸之

天然閘峯山四閘北岸之蘇家山閘水線河皆係減黃舊路遇長水過盛時卽應酌啟以免倒灌上是其言五月轉吏部左侍郎六月以籌畫宣防俱臻妥協授江南河道總督七月伏汛各工平穩下部議敘尋奏河工物料昂貴請照時價實用實銷如所議行八月宿南廳周家樓河流漫口其上游郭家房復壅均元等奏請治罪得旨本年汛水實屬異漲漫口又係無工處所尙有可原從寬改爲議處十二年正月奏近年河底淤高大隄日形卑矮請加培揚徐二屬黃運南北隄工爲先事豫防之計從之三月減壩合龍河歸故道上嘉其妥速賞加太子少保銜賞戴花翎五月因失察廳員偷減草率飭之九月以秋汛安瀾下部議敘十三年二月因病陳請開缺六月原派萬年吉地工程承修大臣盛住侵吞加價及扣成銀兩事覺上以均元曾經接手管理毫無覺察命拔去花翎降三品京堂十二月病痊授都察院左副都御史十四年二月提督順天學政賞加二品頂帶五月擢倉場侍郎尋因盤驗倉米微壞請將漢監督鄭紹瑛解任並請飭各衙門保送監督應公慎遴選從之七月直隸總督溫承惠以康家溝溜勢奔騰漕船逆流而上大費牽輓奏請修復正河命均元查勘妥議尋奏言張家灣兩岸沙灘淤厚壩基難

立爲費不貲軍船請仍由康家灣行走至通惠河係白糧銅船要路見在河底日淤隄岸卑薄請先挑淤培築允行十五年溫承惠奏籌辦奉天糧石抵津不及轉運請起卸露囤命會同倉場侍郎妥爲辦理尋奏言奉天米石照節年黑豆章程辦理無須露囤如所議行十六年以前在河督任內失察工員不能如式辦理革職留任五月河東河道總督李亨特奏請籌議南糧全數自楊村起剝到場命倉場侍郎會議尋奏言官剝民船不敷輸轉請遇有南糧遲滯之年於三進尾後數幫自楊村寄剝抵場較爲妥順從之十八年九月改授河東河道總督十九年正月患病命補吏部左侍郎來京供職閏二月擢都察院左都御史四月充殿試讀卷官六月署吏部尙書七月充經筵講官八月升禮部尙書九月奏言河工向遇堵築工程將料物購備足數後料販無可牟利潛將料垛焚燒請於堆料處所周圍挖濠防守從之十二月賜紫禁城騎馬二十年六月復署吏部尙書七月直隸總督那彥成奏永定河下游淤墊高仰屢次漫溢請將下口移改南岸上以均元通曉河道命會同那彥成履勘八月以永定河下口居民衆多未便改移奏請停止又請於北七工漫口處所趕緊堵築允之二十一年四月江南河道總督黎世

序奏籌辦大汛各工命偕兵部尙書吳璫會議尋奏言李家樓幫培三壩必選用膠土層土層礮其外鑲護埽尤須刨槽加深築做堅固天然閘應加高二層峰山二三兩閘應加高四層允行閏六月調吏部尙書九月管理戶部三庫事務二十二年三月充會試正考官命協辦大學士六月上以均元辦事勤勉賞加太子少保銜七月署刑部尙書九月以郎中錢學彬濛混截取未經詳查率行保送降二級留任二十三年二月命在軍機大臣上學習行走五月以纂輯明鑑體例不合革職留任六月兩江總督孫玉庭奏徐州城外應幫石隄命偕吳璫會議尋奏言徐城濱臨大河全賴石隄保障河底日漸淤高郡城形如釜底大隄高而不寬具多窳潮滲水之處議將石工外無灘處所間段包砌碎石俾資捍衛從之九月上詣盛京祇謁祖陵禮成賞加二級尋以禮部頒發科場條例於廟諱刊刻錯誤下部嚴議議奪職上加恩改爲革職留任十一月充上書房總師傅先是孫玉庭等奏睢南所屬峰山閘外河迎溜湧請就峰太兩山之間添築減水滾壩以護閘座命均元會同吳璫議奏至是奏言請於臨黃一面鑲築護埽用碎石包砌足資抵禦南面平水無溜處無庸包砌以歸撙節如所議行二十四年正月京察屆期下

部議敘三月銀庫收銀遲誤降一級留任尋充會試正考官十月命偕戶部右侍郎那彥寶馳往河南查勘隄工並命均元先赴馬營壩履勘大壩引河再將原村引沁歸黃各工勘明後由山東查勘運道十一月奏言東西兩壩水性純沙急應創槽盤護又堵築漫口全憑引河必須先期挑竣相時開放方可乘機合龍其原村引沁歸黃各工見止挑有五分成數查進占以集料爲先兩壩運儲稽料僅及千垛若不通盤籌算源源接運進至深水萬一不能應手勢必停工應卽設法購運以資接濟從之二十五年二月回京擢文淵閣大學士晉太子太保銜管理刑部事務七月仁宗睿皇帝升遐命恭理喪儀九月充實錄館總裁旋以繕呈遺詔副本誤紀高宗純皇帝誕生處所上震怒切責擬詔諸臣事具文孚傳命均元毋庸在軍機處行走並不必恭理喪儀下部嚴議部議奪職得旨戴均元著降四級留任六年無過方准開復道光元年三月審辦德勝門城上失落木植不實降三級留任七月上謁昌陵留京辦事九月命承辦萬年吉地工程旋充順天鄉試正考官二年三月以前承辦裕陵隆恩殿工程柱有黓朽降四級留任削經筵講官太子太保銜命仍敬謹妥辦以觀後效十二月河南馮宿村漫口巡撫程祖洛奏

挑濬新河命均元往勘妥議三年正月奏言漳河支流穿錯並未刷成河槽仍係一片漫水欲加疏濬新河不惟水中難以施工兼且無從覈估轉瞬春水盛漲勢必潰溢堪虞請仍挑築舊河復歸故道允行四月回京會吉林將軍富俊奏部駁揀選驛站官員辦理兩歧請仍交原議大臣會議上命偕兵部左侍郎恩銘等議奏尋奏言查吏部則例吉林驛站官向無漢軍應否揀選明文以致承辦各員舍案從例據咨議駁請嗣後吉林驛站官改照黑龍江之例准其以漢軍人員升補任滿後亦照黑龍江之例以驍騎校升補不准升用文職以示限制至吉林助教不准漢軍揀選亦未平允請敕部改歸畫一並請纂入則例從之九月命馳勘直隸元城之紅花隄及河南內黃之袁村地方兩缺口並命順道赴河南會勘漳河漫口池下情形設法籌辦尋奏言紅花隄屢加修築仍多殘缺且隄西一片平行如遇漫水南注隨處皆可旁溢卽修復亦屬無益查元城境內有引河一道應飭將河身挑直並量加寬展以暢其流其缺口迤下有新刷水溝地較低窪應將溝槽挑成河道可冀分洩並自缺口起至入衛處止建築東西兩隄以免旁溢從之十月偕程祖洛奏內黃縣袁村地方用漳洹合流沖衛以致旁決今旣刷有河槽

漳衛分流水患輕減自應通籌全局開治新河其沖刷處所間有浮淺兩岸亦恐旁溢應請挑挖深通築隄捍衛並請於瓠子觜東岸築壩以備宣蓄其東袁村等漫水應請堵塞其無支流可引之村卽於該村前後築隄使全溜俱歸正河又會奏漳河見在北徙水勢分殺應請於樊馬坊馮馬坊等北岸支流築壩使分流併歸一處再將辛莊一帶漫水築壩堵閉其梗阻河心之田家營等十處南北兩岸迎流處所編設柴壩以衛民居北岸上游壩工卑薄應請鑲修高厚並加築挑壩土格以期穩固自柴村橋起至洹河北岸民埵建築土埵一道再將舊民埵加高培厚樊馬坊迤下南岸王家口築做土格土壩以免串流南趨疏入均如所請行四年三月裕陵隆恩殿工竣賞還太子太保銜四月仁宗睿皇帝實錄告成上以其盡心編輯在館四年始終勤事長子候補員外郎戴詩亨命遇缺卽補長孫監生戴秀嘉賞舉人一體會試七月年老乞休諭曰大學士戴均元由翰林洊陟卿班仰蒙皇考仁宗睿皇帝恩眷簡任綸扉命充上書房總師傅在軍機大臣上行走內而管理部務外而宣力河防均能勤慎供職前年朕召見時戴均元曾以衰老乞休朕察其精神尙健再四慰留不忍遽令退閒茲復以年屆八旬籲請解職

情詞懇切若仍不如所請轉非所以體恤大臣之意戴均元著准其以大學士致仕回籍並加恩令其在家支食全俸俾得優游林下頤養耆年用示朕優禮老臣至意閏七月以前在刑部時因擬流官犯侯際清呈請贖罪漏查紅供並失察官吏得贓降頂帶一級復以濫保司員德恩再降頂帶二級尋奏起程日期御製詩章賜之詩曰三朝中外宣勤久夙夜溫恭贊閣綸疇昔承恩五十載來春篤祐八旬辰車懸勉允優賢義帆轉言歸自在身話別重期辛卯歲杖鳩慶祝洽君臣並命馳驛由內河水程回籍所過郡縣在二十里以內者地方官照料護行五年均元八十生辰御書頤性延祺額並諸珍物賜之仍還一品頂帶七年以萬年吉地工程堅固晉加太子太師銜長子詩亨命以郎中補用八年舉行戊子科鄉試均元以乾隆戊子科舉人至是重逢鄉榜得旨致仕大學士戴均元宣力中外歷有年所茲屆蕊榜重逢洵屬藝林嘉瑞著賞給御書扁額准其重赴鹿鳴筵宴九月寶華峪地宮漫水以咎由均元辦理不善削太子太師降銜三品頂帶伊子詩亨仍降員外郎越日上親臨閱視全券內石墻濕淋地面間段積水諭曰此次工程開通時如果詳慎體驗豈竟毫無情形乃漫不經心味良負恩莫此爲甚戴均元

著卽革職尋有旨戴均元帶同各堪輿相度吉壤會據宋泗以總穴太後恐穴中有石應移前十丈戴均元輒拘泥規制僅移五丈以致北面開出水石朕前令戴均元勘定福基曾降旨祇期地臻全美不必拘四至之廣狹卽照從前規制稍從儉約亦無不宜乃師心自用並不據實陳奏及開工未幾旋卽乞休伊年雖屆八旬精力尙健何至遽思歸田明係潔身遠引其居心尤爲可惡著卽傳旨拏交刑部嚴審定擬具奏並命查鈔家產十一月讞定諭曰戴均元相度福基自應倍加詳慎乃旣未將石母滴水處所豫爲測量詳明迨至目擊地盤壙幫滴水情形仍商同用土攔護並未據實奏請及早籌辦見經奕紹等訊明比例擬斬監候實屬罪所應得卽減等量予遣戍亦是從輕寬貸惟念戴均元尙未始終經手工程且年逾八旬毫不加刑著加恩免其死罪並免發遣卽行逐回原籍用施法外之仁其子戴詩亨著革去員外郎其孫戴嘉秀著革去知縣戴嘉會著革去鹽大使戴嘉德著革去舉人以示薄懲十一年得旨戴元均之子戴詩亨著加恩以七品小京官補用伊孫戴嘉德著加恩賞還舉人二十年故年九十五

伊里布

紅帶子伊里布滿洲鑲黃旗人嘉慶六年二甲進士授國子監學正因無旗缺奏以典簿改補十年補典簿十五年京察一等記名以撫民通判用十七年揀發雲南十八年補雲南府南關通判署澂江府知府二十年升騰越州知府二十四年雲貴總督伯麟等疏言騰越州臨邊各土司在在與緬甸國接壤本年春間緬甸野匪搆亂有竄入內地者經署知州伊里布先後緝獲猛阿來瞞弄等交該國自行究辦伊里布頗有膽識熟練邊務於各土司駕馭有方是以各山野夷甚爲斂戢本年兩次訪獲緬匪俱能不動聲色刻卽就擒請給升銜以示鼓勵得旨以應升之缺升用道光元年八月永北廳大姚夷匪唐貴等因地土給與漢民耕種起釁糾衆滋事伊里布隨雲貴總督慶保馳往剿平之慶保上其功賞戴花翎九月署永昌府知府十一月授安徽太平府知府二年升山西冀寧道三年遷浙江按察使四年閏七月升湖北布政使九月調浙江布政使五年四月授陝西巡撫五月調山東巡撫六月丁父憂百日孝滿命署理雲南巡撫十一月兼署雲貴總督六年七月密奏調任迤南道保亮識見暗昧不勝道員之任得旨勒令休致復諭曰各省督撫於所屬道府中有才具平庸或心地糊塗不稱職者自宜據實參奏

俾知儆畏方合大臣辦公之道若皆爲密奏各員不知所勸懲嗣後各省督撫於所屬道府等官不稱職者俱應據實入奏毋庸密陳更不可因有此旨稍存避嫌遠謗之見動輒一味姑容殊失朕望治之心矣十一月奏滇省應運京銅每年正運四起加運二起共額解帶解二百四十萬餘斤應領撥銅本銀九十六萬兩道光五年經戶工二部奏准將丙戌年加運二起暫行裁減查見在京局存銅約有二三年之儲請將丁亥年京銅正運四起照舊辦運暫裁加運二起較常年少用銀三十二萬兩於經費固可節省外間廠務亦甚有裨下部議行七年七月御史廖敦行以滇省鹽務滷淡課短奏請廣覓子井酌盈劑虛上命伊里布偕雲貴總督阮元確查議奏旋奏言歷年短課始由各井滷淡煎不足額繼因開採子井私鹽充斥亟宜封閉私井慎選井員所有猛野等處私井業經填封撥兵巡查以杜奸民私窆其昭通東川二府向食川鹽近有川私侵入毗連之曲靖府亦經堵緝不敢越界私售見在鹽務已見起色除煎辦足額及有溢銷外惟安寧等五井歲減課銀二萬七千七百餘兩請於溢銷較多之石膏元興永濟三井溢課項下抵補卽以帶徵名目入冊開報以專責成允之九月服闋實授雲南巡撫八年八月

偕雲貴總督阮元奏獲湖北嘉魚縣民人王士林私雕假璽將赴越南國小潮地方勾結滋事因查出小潮匪徒趙應隴李映川楊林仲等偽造逆詞圖爲不軌將各犯分別治罪如律九年奏永北廳土司夷日所典漢民地土有已屆三限力難全贖者請量爲變通令該土司夷日隨時措價取贖其有願將土田賣與漢民者卽令漢民補價管業上允其請十年喀什噶爾回匪入卡滋事伊里布奏請隨同帶兵大員前往剿辦諭曰同仇敵愾固人臣分所當然但該撫遠在滇南於回疆不靖之事不能悉其梗概從前永北廳野夷糾衆擾及大姚與喀什噶爾夷匪滋事情形迥不相同何得以此比較該撫妄行馳奏徒勞驛站實屬不知輕重著先行拔去花翎交部嚴加議處旋議革職加恩改爲革職留任十一年恭遇五旬萬壽開復降級罰俸處分十二年二月揚威將軍長齡等奏籌辦回疆善後事宜請裁各省綠營兵額將節省經費解交甘肅藩庫歸入回疆搭放命各督撫速查覆奏伊里布偕總督阮元奏言滇省額設馬步守兵四萬七千三百一名共應裁減八百十五名歲省餉乾銀一萬二千八百餘兩米二千九百餘石九月遵旨議裁文職間員請將曲靖府同知劍川州沙彌井鹽大使曲靖大理永昌三府司獄順

寧府知事六缺裁汰均從之十四年奏車里土司刀繩武前與土舍刀太康猜疑起釁互鬪之後將刀繩武奏請革職加調防兵震以威勢其裸夷俱已散歸復業刀太康亦遵諭撤練刀繩武結釁不休於革職後猶復帶印逃竄所遺車里土司世職其子孫例不應襲卽諭飭車里所屬十三版猛夷秉公選舉查刀繩武之父刀太和尙有嗣子刀正宗年已及歲夷衆悅服應令襲職並請由部鑄印發給以重職守刀繩武緝獲另辦十五年遷雲貴總督十七年京察屆期上以伊里布熟習邊務鎮撫得宜下部議敘十八年二月命以雲貴總督協辦大學士十月四川綦江縣民穆繼賢與貴州仁懷縣武生趙應彩涉訟繼賢挾讎擅殺應彩糾奸民謝法眞等乘勢恣搶仁懷縣知縣王鼎彝綦江縣知縣毛輝鳳往捕外委章泗明倉卒遇害賊沿途裹脅貴州提督余步雲布政使慶祿貴西道周廷綬先後帶兵會剿賊屯方家溝負險抗拒十二月伊里布率兵抵方家溝會四川重慶鎮總兵張作功亦來協剿賊牆柵堅固於牆隙暗放槍礮兵進輒傷伊里布與余步雲慶祿合圍蹙之槍斃紅衣賊目一人斬僞元帥趙應松進逼賊巢拋棄柴草火彈燒斃無算賊匪六七十人由水溝潛遁我兵分投追捕擒賊目穆繼賢謝法眞等燬

其巢餘匪殄滅捷奏上以伊里布辦理迅速賞戴雙眼花翎十九年調兩江總督二十年正月京察屆期上以伊里布久任雲南邊防靜謐下部議敘七月浙江巡撫烏爾恭額奏英人船隻駛至浙江定海洋面滋事定海鎮總兵張朝發撤守失城命伊里布爲欽差大臣馳往浙江查實具奏尋奏查明張朝發因英人投遞書辭言語甚悖欲卽攻剿署遊擊羅建功等以兵勢單弱衆寡懸殊請俟英人登岸再行剿擊張朝發以夷情猖獗不宜退避令卽進兵英船亦卽開礮以致我兵傷斃無數張朝發被礮轟傷左股墮水撈救入城英人攻破東門定海失守張朝發復諫喪師咎無可道業已身故應無庸議九月奏堵剿英船情形諭曰前因英人在天津海口起旋南旋已派琦善馳赴廣東查辦曾飛示伊里布一體遵照此次伊里布因英人登岸督率兵勇將其船隻擊沈礮位搶獲並生擒英人多名自係在未接廷寄之先見在該大臣已奉廷寄自必相機妥辦英人所投回文欲將擒獲英人釋放於交地退兵之事並未覆及該大臣惟當剴切曉諭告以爾等之來原爲訴冤乞恩起見前在定海係因言語不通以致互相攻擊此次擒獲多人亦因爾等直逼口岸先放槍礮是以力加防禦見仍仰體大皇帝中外一家之意將

所獲之人優加豢養爾等果能退兵交還定海將歷次所獲男婦剋日釋回天朝誠信待人斷無加以欺誑之理該大臣如此曉諭一面派人偵探如果英人確係退兵交地始可將擒獲之人全數交還其前次擒獲收管黑白夷人亦著無庸解赴廣東統俟交地時一併辦理十一月奏定海居民內渡者八千餘名請籌款撫卹從之二十一年正月命伊里布剋日進兵收復定海二月英人起旋赴粵伊里布聞其將繳還定海咨會浙江巡撫劉韻珂入奏遂未進剿諭曰前因英人占據定海特命伊里布爲欽差大臣降旨令迅速進兵不必俟廣東咨會卽行攻剿乃伊里布不遵諭旨惟知順從琦善屢次奏報始以兵礮未集藉詞緩攻繼以接得繳還定海之札卽信以爲實已有旨令折回本任命裕謙馳赴浙江作爲欽差大臣會同提督余步雲迅速剿辦本日據裕謙馳奏英人未受懲創仍行前進一摺所奏均是朕竚望該大臣迅奏膚功懋膺上賞斷不可因該英人見有繼還定海之說稍事遲迴又墮其詭計中而蹈琦善伊里布辜恩誤事之故轍伊里布身膺特簡疊次催令進兵並不遵旨剿辦株守數月觀望遷延甚屬畏葸不堪著交部嚴加議處尋議革職諭曰因英人在天津投書聲稱訴冤朕惟仁育義正無間華

夷特命琦善赴粵查辦並諭知伊里布暫緩進兵旋因該英人日肆猖獗疊次降旨令伊里布迅速進兵收復定海乃伊里布屢次奏報總以兵礮未集爲辭直至探明英人願繳定海確信始行遣將帶兵前往本日據奏定海業已收復英船全數起碇等語英人占據定海已更數月見因粵省命將出師聲罪致討方行繳還定海全數起碇出洋可見英人並無能爲設使伊里布奉到諭旨熟審順逆主客之勢密籌剿防攻取之宜一鼓作氣四而兜擒復我故土殲除醜類庶足以伸天討而快人心乃伊里布觀望遲延株守數月直至英人聞有大兵望風遠竄遂將定海收回可謂庸懦無能之至前將該督交部嚴議部議照溺職例革職實屬咎有應得姑念一時簡用乏人伊里布著革去協辦大學士拔去雙眼花翎暫留兩江總督之任仍戴革職留任處分八年無過方准開復以觀後效閏三月命來京候旨上派王大臣會同刑部傳訊六月訊出伊里布令家人張禧暫戴六品頂帶與外委陳志剛渡海賞給英人牛羊英人回送洋呢權宜收受奏奉嚴飭直至收復定海始遵旨發還尋定擬罪名入奏命革職遣戍軍臺二十二年二月改發浙江軍前效力旋賞給七品銜交耆英帶往浙江差遣五月賞給四品頂帶署乍浦

副都統九月上以伊里布爲欽差大臣授廣州將軍先是英船犯臺灣經總兵達洪阿督兵擊沈船隻俘獲英人一百數十名奪獲槍礮旗幟無算已正法者一百三十九名見收禁者十一人十二月伊里布接英酋照會稱遭風難民被達洪阿俘獲殺戮多名積憤爭辯奏請將總兵達洪阿撤回得旨朕辦理此事自有權衡二十三年正月伊里布抵粵接見英酋樸鼎查諭以見經欽派大臣渡臺查辦旋奏米利堅法郎西因准英人添設馬頭亦求通商若不允准恐其船隻衣服無甚區別且慮英人串通前來轉難阻遏反使惠出英人怨在天朝亦爲失算請一併議定稅則允之二月卒諭曰廣州將軍伊里布由科甲出身洊膺疆寄擢任綸扉前因事遣戍經朕棄瑕錄用授爲欽差大臣廣州將軍令赴粵辦理善後事宜正資倚畀遽聞溘逝殊堪軫惜著加恩追贈太子太保銜照將軍例賜卹任內一切處分悉予開復應得卹典著該衙門察例具奏其靈柩回京時准入城治喪以示朕篤念蓋臣至意尋賜祭葬如例予諡文敏子桂斨候補教授桂榮刑部筆帖式

李鴻賓

李鴻賓江西德化人嘉慶六年進士改庶吉士七年散館授檢討九年充雲南鄉

試副考官十二年充貴州鄉試副考官十三年充湖南鄉試正考官十四年二月授山東道監察御史稽察南新倉五月疏言江西有漕各縣開兌時買湊低潮米石每石給旗丁銀三五錢名曰倉廩使費運弁等亦暗收規禮頭伍刁丁復先期赴通賄商坐糧廳經胥人等回漕折價種種彌縫又在水次時運弁演戲備席斂取旗丁分金頭伍刁丁又勒派各船出銀若干名曰各衙門使費疲丁遭此剋扣運費愈覺不敷請敕有漕各督撫釐剔弊端八月奏河南汝寧府屬匪徒結黨肆擾俗謂之紅鬍子請敕河南巡撫密派明幹大員設法堵捕湖北督撫飭所屬附近豫省之州縣一體嚴緝上如其請九月轉掌廣西道監察御史十五年巡視西城以獲東安門內命案兇犯得旨嘉獎並下部議敘十六年遷吏科給事中十七年三月奏山東大計本甫題該巡撫忽又將濱樂分司運同王訥奏請休致所遺之缺扣留題補臣思王訥既年老衰庸何不於大計題本內參劾恐不肖之員知此缺係屬部選轉輾鑽營巧爲扣缺地步請交吏部詳議上是之十月轉掌工科給事中巡視中城十八年九月巡視東漕十二月奏言山東省泉池泉渠歸縣丞主簿疏導泉河歸各州縣辦理請嚴定勤惰功課章程上命河道總督山東巡撫

飭屬如所議行十九年二月奏濟運全賴泉源見飭泗水等縣挑出新泉數處恐各州縣以添泉多費設法阻撓請嗣後疏出新泉該州縣將泉名勒石申報各上司彙冊咨部如有湮廢確查扣除其新泉隱匿不報者奏明參處從之時直隸山東河南三省毗連地方頻年遭兵鴻賓疏陳善後四條一賑恤窮民宜令普霑實惠一查禁地窖以免潛匿匪徒一嚴禁私渡以防逃匪而濟災黎一做行會哨以省繁費而示兵威皆奉旨允行閏二月命偕河東河道總督吳璈山東巡撫同興訪查已革河督李亨特劣蹟得實以聞五月賞三品頂帶授東河副總河命督率道將廳營催趲漕船收蓄湖水六月奏連日得雨開河水長新挑南沙引渠並能收水入湖諭曰李鴻賓正當趁此大雨時行之際將陂水泉水歸湖之路隨地疏濬務期湖水日有增益足濟來年重運八月偕河道總督吳璈奏言微山湖久涸蓄蓄非易而來春開壩時用水甚多乘此重運已過回空未臨宜將河水攔蓄擬於朱姬閘南築壩並將湖隄開一缺口俾河水入湖上如其請九月奏微山等湖均已蓄蓄充盈上嘉之賞換二品頂帶十月命赴睢工會同吳璈辦理堵築事宜十一月奏山東各州縣報出新泉共九十八處覆加履勘可以經久者僅泗水等

州縣十八處上命再委妥員詳加履勘凡可疏濬者設法利導十二月巡漕給事中卓秉恬奏河南汝寧府通判竹騰霄稟訐藩司諸以謙剋扣賑恤河工銀兩及前任糧道時收受漕規等款上命鴻賓赴開封會同按察使琦善確訊尋訊明騰霄誣告坐罪如律以謙失察家人唐忠私侵銀項違例捐納縣丞又爲其子捐監應考請交部嚴議二十年正月擢河東河道總督三月奏蘭陽汛十一堡河勢南北頂衝塌成圈灣急需鑲埽築壩報聞四月以湖漕充足下部議敘是月丁母憂賜祭一次並賞銀三百兩二十二年九月服闋署禮部右侍郎十月命往河南訊民人孫逢午京控之案事竣讞獄山東並查勘黃運河湖水情形二十三年三月調署兵部左侍郎四月授廣東巡撫十二月偕兩廣總督阮元奏言廣州佛山同知近海非新選人員所能勝任應請在外調補瓊州府同知駐崖州向定爲煙瘴要缺在外調補應請改簡下部議行二十四年閏四月偕阮元奏請添設巡檢一員駐豐順縣留隍地方裁潮州府稅庫大使又請將饒平縣黃岡司巡檢移駐柘林大埔縣大產司巡檢移駐白猴五月奏粵東額徵米石實欠在民由州縣墊解者計米折銀共四十八萬九千六百有奇恭奉恩旨普免二十二年以前積欠錢

糧而節年墊解之數不能再徵於民反成無著之款請分限六年卽在各州縣任內分數按交均下所司議行旋授漕運總督八月復授河東河道總督時河溢蘭陽儀封上命鴻賓偕尙書吳璥馳往籌辦尋命鴻賓專駐儀封堵築會北岸馬營壩復決奉旨北岸漫口地居上游尤關緊要著吳璥李鴻賓上緊搶堵並命將蘭儀料物運儲北岸刻期興工尋會奏馬營壩一帶土質沙鬆因河溜尙勁未能遽定壩基上以鴻賓等株守坐待飭之十月自以不勝河督重任奏請辭職諭曰李鴻賓由京員出身於河務本不諳習但於簡放時卽當據實陳明茲已視事兩月忽奏請辭職顯係因吳璥等辦工遲緩恐將來一同獲咎豫爲諉謝地步伊旣不諳河工卽簡任河督亦屬無益著革去河東河道總督給予郎中職銜留於河南專司大工錢糧二十五年正月管理山東運河事務二月兼署山東巡撫命專駐張秋辦理釘樁搭橋及堵築各事宜旋奏言本年重運經臨張秋仍應由正河行走惟東岸有三處決口均係黃水穿運必須於西岸搭橋墊路以通繹輓至西坡乃去年回空舊路重運難行若水長數尺仍可由江家莊口門出運入坡至磨盤壩口門由坡入運此籌備張秋趨運之法也臨清閘口向須蓄汶敵衛本年黃水

分流入衛汶水不敵已飭臨清以上各閘嚴閉石板擡蓄清水如遇攔口一面啟放清水衝刷一面集夫撈空並豫備畚鍤器具以供臨時之用此籌備臨清趨運之法也此外蜀山馬蹋二湖收汶水太多已於戴村壩以上築攔汶壩俾汶水洩入鹽河泗水之魯橋壩見已加築引水歸蜀山湖俟運河水消再令啟放微山湖瀦水充盈見令暢放鋪水報聞十二月授安徽巡撫道光元年正月諭曰安徽省倉庫錢糧聞虧空甚多該撫當督同藩司張師誠逐案詳查該州縣如實有侵蝕入已必當據實參辦其實係因公挪墊者應如何設法調劑該撫秉公確覈酌定期限不得以一奏塞責四月奏言安徽省虧空自嘉慶五年至十九年清查五次必先詳查舊案方得實在虧數自十九年以後續虧諒復不少應按年確查凡十九年以前未清之款俱在以後交代之中以交代所欠之款覈清查開報之數則從前有無隱匿朗若列眉如十九年以後未經交代之處恐仍隱匿應將經徵錢糧之紅簿串票及解銀之批回庫收等項逐年另覈惟持之過急轉恐疎率請稍寬時日俾局員得盡心察覈從之五月奏參試用知州李濤沈慶蘭試用通判黃樹荃均有玷官箴請勒令休致得旨所辦甚好又奏鳳穎一帶緝捕事繁員弁路費

賞需無款可籌請在藩庫動給上允之六月復授漕運總督二年閏三月御史董國華奏江安各幫有尖丁名目常德廣馬回子數人皆著名刁橫累丁病漕上命鴻賓密訪按名懲革並覈減丁船費用四月奏言江淮四幫內有長德光並無劣蹟安慶後幫有散丁控告頭船馬錦福亦謂之馬回子所控係鑽充頭船事與董國華所奏不符均須訪查明確再行革究至丁船費用每開必雇夫拉挽夫頭盤踞又與不肖委員勾通漁利深爲漕害臣已將著名刁橫夫頭盡行革退並查看水勢某閘用夫若干需費若干刊刻木榜以免浮冒一切陋規早經嚴禁得旨所辦甚好恐日久玩生該漕督總當身先倡率隨時認真九月授湖廣總督三年六月偕湖北巡撫楊懋恬奏言遵旨查勘枝江縣羊角洲於縣營有大江之隔聲息難通應移駐千總一員添撥兵丁巡緝下部議行十月會同湖南巡撫嵩孚奏保靖營兵糧向係折色近來糧價日昂不敷買食請改放米石允之四年三月奏鄖陽府白河口前經川陝楚三省督撫奏准設撫民同知應請改爲捕盜同知原議設訓導各官應行裁汰下部議行四月奏湖南巴陵縣君山居洞庭湖之中應責成岳州府知府暨岳州營參將按月親巡並飭同知守備隨時前往偵緝前督臣

陳若霖等奏准設官移汛諸多窒礙應請停止上允之七月奏言鄖宜施襄四府距省較遠押送人犯防範難周請嗣後尋常遣軍流徒各犯並秋審人犯均歸巡道審勘上如其請先是湖廣行銷准鹽行封輪之法大商壟斷而小商每致向隅經前督臣陳若霖奏請開輪九月鴻賓奏開輪銷售以來又有跌價搶售之弊見議設立公局僉派妥商經理無論鹽船到岸先後將小商之鹽隨到隨賣大商之鹽按各家所到引數公同合計均勻派銷俟試行兩月再將議定章程具奏報聞五年正月奏定長江漢江覈巡章程二月奏漢岸自設立公局以來遠近水販均知鹽無私賣價無私跌源源販運踴躍如前商無虧本之虞民無增價之累試行兩月有餘銷數較旺請永遠增行允之六月左都御史英和奏請酌折額漕以資治河諭鴻賓等議奏七月奏言徵收折色弊竇叢生莫若令民間完交本色由州縣賣米易銀轉解河工諭曰徵收折色既於民情不便本年湖北漕糧著仍循舊章由州縣賣米易銀恐啟州縣抑勒商民承買書吏捏報市價加收本色諸弊如明歲清水足資敵黃仍飭糧船照常由河運抵通儻或阻滯卽設法存儲待至下年搭運又奏遵旨訪查湖北糧船水手御史王世絨所奏立教斂錢等弊並無其

事惟水手良莠不齊未雇之先應由旗丁詳慎選募既雇之後應由運弁取結確查船在水次以前責成該縣營彈壓兌米開行以後所過州縣悉按管轄地面照在水次時分別獎罰庶考察均歸嚴密得旨如所議行八月會奏湖北漢陽縣新淤之地係白泥沙灘歷年被川江襄河泛漲屢次淹沒請免升科十月奏請挑濬澤口等支河並擬於監利縣建閘兩處俾積水由閘達江均得旨俞九年正月會奏湖北石首縣文義洲新淤熟地水淹沙壓不能布種請酌減租銀並蠲免積欠下部議行五月調兩廣總督十一月因新疆逆回滋事偕巡撫成格奏請於藩庫支銀三十萬兩解赴甘肅分十年在督撫司道知府養廉內勻扣還款上以其有失政體諭不准行七年七月會同成格奏言粵東外海內河奸匪叢集數十人共乘一船名曰快蟹其行如飛官船每不能及臣等於上年會議做照快蟹式樣製造七隻選派弁兵巡緝已陸續獲快蟹船六隻黃埔虎門一帶頗覺肅清上嘉之八年會同廣西巡撫奏請將容縣大岡巡檢移駐該縣自良墟下部議行九年御史張曾奏風聞廣東行使洋錢上命鴻賓查禁二月奏粵東海濱各屬向與外人通市致光中景盛等錢攙雜行使當曉諭鋪戶居民於每月朔望赴州縣彙繳

照收繳小錢例每斤給制錢六十文勒限半年全繳逾限卽照例治罪並嚴諭洋行不准洋船夾帶得旨嚴飭所屬認真查辦十二月英吉利國商人呈控洋行欠銀洋船延不進口鴻賓等提商追欠將所稟各款飭司妥議並以其情叵測咨水師提督李增階密爲之防具疏以聞諭曰所辦甚是此事有關國體該督等務當詞嚴義正折其桀驁之氣杜其貪詐之謀不可稍涉遷就致失大體十年六月奏虎門海口鎮遠礮臺迤東有沙角山橫檔礮臺迤南有大角山爲洋船入口要路而大角山向無礮臺應請添建得旨允行時銀價日昂上聞番舶專載洋錢收買紋銀又鴉片流行內地耗財傷人命鴻賓等妥議旋疏陳六條一洋商與外人交易以貨抵貨如有尾數祇准給付番銀鋪戶居民私賣紋銀與外人者加等治罪一責成巡洋舟師分段查察洋船初到時嚴查匪艇運銷鴉片回帆時嚴查匪艇運送紋銀一關口委員書役及守口弁兵如有賄縱情弊或失於查察分別治罪議處一責成洋商通事買辦隨時查察如外商夾帶鴉片偷買紋銀卽呈明一奸民偷運鴉片售賣各衙門書差兵役受賄包庇與販賣一律治罪一鴉片運赴各省責成沿途各關卡搜查其冒充巡丁強搶入己者照例治罪如所議行九月

奏請分大鵬營爲左右二營至前山營本屬陸路而與香山協界址相連請改爲內河水師下部議行是月授協辦大學士仍留總督任十一年正月京察諭曰李鴻賓歷任封疆實心任事著交部議敘三月崖州黎匪滋事總兵孫得發等進剿斃匪數百人我兵間亦被傷千總周明清中箭陣亡鴻賓馳抵雷州督辦提督劉榮慶馳往崖州會捕尋獲首犯張紅鬚並射斃千總之兇匪高老亮及爲從各犯懲治如律六月會奏查禁栽種罌粟章程略言粵東惟潮州府屬間有種罌粟花者已飭令剷拔嗣後如有種罌粟花者責令保甲人等首報將地入官照販賣鴉片煙治罪如地保隱匿分別懲治並飭各州縣隨時察訪按季具報該管道府卽飭員覆查年終具結詳報時給事中劉光三奏廣東匪徒有三點會等名目有旨命鴻賓查訪鴻賓奏言廣東並無三點會名目惟結拜弟兄糾衆搶劫及打單棍徒向耕戶勒索錢文根株猶未盡絕已飭屬隨時訪拏被誘者將首犯控告准照自首律免罪其被脅者自行投首或父兄代首免罪惟廣州一帶人稠地狹所有廣州潮州肇慶嘉應等府州屬山場荒地請令無業游民報官墾植成熟後永不升科庶粒食有資不至流於匪僻均允之八月入覲諭曰李鴻賓來京陛見適值

萬壽慶辰念其宣力封疆有年著加恩賞戴花翎尋回任十二年二月奏鴉片煙來自外洋必應遏其來路請嗣後外人來粵令洋商開導毋許夾帶煙土儻經查出不得開船賣貨並令貨船外不得令帶船隻以杜私入之源仍於省河禁止查私快艇潮瓊各屬商船毋得攬近零丁洋面庶免偷販情弊上如其請會湖南搖匪趙金隴滋事上以兩廣與湖南接壤恐搖匪乘間竄入諭鴻賓嚴密防堵又命派委兵弁在連州交界堵緝三月奏連山廳黃瓜衝及余高汛等處均有搖人搶劫見飭總兵得志等率兵七百進剿尋奏黃瓜衝等處搖匪經官兵剿捕均畏懼解散八排搖人俱屬安靜止以連山各搖仍恐被楚搖誘脅命鴻賓嚴防各隘口是月奏獲會匪胡亞豹等六十八人又請將崖州營參將改副將海口協副將改參將下部議行四月奏獲李學問等訊係趙金隴遣赴廣東交界偵守隘官兵多寡欲圖竄入見已增兵防守上命實力爲之五月欽差大臣戶部尙書禧恩盛京將軍瑚松額平湖南逆搖斃首逆趙金隴諭曰粵省逆匪實與趙金隴聲勢相倚撫則不散剿則兵單今聞趙逆殲斃自應膽落亟應懲辦以淨根株尋奏言東路搖匪掠倒流汛竹子坪等處副將王登科督兵擊卻之餘匪竄入山峒而西路黃

瓜衝等處賊匪復熾見調運連州兵六千進剿諭曰該督見在行抵連州卽激厲將弁一鼓作氣聚而殲旃朕計日以待六月奏三路進兵殲斃猺匪五六百人而中路都司王珍東路遊擊謝國榮西路遊擊史鵠均因傷致斃弁兵傷亡者數十人請俟湖南猺匪辦竣後再行進剿諭曰覽奏實深憤懣該省調集官兵已六千名兵力不爲不厚豈有觀望鄰省賊匪撲滅再行進剿之理李鴻賓雖不知兵何至束手無措一至於此見已降旨令余步雲署理廣東提督該督等俟到粵後卽會同迅速剿辦稍贖前愆嗣又諭曰前因逆猺趙金隴滋擾當湖南進剿之時卽降旨交李鴻賓妥辦如果先事豫防一切調度自必得宜何至任其蔓延用兵之道貴在神速該督聞信乃因循姑待至四月間奏請前往五月始抵連州且據奏稱俟湖南猺匪辦竣後再行籌辦尤屬意存觀望又據奏稱劉榮慶年將七十兩耳重聽此等衰庸之員早應參劾何以久事姑容李鴻賓種種錯謬著交部嚴加議處部議革職命拔去花翎改爲革職留任旋以鴻賓辦理失宜命禧恩瑚松額赴粵剿辦七月鴻賓奏擒捕猺匪屢有殲獲分兵守隘俟楚兵到齊後妥籌剿捕並請用堅壁清野之法上以堅壁清野未免曠日持久命禧恩等俟湖南兵到粵

後迅擊之禧恩瑚松額之赴粵也有旨令將鴻賓辦理情形并奏報虛實查明具奏八月奏入諭曰據禧恩等奏李鴻賓於五月間始抵連州定計分路進剿山深箐密偵探未確卽行進兵墮賊設伏奸計將弁兵勇多有傷亡辦理已屬失宜兩月以來雖間有斬獲亦僅一二搶掠匪徒並未擣穴攻巢擒渠斬馘且意主招安犒匪正在鷓張非大加懲創安能帖然就撫實屬懦弱無能節次所奏軍情與禧恩等所查情形亦有未符是其含混入奏誤事之罪咎無可辭又據禧恩等奏該省調至軍營戰兵六千餘名不慣走山沿海各營兵丁多有吸食鴉片煙者該省營伍皆屬總督統轄如果平素整頓操防何至臨陣懼懼平日廢弛臨事畏葸種種乖方李鴻賓著革職來京交部治罪十一月經大學士軍機大臣長齡等會同刑部審訊奏請從重治罪諭曰李鴻賓辦理連州犒匪節次所奏軍情訊無含混情形而辦理不善耽延月日罪實難道雖隨同禧恩等辦理犒匪完竣僅罰軍需三成銀兩尙不足以示懲著從重發往烏魯木齊效力贖罪十四年二月釋回七月抵京賞編修旋告假回籍二十六年卒子儒郊前任甘肅甘州府知府儒鄭庚子科舉人捐納員外郎

陳官俊

陳官俊山東濰縣人嘉慶十三年進士改翰林院庶吉士充文穎館協修十四年散館授編修十五年充順天鄉試同考官十七年大考二等賞線緞一匹二十年四月升右春坊右贊善九月轉左贊善二十一年六月命在上書房行走八月充順天鄉試同考官九月充日講起居注官二十三年二月大考二等賞緞二匹七月遷司經局洗馬十月升翰林院侍講二十四年三月充會試同考官六月充陝甘鄉試正考官九月提督山西學政二十五年四月轉侍讀九月升右春坊右庶子仍留學政任先是戶部尙書英和奏各省府州縣養廉不敷辦公取給陋規日益加增不若逐一查明分別應存應革定以限制上命各督撫體察情形議奏尋官俊疏言事不可行尙書汪廷珍侍郎湯金釗總督孫玉庭蔣攸銛亦先後奏阻諭曰英和聽信邪言謂清查陋規有益於國計民生率爾陳奏幸朝有諍臣連章入告朕不勝欣悅之至陳官俊著交部議敘道光元年八月升翰林院侍講學士命回京仍在上書房行走十一月山西巡撫成格奏劾官俊在學政任內各款命交軍機大臣傳訊官俊承認毆差買妾兩款屬實諭曰學政按臨各處州縣丁役

如有過犯原應發交地方官懲處乃陳官俊自行責打辦差家人未免輕躁然此猶其過之小者也考試平陽時買通判之婢爲妾學政本不應與地方官交結乃不檢束有違例禁此實咎無可辭其所參干預地方公事一節上年朕本有密旨諭令留心察訪官吏賢否政治得失隨時密奏詎意陳官俊卞急粗率將晉省官員大加訪問以致聲勢侈張物議激起殊與朕委任之意大相徑庭言不密則失身致干罪戾陳官俊著降爲中允贊善候缺補用念伊平日在上書房授大阿哥讀功課尙能認真著加恩仍在上書房行走時陝甘總督長齡請入覲上卽命長齡順道赴山西查辦並解陳俊官任就質十二月長齡奏稱成格所參陳官俊各款多係得自傳聞不能指實諭曰前據成格奏所參陳官俊各款當降旨令長齡於來京陛見之便前赴山西省城署理巡撫事務將成格陳官俊俱行解任交長齡秉公查辦茲據查訊具奏成格於奏參陳官俊各款多係得自傳聞不能指實又復措詞失體成格不勝巡撫之任著卽來京以六部主事降補陳官俊躁妄粗鄙不知慎密實屬負恩著退出上書房以編修降補又諭曰前因成格奏參陳官俊於嘉慶二十四年冬間在太原縣毆打辦差家人又於二十五年六月買妾並

稱干預地方公事擅作威福雖未能實指其苞苴之據而已大開奔競之風等語卽令軍機大臣等傳到陳官俊詳加詢問所參毆差買妾兩款均已承認至密陳官員賢否則堅稱實未向人洩漏當令軍機大臣寄問成格向陳官俊鑽營者何人奔競者何人令其明白回奏嗣於十一月二十四日具摺覆奏前來聲稱魏元烺邱鳴泰諸人省中紛紛傳說俱經學院保舉此數人官聲素好所舉原不謬妄又稱陳官俊曾向伊說皇上見差太監前往河東查訪商人控告鹽務一案此則更不成話愈辨愈奇支飾尤甚試思此語若確陳官俊當得何罪必應徹底查訊按其是非治以應得之咎特令長齡於經過晉省時馳赴省城一面著陳官俊前往山西當面質對令長齡秉公查訊孰是孰非據實覆奏茲於十二月十二日長齡奏到據稱到省後傳旨詢問成格令其一一指證成格惟有伏地叩頭聲稱奏事不實以妄誕無稽之語冒瀆宸聽實屬荒謬不能指實惟求代奏從重治罪已降旨將成格陳官俊俱行降革示懲矣陳官俊於嘉慶二十四年冬間毆差二十五年買妾成格因何不卽行參奏乃一味姑容已屬不能秉公持正及至陳官俊奉有密旨留心地方公事成格揣得其情心存畏忌以伺其短又值陳官俊不知

檢束於前不能慎密於後高興妄爲自取罪戾但成格去歲回任今又將及一載且於嘉慶二十四五兩年年終奏報本省學政摺內全未提及一語於此可見毆差買妾之事原不欲行參奏總因陳官俊查訪地方情事恐其遇事直陳有害於已輾轉狐疑蓋非一日也又計陳官俊未回京之前若行參奏朕必立派大臣前往查辦是非無難立辨伊焉能售其伎倆是以直待其回京後始行參奏而摺內復隱約其辭使朕存之於心知陳官俊不可信任在內廷之人奉命出差尙且如是其翰詹科道等出差奏事更不足信矣即使陳官俊有所陳奏朕豈有不辨別是非槩行聽納之理再陳官俊若係朕委用無疑之人何難授以地方大吏或留於山西以備查訪因何學差未滿反令其回京供職耶朕用陳官俊之意於此可見也詎意成格巧詐欺飾以無可質對之言屢行奏辨其居心直欲屏朕耳目使不聰明外省之事無敢過問此其咎之重者也至陳官俊奉命典學惟當盡心考試或有與撫臣交涉之事原可公同商酌至奉有密旨後惟當隨時察訪默而識之可奏者奏之無庸奏者置之不應將密諭顯露公然議論其賢否是非不特有乖素位而行之誠卽與朕之諭旨亦大相徑庭矣躁妄粗鄙深負朕恩必當立予

降黜以爲不慎不密者戒朕辦理庶政一秉公誠賢則用之不肖則去之從不心存成見亦不能直受欺蔽也嗣後各省督撫斷不可因成格參奏學政獲譴卽有不公不法之學政亦不肖據實參奏各省學政亦不可因陳官俊言事不密獲咎明知本省利弊亦皆緘默不言如是則與朕用人行政之心大相刺謬矣故復申諭各省督撫學政知之二年充順天鄉試同考官四年大考三等奪俸半年五年充順天鄉試同考官八年五月充貴州鄉試副考官十二月升右春坊右中允九年升國子監祭酒十一年六月充江西鄉試正考官七月丁父憂十三年十一月服闋十二月補翰林院侍講學士十四年二月升詹事府詹事三月充日講起居注官九月稽查西四旗覺羅學十月升內閣學士兼禮部侍郎銜十二月充文淵閣直閣事十五年稽查中書科事務充殿試讀卷官十六年三月升禮部右侍郎五月充朝考閱卷官轉左侍郎七月調吏部右侍郎十七年八月署戶部右侍郎兼管錢法堂事務旋充順天鄉試副考官十二月轉左侍郎十八年充庶吉士散館閱卷大臣十九年正月充經筵講官二月充大考翰詹閱卷大臣三月升工部尙書七月命查三庫十一月賜紫禁城騎馬時東陵郎中慶玉被馬蘭鎮總兵琦

琛奏參查辦並籍其家以訊有隱匿寄頓等情經王大臣傳詢慶玉之戚戶部主事全孚供稱豫先得信係陳官俊談及官俊遵旨回奏與全孚親供不符上以官俊隱飾命解任聽候傳訊諭曰前因查辦慶玉一案究出送信根由係戶部主事全孚牽涉工部尙書陳官俊當降旨分別訊究朕於此案並不計其隱匿寄頓之多寡惟須究出送信之人從嚴懲辦本日據載銓等將陳官俊全孚親供呈覽全孚之供仍稱陳官俊告知而陳官俊則過涉支吾以情理而論言者或出無心聽者早已有意卽令陳官俊偶有不檢摭拾空談亦不致遽罹重譴何以親具供詞毫無一語著實朕綜理庶政一秉大公在廷大臣無不相待以禮今遇此等案件既有旨訊問自當供明朕亦斷不疑陳官俊與慶玉有私故爲送信著陳官俊再行據實具供無得稍形影響儻經此訓諭之後仍復含混飾詞必將該尙書革職嚴訊勿謂朕薄待大臣也尋官俊供因事談及屬實諭曰前因查辦慶玉一案牽涉工部尙書陳官俊當降旨飭令明白回奏若該尙書於前經奉旨之時卽行據實奏明何致屢于訊究乃所具供詞俱設支吾迨經嚴旨訓諭始行據實供出陳官俊以一品大員言語不知檢點摭拾空談致令全孚藉端傳說以虛爲實咎實

難辭陳官俊著交部嚴加議處部議革職奏上諭曰此案查辦慶玉各款與陳官俊原不相涉惟陳官俊傳詢全孚時稽覈經手工程不應以臆揣之詞提出難免動家字樣以致全孚藉端送信指虛爲實已屬失於檢點至降旨飭令明白回奏並解任取供兩次所陳俱含混隱飾及至嚴旨切責始行供明殊失大臣之體陳官俊著照部議革職二十年授通政使司通政使二十一年稽查西四旗覺羅學二十二年正月升戶部右侍郎兼管錢法堂事務二月復充經筵講官十一月調吏部左侍郎二十三年四月諭曰戶部三庫總司出納事務較繁著派戶部滿漢左侍郎兼管向來管理三庫大臣僅派二員著添派廖鴻荃陳官俊凡遇收放銀兩日期輪應一人親往監視並專司啟閉五月以顏料庫不戒於火部議奪俸半年六月兼署戶部右侍郎兼管錢法堂事務時銀庫虧短案發官俊曾充查庫大臣坐失察革職留任旋以應賠銀兩限內全完恩予開復八月署兵部尙書十月以吏部行印被竊部議鑄級留任十一月賜紫禁城騎馬十二月升禮部尙書兼署工部尙書偕軍機大臣順天府遵旨申議科場章程奏言鄉會試謄錄各州縣選正身書吏字畫清楚者於親寫年貌籍貫外加以臂印派幹練丞倅解赴順天

府查驗並監臨知貢舉覆驗入場該謄錄所官嚴密稽查一次無過紀錄一次三次無過加一級失察舞弊者議處又查彌封所謄錄所於至公堂東西分設本屬隔絕應責成巡察官見有二所人役私相往來者從重究辦以杜弊端又向來落卷祇由該生報名領發是否本人無從查覈嗣後應以領卷印票繳驗爲憑再查乙未年特命舉行覆試惟各直省自行覆試恐屬具文若照順天府例殿廷分次考試亦形繁擾應請令各省舉人於會試年二月初十日前到京取具同鄉官印結送部十五日在貢院覆試其道遠逾期到者歸順天府補行覆試其逾補試期者歸下三科辦理三科內未覆試者永遠不准會試亦不准截取銓選均如所請行二十四年二月調工部尙書三月充會試正考官四月充庶吉士散館閱卷大臣朝考閱卷官八月充溝渠河道值年大臣十月命大挑各省駐防舉人十一月以己句絞犯宋添成臨刑呼冤命軍機大臣會同恩桂陳官俊再行覆訊尋訊明宋添成鬪殺屬實請仍照刑部按律問罪允之尋調吏部尙書協辦大學士二十五年四月充庶吉士散館閱卷大臣尋以前署兵部尙書任內於候補主事恩麟違例派署掌印未能查明更正部議鑄級十月命偕軍機大臣審訊福建臺灣刁

民郭洸侯一案尋訊明洸侯斂錢上控抗捕負固屬實按問如律十一月遵旨偕軍機大臣審訊吏目蔣勤培責押無辜一案並訊明給事中雙壽巡城御史萬超有請託瞻徇情弊分別奏辦均允之二十六年二月上謁西陵命留京辦事閏五月以吏部郎中慶文存用書吏張彤送繳節省工銀聽從干求改補經承名次郎中邱景湘收受張彤壽禮扶同瞻徇官俊坐失察交都察院議處十一月充玉牒館副總裁命管理三庫事務十二月上以御門時吏部堂官全行誤班交都察院議處奪俸二年二十七年二月以官俊母年九十歲御書者臣壽母扁額福壽字並珍綺等賜之四月充殿試讀卷官朝考閱卷官五月充大考翰詹閱卷大臣六月諭曰繙譯爲滿洲本業每科繙譯會試獲雋者止用部屬升途較隘茲將此項人員轉入翰詹衙門專心學習繙譯與各員一體升轉遇有考試之年卽照向例考試繙譯免致舍其所長用其所短其應如何分缺錄用之處著大學士軍機大臣會同吏部議奏至蒙古進士以主事用者得缺較難應如何疏通俾無積滯亦著一併議奏尋偕大學士穆彰阿等奏將繙譯出身滿蒙人員分缺轉補並分別內班外班及應行考試抵補之處擬就九條呈覽并請將蒙古繙譯進士以主事

用者掣分六部理藩院太僕寺行走三年奏留後遇有題選缺出酌量補用允之
十一月上以各省獲盜引見官員有題咨到部者有專摺奏請者殊未畫一命吏
部明定章程畫一辦理尋奏言如有丞倅州縣以下等官獲盜與引見之例相符
者均題請引見如有續獲多案止題請給與加級紀錄者毋庸調取若未經引見
該員已另案升補其所獲之案仍照例調取引見其續獲多起併案赴部者於引
見簽內逐一聲敘再文職獲盜例准調取人員州縣以上由督撫專摺奏請州縣
以下具題如所議行二十八年十一月命充上書房總師傅十二月以四川從九
品包全春送伊戚引見於吏部帶領時誤隨入乾清門官俊坐失察奪俸一年二
十九年二月以給事中陳壇奏參翰林院編修童福承品行不端難勝上書房授
讀之任並聲稱福承送官俊妻祭文有過當語官俊遵旨回奏福承措詞失當屬
實諭曰童福承身列詞垣不自檢束致招物議著不准其授讀陳官俊於童福承
措詞鄙陋原可不論但將該員派充師傅之後何以不卽奏聞實難辭咎陳官俊
著毋庸充上書房總師傅並交都察院議處旋議降三級調用上加恩改爲降六
級留任閏四月充考試試差閱卷大臣七月卒諭曰協辦大學士吏部尙書陳官

俊性情直爽表裏如一學問貫通慎勤供職蒙皇考仁宗睿皇帝特達之知由翰林院入直上書房學識兼優克盡厥職朕御極後見其心地坦白誠樸可嘉日加委任洊擢正卿特命以吏部尙書協辦大學士奉職彌勤正資倚畀茲以痰疾猝發頃刻溘逝遺章披覽悼惜良深著加恩晉贈太子太保入祀賢良祠賞給陀羅經被派惇郡王卽日前往奠醮任內一切處分悉予開復應得卹典該衙門察例具奏又諭曰陳官俊以疾遽逝昨已降旨賜卹追念愴然伊長孫陳厚鍾加恩賞給舉人准其一體會試次孫陳厚滋俟及歲時由吏部帶領引見候朕施恩尋賜祭葬予諡文愨子介祺見官翰林院編修

清史列傳 卷三十七

大臣傳續編二

黃鉞

黃鉞安徽當塗人乾隆五十五年進士以部屬用籤分戶部嘉慶五年得旨候補主事黃鉞著照趙秉冲之例在懋勤殿行走七年補主事九年正月諭曰黃鉞在懋勤殿行走有年伊本係進士出身學問尙優著加恩改擢贊善遇缺補用並著在南書房行走三月諭曰向來部院各官補實缺者方准考試試差黃鉞尙未得缺但本係實缺主事准其一體與考七月充山東鄉試副考官十年八月補詹事府右贊善十一月充日講起居注官十一年三月升右中允六月轉左中允十月遷翰林院侍講十二年六月充湖北鄉試正考官八月提督山西學政十三年轉侍讀十四年十一月升詹事府右庶子十二月偕山西巡撫初彭齡奏請巡幸五臺從之十五年四月轉左庶子十月差竣回京仍入直南書房十七年升翰林院侍講學士十八年二月時屆京察上以黃鉞供職勤慎予議敘七月充山東鄉試

正考官八月提督山東學政九月擢內閣學士兼禮部侍郎銜十二月奏參荷澤縣訓導兼理曹州府教授宋璇失察武生馬克光學習邪教請褫職十九年二月復奏參失察武生從逆之定陶縣教諭郎謙牧訓導方運景均請褫職又奏言上年逆匪擾及定陶曹州府屬文武生員助官剿賊學錄孔毓俊生員孔毓仲等同時陣亡均請交部議卹並以金鄉縣生員李九標首告教匪破案復設法擒獲謀逆在逃諸犯奏請獎勵俱從之三月命來京供職仍入直南書房四月授戶部右侍郎兼管錢法堂事務二十年二月接纂祕殿珠林石渠寶笈續編命鉞偕吏部尚書英和兵部右侍郎姚文田專司檢閱二十一年六月寶泉局匠役訛索滋事上以黃鉞管理錢法堂未能稱職下部議處尋調禮部右侍郎閏六月祕殿珠林石渠寶笈書成賞加二級八月充順天鄉試副考官十一月纂輯全唐文告成得邀賞資十二月充玉牒館副總裁官二十二年三月調戶部左侍郎四月充殿試讀卷官二十三年八月署兵部左侍郎十月賞紫禁城內騎馬二十四年授禮部尚書二十五年三月充會試副考官八月賞加太子少保銜九月命在軍機大臣上行走旋調戶部尚書十月御史李肄頌奏請將應追官項覈實辦理上命軍機

大臣議奏鉞偕大學士曹振鏞等奏言攤扣銀兩往往經年累月追補無期應請敕下各督撫嚴飭各屬遇有動支錢糧務令實用實銷報銷到部各該部亦卽詳慎句稽迅速覈銷應行駁減者卽於本員名下按限追補不得攤派以滋擾累其攤扣養廉之事概行禁絕從之又奏河工添用正途人員略言河工同知通判皆知縣佐貳升階如果知縣佐貳內正途居多則將來保奏河廳不患無人查見在分發河工正途人員祇有大挑舉人一項應請將教習期滿知縣教職保舉知縣兩項內揀選發往俾令學習照大挑舉人之例補用每屆三年由該河督察看人數多寡酌定員數奏請揀發如所議行道光元年七月妻喪請假諭曰卿已逾七旬非十分強壯可比矧天時暑熱切勿過於哀傷總之國事爲重倚畀方深加意自愛永保康強佐朕以襄上理實有厚望焉二年正月時屆京察得旨黃鉞辦理部務本屬妥協又自簡任軍機大臣以來敬共所事實力匡襄著交部議敘五月以會議倉場盤查章程措置失宜降一級留任八月充順天鄉試正考官三年正月諭曰朕於本年元旦御殿受賀闈惠覃敷左右近臣允宜特加恩澤戶部尙書黃鉞前因議奏倉場以放代盤措置失宜降一級留任著加恩寬免三月署翰林

院掌院學士四月充殿試讀卷官四年正月會議保送倉監督章程略言花戶散法總由監督約束不嚴自應慎加遴選請嗣後欽天監太常寺鴻臚寺鑾儀衛各衙門司員均毋庸保送其餘令各該堂官秉公遴選其結實可靠之員准該侍郎等奏留三年始終奮勉隨時奏給升途至京察之年應請添保一員不得先儘坐糧廳大通橋監督以昭公允其不實心任事者隨時參處庸懦無能者咨回停升自行查出舞弊者免議至向例監督祇領半俸嗣後請給全俸以資辦公從之二月奏言各直省奏報徵糧比較之法未能畫一嗣後應請一律比較分數凡豐收之年以額徵之數爲準蠲緩之年以應徵之數爲準各按十分計算本年完欠分數較之上三年或溢或少或相等一一註明其舊欠帶徵亦照此另款開造統以辦理奏銷之日截數開單奏報以歸畫一如所請行五年正月京察屆期上以黃鉞管理部務均臻妥善獻替匡襄尤爲出力下部議敘五月諭曰黃鉞年逾七旬夙夜趨直未免勞勩著無庸在軍機處行走俾得專心辦理部務仍入直南書房亦無庸逐日進內十月以年老乞休諭曰黃鉞懇請致仕並自陳在京供職三十六年未能回籍省墓詞意肫切覽奏深爲惻然黃鉞雖年逾七旬精力尙健前降

旨令其專心部務正當爲國宣勤永承恩眷豈忍令其遽行解退所請著不允仍照舊供職益加懋勉以副朕懷六年四月充殿試讀卷官九月因病陳請開缺上允所請命安心調理病愈卽行銷假十月籲懇致仕諭曰戶部尙書黃鉞由主事改授贊善供職內廷仰蒙皇考恩眷洊擢正卿經朕賞加宮銜在軍機大臣上行走嗣以年老令其專辦部務仍入直南書房上年曾以年力已衰懇請開缺不忍遽許解退溫諭慰留本年秋閒因腰疾乞假月餘奏請開缺降旨允准並令安心調理病痊銷假茲復以腰疾雖愈精力頓衰籲懇致仕回籍情詞肫切若仍不允所請轉非所以示體卹黃鉞准其以戶部尙書致仕回籍並加恩在家支食半俸俾得怡志林泉安心頤養用示優眷老臣至意十一月奏回籍行期上念其年近八旬嚴冬就道賞給護杖以資調攝九年鉞八十生辰諭曰予告尙書黃鉞曾直內廷宣力有年學問素優人亦謹飭本年八月爲伊八十生辰特頒御書福壽扁聯並賜以壽佛如意朝珠文綺等件用迓福祉伊子禮部小京官黃富民加恩作爲候補主事俾聞之益增慶慰並傳諭黃鉞不必遠道跋涉來京謝恩以示朕優禮耆臣錫慶引年至意十年以前在戶部任內失察假照降三品頂帶十一年上

五旬萬壽賞還頂帶十二年以捐資助賑並捐建義倉下部議敘十九年鉞九十生辰御書福壽字頤性延祺額樞廷贊治經猷在珂里承恩歲月長聯句並服物陳設命鉞子禮部郎中富民齋回賜之二十一年卒年九十二遺疏入諭曰致仕尙書黃鉞學問優長持躬端謹仰荷皇考知遇由部曹改官贊善洊歷正卿朕御極以來簡贊樞垣密勿宣勤深資倚畀嗣以老疾乞休因其年近八旬曲加體卹准予致仕並賞給半俸特賜濩枝方期永享遐齡長承恩眷茲聞溘逝悼惜殊深著加恩晉贈太子太保銜入祀賢良祠照尙書例賜卹所有原任內一切處分悉予開復應得卹典該衙門察例具奏用示朕篤念耆臣至意尋賜祭葬諡勤敏子富民官禮部郎中

王宗誠

王宗誠安徽青陽人父懿修禮部尙書宗誠乾隆五十五年一甲三名進士授翰林院編修五十七年充雲南鄉試正考官六十年充四川鄉試副考官嘉慶三年充陝西鄉試正考官旋提督河南學政四年十二月升左春坊左贊善五年四月遷左中允均留學政任七月奏科試陳州府查出童生張序東等用私雕假印換

卷傳遞嚴行懲辦諭獎其細密精詳六年六月遷司經局洗馬七月奏言駐防旗童就各省學政考試入學部議令各該學政歲科兩試後按照應試人數多寡咨部定額臣備職河南歲試時駐防赴考者五人照例取進一名科試赴考者九人其數較增於前然於取進兩名之額尙有未符仍取進一名如照見在取進者定額將來人數衆多未免爲額所限若豫爲餘地多取數名又恐轉滋冒濫可否暫緩定額俟三屆歲科試竣再行覈辦下部議行八月擢翰林院侍講九月充武英殿提調十一月轉侍讀十二月擢左春坊左庶子七月充日講起居注官八年二月擢翰林院侍講學士三月大考三等降左庶子向例大考降補人員不計算前俸上以宗誠充武英殿提調有年辦理書籍妥協無誤特旨准接算前俸九年二月上幸翰林院命廷臣侍宴聯句恩賚有差宗誠與焉尋擢翰林院侍講學士五月轉侍讀學士十月充順天武鄉試正考官十年遷詹事府少詹事十一年正月充文淵閣直閣事十月擢詹事官二年高宗純皇帝實錄告成宗誠以曾充纂修下部議敘尋提督山東學政十三年奏母病沈重請開學政缺來京省視允之旋丁母憂十五年五月服闋十月補詹事復充文淵閣直閣事十六年充武會試副

考官十七年擢內閣學士兼禮部侍郎銜十八年遷禮部右侍郎充順天武鄉試正考官十九年二月署工部右侍郎三月充會試副考官二十年命在上書房行走二十一年四月以父病奏請開缺終養允之尋丁父憂二十三年七月服闋十一月署禮部右侍郎二十四年九月提督江西學政旋授兵部左侍郎先是十四年十月上五旬萬壽九月二十七日孝慈高皇后忌辰係常服不掛珠是年十月上六旬萬壽禮部於九月二十七日服色未經援照十四年聲請堂司各官均下部議處宗誠以正三品京堂降補仍留學政任二十五年授禮部左侍郎道光二年擢兵部尚書命來京供職三年三月署禮部尚書四月充殿試讀卷官四年充經筵講官七年四月署工部尚書八月署刑部尚書十一月賜紫禁城騎馬八年正月逆回張格爾就擒上以宗誠督辦軍報均臻妥協下部議敘八月署兼管順天府府尹十二年署兵部尚書十三年四月宗誠七十生辰御書政翊西樞扁額福壽字及壽佛如意諸珍物賜之十五年復署兼管順天府府尹十七年正月卒遺疏入諭曰兵部尚書王宗誠辦理部務清勤端謹克盡厥職近因感受風寒賞假調理方期速就痊愈益資委任遽聞溘逝殊深軫惜著照尚書例賜卹任內一

切處分悉予開復應得卹典該衙門察例具奏尋賜祭葬子元榜刑部員外郎

何凌漢

何凌漢湖南道州人由拔貢生於嘉慶七年朝考一等以七品小京官分吏部十年一甲三名進士授翰林院編修十二年充廣東鄉試副考官十三年充順天鄉試同考官十七年大考二等十九年二月升國子監司業十一月遷左春坊左中允十二月充文淵閣校理二十年三月升司經局洗馬充日講起居注官六月升翰林院侍講二十一年京察一等二十二年轉侍讀二十三年二月大考二等八月轉右春坊右庶子二十四年五月充福建鄉試正考官十二月遷國子監祭酒道光二年充山東鄉試正考官旋提督山東學政遷翰林院侍讀學士三年奏言山東各學考試童生廩保甚少致槍替之案疊出今酌量增派自縣考至院試無許更換諸弊漸清每試日靜坐堂皇書役悉閉置一室蓋場中多一查弊之人即多一作弊之人臣以爲防弊之道苟挈其要領無事煩苛疏入得旨嘉勉四年遷通政使司副使五年稽察右翼宗學六年升順天府府尹七年坐失察宛平縣知縣張瀚仙緝拏要犯疏懈下部察議八年正月逆回張格爾檻送京師凌漢支應

兵差安速無誤下部議敘五月上御門受俘禮成加一級八月充順天鄉試監臨以士子入場驟雨擁擠擦損試卷未能先事豫籌下部議處十年遷大理寺少卿仍署順天府府尹十一年正月署兵部右侍郎二月遷都察院左副都御史五月陞工部右侍郎兼管錢法堂事務兼署禮部左侍郎六月充浙江鄉試正考官旋提督浙江學政十二年命偕閩浙總督程祖洛審訊山陰會稽紳幕書役勾結舞弊一案鞠實請褫在籍按察使李澧職庫書徐燮堂等各治如律十三年正月調吏部右侍郎兼管順天府府尹事務二月以京畿上年遇旱奏設六廠煮賑嗣因續領米質嫩劣請照七折計算經戶部以折耗過多參奏上命倉場侍郎貴慶等查辦貴慶等奏大興等縣領米出有米色乾潔斛面無短切結不得藉詞折算又府丞王瑋慶奏書役領米恐有中途攙和等弊請敕命確查覈辦凌漢遵旨覆奏略曰此次續領米石曾經親赴各廠量準煮試其放飯之鐵杓應煮得三十二三杓者此次止得二十二三杓故請以七折報銷至州縣領米皆係具結在先領米在後乾潔等語何得以爲確據請欽派公正大臣查驗至中途攙和一節書役領米卽日出城到廠耳目衆多恐難明目張膽提出數百口袋從容作弊請將書役

花戶交刑部審訊上命大學士公長齡等驗試並由刑部定讞均如凌漢所奏辦理四月以固安縣飯廠設賑就食貧民村莊遼遠瞬屆炎暑飯易變味請改爲散米以示體恤從之尋調戶部左侍郎五月奏直隸紳士捐輸賑銀計分儲霸昌通永兩道庫以昭慎重六月奏京畿賑餘米石請存儲縣倉以備急需俱如所請行會挑挖內外城河道以工代賑就食者多至二三萬人詔凌漢議定工竣資送章程尋奏言窮民住京城內外者止須略給錢文無庸資送其在京外州縣以及籍隸他省者先應令其路無乏食尤當使之歸有餘資惟傭趁非同遞解籍貫又屬難稽擬於散工日酌給盤費錢二百並給印票一張註明制錢五百各赴本籍衙門承領俾貧民意有所貪散歸必速所需錢文卽在捐賑項下支給允之七月調吏部右侍郎兼署戶部右侍郎兼管錢法堂事務十一月議駁御史那斯洪阿條陳事宜一地方官有錢糧處分不准升調凌漢以理繁治劇每難其人若格以因公處分概不升轉必至以平庸無過者遷就轉非所以慎重地方且吏治與催科並非兩事未有循良而帑藏空虛者亦未有貪濁而倉庫充實者是在督撫爲缺擇人不爲人擇缺一官收一官之效一人有一人之益正不必徒事更張轉滋窒

礙一變通稅務凌漢以落地雜稅及房屋典當等稅已極周密至京師九門外有鋪稅天津新疆沿壕鋪面有房租因係官房官地也今欲盡天下之府廳州縣仿照定稅則布帛菽粟民生日用所需市僧必將加價以取諸民者輸官水腳火耗官又將取之於民且開歇無常稅額難定徒有歛怨之名而無裕國之實上是之十四年二月擢都察院左都御史仍兼管順天府府尹事務十一月賜紫禁城騎馬擢工部尚書仍兼署左都御史兼管順天府府尹事務十二月充經筵講官十五年三月充會試副考官五月教習庶吉士九月以恭理孝穆成皇后梓宮奉移事宜下部議敘十二月孝穆成皇后孝慎成皇后奉安禮成加二級十六年三月署吏部尚書五月奏直隸寶坻縣歉收請將倉儲餘米散給以濟民食允之九月奏永杜回漕錮弊章程略言欲杜回漕先禁囤積請嗣後天津一帶濱臨水次鋪戶存儲粗米不得過十石違者以回漕論並請責成文武官實力稽查以重漕政尋部議以存儲粗米不得過十石易啟書役擾累之弊改爲不得過五十石凌漢復奏言例載京城粗米不准出城誠以粗米便於回漕水次鋪戶不得擅行囤積不問可知惟是旗丁餘米例准售賣是以有不得過十石之議若寬以五十石則

通州至天津共六百九十家每家五十石合之已及三萬五千石難保無接濟回漕之事至書役擾累全在地方官約束得法自無流弊上如其議十七年三月上親耕藉田浚漢以從耕加一級九月充鄉試覆試閱卷大臣十九年三月調戶部尙書議駁四川總督寶興奏請按糧津貼防邊經費略言川省地丁額徵六十餘萬兩加以津貼較原課幾增兩倍非藏富於民之義且軍需藉資民力不可率以爲常請於各省秋撥項下抽撥百萬兩以三十萬作爲初設邊防之用其餘發商置田所獲息銀以四萬兩爲常年經費二萬兩歸還原款於防邊恤民兩有裨益上是之八月充順天鄉試副考官二十年卒遺疏入諭曰戶部尙書何浚漢由翰林洊擢正卿品行端謹辦事勤慎昨據因病請假冀卽調理就痊遽聞溘逝殊堪悼惜著加恩賞加太子太保銜照尙書例賜卹任內一切處分悉予開復應得卹典該部察例具奏尋賜祭葬予諡文安子紹基翰林院編修紹業四品廕生候選縣主簿紹祺雲南廣通縣知縣紹京候選道

朱士彥

朱士彥江蘇寶應人嘉慶七年一甲三名進士授翰林院編修十年充會試同考

官十二年充河南鄉試正考官十四年充會試同考官十七年二月大考二等五月陞右春坊右贊善十一月陞右中允十八年二月轉左春坊左中允四月陞司經局洗馬七月遷翰林院侍講八月提督湖北學政十一月轉侍讀十九年四月陞右春坊右庶子九月轉左春坊左庶子旋擢翰林院侍講學士皆留學政任二十一年轉侍讀學士二十二年充日講起居注官二十三年二月大考二等十一月命在上書房行走二十四年遷詹事府少詹事二十五年陞內閣學士兼禮部侍郎銜道光元年因病陳請開缺二年二月病痊補原官八月遷兵部右侍郎三年四月充殿試讀卷官九月充知武舉十二月轉左侍郎四年以南河高堰掣通過水條陳河工事宜一高堰石工宜切實估修一堰內二隄宜查勘培補一黃河盛漲宜兩岸分洩一山盱五壩宜相機開放一黃河下游無隄之處宜查勘接築疏入命欽差尙書文孚等籌議尋以士彥原奏均屬緊要機宜經久良策惟高堰內二隄必須增培與大隄相平始足以資保障但需費甚鉅若酌量培補徒費無益餘俱俟各要工完竣後奏請辦理允行五年八月提督浙江學政十一月奏禁訟戶抗糧略言杭嘉湖三府錢糧逋欠甚多詢係不肖生監曾經上控有案卽謂

之訟戶包漕鬧漕抗不完納士習如此不可不急加整頓應請飭下督撫嚴飭府州縣認真辦理奏入命浙江巡撫程含章會同士彥實力整頓六年七月御史錢儀吉以士彥任性錯謬列款劾奏上命程含章詳細確查八月覆奏查明原參各款有並無其事者有事出有因而未盡實者該學政考規整肅取士公平任怨任勞係屬實心任事之人得旨浙省士風輕薄朕所夙知該學政遇事整肅原無不合惟伊父朱彬迎養到浙祇應在署居住不應隨棚閱卷若亦幫校閱豈不與干豫公事者無異試院演劇雖係場事全竣亦不應漫無關防至生童剿習舊文字畫錯訛原應豫行出示曉諭告誡究不宜出題割裂句讀取進後輒予掌責致滋物議著交部議處八年回京九年三月充會試副考官九月充知武舉十年二月提督安徽學政九月擢都察院左都御史回京供職十一月賜紫禁城騎馬十一年二月署經筵講官五月遷工部尙書七月江蘇河湖漫溢江漲添長被災甚重時江蘇學政白鎔以陞任來京上令沿途查訪命士彥偕工部尙書穆彰阿前往查辦八月以安徽被災情形相同命偕白鎔於查辦江蘇事竣前赴履勘九月奏參河庫道沈惇彝沾染習氣言語虛浮原任宿南通判范玉昆襄辦總河幕務聲

名平常得旨俱勒令休致不准仍在河工逗遛旋奏馬棚灣被水情形略言高郵十四堡業已合龍其馬棚灣決口之由因江淮同時盛漲宣洩無路所致至河員領有搶修之項卽應儲備料物晝夜巡防乃寶應北城灣朱家灣閘六郵六安溝界首等處告險均借用民間木料搶辦是該廳木料之不豫備已可概見又偕白鎔奏查勘揚河廳屬掣卸各工除土工已逾固限外其掣卸石工應請敕下河臣查明新舊段落著令原辦之員賠修其揚河揚糧兩廳絳隄如有限內坍卸之工應令河臣覈實查辦又揚河廳南關大壩並新壩耳閘間有坍卸衝刷之處已咨令該工員趕緊補修工竣仍報河督覆驗以重要工均如所請行又以淮揚各官多係調署於地方情形未能熟悉請飭令江寧布政使林則徐常鎮通海道張岳崧總司江北賑務至馬棚灣一帶災民挑工餬口其老弱婦女不能工作者應請速查給賑從之十月偕白鎔奏續查江南下河州縣積潦之區被災尤重已飭地方官迅速查賑惟胥吏串通地保浮開戶口爲向來辦賑積弊已令委員查明各鄉戶口卽於本鄉榜示放賑之時州縣官據委員所查總發一榜總查抽查之員卽可憑以覈辦又奏山盱廳屬添建滾水石壩本年啟放過水見已堵合無從查

驗詢據工員而稟本年啟放時石底間被衝裂壩下灰土亦多衝損請俟塘水消落時責令工員修理完固至堰盱兩廳臨湖石工掣卸二百餘丈固限未滿應請責令賠修其石後輒工灰土間有殘缺應請責令補築又盱堰大隄加幫土工間有蟄低浮鬆之處應請責令填補整齊夯礮堅實並責成河兵種柳護隄又以已估未辦之高堰頭二兩堡未估之智信兩壩應請發辦勘估至前項土隄既非臨湖與黃河險要隄岸不同向來僅照黃河保固一年限期太寬請嗣後堰盱各廳土隄及運河隄岸均定爲保固三年其運河埽工亦與黃河埽隄不同請於經歷一年後再加保固一年由該管道驗明堅整始准歸汛修防均下所司議行十一年月奏安徽無爲州江壩及銅陵縣壩工程緊要均應借項興修上允所請十二年正月奏江蘇鹽城縣知縣孔昭杰開報戶口未能認真安徽宿松縣知縣藍桂報災遲延青陽縣知縣彭輔周遺漏災區甲數得旨令陶澍等查明據實參奏又奏向來捐資助賑及辦理賑務之紳民均准給予議敘惟地方官勸捐則恐人少議敘又慮人多以致書吏婪索駁查累月經年不能上達請敕下該督撫嚴禁書吏挑剔早爲查辦從之二月回京旋充武英殿總裁三月充會試副考官五月充教

習庶吉士九月以南河于家灣奸民陳端等偷挖官隄掣動大溜命偕工部尙書穆彰阿馳往查辦閏九月士彥奏九月初旬清口出水二尺有餘高堰長水二丈一尺勢甚危險其時吳城七堡未開是以洪湖喫重此時既已開放湖水自必分減但見交冬令一月後卽難興工湖中旣多積水風烈堪虞應請加緊趕辦疏入諭以通盤籌畫先事豫謀庶有把握十月命偕戶部左侍郎敬徵馳赴江南查辦河務十三年正月奏參已革留工通判張懋祖賠修壩工仍不認真致損壞更甚請將張懋祖在工枷號仍令迅速賠修上是之旋奏于家灣正壩合龍惟壩下尙未閉氣西壩亦間有蟄矮命士彥等督飭工員趕緊加鑲追壓堅實不得稍誤時江南道總督張井以河湖各工殘損奏請分別估辦命士彥偕敬徵覆勘酌量輕重緩急具奏二月奏言堰盱卑矮石工應請改砌碎石分年覈辦舊信壩及智壩仁河義河壩應分別補還石工填修石底其壩下束水之隄應補還缺口又裏河廳屬福興正閘亦應趕緊修辦惟揚河西岸加高包砌碎石並倒卸石工擬令改拋碎石雖均屬緊要而工程較大且已交春令糧艘將到運辦需時應請分年修理從之又遵旨覆按挖隄各犯治如律四月調吏部尙書十二月充經筵講官十

四年請假省親尋丁父憂十六年六月服闋到京署吏部尙書時廣東在籍已革刑部郎中盧應翔干預訟事瀆控不休命偕戶部尙書耆英馳往鞠之會欽差侍郎趙盛奎等查訊前次禮部尙書昇寅隨帶司員白讓卿陽金城被參各款未能認真審辦卽交士彥等覆查嚴訊又以廷臣劾奏江西各員貪劣款蹟諭士彥等於赴粵之先會同江西巡撫陳燮查辦九月偕耆英等奏訊明清江縣知縣孫慧焯挾勢借貸請革職治罪臨江府知府于公槐失於覺察前署樟樹鎮照磨李世康於民人捐輸錢文情同抑勒均請交部議處從之十月奏已革南城縣知縣黃宗憲糊塗任意應照律治罪下部議行十七年正月授兵部尙書二月偕廣州將軍蘇勒芳阿奏訊明盧應翔挾嫌唆訟屬實請治如律下軍機大臣等議行三月奏查明昇寅隨帶司員白讓卿陽金城委無婪索情弊上以白讓卿等不知遠嫌下部議處四月命赴浙江查勘塘工旋奏海塘原爲保障民田而設向係地方官捐廉辦理費實不貲請敕交撫臣籌款覈實勘辦上允所請五月遵旨赴揚州查詢兩淮運使劉萬程出缺原由並赴清江浦驗看南河料垛工程查盤庫款旋奏言劉萬程實係辦公憂瘁愁急輕生並無別故又勘驗南河工堅料實廳員及幕

友等亦無散法營私情事疏入報聞九月奏盤查南河庫存實數與收支冊卷不符按款駁飭河庫道李湘莖具呈登覆前後矛盾請先行交部議處上命褫李湘莖職十月遵旨赴安徽查訊池州府知府吳祺被參各款請革職嚴鞠旋訊明吳祺得受鹽規屬實請治如律是月河南光州職員陳玉書等京控知州派買倉穀命士彥往按之尋訊明知州劉蔭棠擅照糧地造冊向花戶勸買令民自運交倉又明知價值不敷並不妥爲籌辦輒將原詳價值發買致民間領價虧短卽與私派勒買無異署知州郝文光因循接辦各亦難辭應請各照例坐贓治罪仍按限追贓俟限滿有無完繳分別辦理並條陳常平倉穀出糶採買章程略言動用旣少則採買自稀請嗣後各省因糧遞糧卽照五錢定價按年作正開銷毋庸動用倉穀平糶必市價昂貴民有艱食之虞照例酌減一二錢以上若市價在八錢以下竟可停其出糶至採買之時旣須年豐穀賤亦必該州縣聲明已逾二三年方准採買以紓民力而祛宿弊均如所請行十八年二月兼管順天府府尹事務三月充會試正考官四月上回宮士彥在西華門外騎馬未及迴避鐫級留任五月調吏部尙書八月因病請假調理九月卒遺疏入諭曰吏部尙書朱士彥由翰林

洵擢正卿性情直爽辦事公正前因病陳請開缺疊經賞假安心調理方冀病痊正資委任茲聞溘逝深爲悼惜著加恩賞給太子太保銜照尙書例賜卹任內一切處分悉予開復應得卹典該部查例具奏伊長子朱百順業經出仕外其次子附生朱百行廩生朱百城朱百谷附生朱百梅俱著服闋後交部帶領引見尋賜祭葬予諡文定二十一年諭曰朱士彥宣力多年公勤正直前飾終之典已備寵榮茲朱百行等服闋來京朕追憶成勞賞延後嗣附生朱百行廩貢生朱百谷俱著加恩賞給舉人准其一體會試廩生朱百城附生朱百梅俱著加恩賞給副榜貢生用示朕眷念蓋臣有加無已至意子百順二品廕生湖南寶慶府同知百行東河候補通判百城候選教諭百谷候補內閣中書

鄂山

鄂山博爾濟吉特氏滿洲正藍旗人嘉慶元年進士以知縣用選授廣東保昌縣知縣引見改補山西浮山縣知縣三年丁母憂七年服闋補甘肅會寧縣知縣八年調皋蘭縣十年陞安西直隸州知州十五年調邠州直隸州道光元年擢陝西同州府知府二年三月調西安府九月陞糧儲道三年授河南按察使四年遷陝

西布政使五年四月署陝西巡撫五月實授九月署陝甘總督先是青海口外插帳野番偷渡河北搶掠經前任督臣那彥成檄調將弁剿捕十二月奏河北番賊殲除殆盡見飭剿捕竄匿餘匪請將防河官兵添派四百名設卡駐劄以防代守並移會四川總督檄果洛克千戶等一體緝捕又疏言前任總督那彥成奏定將陝甘提鎮馬兵改爲守兵以節經費查烏魯木齊巴里坤兵丁繁劇全賴糧餉養贍若遽改裁於兵丁生計有礙且新疆地方窳遠馬兵之用所賴實多請量爲變通於該二處摘缺緩補無馬之馬兵以馬改步每處改裁一百四十六名以多裁馬兵之糧餉抵少裁馬匹之草乾覈與奏定節省銀數既有盈無絀而於兵額亦無減少疏入均從之六年五月奏陝西新設佛坪廳請添建城垣得旨允行七月復署陝甘總督時逆裔張格爾入卡滋擾上命鄂山安速籌備糧餉會同前任陝西巡撫盧坤總理軍需事務旋奏言肅州距阿克蘇道里遙遠僅於哈密派員督辦尙恐鞭長莫及請於吐魯番庫車兩處設立糧臺專派大員分駐並多設腰站委員催前提後遞相接運如所請行十月偕盧坤奏籌解備用軍餉並調撥四川西安官兵進剿情形得旨汝二人係朕特簡之人深知公誠可靠是以授此重任

務當和衷共濟成此大勳一切出納實心經理斷不可存避嫌遠謗之心勉之十一月奏皋蘭等廳縣秋收歉薄暨供辦兵差各地方請緩其賦並請借給皋蘭等十四州縣災民口糧允之十二月奏請籌解馬匹得旨見在軍營所需馬匹著派員迅速解往大營毋稍遲誤該署督前奏調馬二萬有餘誤將上年喀什噶爾調用之馬一併計算並未撥除鄂山著交部察議七年二月以署安西直隸州知州王世焯玩延軍需奏請褫職又奏托克遜爲烏魯木齊糧臺之首雖有鎮迪道湯鼎在彼往來查催不能在臺常駐仍恐照料難周請以前任甘肅臬司方載豫移駐會同經理均如所請先是借盧坤條奏籌辦軍需章程臚陳十一事一多儲大營糧餉一量加兵丁口糧一駝馬出口官給草料以資飽騰一營馬缺額亟爲買補以供續調一監造軍火器械以備折衝一撥解陝省制錢以平市價一添設臺站夫馬以速軍報一價雇商民車輛以供轉運一雇募護臺民夫以資防守一出口兵丁加賞皮衣皮帽以禦嚴寒一後路糧臺酌駐官兵防護以資慎重疏入議行其三仍命體察情形妥酌辦理至是覈實覆奏上以此次回疆用兵遠在口外一切軍行馱載供支等事原與腹地不同悉如所議行四月疏劾署威遠營都司

魏吉貴藉病避差請褫職五月奏青海口外野番偷渡河北搶劫牲隻檄西寧河州二鎮總兵官榮玉材等率領兵勇分投剿捕斬馘無算並生擒番賊十九名均置之法七月以回疆漸次蕩平奏陳撤兵節費籌議善後事宜略言首逆張格爾脫逃未獲竄往阿賴拉克沙木吉等處潛蹤無定若仍久駐大兵無論出卡路徑紛歧裹糧追捕後路轉運不及縱帑庫充盈亦不值以中國有用之金錢施之於荒服無用之夷地且時交冬令塞外早寒率師深入日去日遠似非所宜請早將大兵撤回一面酌留或一萬或八千之數分布四城籌辦善後並嚴禁往來貿易外夷及隸入版圖各回民均不准輕放一人出入卡倫使內奸外逆聲息不通竊料浩罕安集延及布魯特等處回衆既不得內地大黃茶葉等物接濟又不得銷售皮張貨物資生乏策卽足制其命不出二三年必有以張逆爲奇貨或生擒或函首來獻籲懇弛禁者此必然之事不勞師旅而罪人斯得矣疏入上聽其言又奏請將幫辦幕務之陝西舉人楊浚以知縣銓用格於例嚴飭之仍交部議處尋以克復四城鄂山轉餉有功賞戴花翎並加太子少保銜八年正月首逆張格爾俘擒凱撤敘功諭曰署陝甘總督鄂山自軍興以來督辦糧臺轉運不遺餘力及

凱撤官兵過境辦理善後事宜悉臻妥協且喀什噶爾軍營尙有留防官兵一萬八千名均已豫備經費無誤接濟實屬始終勤奮見在逆首就擒大功告成鄂山著賞給頭品頂帶三月奏請回任詔暫留甘肅督辦報銷十年九月安集延回匪入卡滋事鄂山復署陝甘總督辦理軍需糧餉十一年正月計典屆期有旨陝西巡撫鄂山兩次總辦軍需誠實精詳毫無貽誤著交部議敘三月奏各城均就肅清未到弁兵撤回原營領過俸賞請分別扣免以紓兵力允之尋擢四川總督十月酌議嚴禁鴉片煙章程略言查禁鴉片必須先查官吏俾免包縱徇隱當飭藩臬兩司密查各屬官員如有吸食卽行揭參並嚴查各衙門官親幕友家丁胥役有吸食者加等治罪至各關隘口凡遇客商私帶煙土立即究辦儻書役受賄故縱卽將該管官一併參辦如此則官員自顧考成管束必嚴丁胥知所做畏查拏必力疏入得旨鄂山奏查禁鴉片章程所見至當正百官以正萬民要在認真懲辦俱照所定章程辦理十二年疏劾不職州縣周鑾等四人降黜有差十三年四月兼署成都將軍十二月奏寧遠府屬之越嶲廳有曲曲烏窩石等支生夷出巢在西羊場等處與漢奸勾結焚搶擾及清溪峩邊等廳提督桂涵新任提督楊芳

剿平之請暫留官兵四百餘名分布要隘以資防守並在省設局清查軍需如所請行十四年七月奏峩邊廳十三支赤夷內雅札等以竊漢民竹筍起釁藉稱報復勾結馬邊廳支夷糾衆焚掠劾參將樊豐等辦理延玩降革有差八月奏剿辦情形諭曰楊芳上年奏報三廳地方一律肅清何以未及半年卽有焚掠之案此次趕緊辦理調兵派將已閱數月之久若能杜絕萌芽不致再肇釁端方爲辦理妥善如辦理草率爲時未久復有夷匪滋事該將軍等不能當此重咎也九月奏雅札石畢等支夷出巢滋事經提督楊芳痛加剿辦全就肅清據十三支赤夷各出具木刻自行檢束娃子於各支公舉頭目二十六名歲給犒賞在文武衙門聽差藉以羈縻而通聲息並請於地方要隘設立汛防弁兵以資巡緝諭曰該將軍等當隨時防範杜絕萌芽庶不致重煩兵力儻敢仍前怠玩閱時未久該夷等再有搶劫情事惟該將軍等是問先是廷臣有以鄂山署內門丁楊姓並幕友楊姓二人朋比爲奸內署服役僕婦馬氏交通作弊招搖誑騙受賄營私該省有三楊開泰一馬騰空之謠又馬邊廳同知趙岳蘭以銀萬兩浼從九品段崇善串通督署家人謀署瀘州知州缺等詞人奏上以鄂山身任總督大員家人幕友自應

嚴行約束不許干預公事如所奏門丁幕友僕婦朋比爲奸實出情理之外命鄂山明白回奏並自行確查據實究辦不准稍有諱飾至是奏言上年訪聞趙岳蘭之弟趙岳蕙被民人鄭瑞起意誑騙商同杜興等假造銀票寫立契約營謀署缺並跟役高五聽從屬探信息已經從嚴懲辦照例擬徒至楊升馬氏遵旨交新任藩司提案嚴鞫仍自行確查究辦疏聞諭曰案關職官營謀署缺屬託探信既有厮役人等招搖生事無論事情大小總當奏明辦理鄂山見不及此將就了事以致人言遠播此事該督罪止失察含糊結案反中一私字朕爲該督惜之著瑚松額督同藩司李羲文秉公嚴審務得確情按律定擬十月瑚松額奏審明督署幕友家丁委無交通作弊原審誑騙未成一案並無不實不盡鄂山尙無徇私迴護惟案內干連已逐厮役不行奏明辦理僅照例咨部不自引嫌請交部嚴加議處部議降三級調用上加恩改爲降五級留任十二月義邊雅札等支夷匪復至雙溪卡白沙河搶擄劾楊芳前次辦理不善並自請議處上以鄂山雖未親往查辦惟率行會奏未能控制合宜下部議處部議降二級留任得旨改爲降一級留任仍命鄂山瑚松額督飭所屬認真查辦務使附近各支夷與漢民均可相安以靖

邊圉而杜後患十五年正月兼署成都將軍三月奏進剿峩邊雅札等支夷匪各路戡平得旨嘉獎四月復奏進剿夷匪全境肅清賞加太子太保銜並賞戴雙眼花翎七月以邛州直隸州知州宣煥違例請陞夔州府知府下部察議十二月以原保之建昌鎮總兵萬榮父子同營有心蒙蔽下部議處十六年十月入覲十一月賞紫禁城騎馬十七年五月以保送推陞都司安定邦箭射無准下部察議七月奏馬邊夷匪復糾衆來擾劾遊擊王殿元署守備趙映從巡緝不力請褫職同知祥善不能先事防範請摘去頂帶從之十一月馬邊雷波夷匪滋事脅同梁山野夷句結附和檄總兵張必祿進攻老林提督余步雲等進攻千萬貫迭有斬獲生擒夷目燒燬寨柵救出被擄民人二千七百餘奪獲器械無算兩路官兵仍由天喜地方會合相機進剿奏入諭曰該夷匪前此膽敢猖獗必當實力奮剿方足以儆兇頑此次尙有吉薩大木干西普庚扎易呼等支及起釁之烏拋並乞黑等支亦應一併懲創俾該夷等有所震懾不致甫散復聚著鄂山嚴飭將弁迅速蕩功不可任其窮蹙逃竄致有滋蔓十二月奏夷匪以梁山爲逋逃藪其中阿合等支地險族繁素多依附官兵大加剿洗各支夷紛紛投誠復乘勝移師至于落三

溪等處盡力搜捕上以該夷匪兇頑性成見當痛剿自必震懾逃竄命鄂山等一律殲除毋留餘孽十八年正月奏官兵自青岡普落移赴攔馬椿六阿那南地等處追至皎米其間夷寨繁多哦雷呷多二支最爲兇悍大木支等支互相依附我兵併力抄襲干落三溪等支夷率衆投誠懇求免剿其餘一律搜緝撫恤兼施官兵於天喜地方會合直進梁山表延二千里剿辦完竣邊圉綏靖撤兵歸伍得旨勗勉閏四月擢刑部尙書補正藍旗漢軍都統六月卒年六十九遺疏入諭曰刑部尙書鄂山久膺外任克盡厥職朕御極後屢加擢用簡畀封疆在四川總督任內辦理一切聿著勤勞昨經擢用刑部尙書方資倚任茲聞溘逝殊堪軫惜著加恩晉贈太子太師銜照尙書例賜卹准其入城治喪所有任內一切處分悉予開復應得卹典該衙門察例具奏尋賜祭葬十一月成都將軍凱音布等復以夷匪滋擾入奏請厚集兵力多籌糧餉以張撻伐諭曰四川夷匪連年出擾屢經降旨令該將軍總督認真妥辦乃因循數載邊陲未靖若使鄂山尙在必當重治其罪凱音布隨同鄂山將就了事著交部嚴加議處子葆淳已革員外郎葆符候補筆帖式

覺羅海齡

覺羅海齡正藍旗人由監生挑取謄錄議敘筆帖式乾隆五十八年選吏部筆帖式嘉慶四年記名以理事同知通判用尋揀發直隸六年補保定府理事同知十年調多倫諾爾理事同知十四年陞昌陵禮部員外郎十五年調太僕寺員外郎旋陞理藩院郎中十七年七月轉山東道監察御史十二月巡視南城十八年六月轉京畿道監察御史九月拏獲從逆太監楊進忠得旨嘉獎賞四品卿銜十二月疊獲林清案内從犯送部治罪尋擢內閣侍讀學士十九年遷鴻臚寺卿二十年四月陞通政使司副使十二月遷太僕寺卿旋授奉天府府尹得旨仍留太僕寺卿任二十一年授湖南按察使二十四年閏四月擢湖南布政使因母老多病懇請留京當差命以三品京堂候補九月補光祿寺卿十一月擢內閣學士兼禮部侍郎銜十二月授正白旗蒙古副都統二十五年正月授左翼總兵三月擢刑部右侍郎四月以兵部遺失行印交刑部嚴訊日久未能訊明降三品頂帶旋即訊出實情開復原官頂帶道光元年三月兼署正黃旗護軍統領六月調盛京刑部侍郎以母年逾八旬不能迎養經軍機大臣代奏得旨著加恩留京候補七月

授鑲黃旗蒙古副都統兼署正白旗護軍統領八月復授刑部右侍郎因審辦德勝門失落木植未能究出正賊降三級留任二年三月充繙譯會試副考官六月調理藩院左侍郎十月署鑲紅旗護軍統領四年三月丁母憂命百日孝滿後署理盛京刑部侍郎閏七月以前任刑部侍郎時失察侯際清贖罪案內官吏得贓舞弊降四級調用又以司員恩德等係京察保列一等人員照濫保匪人例部議以補官日再降二級上加恩改爲補官日降三級留任十一月賞二等待衛充阿克蘇辦事大臣五年十一月以兵丁所種稻田收糧交倉奏請將該管人員議敘從之十二月授都察院左副都御史六年陞盛京工部侍郎七年八月調盛京刑部侍郎初臺丁施詠富越邊偷竊鹿茸年久躡緝無獲海齡抵任後派員嚴密查拏至是獲施詠富及其黨數十人鞫實得官兵受賄縱令出卡並邊門章京德銀索贓釋放狀按治如律得旨嘉獎十二月擬偷打鹿麀治罪專條如所議行又偕盛京將軍奕顯奏興京鳳凰城所屬邊門以外本年拏獲偷砍官山樹木賊匪三十八起查獲木植大小計九千餘件應卽在山存放不准招商變價則姦商覬覦之心自絕偷砍之弊自除尤當隨時嚴飭所屬認真查禁以期漸清官山諭曰和

衷共濟積弊自除方爲不負委任勉之八年調刑部左侍郎九年三月授鑲黃旗蒙古副都統署戶部右侍郎兼管錢法堂事務四月充繙譯會試副考官尋以前署鑲黃旗滿洲副都統八月充崇文門副監督十月復署戶部右侍郎兼管錢法堂事務十年四月調泰寧鎮總兵兼管內務府大臣十月因前在戶部侍郎任內失察假照降二級留任十一年二月諭曰見已勘定龍泉峪建立吉地著海齡卽派員看守開工後一切稽察彈壓事宜均著責成管理十月因病奏請開缺允之十五年卒

英瑞

英瑞那拉氏滿洲正白旗人由舉人於嘉慶十二年補國子監助教十五年陞刑部主事二十二年五月陞員外郎六月上閱射布靶英瑞射中的賞戴花翎二十三年調補步軍統領衙門員外郎二十四年陞郎中道光二年以刑部司員任內疏防候審人犯在押自盡部議鑄級留任四年造辦處玻璃庫失火撲救出力賞緞匹尋超擢鑲黃旗蒙古副都統五年授刑部左侍郎六年署鑲黃旗護軍統領七年八月調鑲白旗漢軍副都統九月歷署左翼前鋒統領工部左侍郎兼管錢

法堂事務十二月充右翼監督尋以署工部侍郎任內屯田司遺失冊籍下部議
鑄級留任八年四月黑龍江將軍祿成有派兵不公及私馬交站餽養各款命英
瑞偕吏部尙書文孚馳往查辦鞠實奏請褫職嚴訊復訊出家人徐添桂詐騙銀
兩情事祿成於取供後自戕英瑞以未能豫防下部察議尋將徐添桂等治罪如
律時奉天府蓋平縣人民鄒士杰呈控知縣潘彭年等浮收蠶稅並科派兵差復
州人民許潤堂亦呈控知州李武曾徵收科派有旨交英瑞等回京路過時查訊
五月訊知蓋平縣以商稅無著責成蠶戶至協濟兵差車輛將無力貧民一律勻
攤復州亦以協濟兵差按畝攤派均屬不合按律定擬並奏言蓋平縣蠶稅廠因
各蠶戶圖賣樵薪並開墾奇零地畝佈種蔬豆致出繭既少商稅有虧但以商人
應納之稅責之蠶戶而每年仍以商稅全完具報辦理既未平允名實亦不相符
並恐復州金州岫巖廳等處應收繭稅復有似此情形者應令將軍府尹派員履
勘蠶樹應補植者飭令補植田畝應陞科者查報陞科庶有以裕國課而均民力
如所請行六月補鑲白旗護軍統領七月以頭等侍衛恩緒毆斃家人遷延不奏
議降二級留任十月因病籲請開缺允之二十年卒子承恩山東候補知縣

王瑋慶

王瑋慶山東諸城人嘉慶十九年進士改翰林院庶吉士二十二年散館改吏部主事道光元年丁父憂三年服闋四年補官七年陞員外郎九年轉福建道監察御史十年正月奏言直省州縣交代不清皆由倉庫多虧接任之員未肯遽受不能依限結算各該上司往往於咨部文內倒填月日捏稱造冊舛錯再三駁查以爲耽延歲月規避處分地步卽或參劾皆係病休降革之員查抄監追多屬無著請飭各省督撫於州縣交代嚴行督催遵照定限盤清扣明到任及出結日期卽時咨部立卽奏參如逾限已久始行揭參者將該上司照徇隱例議處二月奏稱各部則例十年一修不能依限告成每遲至六七年之久各省官員旣無新例可遵又因舊例已改辦案茫無所措而書吏遂得高下其手及至刊刻頒行將屆重修之期新例又成廢本無所遵循且有舊例本屬美備因迴護辦法兩歧或轉舍例就案請將各部已頒成例毋得輕易更張如有因時制宜必應更改之處隨時專摺奏明改定立頒各省一律遵行不必定限十年重修致滋流弊三月奏定考試繙譯章程一頂替宜防添派點名御史四人並令參佐領等按名認識一場規

宜肅以彈壓副都統兼監臨添派司員二人專司受卷一交卷宜遵定例不准給燭一辦考司員應行迴避如此嚴加防範庶積弊除而真材出及補缺日繙繹文案自堪勝任均從之五月以山東州縣差役大縣多至一千餘名小縣亦數百名奏請酌州縣繁簡大加裁汰至繁地方差役不得過八十名事簡地方以次遞減編立卯簿嚴定章程其餘白役概行禁革儻仍容隱該管官漫無覺查從嚴參處如該管上司及該督撫查察不周必當執法嚴懲十月以京察屆期其不勝外任改補京職及發回原衙門行走人員宜嚴行甄別略言不勝外任人員刑部尤多並未隨時澄汰且有撤回原衙門之年力就衰者濫廁其間刑部如此各衙門亦恐不免請通諭各部院堂官隨時察看卽加甄別毋事姑容以昭覈實均如所請行十一月遷禮科給事中十一年三月奏言役滿及告退革退書吏請飭各衙門將該吏住址地方於咨文內註明以便驅逐從之八月署江西道監察御史十二年五月奏言外省候補人員各班擁擠遇有題調缺出輒藉詞人地相需將佐雜奏請陞補而候補人員轉從抑置請將題調要缺仍照例先儘正途候補人員題補不准以佐雜應陞之員超越又奏請嚴查保甲於城市村鎮戶口按名查照清

冊發給門牌詳載姓名生業隨時覈對至京師地方著都察院順天府五城御史督率司坊官及京縣知縣一體詳察均允行七月奏直隸連年收成富戶自多蓋藏新城縣白溝河涿州之新橋馬頭富商皆囤積爲漁利之計請委員確查令隨時價平糶以爲賑濟之用疏入敕下直隸總督辦理八月奏各廠平糶市價未減請酌定價值得旨著順天府五城步軍統領衙門會議尋奏請減糧價定明錢數十月遷內閣侍讀學士十三年二月陞順天府府丞三月以稽查放賑飯廠查出賑米攙和成顆穀粒煮飯堅硬難食致多折耗奏請飭查責令罰賠究辦上命順天府查明辦理旋據順天府府尹何淩漢等奏請將書吏花戶交刑部審辦十二月陞大理寺少卿十四年五月遷光祿寺卿八月稽查左翼宗學十七年陞都察院左副都御史十八年充武會試副考官十九年四月擢禮部右侍郎七月署刑部右侍郎九月調戶部右侍郎兼管錢法堂事務十月充武鄉試正考官十二月給事中朱成烈奏鼓鑄制錢不一請飭查辦上命戶工二部錢法堂明白回奏尋奏言所鑄之錢新用時輪邊較大久而漸窄且鑄錢須用母錢較定例制錢尙重是以大小未能一律嗣後將母錢更換如有輕重不一卽將該監督等嚴參至運

銅到通時派員密訪儻有鑪廠奸商包攬代交等弊當卽嚴拏懲辦允之二十年三月以揀選直隸都司恆年於引見時箭射輒弱下部議處尋充會試副考官二十二年卒子錫榮刑部郎中截取知府

楊遇春

楊遇春四川崇慶人乾隆四十四年中式武舉於四十五年入本省督標效用四十九年甘肅石峯堡回民不靖四川總督福康安率師往討遇春隨征出力拔補龍安營把總五十三年復從福康安出師臺灣討平臺民林爽文敘功賞戴藍翎遷茂州營千總五十七年復隨征廓爾喀在事有功擢四川城守右營守備五十九年福康安調雲貴總督遇春隨赴雲南六十年二月貴州逆苗石柳鄧聚衆圍正大營嗅腦營松桃廳三城湖南逆苗石三保等圍永綏廳附首逆吳半生爲亂三月遇春隨福康安督兵赴黔剿賊屢戰克捷連日解正大營等處賊圍將賊寨盡行燒燬捷入賞換花翎復隨欽差都統額勒登保分兵赴湖南援永綏圍亦解四月攻克竹子山蘭草坪賊寨福康安上其功賜勁勇巴圖魯名號遷雲南督標中營都司尋以擒首逆吳半生於高多寨擢四川松潘營遊擊仍下部議敘嘉慶

元年二月遷四川普安營參將十月以進剿平隴賊巢奮勇出力得旨以應升之
缺陞用旋擢廣東羅定協副將十一月逆苗吳廷義成擒苗疆肅清復下部議敘
時湖北教匪滋事延及川陝各省上命額勒登保移苗疆兵至湖北剿辦林之華
覃加耀等股匪遇春從焉二年五月敗賊於長陽縣之廖家臺六月敗賊於打子
臺閏六月賊竄宣恩建始等縣遇春跟蹤追剿於羊公頭尙書巒長坪疊有殲擒
又殲賊於官店口賊竄金果坪偪近金雞口糧臺遇春帶兵繞至護守果有賊匪
窺伺擊卻之復追擊於白魚寨均斬獲無算十月賊踞恩施圍子嶺抗拒官兵遇
春奮擊復敗之賊竄歸州終報寨三年正月進攻終報寨其地懸巖峭壁四面斗
絕遇春夜縋而登率士卒冒矢石鼓勇直進生擒首逆覃加耀僞元帥張正潮並
擒賊目覃加師等百餘名殲賊黨無算是時賊匪有青黃藍白綠等號又設掌櫃
元帥總兵等僞稱上命額勒登保移師赴陝西商雒一帶迎剿襄陽白號高均德
黃號姚之富齊王氏股匪遇春隨征入陝三月抵興安偵知賊目李全等自熬屋
趨藍田欲與高齊等逆合遇春帶兵躡擊殲擒二千餘人四月首逆高均德自雒
南竄秦嶺遇春率兵追擊至紫溪嶺斬獲甚夥五月復隨額勒登保赴湖北會同

四川將軍興肇等剿辦襄陽藍號張漢潮股匪賊屯聚南漳爲我兵所截竄遁穀城遇春帶兵由章村棚兜剿四面夾擊斬級五千生擒九百餘人六月敗賊於竹山之菩提河餘匪竄入陝界遇春仍隨剿入陝七月擊賊於平利之孟石嶺敗之九月在廣元之吳家河擊剿高均德李全等股匪克之殲賊千餘十月偵聞閬州儀隴邊界之張公橋有賊匪橫竄遇春帶兵衝截獲賊首張漢潮之子正澗賊首羅其清遁走大鵬寨時遇春丁父憂請回籍守制額勒登保以軍務緊要奏請仍留本任得旨允行尋擊賊於觀音坪連奪賊卡遂破大鵬寨剿洗過半殲斃羅其清之父從幟擒賊目苟彬羅其清遁入青觀山十二月復攻克青觀山寨擒賊目苟文如魏應聘羅其清復竄巴州之蔡家梁遇春連戰連捷逆首羅其清及其子泳福弟其書其秀皆就獲伏誅是月擢甘肅西寧鎮總兵官四年正月追剿青號逆首徐添德股匪至廣安之蕭家溪賊方躡渡遇春分兵抄擊殲賊千餘名淹斃者無算賊竄新寧之仁市鋪與黃號股匪王光祖合勢復張遇春閒道繞出賊前兜擊之復斃賊多名二月敗徐添德於大竹之童家場三月迎剿月藍號股匪包正洪分三路兜圍敗之於大竹之南山坪殲戮甚衆適川省月藍號股匪蕭占幟

張長庚自閬中趨營山遇春移師迎剿連戰於黃土牆譚家山殲賊六千餘斬占
幟長庚於陣得旨嘉獎並下部議敘四月追剿白號僞元帥張子聰於梁山向家
場逐北二十里賊由陳家場分路竄逸官兵緊躡賊蹤至雲陽之大黃山四方山
周家壩一帶俘斬多名賊遁竄太平之楊家山與襄陽黃號首逆樊人傑太平黃
號股匪龔建合復竄至開縣譚家壩遇春率官兵分路攻擊痛殲其衆五月張子
聰竄竹峪關與通江藍號股匪冉添元合遇春攻克賊卡賊潰奔杜家坪旋向鎮
龍關奔逸欲與青號股匪王登廷合時王登廷方踞馬鞍寨七月遇春攻克馬鞍
寨八月追至鄧都扶齊灘又克之適偵知甘肅白號股匪楊開甲竄至杜家坪卽
由蔥子坪翻山迎擊斬馘無算仍旋師西鄉流渡壩追剿王登廷登廷奔土丫子
遇春奮勇截擊殲賊一千八百人生擒八百餘人獲僞元帥斬有年等九月追剿
阮正滌股匪於廣元之雲霧山斬級五百正滌死於陣十月剿徐添德股匪於雞
公梁殲賊千餘時王登廷折回川境與冉添元合遇春率兵窮追十二月疊戰於
巴州花叢壘老官廟鷹背梁皆有斬獲王登廷子身竄至蒲江縣經鄉勇追獲斬
之五年三月擢甘州提督先是白號首逆張添倫繞至黑河上以黑河與甘省微

縣兩當接壤即可直趨秦隴詔遇春由棧道西出賊前奮力攔擊至是遇春敗張添倫於成縣嚴家壩又敗之於兩當二郎壩又大破之於燕子嶺均俘斬無算時楊開甲方擾商雒遇春由寬坪擊之賊將由龍駒寨竄河南遇春豫扼龍駒寨痛殲賊衆賊西竄豫境以安敍功予雲騎尉世職並賞賚焉五月白號股匪劉允恭劉開玉糾合賊衆屯踞東安之大小中溪遇春率兵進擊輾轉兜截三十餘里殲擒允恭開玉及其餘黨又擊敗襄陽黃號股匪伍金柱於漢陰之手版巖又擊之於銅錢窖陣斬賊首龐洪勝擒其子龐有兒及賊目楊大燕等計俘斬五千餘六月追及楊開甲於洋縣之茅坪俘馘二千餘斬開甲於陣疊邀獎賚並下部優敘時黃號伍金柱藍號冉學勝張世龍白號張添倫馬五先後竄遁甘肅連兵窺陝西遇春由陝入甘出棧道直趨三岔山進剿在東岔河東河橋迭次俘斬無算賊不能東逸並將老林匿匪陸續搜捕殲二千餘人又有白號股匪陳傑越棧道欲東竄南山遇春在陝境大石板迎擊之擒陳傑盡殲其黨仍回兵三岔河堵剿賊兵夜至犯我師遇春有備擊敗之而成都將軍富成等以無備被戕適甘肅巡撫台布奏請增兵諭曰行軍勝負全係將領之才與不才不在兵之多寡卽如賊匪

前次攻撲各路營盤惟楊遇春早有準備轉獲勝仗卽其明證八月擊斬伍金柱於成縣之峽溝又擊斬賊首宋麻子於鳳縣之潘家溝九月剿高二戴四股匪於西鄉之螞蟻溝又追擊於舊司河殲斃僞總兵楊永祥並斬獲賊黨甚衆十月白號馬五黃號王廷詔等連兵踞安康銀硃壩遇春率馬步兵三路剿殺由銀硃壩追至吳家河沿賊大潰殲賊目徐二貓張誠詹如貴獲賊目柯如德等將餘孽偪過漢南陝省南山肅清上嘉之賜裘服十一月追剿徐添德及高馬等逆於安康平利界疊有斬獲賊仍分股竄逸遇春卽由安康渡江從漢陰截剿以遏商雒之路十二月以冉逆等竄近武關遇春復出子午谷入藍田一帶迎截遏賊東竄在喬家溝冷水河連戰克捷賊不能窺豫楚邊界上以遇春衝寒冒雪不辭勞瘁嘉之六年正月截擊冉學勝股匪於石泉之兩河石塔寺殲斃冉學勝之子更枝賊目冉大志張廷桂斬級四百生擒三百餘人得旨賞賚時高三馬五王廷詔等經官兵偪剿竄至五郎之藥壩遇春方追剿冉逆途次偵知之乘夜掩擊俘斬多名獲僞帥方世傑二月追剿高三馬五後股賊匪由斜峪關躡擊截其由陝入甘之路復趨舊州鋪鋼廠截剿其前股殲擒甚衆尋追及王廷詔於川陝邊界鞍子溝

擒之均邀賞賚並下部議敘是役也遇春奮勇追賊晝夜馳四百餘里馬逸驚墜受傷仍力疾逐北卒擒其渠上尤嘉獎並溫詔垂詢焉三月上念遇春前任副將時丁憂留軍營帶兵已屆服滿未能回籍經理喪葬賞銀三百兩給遇春家屬俾無分心家事並諭以軍務告竣後卽當賞假省視墳塋四月高馬二逆竄至禪家巖遇春料賊必由寧羌之二郎壩奔逸急率兵趨斜谷先抵二郎壩分兵伏龍洞溪旣而賊果至盡殲其衆高三馬五及馬五之子秉太姪秉全秉明僞元帥朱泗林僞總兵張世德等皆就擒捷聞晉驕都尉世職五月擊冉學勝於紫陽之天池山敗之賊竄木蓮橋督兵追擊途次聞白號僞元帥張添倫等五股合兵屯聚洵陽高唐嶺移師往剿克之六月敗張添倫於孤家坡賊復走與冉學勝合遇春揮兵兩路奮擊擒添倫殲賊衆無算捷入賜以御用玉鞞荷囊七月以黃號首逆曾芝秀等敗遁入川戴四崔胡等逆亦向川潰竄遇春入川追剿八月擊賊於通江之報曉埡痛殲賊衆生擒藍號首逆冉添泗王士虎及僞總兵王士勤等餘匪竄大池壩遇春冒雨疾追又擒賊目朱九礮等多名得旨獎賞並下部優敘十一月擊藍號股匪李彬於達州劉家壩擒賊目魏中均唐執禮餘匪南竄復追至高家

河殲其衆擒賊日龐思宇楊應學多名七年二月命額勒登保督同遇春辦理陝境苟文明股匪及各股零匪連次抄截俱有斬獲上念遇春晝夜奔馳實已不遺餘力屢以溫諭慰勉之六月在龔家灣獲苟逆妻羅氏子三皮子七月苟文明就擒得旨嘉獎下部議敘是月調固原提督十二月川陝楚剿捕逆匪大功戡定諭曰楊遇春自隨征以來在諸將領中勇略尤著節次殲擒首夥各逆爲數較多著加賞二等輕車都尉世職八年正月追剿零匪於觀音廟天池寺鐵廠溝皆有斬獲七月以陝境太白山有零匪竄出上命遇春迅速督率官兵極力搜剿以期早就廓清又命自箭桿山以東至安康平利二竹邊境一千餘里分段各鎮將均歸遇春統領督飭巡搜九月以南山餘匪復有蠢動遇春未將賊數據實揭報梟花翎十月丁母憂賞銀五百兩經理喪葬仍暫留軍營帶兵尋議以陝境東西二千里道里縣長與川省地界犬牙相錯若防兵株守段落巡察難周酌將防兵歸整擇適中扼要之地安設抽調防兵內三千名作爲剿兵往來截剿其龍池場迤西一帶另備剿兵防賊西竄諭獎其籌辦得當九年正月命將陝西南山隘口及江防專交遇春堵禦三月以在馬溪容僧河一帶殲斃賊日苟文華等功賞還花翎

七月在鳳凰寨剿捕零匪擒斬僞先鋒羅思蘭等多名餘黨竄南山三五成羣時復嘯聚遇春帶兵窮搜深山老林蹤跡殆徧將首逆苟文潤及各號賊日以次殲擒夥黨悉數斬獲九月三省全功告成予優敘賊氛既掃欽差領侍衛內大臣德楞泰等議於三省邊界添設新兵巡邏彈壓以遇春聲威素著兵勇悅服請令暫駐漢中查察訓練十一年二月回籍守制百日孝滿由原籍入覲七月行抵西安聞寧陝新兵陳達順等滋事卽會同陝西巡撫方維甸帶兵馳往查辦上以遇春能以公事爲重嘉之九月賊由郿縣斜峪關南竄桃川五里坡遇春帶兵迎擊殲賊多名擒賊目彭貴等卽分兵緊躡追剿賊勢窮蹙賊目蒲大芳率其黨乞降縛送首逆陳達順陳先倫向貴磔於軍事平下部議敘時投誠叛匪內有曾充兵丁者二百餘人德楞泰令仍歸原伍上以德楞泰辦理錯謬壞法養奸遇春旣不勸阻又不據實奏參隨同附和有責任使下部議處議降三級調用命加恩改爲降四級留任又以剿辦叛匪時官兵在方柴關臨陣潰散將遇春解任交陝甘總督全保四川總督勒保查明奏參十二月降補寧陝鎮總兵官諭曰楊遇春戰功較著且管兵有方衆心知感擢任固原提督並未到任此次寧陝叛案及固原等營

官兵潰散皆非伊任內之事自應量予從寬已將楊遇春降補寧陝鎮總兵嗣後當妥爲管束使營伍日就整肅十二年瓦石坪叛匪韓金堂等滋事遇春偕提督薛大烈分兵進剿盡數撲滅得旨褒獎下部議敘十三年入覲命在乾清門侍衛上行走仍授固原提督十四年查閱陝安漢中營伍請將訓練懈怠之都司徐龍光等降革有差上以遇春認真考校據實甄覈諭嘉之十八年九月直隸長垣教匪不靖延及河南戕害官弁據滑縣城勢甚猖獗上命遇春選帶將弁馳赴豫省協同欽差大臣直隸總督溫承惠剿賊尋詔陝甘總督那彥成前赴軍營接辦欽差事務遇春得聯銜奏事十月遇春馳抵衛輝偵知賊匪方踞道口其黨數千分屯丁欒集亟率兵衝擊斬馘六百餘餘匪竄歸道口越日道口之賊傾巢而出與官兵抗遇春痛殲之斬賊千餘斷浮橋絕其西竄之路遂合諸軍進攻道口克之毀其巢殲賊萬餘救出難民無算乘勝進攻滑縣四面合圍先分兵擊滅桃源輝縣匪黨之應賊者殲首逆李文成俘斬賊衆無算十二月克復滑城殲賊萬餘生擒二千餘救出難民二萬餘械首逆牛亮臣徐安愾等赴京師磔於市敘功賞二等男爵賜紫禁城內騎馬並以黃馬褂及諸珍物賚之適陝省南山匪徒萬五因

木廠停工乏食糾衆倡亂上以遇春熟悉南山情形聲威素著命帶吉林黑龍江馬隊六百名並酌分蘭州固原勁兵迅赴陝西會同陝甘總督長齡相機剿辦十九年正月諭曰楊遇春謀勇素著忠君急公此次辦理滑城叛匪三月之間掃除淨盡實屬可嘉功成之日奉令來京陛見因陝省亂民滋事又令馳往會剿該提督及所帶官弁兵丁倍加勞勩甚爲廛念務協同長齡等奮勇妥協一鼓盪平時賊首麻大旗劉二橫行隴寶李大旗楊小一股匪又來與合遇春馳抵桃花坪一戰勝之躡剿至柏楊嶺其地兩山夾峙依傍老林賊衆分屯嶺上我師張左右翼擊之遇春親督勁兵由中路仰撲立殲麻大旗劉二賊驚潰我師乘勝追剿盡殲其衆尋緝獲首逆萬五礫之傳首南山二月又獲賊首龔貴殲賊首張占鼈餘匪淨盡諭曰楊遇春忠誠奮發所向克捷厥功甚偉著加恩晉封一等男命與長齡會商陝省善後事宜三月偕長齡奏請移駐鐵鑪川黃牛鋪等處營員並添募兵丁有差下部議行二十五年九月特加太子少保銜賞戴雙眼花翎道光五年十月命署理陝甘總督六年正月歸化城扎薩克喇嘛請赴甘肅大通一帶購買木植理藩院已議行遇春以採辦木植於民食邊防均爲有礙奏請停止從之六月

回疆逆裔張格爾入卡滋事喀什噶爾辦事大臣巴彥巴圖等遇害遇春聞變檄烏魯木齊提督達凌阿巴里坤總兵官多隆武帶兵往援並奏請親率將士馳往剿辦詔授遇春欽差大臣關防率諸軍進討尋命授伊犁將軍長齡爲揚威將軍總統軍務遇春暨山東巡撫武隆阿爲參贊大臣十月馳抵阿克蘇時喀什噶爾和闐英吉沙爾葉爾羌已相繼失守賊氛偪阿克蘇達凌阿等敗之於托什罕河張逆復派賊目糾匪黨數千踞柯爾坪回莊阻大兵進剿之路我師分兩路抄截追至大郝紫爾卡倫盡殲其衆捷聞上以長齡遇春初到軍營卽獲勝仗足褫逆酋之魄諭嘉遇春韜略嫻熟督率有方命優加賞賚十一月上念邊外沍寒特賜遇春裘服七年二月師次大河拐有賊匪五萬屯聚洋阿爾巴特迎拒官兵先遣其黨夜襲大營我師擊卻之次日馳至洋阿爾巴特分三路撲殺賊大敗斬馘略盡張逆復糾賊十餘萬踞沙布都爾莊我師奮勇剿擊偪至渾水河痛殲之斬賊日色提巴爾第素丕卡克占巴克戰方酣西北林箐中突有賊出援遇春亟分兵迎擊斬獲無算餘賊竄阿瓦巴特回莊復糾合匪黨十餘萬負嵎抗拒我兵分馬隊潛繞賊後而以大兵攻其前三面夾擊賊不能支我兵奮勇掩擊俘斬二萬餘

人殲賊目阿瓦子邁瑪底那爾巴特阿渾追至洋達瑪河將沿河一帶回莊匿匪搜剽淨盡上嘉遇春等三獲勝仗懋著勳勤特晉太子太保銜三月進攻喀什噶爾克之長齡駐喀城辦理善後事宜武隆阿因病亦留駐喀城遇春遂督兵進剿四月連復英吉沙爾葉爾羌遇春駐葉爾羌撫綏回民別遣固原提督楊芳收復和闐先是克復喀城時首逆張格爾乘閒竄逸及收復英吉沙爾張逆仍未就擒詔削遇春太子太保銜至是敘克復四城功賞還太子太保銜遇春子國佐以四川茂州營都司從征亦賞加遊擊銜時上以張逆釜底游魂無難剋期就獲不值多勞兵力命長齡酌留官兵彈壓搜捕其餘官兵次第凱撤以息勞勩而節糜費又念遇春出關日久陝甘總督事務緊要命督押凱撤官兵先行入關而遇春自克復四城後偵知張逆由拉克沙竄往達瓦爾斯遂由英吉沙爾與楊芳分途出卡窮追久之卒未得張逆蹤跡七月乃振旅而還楊芳追至塔爾克打板與賊接戰斬賊千餘而官兵亦有傷損詔以遇春等頓兵荒徼虛延時日糜費兵餉竟令零星殘匪傷我官兵辦理不善咎無可辭與長齡均下部議處部議褫職命從寬留任八年正月入覲適生擒張格爾捷聞命開復任內一切處分實授陝甘總督

賞用紫韁諭遣回任五月以俘解張格爾來京護解妥協下部優敘六月命圖形紫光閣御製贊曰少年從征進不知退怒馬橫矛善穿賊隊參贊戎機克城賊潰寄以封疆無慙簡在九年九月請改涼州協副將莊浪營遊擊二缺作爲題缺下部議行十二月遇春七十生辰御書綏邊錫祐扁額三朝疆場宣勤久兩世封圻積慶多對聯及福壽字並壽佛如意服物賜之並賜遇春妻田氏服物十年二月奏言口外梨貢向例由陝甘總督衙門差派弁兵赴吐魯番採買雖經嚴立限期飭令照額採買誠恐道遠稽察難周其承辦伯克輾轉假手亦難免藉端滋擾請停免以示體卹從之五月奏言涼州莊浪二滿營兵缺有限閒散衆多請借款生息增設餘兵藉資調劑部議以增挑餘兵不如酌補附近綠營兵額堪以行之久遠命遇春於涼州莊浪二處綠營額兵內酌量均勻挑補二成以資調劑六月又奏古城孳生馬廠倒斃過多請敕烏魯木齊都統確切查辦以歸覈實允之八月喀什噶爾有安集延逆回入卡滋事遇春以伊犁烏魯木齊及喀喇沙爾所轄之士爾扈特霍碩特等處距喀城較近飛檄調兵往援並檄甘州提督胡超挑帶官兵先行出口迎探相機剿辦仍奏請檄調固原提標河州肅州西安漢中各鎮標

官兵及西安滿營馬隊出關進剿疏入如所請行時遇春已親帶督標兵馳赴肅州詔頒發欽差大臣關防命遇春駐劄肅州妥辦後路事宜毋庸出關仍授長齡爲揚威將軍以都統哈郎阿固原提督楊芳參贊軍務九月遇春到肅州奏言分派司道大員會同營員照料滿漢官兵過境並請由山西陝西添雇駝隻以備軍需又奏自哈密迤西至阿克蘇計四十站應支馬匹料草派員前往喀喇沙爾庫車等城購辦均報聞十一年正月以官兵迎剿克捷即將未到口外之東三省兵及四川兵傳令沿途駐劄候撤又請將口外各城糧員酌量裁減並請撤肅州軍需局歸併蘭州以節浮費上俱從之諭令回任是月京察諭曰楊遇春身經百戰絕域宣勤畀以封疆克勝鉅任著交部議敘四月偕西寧辦事大臣恆敬奏籌添察漢托洛亥蒙古兵數分布各卡隨同官兵防堵操練得旨允行十二年三月奏遵旨議汰冗員請酌裁甘肅安西直隸州州判一員狄道固原寧州三州隴西安定中衛三縣訓導各一員八月偕陝西巡撫史譜奏請酌裁陝安鄜州州同一員蒲城縣巡檢一員寧羌州黃壩驛丞一員褒城縣馬道驛丞一員延安府訓導沔縣訓導各一員又偕烏魯木齊都統成格奏言巴里坤古城濟木薩三處馬廠孳

生過多不能容牧酌擬變價留牧章程以充兵餉而疏馬政一廠地不敷牧放宜量爲疏通以免擁擠一牧兵毋庸添設以節糜費一定價無取過重以紓民力一交價不可過遲以重餉項一口老碎小之馬請按年頂替出廠估變一取孳大兒騾馬不准以馬駒抵補兵部以所請三廠挑變馬一萬二百餘匹爲數過多駁令再行覈實詳查以杜浮濫至按年如數頂替出羣一節既失從前設廠取孳之意又啟將來任意挑變之私應毋庸議餘俱議行遇春尋覆奏原請挑變之馬業經詳挑實係不堪適用若不如數變估則水草不敷良劣擁擠倒斃損傷勢所不免有關牧務請仍如原奏辦理上允之十月奏裁陝甘兩省馬步守兵一千九百五十名馬四百餘匹所節省糧餉乾料爲撥補回疆新增防兵之用下部議行十三年甘肅都司葉昌泰規避防差不遂以派差辦事不公等詞捏款具稟遇春奏請查辦諭曰楊遇春公忠體國實心膂股肱之臣朕所深信該都司意存挾制無知妄爲可惡已極著革職解交刑部審訊鞠實治罪如律十四年正月京察諭嘉遇春中外宣勞功勳懋著下部議敘十二月舉蘭縣匪徒鄭曼年等糾衆滋事焚署傷官旋即捕獲置之法遇春以未能先事防範自請處分議處如例十五年正月

因病陳請開缺諭曰楊遇春起自行閒歷事三朝自少壯從戎每遇軍書旁午無不在事馳驅忠勇嚴明深嫻韜略功勳懋著洵邀五等之封朕御極後特加簡擢畀以陝甘總督重任復能盡心職守於邊省事務控制得宜訓練軍實整飭官方實心實力不避嫌怨老成威望中外皆知實朕股肱心膂之臣茲因年近八旬舊疾復發瀝情籲懇開缺調理若重違所請朕心實有不忍楊遇春著准其開缺緩程來京陛見親加慰勞量爲恩施以榮其行且俾伊得申瞻戀之忱屆時再令回籍息心頤養優游林泉以示優待勳臣眷念無已至意五月入覲命晉封一等侯在籍支食全俸並以御製紫光閣畫像贊一軸及人澆服物賜之又賜御書詩扇詩曰元勳入覲允歸榮功立才全際太平宣力三朝邀寵錫抒忠百戰播威名官兼文武真難邁志篤廉明永不更晉爵酬庸延後世林泉頤養話長生諭令回籍十六年特賜福壽字各一方人澆十兩交四川總督鄂山帶回給領時遇春子國楨丁母憂在籍命服闋後迅卽來京聽候簡用十七年二月卒於家遺疏入諭曰予告陝甘總督楊遇春自乾隆年間以武舉效力行閒每遇軍務無不在事馳驅身經百戰歷事三朝懋著勳績前於嘉慶年間平定滑縣賊匪蒙皇考仁宗睿皇

帝賞給二等男爵紫禁城內騎馬旋晉一等男爵朕御極後賞加太子少保銜並賞戴雙眼花翎嗣因克復回疆四城晉加太子太保銜賞用紫韁由提督擢任陝甘總督恪共忠盡實國家股肱心膂之臣前年因年近八旬舊疾舉發懇請開缺回籍調理朕不忍重違所請特命來京朕見追念勲勞晉封一等侯爵准其回籍支食全俸上年四川總督鄂山來京朕見朕特親書福壽字二方頒發內府人瀆十兩令鄂山帶回賞給祇領方冀頤養林泉永膺福祉茲聞溘逝悼惜難堪披覽遺章不禁垂淚楊遇春著加恩晉贈太子太傅銜兵部尙書照尙書例賜卹入祀賢良祠賞銀二千兩經理喪事任內一切處分悉予開復應得卹典該衙門察例具奏伊子楊國佐著賞加副將銜所有應襲侯爵著楊國楨承襲服闋後卽來京陛見以示朕優卹勲臣有加無已至意尋賜祭葬諡忠武十八年九月署四川總督蘇廷玉題請入祀崇慶州及成都省城鄉賢祠諭曰已故陝甘總督楊遇春歷事三朝身經百戰勤勞懋著功在旂常前已加恩入祀賢良祠著准其入祀鄉賢祠無庸再交部議子國楨襲侯爵見官山西巡撫

陶澍

陶澍湖南安化人嘉慶七年進士改翰林院庶吉士十年散館授職編修十五年充四川鄉試副考官十八年記名以御史用十九年三月補江南道監察御史充會試同考官十月奏劾吏部重籤之弊於掣籤既定之後將續到人員重爲設籤令其補掣如掣得第一名卽插入初掣第一名後謂之重一籤旣開濫倖之門必啟賄託之漸請將重掣名目概行停止上甚是之十一月命巡視中城十二月奏言各省州縣錮弊日深皆由該管上司不能正己率屬如勒接交代多攤捐款預備賞號派辦供給壓薦幕友濫送長隨委員需索提省羈留諸弊督撫藩臬中雖賢者或亦不免以致不肖之州縣旣有所挾持以無恐而循良之州縣又有所牽掣而不能應請悉予裁革庶吏治日有起色從之二十年正月奏教習之設原以教育八旗子弟非祇爲應試人員增一出身之路向由禮部奏請欽派大臣糊名扁試秉公甄錄所以重訓課而嚴弊混法至善也後改於鄉會試落卷內挑取遂致辦理參錯多有格礙請復考試教習舊例庶於國家教習八旗之典方爲有名有實下大學士軍機大臣等議行三月調陝西道監察御史四月遷戶科給事中九月命巡視淮安漕務二十一年二月奏陳鎮江運河事宜一練湖宜濬治一甘

露港宜挑深一閘座宜整理一積土宜起除疏入下兩江總督查辦八月轉吏科掌印給事中二十三年四月俸滿記名以道員用十月巡視東城二十四年授四川川東道二十五年遷山西按察使道光元年八月調福建按察使十月擢安徽布政使三年正月授巡撫二月上以安徽省倉庫錢糧虧數甚多曾經五次清查尙有輻輳款目命澍逐細確查籌定章程覈實辦理三月覆奏從前歷次清查僅以州縣開報入冊之數定案不實不盡因思州縣虧缺藩司衙門俱有檔案可稽隨將各州縣欠解正雜錢糧並應捐未解各款分析開出以司庫之檔案覈州縣之冊報虛實立見計自嘉慶二十五年以前共虧銀十三萬餘兩米穀麥豆一萬餘石察其致虧之由多係因公賠累以及衝途歛區入不敷出輾轉挪墊成虧尙非侵盜入己懇請暫緩治罪勒限著追竊以追補舊欠必先杜絕新虧杜絕之法亦惟嚴交代提存庫減捐款禁流攤數端尤以有犯必懲俾後來不致效尤惟有極力整刷務使從前之宿累全清此後之章程悉定並酌議追補章程十條以聞均從之五年二月奏洪澤一湖必藉淮源旺盛方資收蓄敵黃自應多方導引以助其勢勘明各處情形壽州境之城西湖鳳臺縣境之蕉岡湖鳳陽縣境之花源

湖均可抽溝入淮又懷遠縣新漲沙洲爲上游各州縣之患必須再開引河數道除城西蕉岡兩湖係該民人自辦外其花源湖及新漲沙洲請動用閒款剋期興辦又以淮水紆回一交伏汛每汪洋一片橫溢民田祇有築隄東水俾清流暢入湖心既可蓄以敵黃而兩岸民田即可藉隄保衛但經費浩大無從籌措應責成地方官隨時督勸百姓設法辦理自可漸著成效諭曰興水利除水患莫大之善政也固不可徒費周章亦不可始勤終怠詳慎勉之四月奏安徽自分省以來未有志書於掌故難免闕漏請設局纂修上允其請五月調江蘇巡撫旋奏安徽勸設義倉章程十二條得旨所議州縣中每鄉每村公設一倉秋後聽民捐輸歲歉酌量散給出納悉由民間經手不假官吏防侵蝕以禁騷擾矜貧寡而杜爭端各條著卽移交新任巡撫照議辦理先是洪澤湖決口運道艱阻協辦大學士英和請暫雇海船以分滯運酌折漕額以資治河上命澍悉心妥議六月覆奏海運之法自元逮明行之有效止以閱時旣久章程難復然全漕由海運則不可而商船未嘗不可分載至折漕一事以江蘇一省言之額漕幾及二百萬如以百萬折色約計應折銀二三百萬平時一百數十萬之地丁猶以催徵不前矧於數月之內

頓加逾倍之徵民間以米易銀遽難出糶勢必穀賤傷農至停運治河京師萬方輻輳漕米而外需用甚多若南方之貨物不至北方之棗豆難銷物情殊多未便是折漕與停運均不可行大抵專辦海運則恐商船不足專辦河運又恐清水難恃來歲當以海河並運可期無誤諭曰停運折漕竟無庸置議海運一事著俟藩司賀長齡赴海口查勘情形卽將一切章程妥議具奏十一月疏陳海運事宜一驗米應責成糧道會同蘇松太道監兌一赴津交米應分別委員前往一交米委員以到天津爲竣事無須再至通倉一協濟天津通倉銀兩由蘇省籌款解交一押運宜遴委武職大員得旨允行六年二月澍至上海督辦海運趕緊斛兌隨兌隨開奏言海運水程自吳淞口出十激東向大洋至佘山北向鐵槎山歷成山西轉之罘島稍北抵天津總計水程四千餘里春夏之時東南風多行走尤爲順利並繪圖貼說以進又奏漕米經由大海應由水師營汛帶兵防護以重巡防而昭整肅又奏載米沙船酌給船戶耗米到津兌交額糧後合計餘賸不下十萬餘石請照糧船餘米之例就近官爲收買四月奏蘇省海運應將歷年緩帶米石隨同新漕搭運赴津惟本年起運全漕米數甚多民鮮蓋藏請留備本省糶買以濟民

食即以糶出之項抵補天津收買沙船耗米之價一轉移閒於太倉無損毫末而民食得以充裕均如所請行六月初運商船回棹澍復至上海督辦次運通計裝載正耗各米一百六十三萬三千餘石前後用船一千五百六十二隻掃數解交完竣因奏言海運創始人情觀望商船旣虞壓雇復懼難交畏縮避匿其難一也河運弁丁數千沿途照料尙不免風火沈失今以新定章程責之素不相習之委員保無疏損其難二也各州縣米赴上海同時雇撥船隻難敷其難三也黃浦水次旣恐停船待米又恐米到船稀盤量稍稽卽誤風汛其難四也海運用費初無成式籌畫稍疏官民藉口其難五也商船赴津風利東南回帆又宜西北萬一停阻有妨二運其難六也茲幸商情感奮民慶安堵自開兌以至歲事諸極順利見在督飭放行約計六月下旬卽可全抵天津諭曰上年河務阻滯諸臣奏請試行海運事屬創始辦理維艱在事臣工竭誠宣力籌畫周詳陶澍親駐督辦深協機宜著賞戴花翎七月奏本年夏閒雨水過多洪湖啟放較早附近州縣悉被水淹見就災民棲止之區隨查隨賑俟水退人歸再行按戶辦理九月奏江北被水災民就食南來見在籌辦撫卹擬擇棲止以資安集設籤冊以便稽查散口糧以資

養贍別男女以重廉恥施醫藥以拯疾病給棉衣以禦寒冷禁販賣以杜拐掠設巡卡以防匪類俟上游各壩堵合田廬涸出該民人即可還歸原籍自謀生業俾免流移得旨正深廑注覽奏精詳周妥朕心稍慰十一月奏江蘇漕務閭閻每苦浮收而各州縣用度浩繁不能不藉資津貼抗玩者即因此挾制以爲控端在額預之州縣未必諒百姓之苦在額愚之百姓亦未必悉州縣之難互相詬病而皆不爲無因惟有一種病官病民大爲漕害革除不可不亟者包漕衿棍橫索陋規稍不遂意非逞兇鬧倉卽連名捏控人數最多之處生監或至三四百名漕規竟有二三萬兩旣藉控爲抗以遂其包攬之私尤仗訟分肥以長其白規之數必應力輓頽風使衿棍無可挾持庶陋規可革費用自省而閭閻可期蘇息上甚是之七年二月奏徒陽漕船前因西風潮弱致有淺阻臣親詣勘視督同道府擇要爬疏惟西閘門外至江口一帶無可攔蓄一遇潮退江水頓落船不能出擬用沙囊堵塞潮至則啟復設活水板閘潮來時啟一板而各板皆鬆抽卸卽易蓄送亦靈雖小汛期內亦得挨次放船本年漕運爲河務一大轉機惟有竭力督催俾得及早渡黃以全大局奏入報聞時學政辛從益條陳漕務積弊詔澍查辦並將收漕

章程酌中定制五月覆奏前言刁徒橫索陋規日添勢必取償鄉曲之淳良爲補短牽長之計以致浮者愈浮苦者愈苦乃此閒受弊之實在情形而學臣以爲官吏婪索是其常態縱無此等生監而小民之被苛徵亦不能少減殊不思陋規卽出於浮收欲減浮收先裁陋規實一定之理若料有司之不減而謂陋規可存而不論已非釜底抽薪之計况整飭士習首嚴義利之辨以主持教化者而爲此論似非所以訓士也正恐刁生劣監恃以無恐則陋規終難盡革而小民之累無窮甚或釀成事端則所傷實多轉非所以保全善類夫徇衆沽名其勢順而易力輓頽風其勢逆而難斷不敢畏難避怨致令刁風日長民困難蘇又奏收漕一節嘉慶年間屢有八折完漕之議迄未能行蓋年歲之豐歉難齊地方之繁簡亦異情形不能一例此時酌定收數原爲津貼而設萬一不肖官吏久且視爲定額而更有所加則作法於涼已非整頓之初意且刁徒訐告其意不在浮收而在需索卽使定爲加二亦無難以加五加六捏詞妄控惟有力加整頓既不使不肖官吏浮勒病民亦不容衿棍把持藉端訐告似不必另議章程轉虞窒礙上謹其言九年二月安徽省通志書成上以此書由陶澍創修下部議敘十年六月以假照案內

要犯任松宇劉東昇迅卽就獲加太子少保銜尋兼署兩江總督八月實授仍兼署巡撫十月以淮鹺疲敝已極縷陳積弊情形並請刪減浮費停緩攤補命戶部尙書王鼎侍郎寶興同往查辦十二月查明運庫墊占虧缺各項會奏略言兩淮正雜錢糧本係按綱徵收而外支各款則係按年支用如能一綱之鹽年額年銷則運庫解支自可年清年款無如口岸滯銷以後正課則統引分攤而雜款必須按年支發數十年來庫款之套搭挪墊致虧銀數千萬之多皆由於此惟有將前項積欠暫緩攤帶自道光十一年辛卯開綱日起截清前積以斷葛藤庶可從新整理漸復舊規又言淮綱全局詳加綜覈力求課歸場窳之法大要有三而皆有窒礙之處一由窳丁起科窳丁皆濱海貧民若令先納課而後賣鹽則力有未逮抑令先賣鹽而後納課設遇歉產之日勢必課宕丁逃且場鹽每斤向賣制錢一二文三四文不等今加入課銀六釐是課重本輕仍難免透私之弊此窳丁起科之難行也一由垣商納課招徠殷商令其認課包納窳鹽悉歸該商經理寓散於整較爲扼要惟窳戶以己業而聽命商人情必不願況商人惟利是視秤收則勒以重斤借貸則要以重息窳戶狃於售私職此之故窳不樂以鹽歸垣商亦必無

貨完課此垣商納課之難行也一由場官收稅就各場產鹽引額攤定課額官爲經理似覺覈實無如每場應徵銀數十萬兩鹽場微員豈能任此巨帑況試行之初額難懸定若聽其儘收儘解難保不匿報侵欺兼之場署多在海濱無城郭營汛防衛徵解亦恐有疏虞此場官收稅之難行也至於就井抽稅滇省雖有成效但兩淮場地延袤八百里非若滇省一井一官卽能查察未易做照辦理卽使先爲試辦而清窳僉商改官變法非一二年規模不能粗定且商販通行又必南侵閩浙北侵蘆潞若不統各省鹺務通盤籌畫實不免此盈彼絀之虞況此一二年中課額未可長懸場鹽未可停捆各岸食鹽更未可久缺伏思淮鹽定制逐層防範原屬至周至密惟有將舊章大加釐剔使射利者無可藉端欠課者無可藉口似較課歸場窳之法確有舊轍可循謹擬定章程十五條一裁減浮費一刪減窩價一刪減繁文一慎重出納一裁選商總一酌覈帶銷一積欠宜緩一宜恤窳丁一實給船價一嚴究淹消一疏濬運道一添置岸店一亟散輪規一整飭紀綱一淮北另籌其餘未盡事宜應隨時覈辦諭曰據王鼎等奏鹽政無管轄地方之責疏銷巡緝難期令行禁止著將兩淮鹽務改歸總督管理所有鹽政一缺著卽裁

撤其會議酌定章程仍著照所議行十一年正月澍疏言鹺務章程甫立節目尙多如減價敵私諸條皆商情所不樂諉口所易騰一時未必帖然自應從實妥辦一有瞻玩卽追革究治方足以資整頓惟見在商人力能辦運者不過二三十家新商僉募尙需時日本年新鹽卽截清界限於春月開綱而行抵楚西各岸已在夏秋之際明歲奏銷勢不能如期完竣不得不預行陳明得旨明歲奏銷准其稍寬時日屆期奏明辦理澍又言兩淮商情疲敝若責令照額捆鹽自行賠補拋耗勢必仍圖夾帶隱占新綱應請每引捆鹽酌爲加數以五百斤出場除額鹽三百六十四斤仍照案賞加鹽二十斤並例給暑月滷耗十六斤作爲常年拋灑其餘一百斤照依新綱科則帶完前綱正課此外如再有顆粒私增定卽嚴提重懲庶隱私可絕而國課自裕下部議行又以本任總督養廉已極優厚所有鹽政養廉五千兩應行恭繳至鹽政衙門浮費較多計前後裁減每歲費用銀十六萬餘兩其外支浮費及運司衙門濫支各項應飭查明一併刪減許之三月以兩淮候補各班人數過多差遣旣難徧及優劣亦無從周知查定例運判知事試用五年運判准改捐知縣知事准改補巡檢典史請量爲變通如試用未滿五年均准改捐

改補下部議行五月奏江浙漕船半入運河而洪澤湖水驟漲不得不急籌分洩因簽椿搭橋設關加絳節節輓渡各船順流渡黃全漕完竣洪湖水勢旋即漸次消落上嘉其所辦甚合機宜六月以江淮並漲各屬多被淹浸災民遷依堰阜棲食全無自應設法拯濟請以銀易錢米隨查隨給以濟然眉諭曰悽愴景況不堪設想若仍拘泥向例查勘分數分析輕重何濟於事務要趕緊拯救均霑實惠或可免委於溝壑也八月疏陳拯濟章程十二條一倡率勸捐以調貧乏一資送流民以免羈留一收養老病以免流徙一勸收幼孩以免遺棄一勸諭業戶以養佃農一殮瘞屍棺以免暴露一多設糶廠以平市價一變通煮賑以資熟食一捐給絮襖以禦冬寒一勸施籽種以備種植一禁止燒鍋以裕穀食一收牧牛隻以備春耕得旨所奏俱已詳備覽奏稍慰務須實心實力詳慎擇人辦理時廷臣等請課歸場竈或請就場收稅或請倣照王守仁贛關立場收稅或請撤商歸竈徵其課稅詔澍等議澍以兩淮鹽課甚重鹽在場竈每斤僅值制錢一二文一經收稅則價隨課長爭其利者必多比戶皆私課稅因而更紕至於設廠抽稅則道路四通八達安必處處有隘可守繞越漏私更甚若准鹽任其所之他省已受其害鹽

法紛更愈甚關係愈大利權不操於上必移於下恐豪強之徒得據爲利其患有甚於私梟惟有認真督辦儻能得有起色則成法卽無庸另議更張萬一無可輓回再請另行籌辦疏入允之又奏淮北綱鹽官督商辦滯岸無鹽濟售請照山東浙江票引兼行法於海州所屬中正板浦臨興三場分設行店聽民投買運售擇各場要隘處設稅局給照票凡無票及越境者以私論如所請行十二年八月御史鮑文淳奏兩淮鹽務自辛卯開綱至今尙有三分之二未完若輾轉占礙稽延帑項出入憑何筭算且招徠商人未見樂趨或辦理仍未盡善詔澍查奏尋覆言萬難措手之時思復舊規而力單任重實難得有把握蓋積重之由不自今始溯查國初淮綱正課原祇九十餘萬至嘉慶二十年後正雜內外支款竟需八百餘萬嗣是課額多懸轉輸無力或數年始行一綱之引或統引而全綱不行商疲課絀百弊叢生奏銷不前則謬爲報效以緩正課支用無出則擅動庫款以應雜需且批解則貼色貼息彌縫則公補公攤庫款旣竭典質遂及於根窩私質無憑虛僞遂流爲印本其尤貽患後來者借本認息本罄息存以數十年後之膏血拔而用之於數十年之前而四千餘萬之舊項已空一千餘萬之欠款仍在毋怪乎昔

枵而猶能揮霍今斂而彌形枯窘也亟圖整頓實已不遺餘力無如舊商早已消
乏新商尙多觀望辦理實形竭蹶惟有敦飭運司就近體察如有可以鼓舞商情
之處設法籌辦又總因革除陋規刪減浮費以致物情多怨商情隔絕請仍放鹽
政一員專司課項及轉運招徠各務諭曰陶澍奏請另簡鹽政實屬有心取巧國
家設官分職豈容私意更張如果淮鹺疲敝實難整頓何以奉命任事之時未思
及此並無一言陳奏迄乎辦無成效又思更改不過以專管兼管甚相懸殊爲此
避重就輕之計如此居心辦事豈公忠體國者之所爲朕總理庶政惟知賞功罰
過視乎其人之自取儻辦理不善有負委任惟有執法從事治以應得之罪若如
此朝更暮改不成政體朕亦不能對天下矣陶澍著傳旨嚴行申飭九月桃南廳
屬奸民偷窆官隄掣動大溜澍以兼轄河工未能先事預防自請議處部議降三
級調用上加恩改爲降四級留任十月因桃南窆隄放水龍窩汛決口工部尙書
朱士彥奏見在全黃入湖下河危險請從桃北另開新河使漕船從南岸東下渡
河牽輓至桃北以上入運命澍會同戶部侍郎敬徵南河總督張井履勘籌議澍
等奏查朱士彥所奏改河之事道遠費重且由蕭工輓歸正河舊河底反高新河

一丈五寸水性就下必致兩岸皆成倒灌河身依舊淤高於漕運大有關礙請毋庸置議先是御史周彥以票鹽之法利於臬而不利於課其可慮有三等語入告上以周彥既言有三可慮又云利多害少卽移其法於淮南豈非自相矛盾命澍悉心體察通盤籌畫總期有利無弊至是復言該御史請移其法於淮南蓋未悉淮網南北課額多寡懸殊且票鹽試行於淮北滯岸其運道須待雙金關開放又須渡黃河而涉洪湖抵正陽關之後分赴各岸尙須盤撥故可無虞泛濫淮南之鹽則江海四達無可範圍淮北引地僅在皖豫一角淮南之楚西等省居各省之腹中在在鄰界接壤如亦改行票鹽勢必四侵鄰境於各省鹽法亦多窒礙命仍照原議妥辦十三年二月奏淮北票鹽業經試行有效應請推廣辦理請將安徽省之壽州河南省之信陽等十一州縣一律改行票鹽仍令將安徽省向由江運之桐城等八州縣及高郵湖運之天長一縣留商認辦以固淮南藩籬再票鹽指地販運原以保固商岸今商運旣不足額票販各口岸自應量予變通如所指之地鹽壅銷滯准其於出卡之後就所在地方呈明轉運他岸售賣至海州引鹽出場向由雙金關啟行今請由鷹游門灌河口轉尖入黃行走擇要設卡盤驗俾內

外河均有水可運各岸可無缺鹽之患又奏請將海州營錢家集都司一員把總外委各一員額外二員馬步兵一百四十名移駐洪澤湖之老子山等處作爲內河水師營以資防禦均下部議行八月奏淮南加帶已庚殘引因各省連年水患未能帶銷占礙正綱應請停止所有商鹽每包五百斤出場解捆正鹽四百斤之外其餘百斤循照割引成例配割本綱正引按照科則正雜錢糧全數完納命試辦一年果能有盈無絀再准其遞年做照辦理時漕督貴慶奏沿途派委漕弁搜查回空私鹽有礙遄行請將漕弁撤回並江廣道遠丁苦請於例帶食鹽外加增買帶過揚州時納課給照准其售賣澍奏若遽請將漕弁撤退則幫丁舵水等放膽買鹽其停泊上載必不止如委員搜查之片刻而楚西等省之冬春銷市必盡爲糧私所占明縱偷漏既有害於鹺綱欲速反遲尤有誤於漕運況糧船水手素稱桀驁加以順帶官鹽必有梟匪出資附和其害不可勝言以官事而論長蘆課細有藉詞兩淮鹽壅無去路以實情而論所銷盡長蘆之私鹽所缺盡兩淮之官課兼之淮南二十場之鹽無從銷售數十萬竈丁生計有妨請仍照成案搜查於漕運鹽務地方均有裨益上甚是之十月御史許球奏回空軍船請帶蘆鹽見仍

堵截搜查伊等有利未獲而轉觸科條全虧資本總督一味濟之以猛是貴慶籌議恤丁非徒無益而又害之殊不足折服幫丁之心江廣軍船人數衆多萬一另起釁端必致貽誤歸次命澍查辦尋覆言歷來軍船帶私無不以搜查延誤新漕爲詞迭經奏明如敢藉詞挾制或棄船星散卽嚴拏究辦若如該御史以水手與風客販私有別慮其搜查時資本均歸烏有是未知所貸之資卽風客之資所虧之本卽風客之本鹽爲官物在平民不能縱任販私況糧船水手律有專條何得謂旗丁水手販私與風客究有區別今祇搜起其鹽趲行而過是正因漕務而濟以寬似不得謂一味以猛且漕船私帶未始非前途玩縱所致今若因查鹽而慮其啟釁則盜賊豈無飢寒之可憫梟徒亦有拒捕之堪虞又將何以折服之上納之十四年正月計典甄敘上以陶澍辦事實心鹺務日有起色下部議敘十月報霜降安瀾下部議敘十二月御史許球以兩淮鹽務辦理支飾情形入奏諭曰該督如有天良卽當實力疏銷通盤籌畫儻稍混飾彌縫毫無實效帑課攸關豈容因循貽誤朕惟執法從事斷不稍爲寬貸尋奏言癸巳綱收銀二百七萬六千餘兩比較辛卯綱實多收銀十四萬三千餘兩比較壬辰綱僅少收銀五萬三千餘

兩見在未運各引多至一綱有餘此係舊綱未竣並非本綱應運之引兼值頻年災歉商人之成本既增各岸之疏銷未暢甲午新引見已開綱飭運司趕緊設法辦理因思裁革浮費爲衆怨所歸復以議駁太戇難免藉端報復浮言所至商情觀望應辦事宜不免阻滯然亦不敢避嫌避怨諭曰嗣後若果有成效年勝一年朕豈有不爲卿作主之理無恤其他若歲歲空言搪塞部中不難稽覈前車未遠朕不能上下其手也噬臍二字凜之識之十五年入覲賜御書印心石屋扁額澍以澹務已有起色奏請復設鹽政以專責成得旨陶澍精神才具結實周到正當乘此鹽務日有起色之時實力整頓悉心經理方不愧爲國宣力之大臣況兩淮鹽政裁撤未久忽撤忽設亦無此政體所請著不准行十七年因河庫道李湘茝註考不實下部議處議降二級調用上加恩改爲降四級留任十八年二月奏准北引餉原額止二十九萬餘引自改行票鹽按年約行四十萬引內外節存經費溢課爲數尙多應請嗣後准北奏銷仍按原額造報此外票鹽溢課及經費餘存並每引酌量加徵雜課共可得銀三十餘萬兩以資協貼許之十九年正月奏請將淮南戊戌綱懸引提出二十二萬道歸於淮北行銷所有懸引課銀按數抵補

足額下部議行二月因病陳請開缺六月卒遺疏入諭曰前任兩江總督陶澍由翰林洊歷科道出膺外任迨擢授兩江總督以來實心任事不避嫌怨上年染患手足痿弛之證迭經賞假俾資調攝今春因病勢日增勉從所請准其開缺冀可專心調理醫治速痊茲聞溘逝殊堪悼惜陶澍著加恩晉贈太子太保銜照尙書例賜卹入祀賢良祠任內一切處分悉予開復應得卹典該衙門察例具奏伊子陶桃著賞給主事俟年及歲時由吏部帶領引見將來靈柩回籍並著沿途地方官妥爲照料用示朕優卹盡臣至意尋賜祭葬諡文毅

程祖洛

程祖洛安徽歙縣人嘉慶四年進士以主事用籤分刑部十二年補官十三年升員外郎十四年十月升郎中十二月以承辦秋審黃冊黏貼錯誤部議降三級留任奉旨實降一級留部以員外郎補用旋補官十五年充湖南鄉試正考官十六年升郎中十八年正月京察一等以道府用六月俸滿截取記名以繁缺知府用十九年充會試同考官二十年選甘肅平涼府知府刑部堂官以祖洛總辦秋審並承審逆案奏請留部諭曰刑部郎中程祖洛在部年久於刑名尙稱熟悉朕所

素知是以於該員記名道府後未經簡放茲吏部以該員擬選甘肅平涼府知府刑部以程祖洛總辦秋審逆案未便遽易生手奏請留部扣選並聲明業經截缺例不准見缺保留等語刑部如因程祖洛在部得力何以不早行奏明扣選乃於該員既選平涼府之後始行保留顯係因甘肅地瘠缺苦始爲此奏若係美缺未必保留矣刑部堂官俱著交部議處所有程祖洛京察截取記名以道府用之處俱著註銷仍著留刑部郎中任辦理部務永不外用如果始終奮勉酌量施恩而已二十一年充廣西鄉試正考官二十四年升內閣侍讀學士旋授江西按察使二十五年擢湖南布政使道光元年調山東布政使二年五月擢陝西巡撫七月調河南巡撫御史程裔采奏河南教匪朱麻子等由新蔡竄入安徽阜陽縣上以皖豫毘連地方餘匪易於潛匿命祖洛及兩江總督孫玉庭安徽巡撫孫爾準按名掩捕九月祖洛奏朱麻子就獲並獲夥黨四十餘名按律定擬並言皖豫兩省匪黨不止二百餘人若不搜捕淨盡稍留餘孽復恐煽結滋事卽今辦法不在急治見獲之犯而在窮究未獲之人奉硃批汝能如此存心再能認真辦理使積年教匪不動聲色漸就殲除地方獲保安謐則是莫大之功也總在實心經理亦不

責成近效相機而行汝自爲之日後自有明驗十二月籌議緝捕經費奏言豫省內黃考城一帶與直隸山東邊界毘連爲盜賊出沒之所又南汝光及陳州各屬與安徽之阜陽縣暨湖北之襄陽等縣犬牙相錯向多紅鬍捻匪地方官遇有盜案非不懸賞勒緝而用項繁多勢不能從優給賞往往兵役購綫獲盜得賞不償所費難期鼓勵議於司庫扣存歲料市平銀兩及入官地租項下動撥銀五萬兩交各典生息每歲可得息銀六千兩以二千五百兩解交司庫歸還原本以三千五百兩作爲緝捕經費從之又勘明安陽縣之馮宿村漫水情形疏言漳河北徙舊河高於平地斷難復令南趨馮宿村口門之水由北入衛已成河形議請毋庸將漫口堵築卽就新河量爲疏濬以輕水患上以漳河爲直隸河南二省民田運道所關命大學士戴均元赴豫會勘妥議並命祖洛於漳水經流之處周歷履勘三年正月偕戴均元奏勘明見在形勢與上年冬令不同請仍挑築舊河復歸故道如所議行十月偕戴均元奏報勘辦安陽縣樊馬坊漫水略言治水之道合則爲患分則安流自乾隆五十九年漳水南徙合洹以來衛水爲所頂阻每致潰溢今河勢旣分萬不可使之再合合則並力爲患議於田市地方就高灘挑挖引溝

使北岸漫水放入南岸正河再於田家營環水各村莊編列柴壩以護民居至樊馬坊上下距洹河甚近擬添築土堰一道其南岸衝刷溝槽建築土壩以禦之俾水各分流而漫溢之患可冀輕減十一月以定擬秋審失入部議降一級調用上加恩改爲降二級留任是年上臨雍頒賞王大臣臨雍御論幸萬壽山賞御製宴十五老臣詩墨刻又賜欽定大清會典養正書屋全集祖洛皆與焉四年二月奏田市積水消涸露出地形北面漫水與南首溝工隔斷不能引歸正河惟田市以上之龍家莊水勢北高於南議卽就涸出窪形之處節節抽溝相機勘辦近南漫水不能全行掣消而消涸一分卽收一分之效又奏龍家莊抽溝啟放之後水勢暢順而北面之水仍未見消又加詳度惟內黃縣之馬家窪水面北高於南距正河亦祇一二百丈議於此處再挑引溝以消漫水五月奏馬家窪新挑溝口暢順已將漫水全行掣歸正河復請於田家營添築大柴壩使溜勢盡走南流並言三十年來漳水挾洹奪衛爲患滋深此時漳洹分流縱遇盛漲較之從前漳洹衛三河合併爲患之勢不啻霄壤後此相機利導似易爲力先後疏入俱如所請行七月奏准汝寧光州二屬尋常遣軍流徒各犯就近由該管道審轉以免稽延其人

命案內罪應斬絞及一切由死罪減爲軍流之犯均照舊解司勘轉以昭慎重而符定制九月以歸德府屬之永城縣汝寧府光州所屬之新蔡縣息縣界連山東江蘇安徽向多盜匪奏請以歸德府通判移駐永城縣之薛家湖集於新息接壤之黃湖店添設新息分防通判一員永城營添設守備一員山城集經制外委一員又奏裕州屬之小史店南陽縣之賒旗店皆易藏奸應各於本營派撥弁兵設立專汛均從之十一月奏豫省東南歸德府屬之虞城夏邑永城等縣地勢低窪西北開封府等屬夏秋被水多匯注於此向賴虞城縣之橫河惠民溝夏邑縣之巴清河永城縣之減水溝爲之宣洩南有申公隄一道束水歸槽經江蘇碭山縣蕭縣以達洪湖爲豫省東南洩水要道迭經黃水漫溢各溝河全行淤塞致虞夏永三縣並江蘇蕭碭二縣之濱河村莊連歲被淹農田失業請分別撥項卽時挑濬上以事關兩省水利民生命實心經理以收實效是年江南高堰湖隄漫口命尙書文孚等馳往勘辦並降旨動撥帑銀酌留漕米十二月祖洛奏豫省附近大河各州縣計可撥米十萬石並委員預購稽麻三百萬斤籌撥庫銀約計四十萬兩上以其盡心國事不分畛域嘉之初皖豫撫臣以懲創捻匪奏准豫省之南汝

光陳皖省之潁州等屬遇有兇徒結夥在三人以上持兇器傷人之犯除實犯死罪外其餘不分首從發極邊煙瘴充軍如十人以上無論曾否傷人發新疆給官兵爲奴纂輯爲例嗣經刑部修改南陽等屬鬪毆至三人十人以上必須豫謀結夥逞兇者方照例分別嚴擬若釁起一時僅止爭毆仍各按其本罪定擬不得牽引舊例亦著爲令五年祖洛以南陽等屬匪徒結捻一人倡劫黨衆不呼而集其豫謀逞兇早在結捻之時不待臨時商約新例以是否豫謀分別罪名輕重辦理諸多窒礙疏請敕下刑部改復舊例刪去豫謀等字俾外吏得以覈實辦理並酌議匪徒拒捕暨捕人治罪各條下部議行六年正月奏歸德府前明刑部侍郎呂坤忠言讜論正色立朝其平居講學不語精微不談高遠惟以躬行實踐爲本在明季最爲醇正應請從祀文廟下禮部議行七年十月請寬免南汝光陳等屬失察匪徒處分疏言匪徒擾害閭閻至獲犯後究出舊案追溯從前失察處分恐瞻顧同官多所迴護請遵照嘉慶年間聖諭實力翦除不復咎其既往俾承緝各官無所瞻顧以期有犯必獲有獲必懲得旨允行旋丁母憂回籍九年服闋十年閏四月署工部左侍郎六月授湖南巡撫十二年二月擢閩浙總督四月奏審明峻

訟擾害糾衆拒捕之武進縣已革生員莊午可依律處斬並聲明此案牽涉人犯衆多先因莊午可行蹤詭祕購緝拏迨至莊午可就獲各緝日均散歸農恐伊等報復私怨妄自誣拏業經嚴飭府縣掣銷差票曉諭居民暫行停緝餘黨以免擾累上是之先是有人奏浙江紹興已革庫書潘鳴皋徐燮堂等詐贓營私及在籍臬司李澧干與公事各款命祖洛會同浙江學政何凌漢按其事九月祖洛偕何凌漢奏審明分別定擬李澧訊無交結情事惟在外聽曲宴飲出入衙門有玷官箴請旨褫職十月上以浙省鹽務日敝庫款虛懸命祖洛於赴閩時路經浙江體察情形奏明覈辦尋奏請援照前浙江撫臣帥承瀛清查鹽務成案辛卯秋冬壬辰春夏四季正引并綱統銷以紓商力而裕庫款並嚴定裁汰浮費章程下部議行是月臺灣府閩粵莊民因事起釁奸民張丙陳辦等乘機糾衆戕知府呂志恆知縣邵用之官兵禦賊於斗六門縣丞方振聲千總馬步衢等死之上命祖洛確探情形酌辦旋命署福州將軍瑚松額爲欽差大臣督兵渡臺剿辦而以後路糧餉軍火等事專責祖洛尋兼署福州將軍十三年正月首逆張丙陳辦詹通陳連等就獲奏聞尋遵旨赴臺妥籌後善事宜三月上命祖洛查辦應參應獎之員

諭曰朕用人行政惟知一公字程祖洛膺茲重任爲國宣勤彰善癉惡亦當守一公字無恤其他尋偕瑚松額奏審明戰守無方之都司周進龍革職遣戍守備陳福隴外委黃廷鳳等均革職七月偕瑚松額奏臺灣逆匪蕩平將張丙陳辦詹通陳連四犯解京見在官兵陸續凱撤各莊仍復舊業全臺安堵上以祖洛等迅速蕩功降旨嘉獎賞戴花翎仍下部優敘又奏福建金門廈門一帶沿海奸民私造小船一名白底船一名草烏船藏有礮位軍械沿海伺劫並有闖入粵浙洋面之事上責祖洛及福建水師提督陳化成等實力堵拏八月奏請將臺灣北路左營改爲嘉義營添設參將駐紮嘉義歸臺灣鎮總兵統轄其原設北路營都司改爲斗六門營都司移駐斗六門歸嘉義營參將兼轄原設斗六門汛守備移駐嘉義作爲嘉義營參將中軍守備專管兵馬錢糧其北路協副將專管北路左右二營又臺灣鎮標原設左中右三營遊擊道光七年改右營遊擊爲北路右營遊擊歸北路協副將兼轄而以鎮標右營事裁歸左營兼管今議仍設鎮標右營遊擊俾資調遣如所請行十二月以浙江温州鎮總兵李恩元捕務廢弛奏請革職留緝上是之又劾福建海壇鎮總兵萬超諸事不能振作請旨革職枷號示懲先是有

人奏汀州等府書差滋事擾害閩閩上以祖洛新任閩督無所用其迴護命悉心訪察十四年六月祖洛遵旨查覆因奏陳閩省吏治民風略言安民莫先於懲蠹懲蠹無他術惟在就事據實懲辦不可以私心迴護不可以瞻顧處分而曲縱奸惡閩省吏治既無子惠之政又務寬大之名其始也實因官之庸劣致成頑梗之風至於今日則又因民之譸張遂有疲難之勢官曰民刁民曰吏虐互相傳播漸失其真此奉旨飭查各款中之實有其事而與原奏略有異同必應設法整頓者也已往者無可追求以後當隨時查察就案懲辦總之閩省大弊在於官不執法幕不守法因而愚民犯法書役弄法訟棍玩法必得將不肯執法之官嚴懲一二使有所儆各知治其犯法玩法之人則法立令行而閩閩庶可安枕矣得旨所論周詳至當務要以次認真整頓方爲不負委任之意也勉之又勉七月奏浙省二十餘年來海洋安謐久已文恬武嬉上年沿海地方多有失事獲犯至二百餘名承審府縣化劫爲搶以首盜爲被脅致令武職藉口情緝請將知縣陳文治交部嚴議嗣後如有似此不肯認真讞獄者卽隨時參革不敢瞻顧嫌怨諭曰此等惡習已非一日朕早有所聞因無實據難以懲辦卿能奮勉整飭可嘉之至務

當一力勉之十月已革縣丞秦師韓控提督馬濟勝朦奏邀功並訐祖洛偏袒欺蒙各款命侍郎趙盛奎赴閩會同學政張鱗按治之尋盛奎等奏查詢明確所控多屬虛妄其列控祖洛各款亦皆空言上以師韓逞刁妄訐遣戍新疆復以各省督撫幕友例不准邀議敘祖洛將幕友陳時等五人率行保列下部議處十二月偕福建巡撫魏元烺奏捐廉倡辦義倉以資糶濟略言閩省內地各郡瀕海多斥鹵之區負山鮮膏腴之壤產穀不敷民食必須妥籌備糶之資臣捐廉銀三萬兩於省城內修建義倉買穀二萬石以爲之倡示諭紳民有願捐者各聽量力出輸以期接濟得旨嘉獎十五年三月奏撥赴臺灣換防弁兵申明定例概用水師營哨船渡載不准勒坐商船以杜擾累而資習練如所議行十月奏修建沿海最要塞城礮臺綜覈閩海大勢當以漳州府屬之南澳銅山爲藩籬泉州府屬之廈門金門爲門戶福州府興化府所屬之海壇爲省城右翼扼要閩安爲省會咽喉福寧府屬之銅山爲後戶巡緝守禦全資塞城礮臺確勘形勢分別緩急其最要者共四十四處估需工料銀兩已經官民捐辦毋庸動項得旨迅速興辦先是祖洛奏福建在籍藩司梁章鉅捐辦義倉進京後其子逢辰接辦勸捐請旨獎勵經御

史鄂爾端奏參逢辰上年隨父入都祖洛前奏不實命明白回奏十六年覆奏梁章鉅奉旨進京義倉未葺之事逢辰接手辦理旋即事竣隨同伊父入都上以其入奏時未能明晰聲敘下部議處旋丁父憂回籍十八年服闋以舊疾未痊奏懇賞假調理允之二十九年卒遺疏入諭曰原任閩浙總督程祖洛歷任封圻勤勞素著前因患病乞休准其回籍調理茲聞溘逝殊堪軫惜著加恩晉贈太子太保銜照總督例賜卹任內一切處分悉予開復應得卹典該衙門查例具奏前任太常寺博士程枚功俟服闋後著吏部帶領引見尋賜祭葬如例予諡簡敬子枚功太常寺博士榮功校功梯功俱舉人

祁墳

祁墳山西高平人嘉慶元年進士以主事用分刑部六年補官八年升員外郎九年提督廣西學政十三年回京五月補原官尋以會審宗室敏學案研鞫不實褫職十四年恭遇仁宗睿皇帝五旬萬壽加恩以七品京官用仍留刑部行走十五年丁母憂十八年三月服闋以承審教匪逆案出力賜文綺十九年陞主事二十一年二月京察一等五月陞員外郎八月充順天鄉試同考官十二月陞郎中二

十四年二月京察一等四月丁父憂道光元年服闋補原官二年十一月俸滿截取記名以繁缺知府用十二月經刑部堂官奏請暫留辦理赦款減等並纂修律文四年授河南糧鹽道五年擢浙江按察使時浙江德清縣民徐寶華妾倪氏謀殺夫姪妻蔡氏獄久不決上特命墳詳加覆檢尋鞫實得歷次仵作刑書受賄蒙蔽狀上復命尙書王鼎馳往覆覈悉如墳議讞始定六年升貴州布政使九年三月遷刑部右侍郎十月充武殿試讀卷官尋授廣西巡撫十二年湖南江華搖匪趙金隴作亂墳以廣西地界毗連檄按察使戚宗彝往富川賀縣防禦富川恭城賀縣三邑之交有姑婆山周二百餘里與江華途徑交錯墳別遣將弁搜捕會逆搖敗走復檄戚宗彝移駐桂嶺遏之賊乃不敢南竄趙金隴剿滅廣東連江逆搖又起廣西搖匪盤均華本江華搖徙居蒼梧聞連江搖不靖亦乘機蠢動墳檄參將滿承緒同知易中孚勒兵賀縣知縣吳扶曾舉人吳元德撫馭其搖之良者盤均華遂合柑子沖搖匪趙金香由大貴山下龍井村出道石墟謀奔江華奪搖山爲逆經滿承緒易中孚追及於芳林渡口連戰三日夜斬馘千四百擒獲八百餘人盤均華走湖南竹排沖就獲廣西搖平諭曰逆搖盤均華聚衆謀逆僞稱名號

甫經起事卽經廣西文武各官於芳林渡痛剿敗散該逆窮蹙卽被擒獲不致蔓延是芳林渡戰功保全甚大命加墳太子少保銜並議敘軍功加三級尋疏陳善後六策一重官守以資治理賀縣地方遼闊桂嶺松里濠界龍水鋪門等隘雖分設縣丞巡檢駐有弁兵惟距府治三百餘里與富川昭平壤地相接控制太遙富川縣屬之鍾山鎮爲古富水縣治去賀縣一百四十里去昭平二百七十里去平樂二百二十里如黎頭山姑婆山天洪山皆隨路可通實爲適中扼要之地平樂府通判向駐郡城政務甚簡宜移駐於此就近審理民謠詞訟防奸緝匪並酌撥千總一員兵丁四十名同駐以資威重一選謠目以定賞罰廣西所在民謠雜處平日尙皆安分惟外來謠民就山耕種名過山謠依山結屋散處零星難拘保甲之法謠人所居爲冲每冲或數十家或數家領以謠目或一二冲或數冲應令過山謠人附冲居住者歸入各冲編查遷徙他往者存記歲終令謠目造册呈縣如教率有方三年安靜無事者量給外委頂帶一禁遊棍以安生業謠人崖居穴處賦性蠢愚每被遊民欺詐應責成各州縣時常輕騎親赴曉諭無令畏懼嚴禁民人搶占謠業若謠人趁墟交易墟長街保爲懲察奸徒其涉訟公庭者檄令謠目

按名送官差役不得入山滋擾一收火器以嚴禁令瑤人打牲防獸私藏鳥槍有事卽藉以抗拒今乘創剿之威收繳應盡自後如有鐵匠鋪戶造鑄鳥槍民人賣給火藥依律嚴治一勤訪察以知情僞瑤人之安分與否及外來匪類潛入瑤境州縣官難以周知而兵役貪利者使之稽察易滋流弊與其任事權於兵役不若寄耳目於紳民紳民間見較真且恐事發先受其累應擇其附近瑤山熟習瑤情能知大義者畀以化導之權稍見釁端卽察治庶合防微杜漸之意一興義塾以化氣質瑤人雖愚亦頗知字義無如所聞多師巫之說不知是非邪正應嚴加禁絕於各冲相度情形設立義塾延端正之士以詩書訓課州縣官隨時親臨獎其穎秀可教者朔望恭宣聖諭廣訓俾漸知禮法數年後果有成效一體設立瑤童學額均如所議行十三年調廣東巡撫十四年以廣州肇慶各屬大水壞農田圍基奏請借帑修築十五年正月奏肇慶府高要縣之景福豐樂二圍爲廣州上流廣州府屬清遠縣之石角三水縣之榕塞南海縣之烏茶布等圍又爲省城上流每遇西北兩江盛漲潰決不特田廬淹沒卽省垣西關亦俱在漫漫之中近海之地沙土浮鬆上年雖籌議修築僅止就段補修非經久之計必應將各圍基尤

要處所加砌條石並於臨河堆疊蠻石方資鞏固見勸令紳商捐備經費其不敷銀兩請援成案於藩庫雜款項下借給均允之時上以潮州民喜械鬪其受雇鳥槍手尤爲積害命督撫嚴定科條以懲兇惡尋遵奏受雇鳥槍手傷斃人者依律定擬在場幫毆者依教師例加等擬杖一百附近充軍並未受雇幫毆而學習槍手已成者卽依教師例杖一百流三千里從之六月以潮州府屬之普寧縣民俗獷悍界山連海撫治不易請與饒平縣缺繁簡互調下部議行九月兼署兩廣總督墳偕前總督盧坤以虎門爲筦鑰羣夷要地奏請增改礮臺補鑄大礮十一月工竣疏言大角沙角礮臺在大洋之中東西對峙中隔海面千數百丈礮火不能得力祇可爲信礮望臺其鎮遠橫檔兩臺南北斜峙南山臺在鎮遠迤東形如品字中隔水面止三百餘丈勢甚聯絡實爲要害之地大虎臺海面雖闊常有暗沙提臣關天培已於沙上立樁並用舊船載石壓沈卽水長時船必須由樁外行走礮火亦屬得力見在各臺完固堅整控制遠近氣象雄壯其南山新建月臺尤足以嚴備禦署東莞縣知縣李繩先承修有勞請下部議敘其新鑄礮位驗放時聞有炸裂都司黃廷彪不能督率經理應革去頂帶責令賠造從之時普寧縣塗洋

鄉大姓聚衆劫掠拒殺差役墳檄同知姚柬之隨同總兵李鈺惠潮嘉道李本榆督兵往捕焚其巢賊渠方阿薈就擒殲四十餘人擒三百餘人墳親赴潮州翰訊治如律十八年擢刑部尙書賜紫禁城騎馬二十年正月京察屆期諭曰郝墳執法精詳奉公敬慎交部議敘四月充殿試讀卷官二十一年英人在廣東虎門滋擾命墳前往督辦糧臺旋授兩廣總督虎門之役上以官兵臨陣退避致提督關天培陷歿特命靖逆將軍奕山等詳查首先逃避之人嚴治其罪以肅軍令二十二年四月墳偕奕山等覆奏諭曰近日海疆防守奮勇殺賊者固不乏人至於臨陣退避主帥陣亡此等失律士卒不難悉數駢誅因念罪有首從不忍概予誅夷該將軍等身膺重寄自應將實在情形迅速覆奏候朕酌量法所難宥者立正刑章情有可原者量從末減乃奕山等奏關天培在靖遠礮臺陣亡兵衆同時逃走並無確切證據等語郭棕等五犯旣據何居桐指出卽應親提嚴訊乃直至該把總畏罪自盡始行親提以致恃無質證率卽擬結僅請革伍責懲殊屬輕縱另片奏拏獲漢奸温東幅一名究出被脅入夥赴官投首之從犯萬亞馨等三名將温東幅正法萬亞馨等擬軍等語廣東漢奸在在多有數年僅獲一温東幅而萬亞

警等又稱赴官投首可見平日並不認真查拏奕山身任統帥祁墳梁寶常俱係封疆大吏乃陳奏如是不誠不實迹近欺詐辦理亦屬錯謬著交部嚴加議處部議墳革職命從寬留任五月奏言外海水師乏員陸路兵弁有生長海濱熟諳水性者請援內河例擇其緝捕出力通曉洋面事宜酌保遊擊都司各一員守備千總二員以補水師之缺其世職各官及隨營武舉因在陸營效力其中卽有熟習海洋願改水師者皆爲成例所格蓋水師升途較捷易啟奔競定例不得不嚴見當籌海之時請依陸路改水師之例發洋試驗果能勤奮咨明兵部分別補用時上屢命收復香港不得因琦善擅許聽其占住墳奏欲收復香港必先修築虎門礮臺然非設險省河則虎門之興工無期見於內河獅子洋設險守戍以蚺蛇洞及大罔邊爲南路龍船墟得勝坪及獵德諸臺爲東路以官山門爲東南路三山及大通河爲西南路其蚺蛇洞下水深數仞英船必由之路復築堡於山之南麓英船之道獅子洋從山北入者轉居下風礮爲山掩攻無所施然後虎門各礮臺乃可次第興修二十三年正月奏修復虎門礮臺略言虎門內外原設各臺均係依山臨海上橫檔之東西二面原設橫檔永安二臺其東北對面原設鎮遠靜遠

威遠三臺其西對岸原設鞏固一臺其後大虎山原設大虎一臺其東南逼近大洋原設大角沙角二臺及新涌蕉門二臺下橫檔泥土一臺計礮臺十二座新涌蕉門地居小海口損壞無幾應仍舊貫其餘各臺在當日建築自屬天然形勢今則舊臺較卑僅足以防洋盜英船高過於臺我之情形一望可知難以制勝且臺形如扇面礮口多在正面而側面礮口無幾若英船從側面攻擊亦難抵禦並聞外人礮臺用三合土築牆高下並無一定類多作人字形緣石性堅脆一被轟擊立即飛散三合土性質堅實既可受礮而牆形參差發礮時又可錯綜向外攻擊英人利在火器禦敵之法自當用其所長或因舊基培加高厚或增建以資策應或應合兩臺爲一或地勢未宜必應移建謹繪圖以進諭曰所辦尙屬周密惟防守兵弁無多其傍山麓者設遇有警如何爲後路接應以防抄襲其孤懸海中之臺尤不可無策應之兵儻遇有警如何一呼卽至卽可保護礮臺並可出奇制勝當悉心妥議勿徒以工堅料實據信爲有備無患墳因奏海墘屯田法曰虎門礮臺旣經修復增兵防守必須增餉莫如仿古屯田之法以本地之田養本地之民卽以耕屯之民爲禦侮之兵上年會勘虎門見虎門附近及大角沙角等處多有

淤沙可就勢圍築成田令土人承種其地已屬海面與江流無礙計可得沙田一百六十餘頃每夫酌授六七畝隊長量爲增加計可得屯兵二千人更諭令土民將附近虎門沙坦凡有開墾者隨時呈報升科爲屯務雜費及屯兵器犒賞之用則各臺外阡陌縱橫夷船不能衝突而應募守臺者各思衛其田廬前路聲援後路策應自可一呼卽至守隘防虞此爲良策又遵議御史田潤條陳團練事宜奏言前因英人不靖沿海各鄉先後創建昇平社學昇平公所東平社學東平公所並石岡書院諸處皆聯合鄉民捐貲練勇有事聽調粵東民俗雖悍然談及忠義多知奮發誠得官長倡率於上紳士勸諭於下移私鬪於公戰進有勇以知方則連鄉皆指臂之形野人獲干城之選民心堅定國勢自張前三元里民合殲夷目一事卽其信而有徵諸疏入得旨務令事可經久有濟實用時裁旗營綠營馬乾之半以節經費七月頃奏言綠營差務較多所轄地方遼闊未可一律議裁今請提鎮如議副將參將量減少半遊擊減三之一都司守備裁四之一千總以下如舊又遵議潮州府潮橋改辦票鹽稽察不便請仍舊章均下部議行是年廉州洋盜頻起副將張斌出洋捕盜失去關防提督吳建勳駐師不進專事招撫頃疏

効之降吳建勳副將張斌遣戍新疆墳慮洋盜日久聯幫剿除費力乃督責總兵鮑起豹率領將備分帶師船由欽州外洋追剿擊沈數船擒賊目譚保賊黨梁亞喬遂殺夥盜九瀧受投首俘馘一百八十餘投順二百三十餘人廉州洋盜平保奏在事出力人員得旨允行十一月因病乞休給假兩月復連疏陳請允之二十四年卒諭曰前任兩廣總督祁墳人品端方居官勤慎由部曹歷任中外宣力有年迨經朕簡任兩廣總督以來辦理諸務妥協認真不辭勞瘁上年染患咯血之症迭經賞假調理今春因病勢日增准其開缺冀可安心調攝俾得速痊茲聞溘逝殊深軫惜祁墳著加恩照尙書例賜卹所有任內一切處分悉予開復應得卹典該衙門察例具奏伊子戶部候補員外郎祁之銓著俟服闋後卽候補選直隸州知州祁之鏐著俟服闋後卽選用示朕優恤蓋臣至意尋賜祭葬予諡恭恪子之鈺福建沙縣知縣之銓甘肅涼州府知府之鏐直隸候補同知之鏐舉人直隸灤州知州

裕謙

裕謙原名裕泰博羅忒氏蒙古鑲黃旗人曾祖班第官兵部尙書定北將軍一等

誠勇公祖巴祿官察哈爾都統綏遠城將軍父慶麟官京口副都統裕泰嘉慶二十二年進士改翰林院庶吉士二十四年散館以主事用籤分禮部道光三年補官四年四月實錄館告成議敘以本部滿洲蒙古員外郎用閏七月補員外郎五年京察一等引見記名以道府用六年三月授湖北武昌府遺缺知府六月補荊州府以與湖南布政使裕泰同名經湖廣總督嵩孚奏改今名九年調武昌府十四年四月擢荆宜施道七月陞江蘇按察使十六年丁母憂旋告病服闋病痊十八年署江蘇按察使十九年二月實授六月遷江蘇布政使兼署巡撫十一月疏言安民必先息訟而刁衿劣監每多恃符狡飾應令將執照隨詞黏驗做國子監之例於執照上蓋用戳記而健訟之風可以息冒充之輩無所容卽有假照等弊亦可隨時勘破矣下部議行十二月授江蘇巡撫二十年正月偕署總督麟慶奏江淮等五府州屬熟田舊欠錢糧未能同時並納請緩其賦其豐縣贛榆縣秋收減色之區應一併查辦又以蘇松鎮等處所轄洋面疊次失事劾備弁等緝捕懈弛請摘頂勒緝並將督巡不力之總兵官交部議處從之三月奏參高淳縣知縣許心源捏填年歲請擬職以杜取巧規避之漸並劾藩司知府不爲覈實辦理請

一併分別議處又奏訪獲儀徵縣在籍捐納通判秦開甲倚恃土豪欺壓鄉里請斥革提省嚴訊又奏訪聞瓜洲司巡檢趙景星吸食鴉片煙按驗得實均如律五月偕總督伊里布奏參相驗含混及刪改供詞之知縣朱勃鄭敦五等請奪職又因淮安徐州各府秋收歉薄請將新賦舊欠分別展緩均蒙俞允七月署兩江總督及鹽政事務先是鴻臚寺卿金應麟奏請飭禁漕務積弊並將漕運事宜量爲變通諭兩江總督及有漕督撫議奏卽據林則徐烏爾恭額臚款陳奏上更命伊里布裕謙妥議至是覆奏略言江蘇漕務固屬疲敝然二百年來成法具在所以日壞一日者實由議論太多之故一切積弊向所諱言一經上達宸聰無不恃有奏案視爲分所應爲臣惟有和衷共濟恪守舊章去其太甚以期漸革積弊較之空言似有裨益所有金應麟林則徐等條陳各款應毋庸議上可其奏時英人在浙省定海登岸滋事上申諭沿海將軍督撫分飭將弁加意巡防裕謙接督篆後卽赴寶山督辦防務八月英船駛至海門廳糖鱸沙洋面游弋遙放槍礮經我兵擊退裕謙奏請暫緩撤退前調兵丁許之是月許乃安陳奏浙事並稱蘇州一帶居民因畏夷氛亦多遷徙丹陽縣因創議加賦致激成毆官劫獄得旨著裕謙加

意撫綏居民示以鎮靜勿令惶恐逃亡以安衆志尋奏言六月閒江蘇霖雨成災兼值海氛不靖民情不無惶惑嗣經調兵防堵英船不敢深入並奏蒙聖恩寬免關稅招徠商販得以采買米石接濟兵糧民食而被災較重之所又蒙恩發帑撫卹以是民皆安帖如故委無逃亡之事至丹陽縣一案查係刁民吳章行與糧差計較錢串起釁並非由加賦激變見已將該知縣呂湘撤任飭拏全案人等嚴行審辦臣惟有欽遵訓諭鎮之以靜撫之以恩庶刁徒知警而良善得所矣疏入報聞會英人船隻赴天津海口投遞呈詞乞恩並願回粵省聽候查辦復諭沿海各處仍認真防範但以守禦爲重勿以攻擊爲先九月裕謙由寶山赴上海尋諭裕謙等將前調防守各官兵分別應留應撤妥爲辦理十月以江蘇獄囚擁擠援案請加變通下部議行又奏言前署京口副都統張仙保因辦理防堵奏奉恩准所有防禦官兵口糧每日每員給銀一錢臣查京口旗營官兵卽在本營汛地巡防若遽議加給口糧則外調之如皋江陰等處兵丁亦應一體辦理而預接仗之兵更應加增厥費甚鉅實與大局有礙況旗兵世受國恩凡事應身先作則爲綠營表率未便首開糜費之端所有該副都統原奏應毋庸議上是之又奏查明江蘇

沿海口岸舊存礮位不足以資防禦請添鑄自三千斤起至八千斤止大礮數十位建造礮臺分口排立如所請行十一月奏勘明江寧蘇州等府屬被水成災請新舊錢糧分別展緩又奏查閱京口一帶江防情形請將年力就衰之遊擊黃琴及歷練不深之守備孟兆蘭分別勒休撤任又奏當塗銅陵等縣江面商船被劫其巡防不力之備弁按照舊章止應記過惟該員既未能與文職會哨復捏具並無失事鈐結實屬溺職請斥革示懲又疏陳軍營莫利於槍礮可助大礮之用者惟擡礮最爲得力請在江寧省製造盤螺擡礮一千桿分發水陸各營選精壯兵丁勤加練習所需銀兩及每年操演應用火藥鉛丸應由撫臣衙門辦公案內按年捐辦無庸另請帑項奏入上以辦理甚好務收實效十二月奏據伊里布咨會知英人反覆不測江蘇洋面與定海毗連崇明旣孤懸海外上海乃通商馬頭而寶山又爲出入門戶在在皆關緊要不致因英人並未蠢動且有天險可恃遂形鬆懈見已飛咨提臣陳化成酌量情形妥爲辦理惟上海地方所駐徐州鎮標官兵見係護理之員管帶恐不足以資彈壓請敕下新任徐州鎮總兵王志元迅速前來庶可專責成而昭慎重先是御史蔡家珩奏籌制英人事宜命將原摺交

裕謙閱看裕謙因奏言蔡家珩所陳各條原爲兵家要訣本年夏秋閒曾經預備試行然皆使其不敢侵犯之計而非驅除醜類之謀也臣愚以爲兵貴神速必先收復定海使之容身無地水米無資而後以剋制之法相機堵禦則英人欲進不能欲守無藉雖船堅礮利無能爲役矣查定海有嶼名岑港形勢險要可戰可守但得精兵數千乘夜渡海先據岑港聲東擊西使之晝夜不得休息不出旬日彼必棄城而遁且官兵移駐定海趁勢進剿有可以無慮者四有不可緩待者六臣請更詳言之定海縣城之後衆山環峙不但岑港如檄欖采和諸嶼東西北三面皆可結營屯兵我旣居高臨下易於擊刺而彼實不能仰攻此可無慮者一也英人大礮不能登山施放其刀不能刺遠英人腰硬骸直一擊而蹶我兵矛矢擊刺趨捷如飛用我所長攻彼所短此可無慮者二也定海山外港汶有淺有礁英船不能盡到而我之漁船處處可入故文報不至難通此可無慮者三也內地昆亭大汪新礮蟹浦等處漁船之往來定海者向皆繞山斜渡由山後各口登岸若官兵乘夜潛渡一潮可達不至阻礙此可無慮者四也見在西北風司令我之口岸悉占上風英人旣畏天寒又虞水淺是以不敢蠢動若至春夏之交東南風發潮

水充盈彼勢既張我則失利此不可緩待者一也定海各舉收割未久有糧可就
不患其阻我饒道以我官兵駐我土地遲則地利人和兩失所恃此不可緩待者
二也各舉民苦英人之騷擾望官兵如雲霓果其從民所望則勇氣百倍不獨未
逃者恃以無恐卽已逃者亦可復歸故土既壯軍威又免難民之踵去此不可緩
待者三也英人在定海出示定價買糧勒令送入城中設我遲久不顧則民人被
其迫脅儲蓄皆爲彼有此不可緩待者四也見在各渡口漁船照常往來易於渡
兵如再遲延恐漁船被脅從逆則我兵無船可渡此不可緩待者五也定海兵丁
之散在各舉者雖經陸續招集而自懷疑懼不敢投回者聞尙不少我兵既渡下
令招安此等散兵一呼可集使功不若使過未有不感恩思奮者較之徵調客兵
更爲得力遲則該兵等別無恆產若不從逆必將流而爲盜此不可緩待者六也
臣從事半年揆時度勢審思熟慮竊謂各省皆可議守而浙江必應議戰且必應
速戰蓋浙江不戰而定海不復則該處米穀牲畜恣其擄掠供其用度定海不復
彼既據爲飲食之源我卽無斷其接濟之法又況荼毒良民誘集奸匪耽延愈久
其勢愈衆迨至潮汐旺盛彼更時出兵船游奕於沿海各省乘閒滋擾反客爲主

轉勞爲逸益寡爲衆我則處處防堵時時戒嚴商賈阻滯士民驚擾勞師糜餽似非長久之計至彼等均係貿易圖利之人原無略地爭城之志不過逞其譎詐要求通商若於我軍旣振彼氣已蹙之後投誠乞命再行仰懇天恩網開一面庶彼等感知畏不敢復萌故智而海疆永靖矣上以裕謙所奏不爲無見命伊里布體察情形按照摺內所指相機妥辦又奏言江蘇營員習於安逸以致營伍廢弛必應先就督標各營實力整頓庶期咸知儆畏請將違例坐轎之中軍副將沙序元及年力就衰之城守協副將張明召分別褫職勒休以肅營規上是之二十一年正月上以伊里布誤信琦善疊次知會因英人有繳還海口之說遷延觀望並不迅速進兵實屬畏蕙命伊里布折回兩江總督本任以裕謙爲欽差大臣伊里布又奏稱接到廣東來信並義律呈遞文件願將定海繳還諭裕謙於馳抵鎮海後察看情形如定海業已繳還著卽撫卹難民修理城濠一切善後防守事宜妥爲經理儻詭言獻地仍復負隅卽遵照前旨相度事機痛加剿洗斷不可因有繳地之說爲其所愚仍蹈伊里布覆轍所有前調赴浙之皖楚等省官兵不可中止仍著裕謙催令前進二月伊里布馳奏遣將帶兵收取定海並密籌攻剿又奏定

海業經收復英船全數起旋上諭裕謙到浙後將伊里布見辦情形確切查明據實具奏旋以馳抵鎮海接受關防並籌辦大概情形奏聞上以善後事宜責成裕謙並申誠裕謙曰英人行蹤詭譎難保不駛回滋擾務當督飭總兵鄭國鴻王錫朋葛雲飛等加意偵察是月裕謙以接奉廷寄不能慎密遵辦下部議處議以鑄一級調用得旨改爲革職留任時浙江按察使周開麒陞任甘肅布政使裕謙以定海善後事重擬奏留周開麒襄辦一切開麒託故推諉裕謙疏劾浙江吏治營伍習於驕惰畏葸已非一日該司心存畛域冀圖脫身事外若不嚴行指參以起頽廢將來善後事宜必致徒法不行應請將該員交部嚴議仍扣留浙江差委以觀後效允之方英人之初退定海也副都統海齡請將沿海通商各馬頭港口一律封閉不准一人一船出入以防偷漏之弊上以海齡所奏自係未知收回定海一節命裕謙體察目前情形悉心妥議尋覆奏略言濱海之區民無恆產而性習於水其仰食於海者難以數計一經封港小民頓失所天必將流而爲盜且上年幫助官兵擊退英船以及救護難民濟渡糧饟皆此商漁船隻是其船爲我之所必用卽斷無用其船而不准其謀生之理閒有不法之徒勾通接濟必停泊於人

跡不到之偏僻海汶何敢出入於衆目昭彰之通商馬頭是封港之議徒有礙於安分漁商而於杜絕接濟之法仍未得其要領再查漁戶冒險採捕終歲勤動僅能餬口竟有終其身未見洋銀一圓者接濟外人不過貪獲厚利而其所得究屬有限若有許以重賞激勸而用之斷不肯舍無窮之富貴而冒死接濟以求有限之錢財當此用人用船之際所有該副都統奏請封港之處應毋庸議又奏查探英船二十餘隻停泊定海外洋見在廣東不准通商難保不竄回定海已撥兵四千八百餘名添礮五十位豫籌防守又奏請懸賞招募水勇以散漢奸並准各國之人一體殺賊請賞又奏言接奉廷寄知參贊大臣楊芳有改水師爲陸路之議臣愚以爲此議斷不可行臣前在軍營亦曾將巡洋官兵撤回防守口岸因英人船堅礮利不值與之海洋接仗然止可爲一時權宜之計一俟洋務平定必應簡練水師講求船械以爲久安長治之圖若竟將水師改爲陸路則海中島嶼巡哨無人幾同棄置非徒示弱外人任其占據更慮沿海盜匪結聚成幫肆無忌憚爲患更甚矣疏入上並嘉納之三月奏陳東渡定海日期並擒獲英人正法又俟定海善後議定仍回鎮海軍營以禦爲剿以守爲攻杜絕接濟嚴防要隘儻駛近口

岸度量礮力能及卽行轟擊或誘令登岸剿洗得旨嘉勉閏三月上召伊里布來京聽候諭旨以裕謙補兩江總督並諭裕謙接奉此旨卽將定海應辦事宜交劉韻珂余步雲等妥爲經理該督卽赴兩江總督新任如有未了之事必須親身督辦者或於到任後再行赴浙查辦四月奏言接奉廷寄擬卽起程並將欽差大臣關防暫行封貯上諭裕謙到兩江任後將各海口善後防堵事宜辦理妥協卽折回鎮海調度將弁不時查訪定海情形軍民果否相安英船有無窺探欽差關防仍著裕謙管帶以專責成又命裕謙酌量江浙兩省適中之地在彼駐劄以便策應尋疏陳定海善後事宜十六條一添設陸路營汛以專責成一定海鎮標左右二營應移駐城外以資戍守一建復衙署兵房以資棲止一添撥礮位以資防禦一製補軍裝器械以資操練一戰哨船隻應分別改造以資緝捕一被賊焚拆戰哨船隻應專設一廠卽行補造一浙江巡撫應節制各鎮以資整頓一浙江提督應按年巡閱定海以資考覈一每年夏秋二季提督應駐劄鎮海以資控制一提標左營遊擊應移駐穿山以資策應一定海縣知縣應請升爲直隸同知以資彈壓一新築土城應隨時修葺以資保障一定海土城之外應永禁搭棚棲止以杜

弊源一應增廣學額酌減錢糧以昭激勸一應豁免舊欠新賦以蘇民困均下部議行又奏審明上年定海失守時退走各員弁治如律五月浙江巡撫劉韻珂馳奏浙洋有英船游奕諭裕謙仍往浙江或駐劄嘉興或徑赴鎮海酌量情形自行妥辦六月奏馳抵鎮海查明英船洋面防堵各情形又偕署江蘇巡撫程喬采奏請將勘明積歉之江寧各府州縣新舊錢糧分別緩徵以紓民力又請將部撥兩淮運庫解閩軍需銀七十萬改撥浙江以備急需均從之七月奏帶兵赴浙江防剿並請緩撤江浙防兵時因靖逆將軍奕山等轟擊英船英人退出虎門議令各省酌撤防兵尋以福建廈門失守諭裕謙等嚴密防範如兵力不敷准其酌量調撥務須妥爲布置毋稍疏虞至英人習於水戰向來議者皆以彼登陸後卽無能爲患乃今占踞廈門是陸路不可不加嚴備務須相度機宜詳加籌畫八月奏鎮海定海交界之青龍港洋面有英船五隻火輪船一隻大佛頭洋面有英船三隻情形叵測又奏擒斬登岸英人並將原定賞格及英人供詞開單恭呈御覽英船旋分口滋擾駛放三板小船從盛嶼地方登岸經太平營弁擊傷而逃又石浦英船亦爲防兵擊退嗣英船大幫闖入內洋裕謙奏言見於各隘口分布兵勇設法

守禦並躬率文武官弁誓於神前城存俱存以盡臣職斷不肯以退守爲辭離卻鎮海縣城一步尤不肯以保全民命爲辭接受英人片紙此非敢效匹夫之勇甘爲孤注之投蓋因鎮海地方疏虞則敵燄愈張兵心愈怯沿海一帶必將全行震動非此不能固結兵心滅此朝食更非此不能挽回徘徊瞻顧之積習故保鎮海卽所以全大局也九月英人又陷鎮海縣城裕謙死之事聞諭曰兩江總督裕謙功臣後裔世篤忠貞經朕擢任封圻適當英人滋事特派爲欽差大臣辦理浙江軍務該督銳意圖功方資倚畀茲以鎮海縣城失陷投水盡節深堪憫惻著加恩贈太子太保銜照尙書例賜卹任內一切處分悉予開復伊祖班第於乾隆年間在伊犁殉節入祀昭忠祠今該督臨危致命不忝前人著附祀昭忠祠並俟軍務完竣後再於鎮海縣城建立專祠以彰盡節其靈柩回京時著沿途地方官妥爲照料並著伊弟裕恆前赴江蘇迎接到京時准其入城治喪應得卹典該部察例具奏尋賜祭葬予諡靖節十一月裕謙靈柩到京特遣成郡王載銳前往賜奠裕謙無子奉旨以其弟世襲誠勇公裕恆之子兵部筆帖式德峻爲子承嗣兩房二十二年十二月德峻承襲騎都尉兼雲騎尉世職奉旨以六部主事用

清史列傳 卷三十八

大臣傳續編三

賀長齡

賀長齡湖南善化縣人嘉慶十三年進士改翰林院庶吉士十四年散館授編修十五年充廣西鄉試副考官十七年大考二等二十一年放山西學政二十四年十二月充文淵閣校理尋記名以御史用二十五年十一月充日講起居注官十二年二月升詹事府左春坊左贊善道光元年授江西南昌府知府二年陞山東兗沂曹濟道四年四月署山東按察使閏七月授廣西按察使九月調江蘇按察使五年陞江蘇布政使六年調山東布政使七年閏五月署山東巡撫六月兩江總督蔣攸銛奏來年新漕仍行海運上命沿海各督撫籌議長齡旋查明應行各章程具奏一在途各商船應催令回南受兌一最要島嶼令該管將弁親督彈壓一陸路委員應行酌減一收入津口船數日期應歸直隸奏報一收島船隻應相風催令開行上踐其言七月御史吳敬恆奏衍聖公官屬濫冒請嚴示限制上命長齡

確查具奏尋查明奏言嗣後保舉廟員三代年貌一併咨部俾無捏混恭遇覃恩惟咨部題補者得邀封典此外槩不准行仍令衍聖公隨時覆查不得以身家不清之人濫充從之八月奏拏獲假充王府差官之棍徒克昇額在東阿縣請託嚇詐請解京交部審辦九月奏臨清州揭獲逆帖一紙上命密查寫帖及張貼之人嚴拏究辦隨訪獲形迹可疑之臨清州人徐慶龍具奏上命將起意情由根究明確旋奏審明徐慶龍委係妄冀要功並無商謀滋事情節命再覆加嚴鞫按律定擬十月調江寧布政使因母年老奏請量移近省得旨所奏著不准行十二月諭曰吏部具題山東省大計卓異本內新城縣知縣容曷一員該撫賀長齡原註悃愾慈祥考語爲政之道總須寬猛相濟豈因一意慈祥遽爾列諸上考直省督撫當於屬吏中體用兼備者登諸薦牘固不可任武健嚴酷之吏爲害閭閻亦不可長優柔之習稍形廢弛十年十一月請開缺回籍養親旋丁母憂十三年服闋尋患病十五年病痊授福建布政使十六年調直隸布政使旋陞貴州巡撫三月入覲九月疏劾興義府知府谷善禾人地不宜定番州知州明玉精力衰頹請分別改簡勒休又平越州知州羅文寶延案不結請革職得旨所參是均允之十月請

將在部候補知府孔繼尹發往黔省差委諭曰孔繼尹前在山東官聲雖好然地方情形不同該撫何以知其於苗疆要缺相宜該省差委之員不妨照例請揀此端斷不可開所請著不准行並下部察議十七年三月會同雲貴總督伊里布奏請將石阡府改爲直隸廳所屬龍泉縣撥歸思南府管轄思南本係簡缺所轄婺川安化印江三縣號稱難治見將龍泉撥歸應將思南府改簡爲繁都勻府原係繁缺見在民苗馴服所屬易治請改繁爲簡又銅仁府屬平頭司吏目係屬閒員請裁汰定番州羅斛州判係苗疆要缺命盜詞訟近益繁多請將羅斛改設知縣部議以平頭司吏目無專辦公事准裁至石阡府羅斛州判均仍其舊九月奏湖北漢局存積白鉛六百餘萬斤足供數年銷售請暫停辦運以紓廠力又奏黔省歲運京鉛四起自己亥爲始歸併兩運以節經費允之十一月奏拏獲龍泉縣傳授報恩會匪犯曹得成呂相桂等審擬發遣如律十八年七月以奏夾帶小錢弊端輕聽新選銅仁府知府周作楫之言率行入奏得旨周作楫著交部議處賀長齡輕聽屬員亦屬冒昧交部察議十二月遵義府屬仁懷縣民人穆繼賢糾衆滋事與四川綦江縣接壤因勾結川省匪徒數百人欲赴川劫掠仁懷縣知縣王鼎

彝往捕綦江外委章泗明亦來查辦章泗明遇賊倉猝被害長齡偵知匪等於附近村莊裹脅愈多恐該處兵單漸致蔓延卽檄調弁兵圍拏隨殲斃賊黨十五名拏獲頭目謝世昌等五名又續獲賊匪二十餘人會同雲貴總督伊里布次第奏入諭曰匪徒糾集恣搶所供頭目十名均須按名弋獲卽就地正法被脅之人旣肯自首自應免罪有捉獲首犯來獻者亦不過貸其一死該督等所奏籲請加恩之處斷不可行並著咨會四川認真防堵旋會奏提督榮玉材與貴西道周廷授調兵分路進攻該處山口路狹匪等壘石樹柵一時不能摧破俟續調各路兵齊竭力進剿得旨催令未到各兵趕緊馳往攻剿迅速歲事隨調到各營弁兵出隊前進殲賊匪二百餘人焚其巢燒斃之賊不計其數生擒三十餘名又獲男婦百餘人合計拏獲首夥各犯千餘名奏入得旨嘉獎十九年正月奏查禁郎岱普安清鎮各廳私種罌粟得旨嚴飭地方官認真查訪立予拔棄又奏續獲開館販煙各犯起獲煙土等件諭以查緝尙好總期有犯必除以絕此患勉之三月保奏降調知府周作楫留黔補用下部議鐫級四月奏拏獲天主教何枚等犯議罪如律又奏部選思南府知府谷善禾才難治劇請酌量另補六月奏訪獲吸食鴉片煙

之大定府經歷陳培玉請發往新疆效力贖罪得旨所辦好七月會奏貴平營都司馬鳴珂剋扣兵餉吸食鴉片並侵蝕銷造火藥銀兩請革職嚴審八月奏鎮寧州訓導蔣紹周捏詞妄傳查詢廣順州吏目丁申難保無挾制索詐情事請革職審辦十二月奏黔省不通舟楫民間絕少蓋藏見於無義倉處添辦先於省城糧儲道倉籌備實貯永寧羅斛等州報捐倉穀各一千二三百石其大定等處報捐倉穀二萬餘石一俟實數貯倉卽續行奏報二十年二月奏黔省土瘠民貧女紅不勤謀衣更艱於謀食見督同司道教民栽種木棉以冀漸知紡織玉屏縣栽種桑樹二萬餘株知縣王存成在署設局教以養蠶取絲婺川縣知縣陸文衡設局購木棉五百斤教人紡織民間能養蠶者百數十戶能紡織者百數十人庶漸推漸廣益宏聖主帡幪之化得旨實力勸導不可中輟勉之三月奏請都勻府八寨廳設立義學並加增學額下部議行經禮部奏稱向例添設學額督撫與學政會銜此次該學政並未列銜上命長齡明白專摺回奏六月奏稱繕摺時學政王慶雲出省考試是以未及會銜得旨賀長齡著交部議處又奏舉人饒懷清護庇吸食鴉片人犯致犯脫逃請革去舉人嚴審旋審明具奏得旨賀長齡所辦甚好一

律查緝不准疏懈二十一年八月審辦糾衆結盟匪徒汪擺片等四十一人如律
十一月奏挾嫌誣訐之學正熊文錦請從重發往新疆充當苦差先是御史花詠
春奏飭邊疆認真訓練上命各督撫妥議十二月長齡議稱黔省形勢四鎮分設
四隅撫提兩標居中控制布置最爲得宜貴東與古州鎮同城其鎮遠鎮亦該道
所轄貴西與威遠鎮同城其安義鎮亦該道所轄唯糧道不兼兵備請將糧道兼
兵備道銜所轄貴陽石阡等營責令稽查統於年內給報一次奏聞下部議行二
十二年三月戶部奏請敕力求撙節上命各督撫分別緩急通盤籌度長齡議請
將黔省通事土弁苗弁苗兵衝僻各路驛夫六項裁汰每年撙節銀一萬八百七
十餘兩並請將撫臣學政司道額支養廉銀每年捐出二成銀五千六百八十兩
州縣養廉銀每年捐出一成銀四千八百三十六兩俟經費充裕再爲復額疏入
如所請行十二月奏黔省辦運黑鉛酌停三年尙有盈餘請敕部議以節經費尋
經部臣議停四年從之又奏言貴州省城貯有關山威遠子母等銅礮平時並不
操演嗣後請定爲每年冬操演放一次多年鏽壞者改鑄擡礮以資利用得旨著
依議行至黔省跬步皆山所製擡礮自以輕捷便利爲要儻過於笨重運用不能

得力卽致有名無實二十三年五月奏永寧州撤任知州富呢雅杭阿公事未能明練得旨覈實辦理尋奏言察看該員才具短絀不知愧奮請以州同降補二十四年三月奏黔省安置各省流人及新疆改發人犯見有三千餘名恐地方官約束難周加以苗民錯處釁隙易生請將改發黔省者仍發新疆安插奉旨下部議奏旋經刑部議上復奉旨交軍機大臣會同刑部妥議敕下伊犁將軍辦理八月奏黔省擡礮製齊而火箭尤佐擡礮所不及數月以來製造均已如法眼同試放皆輕便適用得旨所造不爲無用其善練之十月奏遵義府屬稅口十九處子口十四處近年以來山徑紛歧稽查匪易擬將青坑稅口移於茅苔村其蘭坪等處子口一併裁汰庶走私可絕稅課自充二十五年正月會奏黔省下游鎮遠黎平都勻三府及古州廳所屬苗俗桀驁以盜爲生州縣差役緝捕難周擬於古州鎮遠兩鎮兵內挑選或十名或五名酌量地方衝僻令其專拏盜賊另挑數名作爲餘額遇缺卽補無事仍就本營操演不使曠廢責成旣專緝捕自倍臻周密得旨均下部議行四月陞雲貴總督請入覲旋因病賞假調理六月諭令毋庸來京卽赴新任俟二年屆期再行奏請七月奏請將黎平營參將張肇泰朗洞營參將存

住二員帶往滇省飭伍練兵報可八月兼署雲南巡撫十月永昌府回匪糾衆肆掠先將滋擾情形奏入諭長齡慎密籌辦又命激勵將士迅卽兜剿勿任滋蔓續奏稱回匪於保山縣猛庭寨聚集聲言報復見飭迤西道羅天池提臣王一鳳相機督辦尋奏言回匪千餘人由枯柯河大田壩等處衝突營盤已飛咨提臣張必祿添調官兵親往堵禦十一月又奏回匪偪近永昌郡先經迤西道羅天池將城中內應回民殲除淨盡匪等撲繞金雞村營盤經騰越鎮中軍遊擊朱曰恭帶兵迎敵將放槍之賊擊斃張必祿等分路進攻轟斃匪犯數十名匪等棄柵逃走查明回寨並無匪徒藏匿見將未到官兵截回歸伍有旨嘉之二十六年五月奏永昌逃散回匪經外來奸回煽惑糾衆復出提督張必祿總兵音德布等奮勇迎擊將賊首殲斃諭曰此次回匪滋鬧見據生擒之馬良一犯供稱上年九月搜戮內應殺人過多是以羣圖報復是羅天池辦理不善咎無可辭所有議敘著撤銷賀長齡著交部議處七月奏漢回構隙情形得旨著賀長齡督率所屬嚴禁外來游匪以絕構煽儻再有滋事唯賀長齡是問凜之八月奏軍犯王芝異奮勇效誠請援回疆道勇成例將其釋回諭曰賀長齡所奏甚屬謬妄內地與回疆情形迥不

相同在配軍犯自宜嚴加管束不得藉端遽請免罪致使妄生希冀該督總制兩省營伍不惟雲南之兵歸其統轄卽貴州各營亦無難隨時札調此次辦理么磨回匪何必藉一軍犯之力練勇相助耶賀長齡辦事毫無見識懦弱無能有負朕望著嚴行申飭交部議處經部議褫職上加恩改爲革職留任又諭曰上年雲南回匪滋事經賀長齡親往督剿辦理果協機宜何至本年復有蠢動見雖據奏稱連獲勝仗地方安謐惟究未能及早籌防優柔從事致復勞師糜餉已屬咎無可辭甚至總督重任兩省營伍皆其統轄豈竟調遣乏人轉藉一軍犯之力練勇助剿謬妄無能莫此爲甚賀長齡不勝總督之任著降補河南布政使十二月抵任二十七年二月患病回籍三月諭曰雲南漢回報復幾於無歲不有著李星沅悉心酌辦儻賀長齡從前辦理不善卽據實嚴參尋奏入得旨此次雲南回匪又復滋擾賀長齡未能詳慎區分率行掩捕又率准張富等投誠種種謬妄實屬辦理不善賀長齡著革職二十八年故

林則徐

林則徐福建侯官人嘉慶十六年進士改翰林院庶吉士十九年散館授編修二

十一年充江西鄉試副考官二十四年三月充會試同考官閏四月充雲南鄉試正考官二十五年二月轉江南道監察御史時河南儀封南岸工程未竣則徐以料販囤積居奇奏請飭地方大吏嚴密查封平價收買以濟工需下所司議行先是海盜張寶投誠後累官至副將至是復擢總兵則徐恐其驕蹇不可制疏劾之上躓其言四月京察一等復帶領引見記名以道府用尋授浙江杭嘉湖道道光元年聞父病引疾歸二年授江蘇淮海道未赴任署浙江鹽運使三年遷江蘇按察使四年正月署布政使八月丁母憂五年奉旨赴河南督修隄工工竣仍回籍六年四月命署兩淮鹽政以疾辭十月服闋七年五月授陝西按察使署布政使旋陞江寧布政使十月丁父憂十年正月服闋六月授湖北布政使十一月調河南布政使十一年七月調江寧布政使時江蘇水災咨糴河南米麥則徐委員赴商邱劉家口及陳州光州採辦由河淮運達江境順道親往督辦並於淮揚一路勘災籌賑十月擢河東河道總督十二年正月疏言運河挑工已完六分惟沿隄出土之路因泥漿拋撒逐條凍積名曰泥龍尙未除淨日積日多挑運更爲費事一經春雨更恐衝入河心見飭工員挑完一段卽起淨一段泥龍其已挑未淨之

處官差夫頭量予懲責上是之二月擢江蘇巡撫未卽赴任三月奏言稽料爲河工第一弊端其門垛灘垛底廠及併垛戴帽各名目非抽拔拆視難知底裏見將南北十五廳各垛查明抗敝者察治並請裁山東泉河通判得旨向來河臣查驗料垛從未有如此認真者六月抵巡撫任疏言江蘇錢穀最爲繁重而漕務痼疾已深整頓錢漕先懲已甚清釐倉庫尤貴截流當執法者不敢以姑息啟玩心當設法者不敢以拘牽礙全局報聞時議裁汰冗員八月則徐偕兩江總督陶澍奏裁江寧鎮江二府照磨揚州府檢校華亭縣主簿金壇縣湖谿司巡檢又偕南河總督張井奏裁丹徒如臯二縣縣丞儀徵清江閘閘官均允行閏九月以南河盜決官隄首犯陳端日久未獲降五級留任先是則徐在江寧藩司任內以各屬水災建議倡捐煮賑資送留養收孩瘞棺捐衣勸糶養佃典牛借籽種禁燒鍋十二條經陶澍以聞至是事竣偕陶澍奏請獎勵捐輸出力各官紳允之十二月密陳藩臬道府考語疏言察吏莫先於自察必將各屬大小政務逐一求盡於心然後舉以驗屬員之盡心與否若大吏之心先未貫徹於此事之始終又何從察其情僞臣惟恃此不敢不盡之心事事與屬員求其實際謹將司道府之立心行事人

品官聲略具梗概以聞初則徐任按察使時奉旨綜辦三江水利以憂去任經陶澍奏明孟瀆劉河分年籌辦十四年孟瀆工竣六月則徐以劉河近日淤墊更甚奏請接行勘辦從之七月奏言江蘇錢漕倍於他省其中有緩有急有舊有新勢難一律清解與其漫無區別徒令剗肉補瘡莫若專嚴於提新而暫緩於補舊新款果能全解是州縣無新虧而舊欠亦可漸冀彌補得旨竭力爲之八月奏江蘇各沙洲前經召佃收租充水利經費惟其中有書院善堂公款及民戶承買之業請自道光八年新例以前報部有案者遵照舊案一律准買執業其未經報部及例後所報者發還原價概行歸公以示限制而杜效尤下部議行是年夏秋間江蘇各府或江湖盛漲廬畝被淹或暘雨愆期收成積歉九月蘇松等屬續遭風雨木棉穀粒均有受傷委員勘實奏請蠲賑格於廷議復上疏曰蘇松常鎮太倉四府一州錢漕最重道光三年水災以來歲無上稔民力益見拮据今歲秋禾節節受傷甚至發芽霉爛每畝比之上年少收五六斗民間積歉已久蓋藏本極空虛當此秋成之際糧價日昂來歲青黃未接不知更當何如小民口食無資而欲強其完納卽追呼敲撲亦有時而窮前此漕船缺米州縣尙能買補近且累中加累

不但無墊米之銀更恐無可買之米且鄰省亦連被偏災布匹絲紬銷售稀少權子母者無可牟之利任筋力者無可趁之工故此次雖係勘不成災而困苦情形實與全災無異觀此景象時時恐滋事端儻通盤籌畫有可暫紓民力之處總求恩出自上多寬一分追呼卽倍一分元氣疏入報可十一月以陳端就擒伏誅偕陶澍奏保出力人員十五年正月奏鎮江所屬丹徒丹陽運河爲江浙漕船要道見屆大挑之年請計段興工均允之十一月署兩江總督十六年二月回巡撫任七月復署兩江總督入覲十七年正月擢湖廣總督時荆襄歲苦水患則徐抵任後修築隄工躬自監視七月奏籌襄陽等屬鹽務緝私章程如所議行尋以江南河庫道李湘茝因庫款不清褫職則徐坐前任江蘇巡撫時註考不實降四級留任九月前任總督訥爾經額奏武岡州滋事首逆藍正樽已被鄉勇毆斃則徐遵旨研究亦以毆斃屬實覆奏上責其隨同附和遷就了事降五級留任十八年二月偕湖南巡撫錢寶琛奏籌辰沅道屬苗疆屯防各事宜下部議行又疏陳整頓鹽務略言貧民挑運售私其近川近粵近潞之處與兩淮場竈皆遠而鄰鹽一蹴卽至成本旣輕售價自賤且鄰省鹽課皆輕准綱獨重卽彼此同一官鹽亦必彼

盈此縮況以無課之私販紛紛侵灌其勢更不能相敵見在剴諭紳民日用飲食何在不可節省獨於食鹽計較貴賤犯法食私紳衿革功名平民受滿杖明利害者當不至如是之愚且湖廣錢漕最輕若鹽課復背官食私天良何在嗣後責成紳衿大戶及鄉團牌保互禁食私犯者公同送究其挑賣之窮民許改充肩販由官鹽店給票赴鄉賣完繳價再從前襄陽宜昌衡州三處奏明官運商鹽減價售賣以敵鄰私歷辦並無成效且一種奸販轉賣減價之賤鹽以灌旺銷之引地藉寇資盜無異剗肉補瘡應將此三處不令減價以杜流弊四月奏請湖南提督常駐辰州府扼要彈壓均允之閏四月湖南撫標右營遊擊馬辰失察家人及弁兵舞弊事覺則徐坐曾經保奏降四級留任九月奏各州縣水旱偏災奉恩旨謄黃祇能開載若干村莊其地名不能一一全敘難保吏胥無高下其手衿民亦或狡稱蠲免紛紛訐訟請將應蠲應緩應遞緩之頃畝細冊由各州縣另行繕榜隨同謄黃徧貼曉諭並責成該管道府稽察毋許隱匿上嘉其所見精細允行先是鴻臚寺卿黃爵滋疏請嚴禁鴉片以塞漏卮吸食者治以死罪命下中外各大臣議奏則徐奏言鴉片流毒已甚非難於革癮而難於革心欲革玩法之心安得不立

怵心之法況行法在一年以後議法在一年以前轉移之機正繫諸此必直省諸臣共矢一心極力挽回以期永絕澆風此法乃不爲贅設遂擬章程六條一收繳煙具以絕饒根一各省於定議後出示分一年爲四限遞加罪名以免觀望一加重開館興販及製造煙具罪名勒限自首以截其流一失察處分先嚴於所近一著令地保甲長查起煙土煙膏煙具庇匿者罪同正犯一豫講審斷之法以杜流弊因繕呈戒煙經驗藥方數種尋奏湖南湖北拏獲烟販並收繳煙土烟膏煙具情形上甚嘉之十一月入覲賜紫禁城騎馬命頒欽差大臣關防馳往廣東查辦海口事件水師咸歸節制十九年三月偕總督鄧廷楨等奏查辦躉船二十二隻起獲煙土二萬二百八十三箱請酌給茶葉大黃以示體恤得旨所辦可嘉之至該商畏罪自首情尙可原免其治罪酌賞之處著照所議則徐下部優敘四月奏英人夾帶鴉片請照化外有犯之例人卽正法貨物入官議一專條並酌予限期上命軍機大臣等議行新例既定則徐請先傳檄英吉利國王諭以利害擬彙呈覽頒發又遵查海口排練礮臺情形奏言廣東中路海口以虎門爲咽喉進口七里一山屹立海中曰橫檔其前有巨石曰飯籬排又其前小山曰下橫檔海道至

此分二支右多暗沙左以武山爲岸山下水深英船必由之路海面僅三百餘丈鎖以鐵練承以木排復建礮臺俯臨排練就令英船堅固衝斷鐵練尙有一層阻截羈絆多時臺礮乘之必成灰燼報聞時通商之國以十數俱遵具並無夾帶鴉片切結惟英吉利持兩端七月英領事義律率船五隻以索食爲名犯尖沙觜則徐檄參將賴恩爵禦之九龍山碎其雙桅大船英船紛集礮彈如雨我軍以網紗障船就旁施礮斃敵多名接仗踰五時英人死傷益衆逡巡遁八月復檄守備黃琮等偵英船於潭仔洋面乘英人方開礮亟擲火斗火罐焚其船敗走之義律因潛赴澳門倩他國人遞說帖求轉圜則徐以其言未可信奏請相機剿撫諭曰旣有此番舉動若再示以柔弱則大不可朕不慮卿等孟浪但誠卿等畏蕙先威後德控制之良法也時御史步際桐奏謂責英出結徒開含混之路則徐覆言外人最重然諾彼愈不肯出結愈見其結之可靠亦愈不能不向其飭取臣不敢存趨易避難之見致負委任尋義律經則徐檄諭雖自稱悔罪稟請逐船搜查勒限驅回空躉仍觀望圖免具結九月復乘間糾兵船滋擾水師提督關天培敗之穿鼻洋遂竄泊尖沙觜則徐以其北有山梁曰官涌可以俯而攻也令深溝固壘以待

之英人果六犯官涌皆受懲創然猶逗遛外洋則徐疏其反復情形上以彼曲我直中外咸知諭令停止貿易暴其罪狀驅逐出口則徐復請敕下福建浙江江蘇各督撫嚴防海口如所請行先是三月則徐調兩江總督未卽赴任十二月調兩廣總督奏請移高廉道駐澳門並撥隸水師以資控馭允之尋順天府府尹曾望顏奏請無論何國概絕通商大小漁船概禁出洋以斷接濟則徐遵議奏言自斷英人貿易後他國洋商喜此盈而彼絀當以夷制夷使相問相睽若概與之絕轉恐聯爲一氣且廣東民人多以海爲生若概禁出洋則勢不可以終日擬令漁人出洋止許帶一日之糧庶少接濟下軍機大臣議行時英人被逐寄旋外洋勾引漁船登戶誘以重利希圖接濟銷售二十年正月則徐定計以毒攻毒令關天培密裝礮船雇漁蟹各戶教以出洋埋伏候夜深順風揚火焚蟻附英舟匪船二十三隻延燒英舟及海灘蓬寮自是漢奸膽懾英船接濟幾斷四月奏尖沙嘴爲英船經由寄泊之區又爲粵省東赴惠潮北趨閩浙要道請與官涌兩處各建礮臺俾聲勢聯絡如所請行五月再焚英船於磨刀外洋延燒匪艇十一隻蓬寮九座尋謀知英人新來兵船遊駛外洋請飭沿海各省嚴備嗣探英船揚帆東向因奏

言夷情詭譎凡事矯飾虛張若徑赴天津求通貿易所陳或尙恭順仍懇優以懷柔之禮敕查嘉慶二十一年成案將其遞詞人由內河護送至粵藉可散其爪牙六月英人改犯浙江陷定海掠寧波則徐上疏自請治罪並密陳夷務不能中止英人所憾在粵而滋擾於浙雖變動若出意外其窮蹙實在意中惟其虛懦性成愈窮蹙時愈欲顯其桀驁試其恫喝甚且別生秘計冀售其奸如一切皆不得行仍必帖然俛伏第恐議者以爲內地船礮非外人之敵與其曠日持久不如設法羈縻抑知夷性無厭得一步又進一步若使威不能克卽恐患無已時勢必他國紛紛效尤不可不慮因請戴罪赴浙隨營自效英人旋復構釁於粵則徐調集米艇火船築墩置礮於蓮花峯下爲關閘前山障蔽又以安南軋船專擊船底英人所憚遣人求式仿造以備火攻七月親駐虎門督師水路夾擊轟傷英船沈其三板數隻獲礮彈大小二百有奇八月再敗之龍穴洲英人惶亂不能拒僅放空礮他船來援我軍轟斷其篷索不得進遂乘潮南竄二役斃敵無算官兵受微傷僅數人捷奏未至九月諭曰自查辦以來內而奸人犯法不能淨盡外而興販來源不能斷絕甚至本年福建等省紛紛徵調糜餉勞師皆林則徐辦理不善之所致

著交部嚴加議處卽來京聽候部議此次英人各處投遞稟帖訴稱冤抑朕洞悉各情斷不爲其所動惟該督以特派大員辦理總無實濟轉致別生事端誤國病民莫此爲甚是以特加懲處並非因該英人稟訴遽予嚴議也尋部議革職命仍折回廣東以備查問則徐旣獲罪琦善代之十二月琦善奏英人要求情形上覽奏震怒所請廈門福州通商及給還煙價均不准行飛調四川湖南貴州兵赴廣東諭琦善督同則徐妥爲辦理二十一年三月賞四品卿銜命赴浙江鎮海軍營協辦事務則徐至浙與兩江總督裕謙浙江巡撫劉韻珂籌辦海防節次擒獲海盜正法杜絕接濟嚴堵要隘英不得逞五月復革去卿銜遣戍伊犁七月河決開封則徐道中奉旨免戍襄辦東河河工時大學士王鼎奉命總理河務以則徐熟悉情形深資得力入奏得旨卽督飭工員趕辦二十二年工竣仍遣戍二十四年伊犁將軍布彥泰奏請飭則徐勘辦開墾事宜則徐親歷庫車阿克蘇烏什和闐喀什噶爾葉爾羌及伊拉里克塔爾納沁等處請酌給回人耕種並請改屯兵爲操防均如議行二十五年九月命回京以四五品京堂候補十一月賞三品頂帶署陝甘總督十二月行抵甘州會野番肆劫飭鎮防護馬廠并仿洋礮法改製大

儼推輪運放士氣爭奮二十六年三月授陝西巡撫仍暫留甘肅偕陝甘總督布彥泰等辦理番案六月剿番族番僧於黑錯寺復追堵果岔匪巢殲擒殆盡得旨調度有方下部優敘十一月因病奏請開缺得旨賞假三月二十七年陞雲貴總督時雲南漢回互鬪垂十數年焚殺幾無虛日則徐抵雲南適回民丁燦廷赴京疊控保山縣漢民沈振達串謀誣害劫殺無辜經地方官提犯鞠訊漢民遂糾衆奪犯燬官署劫獄囚搜殺回戶拆瀾滄江橋道路以梗永昌鎮道帶兵往擒漢民遂拒捕二十八年則徐督兵赴剿途次聞趙州之彌渡有客回勾結土匪滋事遂就近移兵剿之破其柵殪匪數百並撫恤受害良民趙州底定保山民間風懾服縛犯迎師則徐按其罪重者百數十人立誅以徇復乘勢搜捕永昌順寧雲川姚州歷年拒捕戕官諸匪千餘名寘諸法奏入旨加太子太保銜並賞戴花翎二十九年五月騰越廳卡外野夷滋擾則徐檄總兵拴住迤西道王發越率明光隘土守備左大雄剿平之上嘉其遠振軍威又安邊地六月因病請假七月復奏請開缺允之三十年五月大學士潘世恩尙書孫瑞珍杜受田應文宗顯皇帝登極求賢詔均首以則徐薦命迅速來京聽候簡用九月以廣西洪秀全稔亂諭曰朕睽

懷南服民生一日不安朕心一日不忍前任雲貴總督林則徐疊次宣召尙未來京著卽作爲欽差大臣頒給關防馳赴廣西會剿林則徐受皇考簡任深恩前在雲南辦理漢回軍務迅速蕺事朕所夙知著卽星馳就道蕩平羣醜綏靖巖疆毋違朕命十月命署廣西巡撫十一月行次廣東潮州病卒諭曰前任雲貴總督林則徐由翰林洊歷外任疊蒙皇考簡膺疆寄宣力有年上年剿辦雲南保山匪徒調度有方渥荷恩施賞加太子太保銜並賞戴花翎旋因病請假回籍朕御極之初知林則徐平素辦事認真不避嫌疑疊經降旨宣召來京嗣因廣西匪徒滋事特授爲欽差大臣頒給關防令其速赴軍營剿辦前據馳奏已由本籍起程方冀迅掃邊氛以綏南服茲據徐繼畬馳奏該大臣沿途勞頓舊疾復發於廣東潮州途次溘逝念其力疾從公歿於王事覽奏殊深悼惜著加恩晉贈太子太傅照總督例賜卹任內一切處分悉予開復應得卹典該衙門察例具奏伊子編修林汝舟文生林聰彝文童林拱樞著俟服闋後由吏部帶領引見候朕施恩尋賜祭葬予諡文忠咸豐元年雲南巡撫張亮基請以則徐入祀雲南名宦祠二年陝西巡撫張祥河奏請於陝西省城爲則徐建立專祠均允行同治四年入祀江蘇名宦

祠子汝舟翰林院編修聰彞浙江候補道拱樞江南道御史

鄧廷楨

鄧廷楨江蘇江寧人嘉慶六年進士改庶吉士七年散館授編修十年充會試同考官十三年三月充會試同考官八月充順天鄉試同考官是年春上巡幸淀津及十四年五旬萬壽廷楨進呈詩冊俱蒙賞賚十五年二月京察一等五月授福建臺灣遺缺知府經浙江巡撫蔣攸銛奏請留浙補用十一月補寧波府十七年丁母憂十九年六月服闋八月授陝西西安府二十年正月補延安府六月調榆林府二十二年調西安府二十五年超遷湖北按察使道光元年陞江西布政使二年以前在西安知府任內承審渭陽民柳全璧案謬誤經欽差刑部尙書那彥成覆審奏入奉旨革職三年六月賞給七品職銜交直隸總督蔣攸銛差委十二月授通永道四年擢陝西按察使五年五月遷布政使七月護理巡撫以綏德等處雹災奏請優卹允之十二月奏嘉慶年間三省賊匪滋事熬屋一縣殉難者四千七百餘人請建祠旌獎下部議行六年授安徽巡撫廷楨奏明祖籍壽州諭以遷居江寧業經五代毋庸迴避七年四月奏鳳潁泗等府州民情獷悍動

輒械鬪經前撫臣陶澍奏明收繳兵器曾於公費內撥銀二千分給各屬爲呈繳器械價值今查私藏者尙多地保分屬各鄉無不深悉應責成給限搜淨如限外不繳及有私造者嚴行究辦地保分別治罪閏五月奏安徽省界連吳楚長江六百餘里往來商旅必須嚴密巡防前以上下江面分爲六段每段委佐雜千把各二人按地分巡并專委縣丞二員會同該管遊擊副將每月督巡一二次每年提銀六千兩以爲經費嗣又加委丞倅一員各分三段責成督巡并添備坐船給予盤費臣查江面巡防原宜周密惟向來所委文職俱係兩岸各有分轄之員派委巡查轉致曠廢本任請無庸另派亦不必給發盤費仍飭該員等與沿江本汛武職按段巡緝其武職應照舊派委但向係三月更換請每月調委以專責成至鳳陽靈璧二縣途衝地瘠缺苦差繁幫貼不敷卽將酌裁巡江之費餘銀五千兩再給鳳陽三千靈璧二千藉資辦公又奏無爲州黃琦灘江埂衝潰添築月隄一道所有空廢田畝請豁免銀米俱得旨允行九年六月以修安徽省志告成交部議敘十月添建壽州考棚並於安豐塘古芍坡設立水門二十八座十年疏濬鳳陽縣沫河口增築隄閘十一年五月以安徽過境糧船最多湖廣江西三省夾帶蘆淮

私鹽皆有棍徒陸續收囤奏請認真查拏諭以按律懲辦十二年二月拏獲江蘇武進要犯莊午可得旨嘉獎下部議敘八月因前奉諭旨酌裁冗員請將徽州府通判蕪湖縣縣丞二缺裁撤十二月奏穎州府距省八百餘里向無驛站發遞公文動形遲緩請添設驛站籌備夫馬均下部議行舊例穎州府屬兇徒結夥三人以上持兇器傷人者不分首從發極邊煙瘴充軍僉妻發配是年廷楨奏言該府民俗强悍非此不足示懲至僉妻發配例內似無深意此等婦人本係無罪之人一經隨夫僉發長途摧挫難堪兵役玷污可慮或本犯病故則異鄉嫠婦飄泊無依或本婦身亡則失恃孤嬰死生莫保況該屬婦女頗顧名節聞夫犯罪例應僉配或自殘以求免或自盡以全身在本犯肆爲兇暴法網固所難寬而本婦無故牽連苦衷亦所宜恤奏入下部議准停止僉妻發配之例十三年十月拏獲江蘇桃南廳掘隄要犯陳端得旨嘉獎十五年正月奏裁符離稅口如所請行八月擢兩廣總督十六年正月英吉利國人製造煙船能行逆風欲進口傳遞書信廷楨令洋商轉飭禁止諭曰外人傳遞書信向有章程何可以詭異不經之船擅入海口英人素性詭詐雖見據查明煙船並無滋事情形惟旣飭諭不准進口乃仍

欲駛入內洋實屬藐玩著鄧廷楨嚴行禁阻驅逐回國如不遵法度竟肆桀驁立即懾之以威俾知警懼時粵省在籍刑部郎中盧應翔唆訟一案經欽差大臣賽尙阿查辦復爲言官所劾上命廷楨密查奏請添派大員會審特命恩銘趙盛奎往訊嗣因承審失實得旨恩銘趙盛奎鄧廷楨於盧應翔干預訟事未能審出實情請開復原官以致該革員瀆控不休實屬錯誤部議降三級留任尙覺過輕著改爲革職留任六年無過方准開復三月奏普寧縣屬大壩與橫山等鄉械鬪斃命又塗洋鄉匪徒恃衆抗拒傷斃兵勇飭委弁兵往緝獲犯三百餘名又奏整頓潮屬械鬪事宜各條奉旨所見是所議妥實力行之久而毋懈四月奏防守礮臺增兵操演請籌備經費允之初御史沈鏞奏請將外省行用洋錢量爲裁制九月廷楨等奏洋錢流布東南驟難禁止其弊在於以枚計值不論分兩之重輕不較成色之高低應請敕下沿海行使洋錢各省必以成色分兩爲憑不得計枚定價止准洋錢補紋銀之水不准紋銀轉補洋錢之水則予以限制成色分兩均有權衡而事既通行居奇無自其價可冀胥平奏入諭認真查察以平市價而杜弊端是月御史黃仲容奏廣東潮州一帶海船到日攜有外國景興光中二種錢文質

薄小始則攙雜制錢並用今則專用夷錢並有將制錢銷燬私鑄者上命廷楨嚴查計值收買十一月以虎門新鑄大礮試演炸裂奏請另鑄以重軍需諭曰礮位原爲武備要需從容試演已至炸裂安望禦侮耶經此次賠造後儻再試演無准惟鄧廷楨關天培是問懍之十二月拏獲蟹艇出洋紋銀二萬兩於大嶼山口又獲二萬八千餘兩於急水洋奉旨將所獲之銀全數充賞因奏言鴉片流傳內地以致紋銀日耗今欲杜絕紋銀出洋宜於從出之地必出之途實力稽查俾漢奸外人兩無所施其伎倆自可漸塞漏卮諭曰該督能見及此著卽同心協力認真巡察以懲漢奸之句串杜洋商之貪饕總期行之有效無得徒託空言十七年覆奏廣東積弊十條一兇盜充斥一營務廢弛一諱盜作竊一紋銀出洋不下千萬一衙役小縣數百大縣千餘一差役濫押無辜一海濱沙灘開墾有礙水道一奸徒放火一盜發墳墓一習尙侈靡有業經懲辦者有見在查拏者上以所議尙屬周妥惟紋銀出洋見在查拏認真暫爲斂迹須乘此稍有頭緒之時加意整頓十八年七月奏拏獲興販鴉片窰口四座上命實力查辦以清其源不准一日疏懈尋以查閱水陸各營官兵奏入諭曰海疆重地各國船隻絡繹不絕武備必當精

益求精將弁兵丁內有吸食鴉片者尤當隨時懲治萬勿姑息勉之時有英國巡船駛至銅鼓洋英將馬他倫帶有番梢五百餘名并攜婦赴澳門英館與該國領事義律居住欲求呈遞書件廷楨以來書不遵舊式卽向擲還并飭員弁諭斥回國奏入諭曰英船駛泊外洋仍當不時偵察時屆北風卽飭令迅回本國不可任其北駛或竟藉端停留自當加以兵威嚴行驅逐并停止該國買賣用昭懲創著鄧廷楨相機籌辦總宜外示靜鎮內謹修防以靖海氛而安閭閻先是御史周頊奏請酌定茶葉大黃價值祇准外人以紋銀交易八月廷楨以交易必須紋銀彼轉得藉詞於置貨之外餘銀攜帶出洋是從前猶爲巧取此後竟屬公行奏寢其議十一月請將韶州府屬三鞏橋增設外委移駐清水江作爲汛防三鞏橋仍留下座樂昌縣屬神頭嶺乳源縣屬古松亭各添卡一座以重巡防部議如所請上以鴉片傳染日深特命湖廣總督林則徐爲欽差大臣赴粵查辦諭曰鄧廷楨統轄兩省地方事務殷繁若專責以查辦鴉片恐顧此失彼見派林則徐專辦此事鄧廷楨自當益矢勤奮應分辨者各盡己責應商辦者會銜奏聞趁此可乘之機力救前此之失十九年正月廷楨奏請於虎門海口勅造木排鐵練添置礮臺礮

位並籌議經費二月奏粵洋向分中東西三路中路自老萬山以內如伶仃等洋皆各國來粵貿易之所若西路之高廉雷瓊東路之潮州南澳皆外艦例不應到之區今因中路堵截南澳長山尾洋先後有外艦八隻駛來拋泊經巡洋鎮將調集師船圍逼始行遁去諭曰夷情叵測所載煙土何肯甘心拋棄必逞其鬼蜮伎倆著各海口嚴密查辦三月偕林則徐查辦躉船二十二隻起獲煙土二萬二百八十三箱請酌給茶葉大黃以示體卹上嘉之嗣英船在粵遷延不肯出具甘結又有毆斃民人命案抗不交兇遂議禁絕柴米食物無許接濟提督關天培率領師船於沙嘴洋防堵七月義律率英船五隻以索食爲名突向我師開礮參將賴恩爵督率將弁拒戰於九龍山擊碎英人雙桅大船俄英船蜂集礮彈如雨我兵以網紗等物障船仍從空處施放大礮轟斃英人多名是日接仗五時之久英人受傷甚衆旋即遁去諭曰既有此番舉動若再示以柔弱則大不可朕不慮卿等之孟浪但誠卿等不可畏蕙先威後德控制之良法也相機悉心籌度勉之慎之八月守備黃琮在潭仔洋面用火斗火罐擊碎英船一隻義律因求西洋人代遞說帖稟請具結聽候逐船搜查九月英人兵船復乘閒滋擾我兵水陸疊擊驅出

外洋查看該英人甘結與新例不符得旨夷情叵測不必取具甘結著卽停止貿易所有英船盡行驅逐出口時廣東省城傳播歌謠廷楨奏言臣自緝查鴉片三載於茲豪猾之徒本厚利豐一經訪拏已獲者刑僇及身未獲者逋逃亡命身家既失怨讟遂興始而風影譌傳既而歌詞遠播以查拏爲希旨以掩捕爲貪功以偵緝爲詭謀以推鞠爲酷罰甚至誣以納賄目爲營私譏建議爲急於理財訾新例爲輕於改律種種狂悖無非爲煙匪洩忿論曰林則徐鄧廷楨皆朕親信大臣畀以重任見在查辦吃緊之際斷不可因羣言淆惑稍形懈弛務當協力同心勉益加勉并嚴拏編造歌謠之人從重治罪十二月調兩江總督旋調雲貴總督復調閩浙總督卽購洋礮十四門由海道運赴閩省二十年三月英船四隻寄泊梅林洋經署水師提督程恩高陸路提督余步雲分投夾攻毀其篷索擊斃其將英船始遁廷楨以閩省所建礮臺大不過十餘丈所安礮四五位重不過千斤難資捍禦且閩洋無內港可守礮臺必須建於海灘沙性浮鬆根基不固爰易礮臺爲礮墩用麻布袋實以沙土層層堆積沙墩外側豎舊小漁船牢固拴縛以爲保護先是御史杜彥士條奏閩省諸弊上命侍郎祁寯藻黃爵滋查辦來閩偕廷楨覆

奏據稱漳泉重地請以巡撫暫駐查巡撫事務殷繁宜責成總督前往督辦光中錢充斥自宜設局繳銷戰船敝壞居多自宜責令賠造奸民私行勾結者自宜設法剿除洋盜未經拏獲者自宜勒限嚴緝至文武需索陋規英人擄掠民婦有業已懲辦者有並無其事者又議整頓漳泉械鬪六條一選擇賢吏力圖撫輯一查拏匪犯無得輕易會營一選舉鄉族各長以專責成一嚴拏鬪匪以絕根株一收繳火器以息兇燄一整飭倫紀以重教化先後俱奉俞旨又奏海防專汛責在陸路洋面機宜責在水師其關津丁役人等應由福州將軍專管並令臬司於定案時查明案犯經過地方關津有無賄縱切實根究以清弊源至民船出口商船則令州縣於給照時親詣察看漁船則令指定埠頭編立字號按日稽查其漢奸巢穴見已訪聞晉江惠安等縣確有主名當設法嚴拏期於必獲諭曰漢奸一日不除則英船一日不絕總宜猛以濟寬禁絕根株爲要六月英人連踪入浙浙之舟山孤懸海外兵力本單英人遂陷定海命率領舟師星馳赴浙會剿廷楨卽帶兵前往行次清風嶺復奉上諭閩省海口歧出處處均關緊要無庸赴浙七月駐兵泉州招募練勇九月上以鴉片未盡根株英人在各海口滋事諭曰前因鴉片流

毒海內特派林則徐馳往廣東會同鄧廷楨查辦原期肅清內地斷絕來源乃自查辦以來內而奸民犯法不能淨盡外而輿販來源並未斷絕甚至本年英人船隻沿海游弋各省紛紛徵調糜餉勞師此皆林則徐鄧廷楨辦理不善之所致鄧廷楨著交部嚴加議處此次英人各處投遞稟帖訴稱冤抑朕洞悉各情斷不爲其所動惟該督等以特派會辦大員辦理總無實濟轉致別滋事端誤國病民莫此爲甚是以特加懲處非因該英人稟訴遽予嚴議也部議革任奉旨革職迅速前赴廣東以備查問差委二十一年諭曰國家設立兵丁勤加訓練所以嚴武備而戒不虞總督有統轄之責必應於平時認真督率將備加意練習使之有勇知方一旦猝遇外侮何患不破敵摧堅立功奏凱前任兩廣總督鄧廷楨履任多年懈惰因循不加整頓所設排練空費錢糧全無實用以致該省兵丁柔懦無能諸多畏蕙虎門之役竟有爲英人買通者思之殊堪痛恨著從重發往伊犁效力贖罪以爲廢弛營務者戒二十三年七月奉旨釋回十二月賞三品頂帶授甘肅布政使二十四年二月戶部以甘肅荒地未經墾復者七千五百餘頃奏請覈查旋據陝甘總督富呢揚阿覆奏請專辦招墾立限陞科六月上特派廷楨查辦廷楨

先由銀州一帶勘明招墾查出卽行陞科與分限升科地畝各半復東盡洮隴西極酒泉共查荒熟地一萬九千四百餘頃又番貢地以段折畝一千五百餘頃寧夏馬廠歸公地一百餘頃次第奏報十二月事竣諭曰前因甘肅荒地較多特降旨令鄧廷楨親歷周勘設法招墾茲據奏稱各屬履勘完竣分別差等酌量陞科該藩司奉派專辦所到之處勸諭詳明妥速蕙事甚屬可嘉著加恩賞換二品頂帶并交部議敘尋賞加二級准其隨帶二十五年二月擢陝西巡撫四月署陝甘總督八月回陝西巡撫任二十六年卒子爾恆官雲南府知府爾頤官山西吉州知州

栗毓美

栗毓美山西渾源人嘉慶六年拔貢七年朝考二等以知縣用分發河南二十年署寧陵縣知縣二十一年丁父憂二十四年服闋仍赴河南道光元年二月署武陟縣知縣十月河東河道總督嚴烺上其防汛出力功得旨以同知直隸州知州儘先陞用先換頂帶二年六月以購辦稽料稽遲褫陞銜頂帶停陞尋以辦理堵合妥速得旨開復三年正月實授十月遷光州直隸州知州四年陞汝寧府知府

五年調開封府知府九年正月擢糧鹽道十月調開歸陳許道十年授湖北按察使十二年陞河南布政使十四年七月以捐資助賑下部優敘尋護理巡撫九月奏桐柏縣查鹽公廠二處實屬虛糜請卽裁撤從之十五年五月擢河東河道總督七月奏原陽支河情形略曰北岸黃沁衛糧二廳黃水漫灘而黃沁原武七堡一帶尤爲喫緊河勢北臥漲水蓋灘而來原武七堡以下進水更形湍急下達衛糧境陽武汛內隄工亦爲喫重除慎守大隄別無良策其切近順隄河之處自原武十五堡至陽武十七堡多有迎溜頂衝形勢見先搶辦隄南靠壩又於隄北及原武隄北幫戩並該汛及原武隄南估築土壩十八道俾免順隄鑲埽險而多費兩汛向無埽工應卽收買堆貯備防總之兩廳灘水串溝久爲隱患蓋因地居上流青峰廣武兩山遙峙對束出山之水勢最猛驟而原武之河灘皆係坡形故一遇盛漲最低處所遂卽刷成溝漕串至順隄河內險無定所卽上流武陟滎澤各路無不匯注合流是以溝形浩瀚竟同河形見在晝夜督辦已堵斷合流並繪圖貼說以進八月奏言連日水勢僅長尺餘而王屋莊進水之口較前更寬百餘丈總由中泓大灘益向南淤溜卽南緩而北緊南股正河成爲迂道北股之溜勢轉

建瓴至大河中泓淤灘之故由廣武山前老灘塌去一千餘丈河溜先向山根裏臥爲山所遏折回東北中泓遂挺生淤灘此河勢之變遷皆由出山處所先有變遷之原委也前奏應辦物料係就近頂衝迎溜處所爲急則治標之計今水口既日見刷寬又何敢但求撙節貽誤事機通盤籌畫從省估計約需銀十餘萬兩請將兩岸各廳應估來年土工稍可緩者酌量裁減先儘黃衛兩廳估辦其稽料麻土夫工稍可通融者亦摺彼注茲以免專案請帑至原陽兩岸隄工已被水漫嗣因沿陂試拋甄塊深資保護月石壩堵合加高幫寬迤下楊村封邱二汛灘水均已停淤壩下七十餘處村莊居民亦得安堵惟串溝分溜關繫北岸全局斷不能緩至來年興工見已借撥銀八萬兩仍俟霜降後於請撥各廳土工銀內如數劃還則錢糧並無加增而要工得免貽誤如所請行尋以支河危險用甄拋護化險爲平入告上嘉其辦理妥速仍命詳細籌畫尋偕河南巡撫桂良會勘以支河分溜已至六分甄工各壩未可深恃請款貯料備防從之十六年四月以甄工試有成效請照時價覈明報銷下部議行十月奏運河廳所屬魚臺汛河道八十餘里兩岸官隄日形殘缺間有民堰亦甚卑薄夏秋盛漲河湖相連糧船不能通緯輓

運遲延請將民堰改歸運河廳於一年內借款修竣復以各員承修閘座保固僅限三年故敢於輕率從事請於例限之外再令保固三年均從之十七年三月奏稱前在豫護撫篆時見速戰陣法聲勢聯絡洵稱勁旅濟城界接兗曹宵小易於出沒從前金鄉曹縣匪徒滋事濟城有兵力防護得以安堵地方既關緊要操防尤宜講求請以實在城兵一千一百餘名內挑選六百三十六名分別各隊操演兼習速戰陣法並咨取熟諳武弁教習上嘉之十八年七月奏請多備土工以固根本略言豫東黃河地居上游向無閘壩分洩全賴隄工高厚方資抵禦本年大汛沁黃洛河接時並漲今雖已設法疏防而隄壩實形卑薄亟應分別估辦以爲來年修守之資今擇其首要工段萬不可緩者豫省十三廳東省兩廳估需銀兩請卽於兩省藩庫撥給以便交春興工其次要工段歸來年估辦者亦賴先事豫籌請於來年二月興工時再由藩庫借銀十萬兩務使一律完竣以防大汛如所請行時因雨澤偶稀漕艘輒阻嚴飭毓美於回空後實力籌辦尋疏陳瀦蓄濟運事宜六條一責成州縣疏濬泉源遴委幹員估挑河渠一濬各湖進水渠道一徵湖水短應由江南駱馬諸湖導引以歸撙節一徵湖節水應遲啟湖口雙閘以免

消耗一臨風輒板二閘應嚴板少啟以節汝流而速漕運一曹州濟寧應擇要估濬河渠以暢來源得旨籌議尙屬周妥飭屬照辦十九年二月奏豫籌微湖收納運水請於重運過竣後不必拘定例消存丈尺之數但計水存一丈三尺以內卽築壩收水又以汝河淤墊旁洩過多請酌量加高戴村壩以期攔蓄得力均如所請行先是毓美奏輒工屢著成效請設窯燒造得旨允行御史李純疏其不便上命偕工部尙書敬徵往勘至是會奏請改辦碎石停止置窯三月毓美復奏言自來言治河者謂明險易治暗險難防暗險者卽隄前之串溝最爲可慮者也豫省歷次失事皆在無工處所實因兩岸隄長千里未能處處籌備一旦河勢變遷兼以風馳雨驟輒蒼黃失措幸而搶護平穩而埽工非數萬金十數萬金不能濟事古人鑲埽亦不得已而用之耳蓋鑲埽引溜生工久爲河工所戒在明白工程者原不肯輕率從事而昧於機宜者遂謂非此別無良策伏查北岸爲運道所關往者原陽分溜幾至掣動全河若非用輒拋護費何可以數計今祥符下汛並陳留一汛灘水串注隄根察其形勢正與北岸相同濱河士民多有呈請用輒者蓋有見於輒工之得力涸復農田不下萬頃其爲保衛田廬情至切也夫事之有利於

民者斷無不利於國特事近於撓難免浮言前南河用石之始衆議紛如良由工程平穩用料減少販戶不能居奇而游客幕友見工簡務閒不能幫辦謀生是以妄生浮議並稱東河漫決皆由不用碎石之故賴聖明獨斷敕下東河試辦至今永慶平成惟自拋用碎石後請銀幾七十餘萬兩後將每年添料改辦六成碎石雖未專案請銀然因購石不易埽段愈添愈多經費仍未能節省自試辦輒壩以來三年未生一新工較十一年至十四年共節省銀三十六萬兩蓋由豫省情形與江南不同產石之地祇有濟源鞏縣必須春末夏初方能運到工次輒則沿河州縣每處民窯不下數十座隨地隨時皆能應手可以無誤事機且石性滑入水易於流轉輒性澀入土卽黏卸成坦坡自能挑遠溜勢至每方輒塊各廳均係價銀六兩石價則自五六兩至十餘兩不等方價既大小懸殊而碎石大小不一堆垛玲瓏半屬空虛尺輒一千塊爲一方平鋪計數堆垛均實石每方重五六千斤輒每方重九千餘斤是一方碎石之價可購兩方之輒而拋一方之輒又可當兩方碎石之用也咨調南河弁兵來豫帶同查驗輒工僉稱與南河土壩包口無二而輒壩不更堅於土壩乎或謂輒可以治將生未生之工不可治已生已成之險

不知杜一將生未生之工卽少一已生已成之險或謂輒塊入土易於損裂不知拋成輒壩一經泥淤卽已凝結嘗見井中之輒因得水而更堅見在收買民輒多有淤入泥土者皆完整如故或謂拋築輒壩近於與水爭地不知隄前之地尺寸在所必爭自來鑲埽之法隄前必先築土壩數十丈然後用埽鑲護輒壩則無須乎埽師土埽之意不泥其法拋作坦坡大溜自然外移未有可築土壩而不可築輒壩者又所占河面無幾安得有與水爭地之患夫隄前水深則險水淺則平水近則險水遠則平自拋築輒壩凡隄前水之深且近者莫不淺且遠前尙書敬徵來豫據道廳密稟謂用輒辦險工究未可以深信亦因連年水小未敢自謂必可施行今道光十八年盛漲較之二年及十二年尤爲猛迅輒壩均屹立不移並未出險生工可知雖遇大水亦能抵禦得力且上年春間儀睢廳秋間中河廳河水下卸場灘匯壩搶鑲埽段旋卽走失用輒拋護均能穩定是用輒搶辦險工較鑲埽更爲便捷今兩岸文武員弁均已深信不疑而急公之員尙有自行捐辦者天下事可與樂成難於圖始大抵皆然竊聞衡工之失事也因灘而不能鑲埽及塌至隄根而已不可治馬工之失事也因串溝塌過隄水其始僅涓涓細流求碎石

不可得率成口岸惜未籌及於輒可代石也見在各廳有工之處皆易爲力惟無工之處串溝隱患必應未雨綢繆今若於黃沁下南豫貯輒塊則可有備無患至於應貯之輒無論新舊仍令向民間採買不必廳員燒造此外亦別無流弊疏入諭曰輒工得力省費搶辦險工較鑲埽更爲便捷且較石價多寡懸殊又所占河面無幾不至與水爭地該河督旣確有把握朕卽責成辦理總期行之無弊方爲不負委任八月奏本年黃河異漲大隄急應加高請借土工銀十八萬兩經部議駁尋復奏言土工爲修防根本前者籌議辦輒減壩卽請以減辦埽工之銀爲添辦土工之用誠欲隄工增高培厚異漲永不爲患始可爲經久不敝之基本年正月查工因見水漲較早又由道庫墊發銀十萬兩將庚子土工豫竣迨立秋前後歷經異漲向非早爲籌備已不免泛溢爲災是豫補庚子年之工己亥年先收實效來年汛期大小無定何可不先事籌防惟部臣所駁爲按年報銷起見所請分年帶銷自應遵照停止今請於豫省藩庫提借土工銀十二萬兩其不敷六萬兩卽由道庫籌墊俟來年估辦辛丑年土工分別陳請撥還則於錢糧並未增添於款目毫無轉轄於要工得資備防特旨允行十月請將添購四成防料銀五萬五

千餘兩改辦輒塊復附奏曰考治河諸書從前係用捲埽之法並有竹絡木困輒石柳葦自用料鑲埽則以稽料爲正宗而險無定所亦無一勞永逸之計緣鑲埽陡立易於激水之怒其始水深不過數尺鑲埽亦不過數段迨至引溜愈淘愈深動輒數丈無工變爲險工於是溜勢上提必須添鑲溜勢下坐必須接鑲久之而片段愈長防守愈難爲力豫東土性浮鬆水及隄身不能不用料鑲護新工既生日久亦形勞費近來錢糧按年比較不敢過於增多而埽工無法減少不得已而減土工少購碎石皆爲苟且因循之計於修守更無實濟自試拋輒壩或用以杜新工或用以護舊工無不著有成效本年三月爲籌防黃河下南廳串溝復請購買輒塊故雖伏秋異漲爲數十年所未有而化險爲平固賴隄身加高亦由兩岸各廳無塌灘潰隄出險生工之處則輒工之力也不特可資經久與稽料大相徑庭而堆貯之處並無風火堪虞是兩岸兵民共知共見儻從此工固濶安亦復培增土工專用力於根本之地則既可以免漫溢之患亦保無衝決之虞矣允之二十年正月計典甄敘上以毓美慎厥修防安瀾奏績下部議敘尋命尙書恩桂等赴豫查驗料埽查出曹河廳料埽丈尺斤秤蟄耗短少請將毓美交部議處部議

降二級留任二月卒諭曰河東河道總督栗毓美愼厥修防安瀾奏績本年京察特予交部議敘河工劇要倚畀方深遽聞溘逝殊深悼惜著加恩賞加太子太保銜照總督例賜卹任內一切處分悉予開復應得卹典該衙門察例具奏伊次子栗燿著加恩賞給進士服闋後一體殿試尋賜祭葬如例諡恭勤二十一年入祀名宦祠子烜見官安徽廬州府知府燿候選內閣中書

鍾祥

鍾祥楊氏漢軍鑲黃旗人嘉慶十三年進士歸部銓選二十一年選授浙江龍泉縣知縣二十五年調山陰縣知縣道光元年陞嘉興府乍浦同知旋丁父憂回旗三年服闋捐陞知府分發湖北以親老告近改掣山東四年奏補濟南府知府六年七月擢兗沂曹濟道十一月擢山東按察使七年遷山東布政使九年丁母憂回旗十年命署理雲南布政使十一年五月服闋實授十二月調江西布政使十二年九月授山東巡撫十一月拏獲南河竈隄首犯陳瑞之袁雙觀奏辦如律十二年二月以曹州府知府王廷溶曹縣知縣秦錫九千總花應春等緝捕不力奏請分別撤任摘頂示懲上韙之十三年二月遵旨籌議給事中渥克精阿奏各省倉庫

虧缺一懸款東省舊案懸款以各官養廉二成分年扣補新案交代絲毫顆粒均期滴滴歸源不必再議提補一攤款凡動支之款果係歷辦成案舊有名目者酌令照案攤辦儻事係拗爲變易名目不准流攤必令依限歸補一捐款事屬公需方准捐辦但可截止者卽當減除務須籌捐者亦當撙節惟通融之法一時之宜未便明定章程轉致日久生弊一倉穀東省見辦州縣交代均不准作價流交委員盤驗取其實存在倉印結至從前賑糶出借及參案報虧均應買補如州縣敢將倉穀私用私糶一經查出嚴參懲辦得旨依議安行九月請將參革長清縣知縣李應曾任內應領採買截漕啣價餘款四千七百餘兩發商生息以爲充登曹三鎮隨時修理要械之用並請派買倉穀以重儲備允之十二月奏裁堂邑縣永通閘閘官十四年訪拏鄉試包攬傳遞之候補守備馬德俊等革職審究奏入上嘉其查拏認真十五年二月偕東河河道總督吳邦慶奏請於捕河廳屬之壽東汛加築土隄以利漕運三月以濟南東昌武定等府秋成歉薄青黃不接糧價增昂請將奉天進口糧船暫免輸稅以恤民艱並從之六月奏歷城等三十五州縣二麥被旱請分別緩徵八月因本年麥收歉薄奏請將章邱等二十三州縣應收

麥石改收粟米俱允所請十月疏請於省城添建義倉以補常平不足略言東省常平倉穀動缺已多買補必俟豐年且一時亦難驟買如額見在倡率捐廉於省城添蓋倉房分爲四廠自道光十四年始巡撫與司道府按年捐輸以二百石爲率州縣之力能捐者祇令百石至二百石而止每年可得穀一萬數千石近省城者俱交本色稍遠者按每石一兩三錢折交司庫遇歲歉價昂無論遠近均卽折交俟價平時由司委員照常價購買以備災賑再於兗州曹州繁要之區以次酌量建倉捐儲輔常平而濟民食得旨此舉甚好要在妥實二字勉之尋兼署河東河道總督奏言鄒平等三十七州縣衛得雨較遲嗣又被水被蟲收成歉薄請分別緩徵如所請行十六年四月勘明恩縣等處境內四女寺支河壩工奏請援案發帑辦理下部議行又奏益都等四十六州縣均未豐收請緩徵以紓民力允之七月擢閩浙總督十七年正月京察屆期諭曰閩浙總督鍾祥精明沈細務常清慎持躬公勤莅事朕將有厚望焉尋議合巡洋面覈實稽考章程奏請於閩省南洋九營除提標中營無庸添撥船隻外其餘八營及北洋面營以次添撥哨船無論南北巡船行至閩安鎮海口俱令稟報總督其南境哨船巡回之時必過廈門

卽令就近稟報提督北境哨船巡回之時必過福寧卽令就近稟報總兵以憑稽察庶官弁不致畏險偷安亦不能捏飾混報並咨行浙江一體辦理得旨所議井并有條用心周到可嘉之至著照所請行三月偕福建巡撫魏元烺籌辦查拏夾帶私鑄並勒限收繳情形奏稱閩省寶福局久撤尙不慮有局私惟奸商自外攜來或名砂壳或係夷錢在於毗連江西廣東一帶地方攙使亟應嚴行禁止海船夾帶尤當嚴查其海口島嶼卽無窩存私鑄亦不可不豫爲防範又民間攙用之弊見均查禁仍勒限給價解省銷燬咨部以憑查覈得旨總在認真辦理時御史王藻疏請查勘沿海港汊村莊以清盜源上命江浙閩廣各督撫妥議章程五月偕浙江巡撫烏爾恭額福建巡撫魏元烺奏言閩浙洋面西南至廣東東北至江蘇島嶼林立各按就近洋面委員親查今公同酌覈謹列六條一沿海港汊宜實力編查保甲以靖盜源一海口要隘及偏僻沙塗必稽查周到俾無縱漏一造報商漁出海船隻宜聯環保甲不准出租以杜影射一水師巡洋宜遵新定合巡章程實力巡緝一沿海各屬米石非奏明撥運不准私載出洋以杜接濟一私藏槍礮軍火器械宜嚴行查禁收繳從之八月奏准裁撤福州糧捕通判缺其所管督捕

事務改歸捕防同知管理十八年查辦延平建寧邵武汀州四府會匪酌定防緝章程責成延建邵道汀漳龍道率屬防緝並於鄰省交界處所建設卡房專派丁役盤查奏入諭曰法在必行勉力認真毋忽十九年五月赴泉州府校閱營伍行寓印信被竊自請從重懲處下部嚴議尋議褫職諭曰總督統轄兼圻責任重而體制嚴所用關防尤爲緊要此次鍾祥赴泉州府屬閱伍講習武備衆所觀瞻宜如何外示嚴明內存敬慎關防係隨身攜帶之物小心守護並非照料難周何至匪徒等夤夜在其住屋偷竊如入無人之境儻查出後即時人賊並獲嚴行懲辦尙可稍從寬宥乃日久無獲是該省吏治武備廢弛已可概見鍾祥著卽照部議革職以示懲儆二十年賞三品頂帶授四川布政使二十二年召來京以三四品京堂候補二十三年四月賞頭等侍衛充庫倫辦事大臣閏七月授河東河道總督二十四年正月以壩工埽段遭風蟄動未能先事預籌自請治罪上以鍾祥到任未久予革職給七品頂帶暫留河督之任將來興舉大工卽責成鍾祥偕河南巡撫鄂順安督辦三月覆勘上年中河漫口以後上游四廳長隄均形單薄請將隄堰壩工擇要興修估需銀兩卽由豫省動撥如所請行七月諭曰頻年軍餉河

工一時並集正供所入不無支絀之虞儻此次大工可緩至明歲秋間再行辦理諸事益當順手鍾祥鄂順安受恩深重具有天良著卽密籌全局據實直陳旋偕鄂順安覆奏密籌中牟大工勢難緩辦得旨趕緊修築鍾祥鄂順安辦理大工責無旁貸惟當相度機宜實心經理於慎重之中力求妥速固不可草率從事尤不可遷延遲玩坐失事機二十五年正月奏言全河大溜悉歸故道暢達東趨並將善後工程督令道廳節慎估計豫籌防堵上以鍾祥鄂順安經理得宜迅速蕙事賞還鍾祥二品頂帶並賞戴花翎八月請預提下年防險銀兩諭曰豫東河工採辦碎石銀兩年年預提甚屬不合此次姑允所請准其預提丙午年例撥銀兩嗣後仍當按例採辦不准再行預提二十七年議請嗣後估辦土工以三成錢文搭放計豫東黃河每年估修土工以三十五萬兩爲率每年可搭錢十五萬串報聞二十九年二月疏稱沛縣賽堰工程爲運道所經關繫甚重請仍歸江南省民辦諭曰該處切近十字河如遇水漲噴著鍾祥責成沭河同知隨時實力搶撈惟當不分畛域任怨任勞求於公事有濟三月偕河南巡撫潘鐸山東巡撫徐澤醇遵議裁併冗缺請將山東運河道屬之泉河通判河南開歸道屬之歸河通判併歸

河營協辦守備各缺一併裁撤以歸簡易如所議行四月卒子德振錫振均候補主事

陳鑾

陳鑾湖北江夏人嘉慶二十五年一甲三名進士授編修道光二年充浙江鄉試副考官五年二月京察一等引見記名以道府用七月授江蘇松江府知府六年六月以海運漕糧兌運完竣辦理妥順賞加道銜十月調蘇州府知府七年閏五月催漕出力下部議敘八月江寧等府屬被水成災鑾承辦賑務撫卹得宜命交部從優議敘八年挑濬吳淞江工程一律完竣得旨以應陞之缺陞用九年三月陞江西督糧道六月調江蘇蘇松常鎮太糧儲道十年三月以蘇州常州一帶運道淺滯未能先事預籌下部議處九月陞廣東鹽運使十一年陞浙江按察使十二年擢江西布政使尋調江蘇布政使十三年兼署按察使十五年八月護理江蘇巡撫十二月偕署兩江總督林則徐奏言泰州屬富安等九場被水成災見在滷氣淡薄產鹽不旺請於來春青黃不接之時按煎停場撥給穀石折色散放以資接濟並請於商捐項下動支毋庸開銷正款如所請行十六年正月奏籌議水

手章程略言糧船水手兇悍之風本非一日卽懲創防範之法亦非一端欲清其致患之源必破其久延之習查漕運全書內載漕船雇募水手責成衛所及押運員弁互相稽查又刑例內載糧船水手夥衆十人執持器械者照強盜律治罪容隱不首者照強盜窩主律治罪嗣後雇募水手除責成衛所備弁旗丁頭舵互保外如有玩違滋事者照例加等問擬以昭炯戒則漕政日漸肅清矣下部議行二月擢江西巡撫五月廷臣奏參江西省貪劣各員上命戶部尙書耆英署吏部尙書朱士彥前往會同查辦九月偕耆英等奏言查明清江縣知縣孫慧焯徵收民欠錢糧挾勢借貸書吏錢文先令墊解十月又奏審明南城縣知縣黃宗憲挪移漏稅罰款復捏稟職員鄧文郁挾嫌傾陷讞定均治如律十七年正月奏豐城縣雷公腦等處土石隄工被水衝塌亟須修築並請於小港口建石閘以資啟閉東岸建石埭以禦溜勢於田廬保障實有裨益允之又奏請吉水縣縣丞移駐張家灣泰和縣早禾司巡檢移駐馬家洲萬安縣早口司巡檢移駐武索並請將吉水縣屬之中鵠一鄉專歸縣丞分轄泰和縣屬之七都改歸巡檢分轄下部議行是月調江蘇巡撫先是御史劉夢蘭奏糧船積匪弁丁每多容庇上命漕運總督及

有漕各督撫會議具奏二月偕兩江總督陶澍奏言江西糧船向由新建豐城鄱陽水次受兌漕糧路經都昌等縣渡湖出境應請自今春爲始凡糧船受兌之處責令各該縣嚴密查拏其經過地方亦責令各該縣親身帶領捕役協同汛弁會同各幫弁按船確查偵有匪徒潛匿卽時擒拏懲辦如該幫丁舵人等有能指名稟官者重加獎賞儻有容庇卽將該弁參處示懲似此立定章程庶可杜絕後患疏入允之八月在籍給事中瞿溶呈控江蘇常州府屬收漕勒折一案上命確切覈辦尋奏言該府各屬漕務均照舊章辦理並無官吏浮收民心不服情事諭曰漕糧爲天庾正供在民不准稍有拖欠在官不得任意浮收自應遵向例照舊章毋任絲毫增添以示限制如經徵各州縣浮勒入己任聽經手漕項人等刁難勒措苦累閭閻著卽分別嚴參提究其刁劣糧戶強以低醜潮雜之米赴倉掙交甚至健訟把持抗糧多事著卽從嚴懲辦毋稍寬縱十八年二月奏請將桃源縣境之王家集添設千總一員穿城集添設外委一員並抽撥各營兵丁五十名駐防巡緝以資控制下部議行五月籌議查禁鴉片烟章程略言制治之法節流必先清源用刑之道由輕而後及重查鴉片烟土來自外洋凡沿海奸民運銀出洋易

士圖利者坐謀叛已行律內地販煙及開設煙館者坐毒藥傷人律愚民吸食者予限一年違者依律論死如是衡情定法分別等差庶幾人心就正民俗還淳漏卮塞而國本培矣疏入命大學士軍機大臣會同各衙門議奏議上諭曰朕惟姑息非所以愛民明刑卽所以弼教鴉片來自外洋海販窰口實爲禍首罪魁非一律從嚴概置重典不足以防偷漏而塞來源至吸食一日不斷則興販一日不絕亦不得稍從寬宥今定以死罪立限嚴懲庶幾根株淨絕立輓澆風朕言出法隨決不寬貸各凜遵毋忽九月偕兩江總督陶澍奏稱上海等處盤獲販賣窩頓鴉片煙土各犯共起獲煙土一萬六千餘兩並諭令海船繳出煙土四萬一千餘兩得旨該督等於所屬地方有犯卽懲辦理認真可嘉之至陶澍陳燮均著交部議敘該督等仍當嚴飭所屬循照見辦章程認真查辦不准稍有疏懈果能力除痼疾朕必嘉悅勉之十九年三月署兩江總督尋奏查江蘇吳淞海口距海關尙遠向來商船夾帶鴉片煙土每於入口後巧爲偷運請將進口商船卽用海關印條封固各艙押赴大關先行驗封然後驗貨並遴委丞倅參游駐劄該處以專責成嚴禁小船出洋接濟裝運遇有近口寄棹洋船查明應進口岸與應赴他處者分

別催令收口開行以杜偷漏下所司議行四月奏江南興武二九兩幫漕船丁力疲敝請將江寧江浦二縣調濟快丁案內應掣本銀二萬兩仍行存典生息撥抵該二幫積欠剝價及添補辦運之需以紓丁力上允所請九月以秋汛安瀾下部議敘十月奏請敕下儒臣推闡聖諭廣訓頒發各省以資誦習疏聞諭曰向例各直省地方於朔望宣講聖諭廣訓俾鄉曲愚民皆知向善良法美意允宜永遠遵行惟州縣地方遼闊宣講仍慮未周著照所請嗣後各學政到任卽恭書聖諭廣訓刊刻刷印頒給各學徧給生童令人人得以誦習並著翰林院敬謹推闡聖諭內黜異端以崇正學一條擬撰有韻之文進呈候朕欽定頒發各直省令該學政一併恭書徧給鄉塾俾民間童年誦習潛移默化以端風俗而正人心是月兼署江南河道總督十一月奏江蘇各州縣衛秋禾木棉歉收請分別緩徵以紓民力如所請行尋卒年五十四遺疏入諭曰署兩江總督江蘇巡撫陳鑾由翰林簡放知府洊擢江蘇巡撫署理兩江總督辦事實心不辭勞瘁年力富強正資倚任遽聞溘逝殊堪軫惜著加恩賞給太子少保銜卽照總督例賜卹任內一切處分悉予開復應得卹典該衙門察例具奏伊長子陳慶涵著賞給舉人一體會試尋賜

祭葬

吳其濬

吳其濬河南固始人父烜禮部右侍郎兄其彥兵部右侍郎其濬由舉人捐內閣中書嘉慶二十二年一甲一名進士授修撰二十四年充廣東鄉試正考官道光元年充實錄館纂修官旋丁父憂五年丁母憂八年服闋九年充日講起居注官十一年入直南書房十二年命提督湖北學政十四年九月回京仍入直南書房十二月升洗馬十五年六月擢鴻臚寺卿閏六月授通政司副使十六年八月超擢內閣學士兼禮部侍郎銜十一月充玉牒館副總裁十七年充浙江鄉試正考官八月授兵部左侍郎命提督江西學政十二月調戶部右侍郎兼管錢法堂事務留學政任十九年八月御史焦友麟疏陳廣敷教化下各直省督撫學政議其濬偕巡撫錢寶琛奏查辦教匪請專責其成於州縣而分任其事於教官並添派族正一項令於各族祠堂宣講聖諭廣訓先報名存案備查得旨地方官有教養斯民之責果能除莠安良何患姦宄不戢民俗不醇多設科條轉滋煩擾所有該撫等奏請分任教官添設族正之處著無庸議九月轉左侍郎仍留學政任二十

年四月奏新諭縣生員胡思津鬧漕案內輸出訓導劉筠袒護包庇知縣包世臣有意消弭各情請飭臬司訊辦從之六月以准補拔貢所遺廩缺辦理兩歧經禮部奏定詳補章程下部議處九月湖北大冶縣知縣孔廣義列款訐總督周天爵上命其濬借刑部左侍郎麟魁往鞫其事復傳諭有人奏湖北候補知縣楚鏞擲造刑具名曰飛禽椅墊以沙石瓷鋒跪人於上勒取供招因傷身死者纍纍相望且預取病結使屍親無可如何州縣爲親民之官遇有案犯自應細心研鞫務得實情若濫用非刑三木之下何求不得著吳其濬等詳細訪查如果有各項違例刑具卽據實奏聞毋稍徇隱尋訊出周天爵私製非刑如飛禽椅之外尙有快活凳上綳子猴兒上樹等名目令楚鏞在署審案任意施用受刑垂斃者盛以籬筐發交縣監又派楚鏞總辦鹽卡將零星負販貧民繫帶鐵桿婦孺殘廢妄加刑責致死多命外委韓雲邦誣拏平人爲盜百姓不服鬪傷官兵不加斥革反聽其子周光岳關說令充巡捕奏入上褫天爵職遣戍伊犁革光岳舉人楚鏞先在省城枷號期滿發往烏魯木齊充當苦差並將巡撫伍長華布政使孫善寶按察使林紱分別降革有差十月署湖廣總督十一月授湖南巡撫二十一年十月御史盧

毓嵩請嚴禁私硝出口酌定官爲收買章程下其濬議尋奏湖南所產土硝本係官買見因軍務撥解及本省操防並無餘贖毋庸更議設局報聞十一月劾千總胡再忠調赴軍營沿途需索縱兵滋擾命發往新疆充當苦差二十二年正月湖北崇陽縣逆匪鍾人杰聚衆滋事連陷崇陽通城將窺巴陵其濬偕署提督台湧馳赴岳州以調兵未集先募糧船水手協堵鎮筸鎮兵至分布臨湘平江各要隘其濬移駐湘陰賊匪二千餘偷劫平江軍營擊卻之二月湖北官兵收復崇陽通城鍾逆就擒餘黨竄入湖南者陸續捕獲正法諭曰此次逆匪先後占據兩城經吳其濬台湧堵截去路不至蔓延調度有方均著交部從優議敘三月以疾乞假調理四月兵部議令各省酌裁冗兵其濬奏湖南地處苗疆人情易擾所裁不多徒生驕卒之疑而啟苗犛之伺請無庸議命湖廣總督裕泰詳察尋議准於不近苗巢之處酌裁一百餘名七月奏鎮筸鎮兵歸伍例不准支借行裝乃行經常德府署武陵縣知縣翟誥濫稟知府葛天柱准動庫項給發請交部分別議處崇陽之役湖南委員有在湖北軍營出力得與保陞知縣者其濬奏軍功甄敘人員係就一時勞績加以獎勵仍須察其才力優絀未便槩行陞用致誤地方是以從前

平糶案內應陞之人有至今尙未得缺者此次保奏各員應由臣詳加察看遇有相當缺出如果勝任方與平糶軍功覈計陞補至湖南防堵出力奏准應升州縣人員臣已飭兩司酌量委用儻才力不及卽行撤銷奉硃諭所辦覈實認真之至十二月列款奏參署提督台湧經欽差禮部尙書麟魁刑部左侍郎王植查明台湧尙無任性妄爲情事惟賞需旣由捐辦不應收受糧道備賞銀兩雖經繳還究屬不合奏請照例議處二十三年五月調浙江巡撫六月武岡州痞匪曾如炷聚衆阻米出境署知州徐光弼往緝被戕其濬督兵搜捕獲犯百餘人分別首從治罪如律因奏洪巖洞藏匿姦宄素爲民害請設卡巡防編列保甲以靖地方從之閏七月調雲南巡撫二十四年上以前代開礦官吏因緣爲奸故國與民交受其病我朝雲南貴州四川廣西均有銀廠歲收額課從無擾累是官爲經理不若聽民自爲計四省可採之地尙多命各督撫體察情形聽民採辦不可假手吏胥其濬偕雲貴總督桂良奏滇省舊廠見祇存十五處并新開各廠歲課四萬餘兩查礦情形不一往往見有礦苗呈請開採商丁甫集旋以無砂廢散其設廠之所先不過數十人裹糧結棚略有所獲則四方商賈百工技藝走集日衆多或至萬

餘人向委廠員彈壓平其爭訟擇吏役誠實者數人司文書出納官之薪水吏之工食皆有一定舊章並無擾累至可採礦地雖多亦有不能盡准者蓋深林密箐民夷雜居夷人嗜利輕生動與漢民結訟若再令空取銀砂勢必劫掠鬭爭釀成事端卽土司境內亦必無礙田廬及附近邊防始可覈辦報聞八月以捐輸東河河工賞加五級尋署雲貴總督二十五年三月劾奏代理師宗縣知縣試用州判李熙恬非刑斃命褫職逮問四月調福建巡撫八月奏滇省銅本每於正額之外輒以多辦銅斤爲辭借支銀兩積成鉅款請清查銅廠情形及庫存款項上蹙之旋調山西巡撫兼管鹽政二十六年五月奏河東活引課銀短絀請裁減鹽政辦公銀一萬兩充抵得旨允行定例實缺知縣不准改補教職其濬以神池縣知縣楊銜才具平常違例奏請改教下部議處十月奏販賣鴉片煙土例禁綦嚴近更有不法之徒伺煙販經過糾衆爭奪事發到官各知罪名甚重兩造均不吐實僅以尋常搶奪鬪毆結案此風不戢輕則恣行械鬪重且釀成盜劫因請將緝捕認真之鳳臺縣知縣蘇元峩酌加獎勵以示觀感十二月以舊疾屢發陳請開缺允之旋卒諭曰山西巡撫吳其濬由翰林修撰入直南書房洊躋卿貳外擢巡撫學

優守潔辦事認真茲聞溘逝殊堪軫惜著加恩賞加太子太保銜照巡撫例賜卹
尋賜祭葬子元禧以祖烜廕從四品廕生候選縣主簿榮禧崇恩俱中書科中書
梁章鉅

梁章鉅福建長樂人嘉慶七年進士改翰林院庶吉士十四年散館改禮部主事
二十三年四月充軍機章京九月以失察禮部頒發科場條例文字譌誤降一級
留任道光元年二月補官十月遷員外郎二年二月京察一等記名以道府用閏
三月授湖北荊州府知府三年擢江蘇淮海道五年擢山東按察使六年二月上
諭兩江總督琦善以河道總督責任綦重前召見按察使梁章鉅明白安詳曾任
淮海道三年於河工能否虛衷辦理妥協著據實察看覆奏旋奏稱章鉅循分自
守於河工機要無所建白不敢保其必能勝任十二月調江西按察使尋遷江蘇
布政使八年濬吳松江工竣兩江總督蔣攸銛奏請濬安東縣民便一帆兩河修復寶應縣通湖閘十
撫十一月偕總督蔣攸銛奏請濬安東縣民便一帆兩河修復寶應縣通湖閘十
年請挑武進縣孟瀆得勝澡港三河語具攸銛傳十二年四月復護理巡撫時英
吉利船大小各一約百餘人由浙洋駛至江蘇羊山洋面章鉅以聞諭令安速驅

逐斷不容任其停泊滋事又奏江蘇各屬被水揚州府境酌動鹽義倉穀散濟災區米價驟昂兵丁月餉不敷分別請借銀米並借給淮安衛丁民田籽種上元等六縣毗連災區麥收歉薄請將新賦舊欠展緩均如所請六月因病陳請開缺十五年病痊授甘肅布政使十六年正月調直隸布政使四月擢廣西巡撫先是太僕寺少卿馮贊勳劾奏廣西宣化縣知縣楊時行濫刑斃命敕禮部尙書恩銘等查辦嗣經訊明楊時行免議既定讞馮贊勳復將責斃各犯姓名月日開單呈奏適章鉅在京上命抵任後密查十一月奏言對覈卷宗並無抽換消滅之弊其答訊取供及發保病故日期相距自一二日至數月不等皆係應責之人而實無杖斃之事楊時行官聲素好以除暴安良爲事重懲賊匪嚴束書差不准紳士干預公事以致缺望懷恨謗議由此而興諭曰梁章鉅查明民人馮大學開場誘賭經楊時行訪獲口稱伊姪見居京職求全顏面該員仍照例責懲毫無瞻徇可稱不畏疆禦甚屬難得著該撫察其才具遇有應陞之缺酌量保奏梁章鉅甫經陞任於交查之案悉心體訪使賢能之員不至屈抑甚屬可嘉著加恩交部議敘至馮贊勳兩次陳奏輕信族人無據之詞意圖報復似此紳士挾制地方官其風斷

不可長著嚴加議處十二月奏言粵西近年劫案疊聞臣與各屬講求保甲之法平樂府知府張楠稟稱保甲之法斷不可行該處地瘠民貧詰以保甲不免胥動浮言伏思保甲之法各省通行該府作此疾視斯民之語實屬狂妄請將張楠送部引見從之時御史李紹昉奏廣西西隆州等處與雲貴毗連匪徒叢集請確查懲辦並調撥員弁額設兵役改移建置肅清盜藪下章鉅議尋奏三省毗連地界此時並無匪徒竄匿惟西隆州僻在邊遠地接滇黔自宜加意巡緝西隆之古漳汛與雲南所屬剝隘相距二百餘里舊設有巖環卡僅有兵二名今議於隆林營添撥兵丁並撥本州壯丁各數名歸永靜汛弁管轄其與黔省接壤地方向有汛兵數十名應在適中之壠江渡汛村添置卡房亦由隆林營及本州添撥兵壯與滇黔兩省會議每月朔望會哨又思恩府屬之百色地方爲滇黔運銅大路所屬陽萬土州西通剝隘亦係通衢向有邏村汛員弁而相距一百七十里之法村僅有卡兵二名今以邏村汛外委一員移駐法村由鎮標撥兵陽萬州撥土兵歸邏村汛管轄如所議行十七年四月偕總督鄧廷楨奏言平樂梧州兩府毗連廣東湖南盜匪潛蹤前奏准移撥員弁增設巡兵各一百餘名卽於裁汰額內照數撥

給俟五年後察看情形應否裁撤自道光十一年起至今已閱五年添駐弁兵請仍留巡緝報聞初給事中陳功奏驛站積弊稱上屆越南貢使入關每站用夫至五千名並有搭差搭貢各名目附載者利其便安私帶者資其津貼沿途不勝擾累上命章鉅於本年使臣入關之時酌定護送各官應用人夫數目妥送嚴查不得稍有浮冒十二月奏廣西鄉試每科均於至公堂前後及龍門內派兵弁巡緝兵役遂於場外設局領費代爲一切傳遞之事並有槍手冒入帳房代作文字種種弊竇卽由此而生見在訪查旣確將帳房暨兵役一併裁撤棘闈高處概行封禁衆論翕然爲數十年來所未有誠恐此後復興必應奏明在案得旨嗣後卽著查照此次章程辦理十八年正月奏校閱省垣營伍情形諭將所稱連珠弓箭滴水鳥槍製造式樣施放之法繪圖貼說以進閏四月劾泗城府知府禮祿潯州府通判孫慧朗分別改簡勒休有差十月奏廣西寶桂局設立鼓鑄舊以錢一千作銀一兩搭放兵餉今銀七錢易錢一千每兩虧銀三錢養贍備操之用不免支絀若錢價愈賤不但兵食有妨卽民間完納錢糧以錢易銀虧折不少請暫停鼓鑄以裕民食平市價奏入從之十一月奏廣西鴉片來自廣東全在梧州潯州兩關

口查拏認真潯州自飭查後獲犯已多而梧州甚屬寥寥率以寬限日期爲請辦理實屬遲緩知府劉錫方請旨摘去頂帶仍責令拏獲大起煙販自贖十九年二月以查拏鴉片煙見獲成數及辦理情形入奏並請獎拏煙出力之文武各員尤之先是御史郭柏蔭奏廣西等省番舶不通之處本地民人私種罌粟熬煉成土國計民生兩受其害章鉅遵旨覆奏廣西煙販本稀第與雲南貴州交界向有栽種罌粟刮漿熬煙之事先已嚴飭徧禁隨地鏟除莠民不無側目而良民無不歡欣究之良多莠少似此轉機不難期之一年必當奏效四月拏獲栽種罌粟匪犯請將從前未經確查之道府各員議處並自請失察之咎部議章鉅鑄級留任有旨寬免八月奏言奸民惟利是視難免將來復種罌粟必須議立查禁章程罌粟一年可種兩次每屆冬初先由道府頒發嚴禁告示令各府廳州縣仿照保甲戶給門牌註明並無栽種煎熬販賣之人取具十家連環保結責保鄰墟長隨時稽察如十家內有違例私種或租與客民栽種首告給獎知情不首併究該管官親往巡查或委員抽查總結申報不實嚴參得旨實力奉行除弊務盡二十年三月諭曰有人奏廣西湖南兩省有傳習邪教煉丹運氣其傳授之書則有性命圭旨

暨妄註大學愚民被誘者不少廣西之平樂柳州傳習尤衆地方官每因別無逆蹟總未深究根由恐傳染日深易致滋蔓著梁章鉅飭屬查明起意者立予嚴懲悔過者寬其既往尋奏稱訪得道士韓禮文等傳習大乘教聽從湖南人雷雨田等拜師念經審明定擬報聞十一月奏煙案人犯衆多先行咨請解配以免擁擠允之又請展鴉片治罪限期得旨令出惟行斷不爲莠言所惑所請不准行二十一年正月遵旨覆奏給事中朱成烈所稱安南軋船實利海防英人見卽膽落前林則徐在任曾經仿製是船制廣東已得其詳英人所恃船堅礮利惟能仰擊平擊不能近擊俯擊軋船專擊船底可備火攻之策上命靖逆將軍奕山等訪察製造三月奏英人擾廣東梧州與之接壤難保不竄入西境請出省防堵以安民心閏三月調江蘇巡撫八月英人擾浙洋復陷定海上以江蘇寶山上海等處緊要命偕提督陳化成度地勢籌布置十月諭章鉅嚴防進口商船以杜漢奸因奏言上海各船有南洋北洋之分北洋沙船有印照查驗南洋閩粵各船歸行戶專管不能混行出入仍於查驗後放行以安商旅得旨英人詭計多端往往賄買漢奸爲其所用務須嚴飭員弁詳細盤查驗放以杜奸蹤英人連陷鎮海寧波特簡將

軍奕經赴浙防剿諭章鉅籌畫建設糧臺之所章鉅建議於蘇州設立總局已奉旨准行旋因借奕經及浙江巡撫劉韻珂奏請於蘇州杭州各立總局再設分局支應復下章鉅等悉心酌議嗣借奕經等會奏蘇州省垣應設糧臺總局得旨見在大兵進剿必須籌畫兩省地勢情形方爲妥善所有軍裝器械必待浙省行取未免緩不濟急著照所議浙省設前路糧臺蘇省設後路糧臺以後應用各物仍由兩局分辦至江蘇製辦一切將來軍需告竣仍歸浙省一併覈銷以免牽混而昭劃一十一月奏緩徵各屬被水地漕蘆課撥錢賑濟又偕總督牛鑑奏賑恤江寧省城被水民戶又言泰州分局屬鹽場被淹請緩徵均如所請十二月自陳患病乞罷允之二十九年卒子逢辰江蘇候補同知丁辰內閣中書恭辰浙江温州府知府

張日昫

張日昫貴州貴筑人嘉慶二十二年進士改翰林院庶吉士二十四年散館授編修道光元年二年歷充順天鄉試同考官四年大考二等賜文綺五年充湖南鄉試正考官七年仁宗睿皇帝聖訓告成日昫以充武英殿提調議敘得旨遇缺題

奏陞用八年五月京察一等復帶引見記名以道府用七月充河南鄉試正考官九年授四川敘州府知府十三年調成都府知府十七年擢建昌道十九年越嶲峨邊等廳夷匪滋事日昃以總督寶興檄偕總兵包相卿堵緝尋偕按察使蘇廷玉督辦添設碉堡招復流亡編集團練各事宜二十年陞浙江鹽運使二十一年遷湖北按察使二十二年二月署布政使七月陞河南布政使十二月接纂大清一統志告成日昃以前充纂修議敘加二級二十五年以中牟大工合龍下部優敘二十六年陞雲南巡撫未赴任丁母憂二十九年七月服闋仍授雲南巡撫十月偕總督程裔奏免各銅廠民欠無著工本銀六千餘兩允之三十年七月以思茅廳邊外遊匪滋擾沿及近甲猛地逼近茶山戕害官弁偕程裔奏調各鎮弁兵兜剿得旨務期盡數殲除迅速蕝事八月卒咸豐元年入祀鄉賢祠子軸新舉人

吳榮光

吳榮光廣東南海人嘉慶四年進士改庶吉士六年散館授編修八年三月大考二等記名陞用九年充順天鄉試同考官是年京察一等十年三月授江南道監

察御史十一年二月轉河南道監察御史十二年充浙江鄉試副考官十三年九月巡視天津漕務十四年五月奏言例載沿途重載糧船顆粒不許上岸條禁綦嚴但恐日久視爲具文見當嚴別倉漕積弊之際儻有盜賣則米石必致虧短交卸時攙灰使水等弊由此而起請旨飭交山東通州巡漕御史一律稽查以清積弊再臣風聞南糧抵通每幫有驗費有窩子錢起卸之時除照例個兒錢外復有後手錢每幫每項約制錢一百串或數十串不等皆幫丁湊斂坐糧廳號房及書役經紀得受該經紀等既得陋規遂與旗丁通同舞弊與其事後勒令賠補何如先事預防請敕下倉場侍郎設法嚴密稽查上如所議行八月通州中西二倉虧短白米倉書高添鳳等使水漲米私出斛面黑檔事覺榮光坐失察黑檔至二千石以上革職十五年捐復員外郎十七年選授刑部江西司員外郎二十一年三月京察一等記名以道府用四月陞安徽司郎中九月充軍機章京二十三年授陝西陝安道二十五年調福建鹽法道道光元年擢福建按察使二年調浙江按察使三年九月復授湖北按察使十月擢貴州布政使四年護理貴州巡撫五年九月奏請給假省親得旨准其開缺賞假四個月回籍省親六年八月授福建布

政使八年丁父憂十年服闋十一年二月授湖南布政使八月擢湖南巡撫十二年正月江華逆獠趙金隴聚衆劫掠據長塘夾衝榮光率兵馳赴永州督辦上命俟總督盧坤至軍卽回省彈壓策應趙金隴故粵之過山獠也始居江華長塘距錦田鄉四十五里與粵之八排獠爲媯姪賊初劫黃竹寨官兵次錦田賊不能進欲竄粵與八排獠合又不克遂至藍山之五水獠山裏脅民獠數千人欲入九疑山都司成喜以百人駐將軍坪衆寡不敵退屯大橋賊遂劫寧遠之黃河魯觀洞榮光先至永州以輕進疏防劾永州鎮總兵鮑友智永州府知府李銘紳等皆鐫職仍令隨營效力撫諭各屬獠寨使皆安堵添調桂陽鎮軍等營兵二千名并咨鄰省一體堵截無使滋蔓二月提督海凌阿副將馬韜戰賊至池塘墟陷伏被害會總督盧坤遵諭調提督羅思舉帶兵一千及守備仇懷瑛等以擡礮五十尊噴筒三百桿赴營尋盧坤至永州榮光回省奏設局派知府以下十一員辦理軍需並請於鄰省藩庫酌撥銀兩及揀發同知知縣以資差委得旨逆獠烏合成羣一俟兵力齊集不難剋期竣事卽公局需員不過數人足資差遣似此濫派多員無非張大其詞爲該員將來議敘地步事竣後卽刻章入奏亦不能俯允所請餘飭

部臣如所奏行榮光復會同總督盧坤奏言從前剿辦苗匪用餉過多請將可以節省者概行刪除其必不可刪者五事一馬步守兵借給減半行裝銀兩一官兵鄉勇支給鹽菜口糧一江華等處糧臺雇用站夫酌給安家路費銀兩一隨營長夫有挖溝填濠樵汲諸役酌予工價口糧一江華等處被擾難民給予撫卹皆因時制宜應請量爲變通疏入得旨允准四月提督羅思舉殲賊於羊泉鎮湖南猺平八月盧坤調兩廣總督榮光兼署湖廣總督九月盧坤與榮光會奏查江華縣界連兩粵爲楚南極邊縣屬錦田鄉距城百八十里外近粵東八排內偪九衝山崗東距藍山大橋五十餘里西距本縣錦岡一百餘里猺山錯雜籌密林深爲衝永兩郡屏蔽大橋爲廣東連州門戶均關緊要錦田大橋向僅設巡檢千總外委各一員不足以資彈壓請將該府同知遊擊移駐錦田增設防兵四百名以提標右營守備移駐作爲錦田游擊中軍再於提標額設把總內酌撥一員駐大橋協同外委巡防大橋向隸臨武營應改隸永左營湖南地方類多山谿之險各營無須多馬計通省標營共馬兵二千二百餘名酌裁馬四百匹以所除餉乾撥給增兵月餉不惟一隅藉資捍衛卽全省南面亦昭慎重所有善後事宜由臣榮光分

別題奏下部議行是月榮光遵旨酌議裁汰冗員請將岳州府同知常德府通判郴州州判道州州判沅江桂東通道石門慈利嘉禾各縣訓導共六缺祁陽東安永明邵陽黔陽桂陽通道各縣所屬巡檢共七缺一併裁撤從之十一月奏移永州府同知駐江華之錦田改爲江藍理猺督捕同知改永州府通判爲永桂理猺通判駐楊家鋪加衡永郴桂道兵備銜節制都司以下又撫恤被難民猺二千五百餘戶修已燬民房六千六百餘間收繳槍械三千餘件次第奏聞十月榮光奏言寶慶府屬桃花坪爲武岡城步新寧三州縣水陸必經之地山重水複最易藏奸見訪有痞首等六十八名爲害商旅委員查辦請將寶慶府通判移駐就近撫馭稽查得旨允行十三年四月奏續訪寶慶府屬沿途水路有舉人毛蔚武舉劉岳爲首私設水卡阻米索錢適御史亦有以寶慶土匪私卡通同縣差門丁爲言者榮光先後拏獲各犯悉治如律復查辦不法長隨胡滿等及各屬包串生事丁書差役一百餘人並奏陳懲創先由近始已將本衙門承差等查明嚴辦得旨嘉勉十六年二月以湖南學政龔維琳被劾榮光先未據實陳奏命降爲四品卿來京候補未行值武岡州逆匪藍正樽滋事榮光亟率軍駐寶慶又鎮筸兵譁榮光

並奏聞得旨留於湖南會同總督訥爾經額剿辦藍正樽黨旋潰散生擒其主謀張和尙陳仲潮等及其家屬首逆尙未就獲以撤兵仍命來京十七年三月授福建布政使二十年四月召入都以年力就衰原品休致二十三年閏七月卒於家

韓克均

韓克均山西汾陽人嘉慶元年進士改翰林院庶吉士四年散館授檢討五年充貴州鄉試正考官七年充會試同考官九年二月上幸翰林院與諸臣做柏梁體聯句克均與焉禮成賞味餘書屋全集文綺箋硯等物五月擢湖廣道監察御史六月奏言各部院衙門事件應遵定例辦理其例有未備者方以舊案比照而成案日積日多辦理不無參差吏胥意爲援引得以高下其手請敕下各部院堂官揀派司員詳校例案遇有例意未盡昭晰者詳細註明其前後兩歧之案酌中參覈不可遵行者概行刪去庶足以杜弊端而歸畫一疏入上是之十年三月充會試同考官七月調協理京畿道監察御史十一年轉掌京畿道監察御史尋奏充實錄館提調十二年九月遷工科給事中十二月高宗純皇帝實錄告成命以四品京堂陞用十三年正月巡視通州漕務四月奏請定豫東漕船行走次序略言

豫漕冬兌冬開東漕春兌春開向來省幫船行抵德州必須守候二十餘日俟德州正幫兌竣開行後始令豫省漕船跟接前進而該二省隨後各幫又復彼此參錯行走動輒停留守候稽遲時日幫丁舵人既賠累不支押運員弁復顧此失彼應請嗣後豫省各幫船一抵德州卽上緊輓運毋許停留其東省全幫亦可挨次緊接行走庶全漕豫順諸事從容得旨允行旋以天津北運河水勢微弱糧艘淺阻克均等未經奏明傳旨申飭並命馳赴北運河勘明挑濬十四年京察一等引見記名以道府用尋授浙江溫處道十九年陞河南按察使尋調雲南按察使二十一年陞安徽布政使二十四年四月擢貴州巡撫九月調福建巡撫二十五年十月以建陽縣米價增昂奏請動碾倉穀減價平糶又奏玩視盜案之署嘉義縣知縣鹿澤長請褫職十二月奏參漳州鎮總兵蘇勒芳阿性耽麴藥難期振作請勒令休致均從之是月調雲南巡撫道光元年二月以題本內擡寫錯誤下部嚴議部議奪職上加恩改爲革職留任尋奏漢民典買夷地酌量變通章程先是永北廳夷匪因漢民典買夷地起釁借端滋擾事平後凡典買夷地議令依限取贖逾限者仍歸漢民執業復據御史張聖愉奏以漢民重利盤剝準折夷地必致積

怨成讐請將逾限不贖之地或剖半均分或給還十分之三疏入上命詳覈查辦至是奏言夷匪甫經懲創不可不抑其逞殘圖占之心是以原議章程予限令贖爲因時制宜起見業經出示曉諭未便朝令暮更應俟限滿不贖之時於原定章程量爲變通除查明杜買無庸議外其平價典押並盤剝準折確有證據者覈計漢民所出本息分與應得地畝餘地給還夷民耕種固不可使漢民剝削夷民亦不可使夷民以焚掠爲得計長其搆亂之心至此後漢民典押夷地尤當嚴查禁止以期永靖邊圉得旨允行十二月奏劍川州山水衝坍沙石淤壓田房鶴慶州秋收歉薄請緩其賦又奏東川府會澤縣小江地方向有大橋爲運銅要道歷年衝刷傾圮勢難修復請改設渡船以濟輓運允之三年九月偕總督明山奏請嚴禁商銅改鑄鑼鍋及無票之銅私行出廠並通飭經過地方文武員弁於關津渡口嚴行盤驗以防走漏得旨認真查辦不可有名無實十一月奏請修挖海口略言昆陽州境海口爲洩水之區歲久未經疏修山水時發沙石淤積滇池宣洩不及浸多水患請於河工積餘銀兩存項內動支修理築壩挑挖以利農田如所請行四年署雲貴總督五年調福建巡撫仍暫署雲貴總督六年二月奏開化鎮所

屬地方與越南國二面接壤前因夷匪不靖添設防兵土練駐守馬達等處以資控馭茲以越南境內匪徒業經翦除淨盡邊界靜謐請全行裁撤以節糜費如所請行五月赴福建巡撫任十二月以閩省上年歉收糧價昂貴奏請暫弛海禁准令浙省商船販米赴閩以濟民食如所請行七年五月以莆田縣木蘭坡地方灌漑民田四十萬畝舊築石隄一千一百餘丈以禦海潮歲久傾圮奏請修復上以所辦有益嘉之閏五月奏參巡海將弁緝捕懈弛請將海壇右營游擊許連生摘去頂帶把總潘秉明外委李萬春等褫職勒限嚴緝上是之十年閩縣知縣張騰以侵虧官銀被劾列款稟訐命禮部尙書湯金釗刑部侍郎鍾昌往按其事張騰坐誣訐論如律克均於司庫盈餘銀兩未經報部復失察家丁收受門包降二級留任十一年京察屆期諭曰福建巡撫韓克均辦事遲緩尙無劣蹟可指著以原品休致二十年卒年七十五子一工部郎中

烏爾恭額

烏爾恭額富察氏滿洲鑲黃旗人嘉慶十二年考取筆帖式十八年中式繙譯舉人十九年補戶部筆帖式道光元年充軍機章京陞主事四年陞員外郎五年二

月京察一等記名以道府用三月授廣東瓊州府知府六年調廣州府知府八年六月陞貴州貴東道八月陞山西按察使九月調廣東按察使十年正月擢奉天府府尹七月奏蓋平熊岳復州金州岫巖牛莊六城蠶廠間有開墾瘠薄不堪升科者請著定繭稅章程每繭千箇輸制錢五十文如有伐桑爲薪照毀伐樹木稼穡律究辦若將山廠拋棄不植樹養蠶照荒蕪田地律治罪下部議行十月戶部捐納房假照案發部議堂司各官降革處分上以烏爾恭額平日當差尙勤見在辦事尙屬認真降爲四品頂帶留任十三年陞盛京工部侍郎兼管奉天府府尹事務十四年二月充牛馬稅務監督時浙江東防海塘潰壞上命前任河東河道總督嚴烺刑部右侍郎趙盛奎往勘嚴烺趙盛奎偕巡撫富呢揚阿奏請按潮頭之輕重分工程之緩急酌議添築盤頭改修柴埽以護塘根兼布竹篾塊石估需銀一百九十一萬八千餘兩復命烏爾恭額赴浙會辦九月烏爾恭額奏言東塘於雍正乾隆間改築魚鱗大石等塘內幫土堰外護坦水法至善也西塘柴埽原係柴塘茲於柴塘之後建築石塘遂以柴塘爲石塘之坦水非專建柴埽爲石塘坦水也至竹篾塊石乾隆八年前督臣那蘇圖以觀音堂諸處草塘衝刷成險編

造竹絡順勢鋪放以作坦水此後並未續辦其條石坦水則自前大學士嵇曾筠修辦之後至今垂爲成法竊思石塘外護無如坦水頭層坦水保護塘根二層坦水保護頭層坦水今閱潮汛見潮退後坦水畢露似尙可以修復除念里亭一帶最險之處業已開工改鑲柴埽其餘鎮海汛戴家橋汛尖山汛均請修復條石坦水爲是不當更改舊制且覈估修復坦水較之改築柴埽竹篾塊石等工可節省銀四十八萬餘兩疏入命左都御史敬徵前往會同浙江正考官戶部右侍郎吳椿履勘十一月授浙江巡撫命偕吳椿督辦塘工先是富呢揚阿以西塘范公塘一帶埽工地近省垣議增建條塊石塘八百七十八丈嗣經趙盛奎等以塊石難以經久請改築條石鱗塘並援乾隆年間成案由江蘇採辦石四萬丈協濟工需十五年六月烏爾恭額偕吳椿奏言修築鱗塘各工應用條石二十六萬餘丈除江蘇協濟四萬丈外以長四五尺六面見方者爲合式非比塊石隨處皆有杭州湖州各屬之山可採者無幾必須取給於紹興而紹興石戶僅止六十餘家以紹屬一隅之山取二十萬丈之石物產本有不敷以數十家之匠責取刻期應用二十萬丈之石人力更有不及誠恐停工待料有不能應手之勢查章家菴條塊石

塘係乾隆年間修築已歷五十餘年尙屬完整范公塘與彼相近潮汛亦同請仍改爲條塊石塘以節經費而速成功從之時御史黃爵滋奏請禁紋銀洋銀出洋命沿海各督撫體察情形議奏七月烏爾恭額奏言浙省惟寧波乍浦二處有商船出口前赴閩粵及江蘇上海等處貿易並不與外人互市近奉部議黃金白銀概定出洋治罪之例是商人得以攜帶者祇有洋銀一項今將洋銀一併禁絕則商賈遠販勢必無資作本而於關稅亦難完納諸多窒礙且沿海網捕船隻及居洋民人以洋銀便於攜帶往來若一切禁止不特有礙日用且滋兵役搜查訛詐諸弊見在刑部議定仿鑄洋銀之罪業經曉諭各處已足杜絕紋銀去路自可不
必再禁洋銀出洋疏入如所議行十六年奏海塘大工一律完竣得旨嘉獎先是御史劉夢蘭奏糧船積慣匪徒號爲青皮偶值汛丁捕役查拏而本幫運弁運丁輒爲容庇釋放請確切查辦命漕運總督及有漕督撫會議十七年正月烏爾恭額奏言防奸之法防於既然不若防於未然糧船開行時地方官點齊水手短絳散給腰牌竹籌青皮等或隱匿在船假充水手或游散在岸記名短絳有無官物繫帶不難一望而知嗣後應責成地方官實力巡查如有匪徒本幫弁丁爲之容

隱卽由糧道參究如此各專責成匪徒自無從託足弁丁亦不敢庇容三月又奏糧船水手習教起自前明羅姓之徒翁錢潘三人翁錢兩教謂之老安潘姓一教謂之潘安每幫船頭供有羅姓師傅牌位凡投充水手必拜一人爲師各分黨與意在爭窩爭鬪以自強與別項邪教煽惑人心者有別自道光五年嘉白等幫滋事大加懲創其教漸衰其堂亦漸廢查沿河茶酒等鋪均屬土著並無勾結匪徒惟浙省水手獷悍性成必當嚴爲遏絕亦應責成地方官密訪嚴辦庶永除巢穴斷絕根株矣先後奏入上韙其言五月偕閩浙總督鍾祥福建巡撫魏元烺奏籌議海防章程六條一沿海港汊村莊島嶼宜實力編查以靖盜源一海口要隘及偏僻沙塗應稽察周到俾無縱漏一報造商漁等項出洋船隻宜聯環保結不准出租以杜影射一水師巡洋應遵新令合巡章程認真巡緝以肅洋政一沿海各屬米石非奏明撥運不准私載出洋以杜偷漏接濟一私藏槍礮軍火器械宜嚴行查禁收繳均從之時給事中沈鏞奏浙江海塘善後事宜略陳歲修塘工宜漸次改築海漫坦坡期無衝刷並築順水壩挑水壩以保險工及種柳護塘盤壩攔溜各條上命烏爾恭額詳覈妥議六月烏爾恭額奏言此係治河攔溜之法非治

海禦潮之法西塘之外護以柴埽東塘之下護以坦水皆係因地制宜藉資保衛前因東塘坦工殘缺曾經奏請建復條塊石坦五千七百餘丈以護塘根是坦工雖與坦坡各異而用意則同也查河工向築順水壩挑水壩以防險海塘則專築柴盤頭以禦潮見有盤頭九座布置已密且盤頭西邊狀若雁翅右擋江溜左順海潮保護險工最爲得力是柴盤頭與順水壩挑水壩名稱各異而辦法實同也按木龍用法係將龍頭插入正溜藉以迎溜挂淤查河溜自西而東水有一定向背故木龍得以奏功至於海塘江水西來海潮東至如用以迎潮則背江水用以迎江又背海潮安放尙難何能得力況木龍每架計銀六千餘兩盤頭大者四千餘金小則二千餘金較爲節省應請勿庸議製惟柳株雖不足以備工料而於塘後隙地亦可種植使之盤根入土以固塘基又言見在所辦乃百餘年成規業有明效未便輕易更張致失依據疏入上是之御史袁文祥奏私鹽充斥請設法清釐命各省督撫鹽政各就見在情形悉心妥議十八年正月烏爾恭額奏治私不患無法而患無行法之人私不絕則引必不暢法不嚴則私必不絕而徒法不能以自行則必責之行法之人乃可漸收實效請嗣後遇有商私梟私各弁兵未能

實力捕拏或私自賄縱一經察出立提嚴辦如承審各官並不根究私鹽來歷含糊定讞一經審出立即糾參如究出買自場竈或來自私篷則咎在稽察之場官及該管地方官如官鹽到岸各州縣查出鹽引不符則咎在提驗之掣所及沿途關口各官即分別查明參處如引鹽照例運到而該州縣並不認真督銷致有缺額即查照分數據實揭報如引地缺鹽而承辦商人並不迅速趕運致有缺銷即罰令該商照數賠課如此層層稽覈庶責無旁貸而法藉以行四月奏言浙江東西一帶石塘爲浙江七郡田廬保障必須修築鞏固乃可有備無患皇上不惜百萬帑金使全塘百廢興舉又額設二十萬餘金以爲歲修工用所以保衛長塘者至周極備竊思捍海莫重於塘長百餘里一綫危隄寄於東西兩防同知及海防守備之手其責任又重於工員是以三年俸滿例准保題陞用獎敘特從優渥第國家用人有功則賞以示勸有過則罰以示懲今查海塘工員有賞例而無罰例恐各員先存倖免之見草率苟簡何所不至塘之旋築旋圯未必不由於此嗣後修築石塘應請飭令承辦之員時時保護如於十年保固限內坍塌立責賠修十丈以內限三個月十丈以外限四個月如限內未竣即行奏參或因事故升遷已

離本省應先行籌款修築實用銀數若干咨會原籍任所追繳歸款其實在無力完繳者卽於原辦各上司分作十分攤賠如此立定章程庶各員知所警惕不敢不認真辦理各上司亦必詳慎講求事事覈實似於工程有所裨益下部議行二十年五月奏請暫停鼓鑄並將存司錢本銀兩易錢運局卽同局錢搭放兵餉扣銀完款以平市價從之六月奏英吉利船駛入浙江定海縣登岸滋事諭曰前經查禁鴉片煙廣東省已斷絕貿易疊經降旨令沿海各督撫嚴加防範何竟毫無覺察形同木偶致令登岸滋事烏爾恭額著先行交部嚴加議處旋奏定海縣城失守諭曰烏爾恭額等籌備不力部議革職尙不足以蔽辜惟見當防堵之時若竟予罷斥治罪轉得置身事外著暫革職留任帶罪圖功以觀後效七月諭曰烏爾恭額以封疆大吏遇英人滋擾事前既無準備臨事不合機宜且該撫奏報後朕心方深塵注乃相距已及半月摺件仍照常由驛馳遞實屬督率無能糊塗不曉事體著卽革職仍令隨營效力贖罪九月奉旨解京拏問十一月命軍機大臣會同刑部嚴訊擬罪尋諭曰前因英人斷絕貿易朕早料其必於海疆要隘肆行滋擾屢經降旨飭令各督撫嚴加防範勿任覬覦乃烏爾恭額不能先事籌畫以

致定海倉猝失守復調度無方一籌莫展似此昏憤罪無可道見據軍機大臣會同刑部議罪將該革員發往新疆充當苦差尙不足以懲儆烏爾恭額著改爲絞監候歸入明年秋審情實二十一年九月蒙恩減等發往軍臺充當苦差旋經兵部援例奏稱軍臺並無苦差可當改爲發往軍臺效力贖罪十二月在臺病故

巴哈布

巴哈布烏忒米氏蒙古正藍旗人嘉慶元年由健銳營前鋒授藍翎長隨參贊大臣德楞泰出師湖北三年追剿股匪於川省之香衝王家坪等處奮力夾擊擒賊渠龔其位卜三聘並零匪二百七十餘人巴哈布在事有功賞戴藍翎五年薦陞前鋒校敗賊於黃茅坪六年六月陞委前鋒參領十月陞副前鋒參領七年以三省賊氛漸息大功將次告藏奉檄回任十一年洋匪蔡牽擾臺灣調赴閩省撲剿十二年陝省標兵滋事出師綏定西鄉一帶疊有斬獲十五年陞前鋒參領十八年滑縣教匪不靖檄赴豫省協剿受矛傷得邀賞賚尋陞右翼委翼長隨御前大臣拉旺多爾濟帶兵前往黃村一帶搜捕餘匪十九年以失察凱撤官兵攜帶幼孩降一級留任二十二年授右翼翼長二十五年擢鑲藍旗蒙古副都統道光元

年三月賞換花翎四月管理健銳營事務七月署鑲藍旗護軍統領二年署鑲紅旗護軍統領五年二月復署鑲藍旗護軍統領十月授喀喇沙爾辦事大臣十二月請將伊子扎爾漢隨往任所幫辦家務上從之六年六月逆裔張格爾糾同安集延布魯特各回莊由開齊山路突來滋擾七月以阿克蘇辦事大臣蘇倫保請調土爾扈特和碩特蒙古兵馳往救援上以蒙古兵素少訓練恐無紀律諭令沿途探聽會合進發相機救援不可輕進八月以軍情緊急巴哈布率領所部弁兵前赴喀什噶爾會同剿辦尋得旨仍令折回喀喇沙爾自行防守九月阿克蘇渾巴什河南岸屯聚賊匪躡淺渡河巴哈布帶兵迎剿分布堵禦殄賊多名上嘉其督率有方下部優敘越日賊黨復糾衆焚搶烏什阿察他克臺屯踞阿拉爾回莊巴哈布偕烏魯木齊提督達凌阿合力攻撲賊竄沙坡樹窩我兵兩路鈔截撲上沙坡殲賊無算捷入上嘉之並邀賞賚十月奏蒙古官兵各歸游牧自請仍赴軍前聽候調遣上以喀喇沙爾爲回疆南路咽喉命巴哈布卽回本境鎮靜撫綏一切軍火糧餉沿途照料迅速催趲以利軍行不必身在行間乃爲報效也十一月揚威將軍長齡以巴哈布曾經行陣調赴軍營奏入允之七年正月賊黨攻擾和

闖該城回衆縛賊迎降巴哈布統領馬步隊前赴該城撫馭邊圉以安二月進兵洋阿爾巴特莊賊衆排列高岡抵死抗拒我軍分爲三路併力兜剿巴哈布偕領隊大臣哈朗阿總兵呂天俸等由左鈔截跟蹤追殺不避鋒刃賊大潰越日改攻沙布都爾莊大兵各分行伍按隊前進賊匪臨渠據險槍礮齊發我師飛身渡越衝入賊鋒奮勇夾擊賊披靡竄渾水河晷渡官兵躡水追撲復有援賊自西北林來乘勝迎剿殲擒四千餘人三月餘匪屯聚阿瓦巴特回莊賊勢鷓張巴哈布率領馬隊兩翼齊進復以連環槍礮隨風施放我兵冒煙衝壓大敗其衆四月四城克復以巴哈布之子扎爾漢在事出力賞給筆帖式閏五月署葉爾羌幫辦大臣七月大兵凱撤諭曰上年逆裔張格爾入卡滋事攻陷城池巴哈布接據蘇倫保求援之信卽檄調土爾扈特和碩特蒙古兵並帶其子扎爾漢迅速前往奮不顧身將賊首庫爾班素皮等殲斃已爲殄賊之先聲是長齡未到之先非巴哈布不能痛褫賊魄保障東四城俾大兵進取有資厥功甚偉見當大功告竣允宜特沛殊恩用酬懋績巴哈布著給雲騎尉世職巴哈布之子扎爾漢前已賞給筆帖式著加恩以六部筆帖式卽補十月命回喀喇沙爾本任十一月請奏鼓勵喀喇沙

爾辦理軍需出力人員得旨允行八年五月以巨憇成擒西陲蕩平繪像紫光閣
贊曰阻遏賊勢渾巴什河伺隙躡渡狡詐計多先聲大振莫敢誰何我戰則克功
在橫戈尋逆酋檻送京師上以該大臣沿途支應諸臻妥協下部優敘八月調庫
爾喀拉烏蘇領隊大臣九年授塔爾巴哈臺參贊大臣十年十月調正藍旗滿洲
副都統十一年五月奏籌款采買布匹允之十月召還京十二年九月署鑲藍旗
蒙古副都統十一月授江寧將軍十四年劾奏辦理馬甲文明立繼案件錯謬之
佐領各官請下部分別嚴議議處從之十五年以保送佐領佛爾洪阿步射無準
部議鐫秩上加恩改爲降一級留任十七年卒諭曰江寧將軍巴哈布由健銳營
前鋒從征川楚歷經出師陝甘滑縣等處打仗殺賊受傷屢著功績前因回疆戡
定繪像紫光閣迨簡授江寧將軍五載以來頗能整飭正資倚任茲聞溘逝殊堪
悼惜著加恩照將軍例賜卹准其入城治喪所有任內一切處分悉予開復應得
卹典該衙門察例具奏尋賜祭葬諡勤勇

特依順

特依順他塔拉氏正藍旗滿洲人駐防福州嘉慶二十年由前鋒校補委驍騎校

二十四年補驍騎校道光三年陞防禦四年陞佐領七年陞協領十三年臺匪滋事隨將軍瑚松額渡臺協拏首匪張丙陳辦等並生擒賊目吳鯀吳鮑事竣保奏賞戴花翎十五年四月擢荊州左翼副都統九月兼署將軍印務十月授雲南騰越鎮總兵十七年正月調密雲副都統四月奏前在福州協領任內教演擡礮施放有準遠至二百餘弓較子母礮捷速便利密雲地屬衝繁請於隘口添設二十位於操防甚爲有益再密雲操演槍礮向來均無獎賞查旗營南西二門外空隙餘地每年地租所入京錢四百六十八千文除夏間閱箭支搭涼棚約用錢三四十千文其餘作爲操演槍箭獎賞至新添擡礮二十位每礮需兵五名請將每年領廣儲司修理弓箭鵠檔公費銀七十兩作爲操演擡礮獎賞庶隨時鼓勵操防可期得力又奏玉田三河順義昌平四州縣所設官兵僅止操演馬步箭俱未設有鳥槍擬於密雲駐防原設鳥槍四百八十桿內挑選尺寸較長打把有準者每處撥給二十桿交各防禦承領令其傳習準頭至密雲操演大陣時卽由排槍內撥入八十桿以符原數俱如所請行七月奏古北口防禦一員係由玉田三河防禦轉調之缺玉田三河防禦二員缺出係不論旗翼通行揀選委驍騎校八名俱

係按翼挑取惟八旗設有驍騎校四員每二旗一員遇有缺出應在該二旗之委驍騎校領催內揀選而委驍騎校領催之缺又係按翼挑補設不得其人驍騎校礙於成例不能越次卽本旗有應放之二三人或有事故或不相宜未便遷就查古北口八旗原設領催十二名內委驍騎校八名領催四名嗣後有驍騎校缺出請照揀選防禦之例不論旗翼於八旗委驍騎校領催內通行揀選補放從之十八年奏密雲營原設腰刀間有白鐵無鋼無裨實用請由京招匠前赴密雲飭協領監造四百把存庫備操上允其請尋授寧夏將軍十九年八月奏寧夏滿營原設各礮位俱因年久無裨實用原設腰刀亦間有白鐵無鋼不能鋒銛請添設擡礮四十位腰刀四百把以資操防寧夏滿漢城內並無製造擡礮匠人其綠營擡礮俱由西安製造運回本營工價運費約需銀五百七八十兩添造腰刀每把工價銀一兩共需銀四百兩滿營見有庫存地租平餘馬價生息歷年積存銀三千五百八十餘兩籲懇動撥九月奏寧夏營領催前鋒選補驍騎校進京時向由恩賞項下例借銀三十兩津貼路費該員等職微力薄往返長途每形支絀寧夏八旗官兵俸餉係由藩庫支領庫平而以市平發放積存平餘銀兩正可藉充公用

請嗣後遇有領催前鋒補放驍騎校者卽於平餘項下借給銀六十兩擬正者二年歸還擬陪者四年歸還文武會試借給四十兩鄉試借給十兩俱作二年歸還如平餘積至三千兩兵丁遇紅白事件照依官借之數借給二年歸還俟積至一萬兩再行請交寧夏府發商生息允之二十一年五月入覲七月英人犯廣東擾及浙江賞都統銜作爲參贊大臣馳赴廣東九月改赴浙江辦理軍務二十二年二月命欽差大臣耆英馳赴浙江省城會同特依順嚴密防守三月定海官兵焚燒英船獲有勝仗上以特依順駐守省城盡心防禦下部優敘四月署理杭州將軍英人陷乍浦特依順未能先事預防應嚴議尋奉旨特依順著加恩改爲革職留任所有前次從優敘議之處著一併撤銷旋因定海兵勇擊斃英人焚毀船隻揚威將軍奕經奏入特依順仍加優敘六月奏准乍浦滿營官兵眷屬統歸嘉興暫行駐紮七月奏乍浦失陷之日滿營陣亡弁兵業由奕經奏請恩施外今續經查出尙有殉難男婦子女五十五名請造冊送部照例旌獎以慰忠貞又奏乍浦陣亡甲兵空缺不敷挑選因該營改爲陸路原設水手兵丁五十名應行裁撤請於此項兵丁內擇其技藝可觀者挑補先後奏入均如所請行九月授杭州將軍

十月定海鎮海寧波相繼失守特依順不能設法救援應嚴議上念其到浙未經派令督兵打仗卽乍浦失守時伊亦駐紮杭州改爲革職留任八年無過方准開復十二月奏乍浦營設有公濟銀六千兩向爲紅白賞卹之用被兵以後應行扣還者無多請籌補以供支借額設軍器見存無幾請補造齊全以資操防又查明乍浦衙署兵房被兵以後難資棲止請將各官兵俸餉借支修理至城垣卡房等工並副都統衙署統歸善後案內勘辦從之尋鎮海英船全數退出特依順奏見飭招集流散安撫居民至城垣衙署礮臺等工亦分別緩急次第辦理上以英人見在就撫准令通商浙江各海口仍應加意防範師船礮械如何接應各處隘口如何布置種種善後事宜命特依順等各就地勢悉心妥議章程具奏二十三年二月勘明乍浦情形並會籌善後事宜奏乍浦爲浙江之藩籬而亦江蘇吳松之保障乍浦之守若固杭州固可恃以無虞江蘇亦可借以爲衛是其緊要不亞寧波城外距大洋不過里許左則山巒聯互右則塘岸袤延形勢散漫並無口門原設葫蘆城礮臺一座已被英礮轟毀相度地勢一遇海寇竊發不惟塘岸地勢平漫處處可登其沿海一帶山形卑薄皆可攀越卽多建礮臺亦恐未能得力況塘

岸則路極偏窄山巒則徑屬欹斜又有不容多爲建築之勢若不整頓兵技徒事興築仍爲無補事機此時惟訓練兵丁爲第一要務使其技藝日精膽氣日壯設遇強寇憑陵不能勝之於水者或可勝之於陸至於礮臺等項則當就舊有之基址興修以爲衝鋒之用未始不可卻敵正不待紛紛添造也疏入得旨特依順等奏乍浦無險可守多建礮臺不能得力當以訓練兵丁爲要所見甚是卽責成該將軍等將該處滿營綠營官兵竭力整頓一洗從前惡習至地利所不足當以人事補之若因其無險可扼遂置不議設遇海上有警必致束手無策若仍於近海口處建礮設兵一遇強寇轟擊勢必如前潰散尙安望其轉戰成功也耶所稱或可勝之於陸臨敵恐亦無把握也著耆英劉韻珂會同該將軍相度形勢悉心籌畫七月奏杭州滿營額馬六百匹以供差操南方地氣潮溼本難久畜兼之路多石砌馬力難施請裁二百八十四匹留馬三百二十四匹足供差操月支草乾可擗節銀三千七百三十一兩八錢六分八釐見在杭州兵丁操演槍礮新陣並擗礮鳥槍準頭自應獎賞卽在擗節馬乾銀內劃出銀七百兩勻撥杭州滿營四百兩乍浦滿營三百兩爲春秋二季獎勵之需會部議覈減各省馬乾銀兩特依順覆稱

杭州滿營裁撤實拴馬匹留存馬價其原支草乾二個春冬二季每個一兩三四分夏秋二季每個祇有八錢三四分加之餉銀二兩每月每兵支領三四兩數錢除扣還修屋出差紅白事件公濟借項以及製備弓箭隨時添補軍器買補馬匹外每月每兵實支二三兩以至一兩數錢不等其各官所支馬乾亦須津貼餵養並買補馬匹製備軍器以及修補衙署近因調撥防堵差務殷繁且逐日操演差操較前倍加若卽議裁減於生計不無窒礙請照常支領以資津貼上可其奏十一月奏杭州營設有小紅衣礮十位演放不能得力請仍交軍需局收存見存廣東大礮二十位酌留八位遞年輪流演放其餘十二位浙江善後章程內所有添設礮臺尙須添鑄礮位請交浙江巡撫擇扼要處所酌量分設二十五年勘明杭州乍浦滿營官員衙署自二十一年驟遇大雪益形坍塌請借給協領防禦驍騎校筆帖式廕監各員共銀一萬四千五百六十兩及時興修就應領俸銀內分作八年坐扣均如所請行二十六年調烏里雅蘇臺將軍二十八年因病請假賞假調理二十九年正月卒諭曰特依順見在病故著加恩照將軍例賜卹任內一切處分悉予開復應得卹典該衙門察例具奏尋賜祭葬如例

那彥寶

那彥寶滿洲正白旗人大學士阿桂孫乾隆五十年由文生員擢三等侍衛嘉慶四年二月陞二等侍衛五月襲騎都尉陞頭等侍衛補奉宸苑卿七月補尙茶正充崇文門副監督八月兼公中佐領九月授鑲藍旗漢軍副都統十月因天壇上班遲誤降頭等侍衛五年五月上念阿桂舊勳以阿迪斯那彥成均被譴謫特擢那彥寶正黃旗漢軍副都統時蒙古請將老河南北兩岸指地遷換作爲公中牧廠命那彥寶往勘同索特納木多爾慶會奏曰蒙古所欲遷換者因其地距水相近牧廠生計攸關固屬緊要但老河兩岸種地之民戶口過多遷移未便惟老河對岸順坡斯板囊金哈擡兩處戶口尙屬稀疏擬將此處概令撩荒作爲牧廠並令三座塔稅員及該旗扎薩克等將所指都沁他拉之地按畝加三公同撥換實屬兩有裨益允之十月調鑲藍旗滿洲副都統授內閣學士兼禮部侍郎銜旋補上駟院卿十一月擢兵部右侍郎十二月襲一等輕車都尉六年正月署理藩院右侍郎四月調兵部左侍郎六月永定河決命偕武備院卿巴寧阿前往駐劄東岸侍郎高杞莫瞻棻駐劄西岸分投督辦嗣因高杞等回京那彥寶與巴寧阿專

事堵築計石工三百餘丈灰土工一千一百餘丈埽土工三千二百餘丈被淹九十餘州縣奏請照乾隆年間江賑等例新開永定例下部議行七月調工部左侍郎仍留工次時盧溝橋水勢陡長二尺有餘擬於南北兩岸漫溢處先築土隄請發帑一百萬以備購料其附近地方百物昂貴例價不敷請暫照市價購辦從之復奏長新店一帶散賑情形諭曰南路災民業已無虞乏食惟長新店盧溝橋等處待賑者多著於京倉再撥米二千四百石交那彥寶等酌量情形設廠賑濟又諭曰本日那彥寶遞到奏報水勢陡長自當駐工籌辦見在天將廟土隄業已辦竣此外漫口各工可以堵築且使災民傭工藉此以工代賑此時京城分廠賑濟災民漸聚漸多京中自不便久住見已賞撥米石於長新店一帶設廠賑濟著那彥寶妥爲辦理總須實惠及民九月以二十三號壩工口門愈窄溜勢湍悍隨飭晝夜堵築將壩身增高一面安鑲大埽十月奏大工合龍奉上諭本年盧溝橋一帶決口四處派令那彥寶等上緊堵築並將下游淤塞設法疏濬雇集人夫五萬有餘以工代賑興工後天氣放晴水勢漸退辦理兩月餘漫口全行合龍河復故道那彥寶遇事虛心籌畫盡善不愧爲阿桂之孫著加恩挑爲御前侍衛仍交部

議敘時莫瞻菴查勘姜晟所挑牝牛河等工甫及一載盡屬沙淤奏請暫緩題銷奉旨交那彥寶查奏勘得牝牛河長一百四十七里自金門閘至米各莊二十里淤成平陸緣金門閘口寬二十餘丈牝牛河寬止五六丈分洩不及加以盛漲沙停遂致淤塞承辦各員雖無草率情弊但未便遽請奏銷應飭仍按原挑尺寸妥爲濬疏奏入允之十二月署倉場侍郎七年二月奏言永定河南北兩岸及三角淀等處自從前督臣劉綎加培後十餘年來日形卑薄且經上年異漲衝決殘缺尤多擇其必不可緩者計長二萬七千餘丈當飭永定河道妥爲辦理惟石景山及兩岸附近盡是沙礫必須數里外取用好土其蓋頂鑲幫仍須膠土封護方足以資鞏固且此次加培後尤須豫定章程隨時修理因飭令製單輪土車一千輛計一車所運可抵三夫肩挑之數將來按工段之險平定車數之多寡分留各汛遇有殘缺隨時補築又言上年工次需人較多曾招集災民傭工代賑盧溝橋一帶需用匠役居多所雇人夫祇可挑水挖土見有二萬餘人已足敷用上以多用一夫卽少一饑民如可增添仍當悉心籌畫四月奏請加增永定河歲修銀五萬六千兩五月工竣六月調兵部左侍郎十月南河唐家灣漫口詔往查看十一月

偕費淳吳璣築挑水大壩復於壩尾接築護隄四十丈遏住全溜隨即堵塞十二月初彭齡奏參滇省維西軍務動用司庫銀兩藩司陳孝昇迤西道薩榮安通同舞弊命偕大理寺卿章煦前往查辦兼署雲南巡撫八年二月抵任諭以實心辦理勉法汝祖三月查明陳孝昇經辦黔省興義軍需灑銷挪補於例不合薩榮安支放軍需所扣平餘爲報銷彌補之計殊屬錯謬保山縣知縣楊躍麟藉運軍糧派累滋擾俱應論罪如律又奏雲南各縣交代遲延踰限者四十六案例應革職者四十九員降調者二十四員概行參劾則滇省幾至一空奏懇姑予留任勒限嚴催又奏寧臺廠未經揭煎之紫板銅原定六九成色撥給各省採買各省委員以銅質厚黑屢請改撥陳孝昇遂將尖山廠銅斤私行換給所存寧臺廠低銅五百餘萬煎驗僅六三成色俱由承辦官員短扣工本所致應著分別追賠至煎淨尙須時日委員未便久稽請仍以尖山廠銅先行撥給奏入俱允之七月兼署戶部右侍郎管理錢法堂事務九月豫省衡家樓漫口命偕尙書劉權之馳往查勘值上游秦家廠險工疊出趕緊搶築截住橫流隨即相度壩基展往迤南並酌挑引河俾得汲川之勢九年二月啟放引河東壩埽工陷蟄場去三十餘丈旋即搶

鑲平穩三月奏報合龍諭曰那彥寶虛衷集議不辭勞瘁實屬可嘉伊本襲有一等輕車都尉世職著加恩又給一雲騎尉世職仍交部議敘七月調戶部右侍郎十年三月詔以成親王敬書聖製文並墨刻四種賜之六月永定河北岸二工漫溢三十餘丈又下頭工河隄蟄陷二十餘丈詔往查辦奏言閏六月十七二十七等日將北下頭工及北二工先後合龍其旱口七處見已全行完竣所有工次採辦物料堵築水口旱口用銀六萬三千九百六十九兩零著落各官分賠允之尋轉戶部左侍郎十月命查看葦子峪山路情形先是豐紳緒倫奏稱葦子峪山路窄狹必須鑿鑿方能行走十一月覆奏峪內挪移樹枝鑿鑿山石恐於陵寢風水有礙得旨著不必辦理十一年正月調工部左侍郎尋授泰寧鎮總兵兼內務府大臣三月西陵白椿界內間有居民改建房屋查於風水無關奏准將紅白椿分別挪進十三年六月因失察西陵總管盛住貪冒侵欺降頭等侍衛派往哈密換班十月授阿克蘇辦事大臣十四年奏言回疆生齒既繁案牘日多請將伊犁廢員撥歸烏什阿克蘇各一名幫辦刑名事務奉旨允行十五年七月調葉爾羌辦事大臣八月授鑲白旗漢軍副都統仍留葉爾羌任十六年二月調塔爾巴哈臺

參贊大臣十一月授鑲藍旗滿洲副都統十二月兼鑲白旗護軍統領十七年三月鐵保等奏喀什噶爾錢局舞弊那彥寶家人得受陋規部議降調九月賞給三等侍衛在大門上行走十二月授正紅旗蒙古副都統十八年正月兼正紅旗護軍統領二月授泰寧鎮總兵官兼內務府大臣值泰陵寶城牆身膨裂命卽日前往詳細估勘會同蘇楞額敬謹承修先是凱音布哈寧阿奏稱開工後復加詳勘應修者尙多那彥寶查明凱音布等所報不實奏請議處從之並以將事敬謹賞戴花翎十九年授理藩院右侍郎兼正藍旗滿洲副都統閏二月調工部右侍郎進六大班三月署倉場侍郎授總管內務府大臣兼管上駟院圓明園事務充對引大臣五月調刑部右侍郎六月轉左侍郎命偕章煦前往運河查勘水勢兼察金鄉匪徒滋事七月奏參山東吏治廢弛地方凋敝實因撫臣同興不能整頓相率因循藩司朱錫爵徇私廢公濟南府知府凝圖聲名狼籍一味姑容金鄉匪徒李義等挾捕役訪拏之嫌糾衆拒捕照律問擬先是十八年九月睢汛二壩漫溢值滑縣用兵工程暫緩至是帶同司員溫承惠等赴工堵築九月由西壩斜向東北建立壩基東壩則自磨盤壩起鑲長五十丈並安鑲大埽復於上邊埽內澆築

夾土壩下邊埽外添設護埽層層進占旋以水凍停工二十年正月興工堵截並將積冰鑿開大溜掣動形勢頗利惟因引河草率奏參督催抽溝之員熊方受等奉旨革去頂帶責令賠挑二月竣工三月偕吳璈李鴻賓方受疇奏言睢工自合龍以後可慶安恬惟查大壩係柴土新工日久不免平墊尙須多加重土量爲培高壩後應趕澆土餞始有後靠並於大壩南首接築柴土二壩以作重門保障東壩下首尙須趕築挑壩二道以防溜近隄身其南北大隄經料車往來碾壓多有低窪亦宜修築平整奏入允之七月署戶部右侍郎兼管錢法堂事務署正白旗護軍統領八月山西雁平道福海朔州知州明祥互相稟揭九月命偕帥承瀛前往審辦查出福海於差役得贓實係失察惟倒填革役日期究屬含糊應請革職明祥辦理門牌草率考取武童事後受財不知潔己請發往烏魯木齊效力贖罪是年山西蒲解二州連日地震傷人至多命卽於山西藩庫支銀五萬兩帶往災區酌量賞給二十一年署鑲黃旗護軍統領六月調戶部右侍郎授左翼總兵二十二年三月命帶御船處印鑰管理圓明園兼軍政大臣六月御史宗山以所獲聚衆斂錢石渠糾約太監人等入會具奏諭曰步軍統領等於所轄地方漫無覺

察均屬咎無可辭那彥寶人尙明白仍留左翼總兵之任交部議處七月署行在刑部侍郎補鑲黃旗護軍統領二十三年訪拏奸商運米私宰馬匹傳徒習教造賣賭具等案又拏獲隨營詐差勒索人犯得旨以緝捕認真任內處分加恩開復二十四年七月永定河北二南四二工同時漫溢命偕吏部尙書吳璈分工專辦因北岸上頭工漫口三百餘丈掣動上溜北二漫口匯歸一處南四工已水淺挂淤諭令吳璈卽會同督辦北上頭工請發銀十萬兩以備工用允之八月東河漫口命吳璈前往所有永定河工程專交那彥寶同總督方受疇督辦九月合龍交部從優議敘十月奉旨偕尙書戴均元前往河南武陟查看壩工那彥寶留駐馬營壩會同吳璈督辦十一月奏言臣等馳抵工次前赴王家溝口門察看大溜水勢尙屬平緩惟引河工段絲長挑挖亦需時日且進占以集料爲先而兩處運貯稽料僅有一千餘垛近處及三百里外俱已購盡必須於更遠地方採買計料一垛須車二十五輛往返卽須半月見在多方設法俟聚至二萬垛方足應用查前次各工本處料物不敷俱由鄰省接濟請於直隸山東江南之與豫省連界者採辦各千垛委員交武陟工次從之二十五年三月引河挑工如式啟放清水暢流

奏報合龍諭曰上年馬營漫口當派那彥寶吳璈會同葉觀朝琦善籌辦該處土性沙鬆水深至十二丈餘尺引河至八百餘里之長購料至二萬數千垛發帑至一千二百餘萬之多自十一月興工至本年三月金門斷流那彥寶實心辦理尙爲迅速著補授鑲藍旗漢軍都統卽取道山東回京覆命旋因南岸儀封三堡復刷成漫口續塌一百三十餘丈上以那彥寶於北岸合龍後遲延十餘日並不迅赴南岸速爲籌辦革去都統降補內閣學士署理河南巡撫四月授正紅旗滿洲副都統五月卸巡撫任因保奏議敘人員濫用超等特等字樣並請以守制道員嚴煇預補徐州道俱屬違例部議降調改降留七月署鑲白旗護軍統領八月仍赴豫辦工十一月遷刑部左侍郎奏言大壩口門逐漸收窄儀封大工東西兩壩將屆垂成以天寒冰凝添雇人夫盡力開鑿旋卽同時進占鑲築堅穩十二月命充經筵講官道光元年調吏部左侍郎署左翼前鋒統領二年正月以先後辦理河工不知潔己聲名平常奉旨降頭等侍衛派往吐魯番換班五月調科布多參贊大臣三年三月署喀喇沙爾辦事大臣奏定民人與蒙古交易章程諭曰蒙民交易由來已久茲據查明蒙古負欠商民者爲數過多勒限竟不能歸還凡糧菸

茶布爲蒙古養命之源著准其撥給商民部票與蒙古公平交易舊欠亦令陸續歸還惟科布多所屬蒙古部落七處除土爾扈特霍罕向不通商外餘俱詢明令其交易至烏梁海與哈薩克接界往往因緣爲奸著卽禁止十一月奏定商人所領貨物須用將軍參贊印票註明方許在城售賣從之四年四月命來京以前在刑部時擬流官犯侯際清呈請贖罪失察官吏得贓率行畫諾降四級調用七月賞藍翎侍衛六年三月授通政司參議七月庫車回匪滋事賞給頭等待衛爲庫車辦事大臣十二月奏言臣前過甘肅察看內地州縣應付車駝頗形拮据肅州前起官兵因出關後無車馬更換全行越站至後路官兵踵至趕辦不及積聚至四千餘人臣籌辦糧運自當悉心經畫惟恐新疆車駝糧石一時趕辦無多容俟到任後具奏上命與喀喇沙爾大臣商同籌辦七年正月揚威將軍長齡請以那彥寶調烏什辦事大臣上以庫車有催趨後路糧運事宜亦屬緊要仍著在彼經理三月暫署烏什事務奏曰烏什西南一帶直逼喀什噶爾等處爲大軍後路西北一帶俱係布魯特游牧自張格爾滋事後從逆者多均須加意防範西南要隘已知會提督齊慎防堵其偏南柳樹泉並西北一帶亦飭分兵彈壓其餘山路小

徑俱酌量分布卡倫多設偵探四月又奏烏什所屬奇里克部落布魯特距城切近去秋疊次搶劫臣到任後分兵防守拏獲布魯特搶馬賊犯詰以庫魯圖克逃往何處據供有餘匪藏匿山內謀搶烏什等語隨飭副將等進山剿辦見賊百餘人踞險抗拒我兵悉力仰攻復鈔上山梁合擊全行殲斃又偕齊慎奏言烏什西南爲賊匪藏匿之所三月內分兵兩路兜擊殺賊四五百人上以兩次進剿情形並無逆跡著恆敬密加訪察五月恆敬奏查明布魯特確有搶掠實情附逆之庫魯圖克見已訪獲時大兵克復喀什噶爾上恐張逆竄入烏什一帶地方諭令嚴密訪查五月仍回庫車任十月大兵凱旋奏上諭所留之兵可由該城支辦兵糈無須再運其在途者仍運至阿克蘇及庫車二處存貯旋以阿克蘇存貯六成庫車存貯四成奏聞授喀什噶爾參贊大臣十二月調塔爾巴哈臺參贊大臣奏言六年軍興以來所有應付腳價俱應造冊呈報至內地各委員接辦糧臺自三月至今用銀八萬餘兩存銀應卽解還惟庫車每年額調經費銀五千兩俱係兵餉遇有應行支放無項通融請將餘銀扣留五千兩以備應用八年二月復偕長清奏言阿克蘇庫車存貯之糧原爲暫留防兵接濟今首逆就擒所需口糧無須運

往查所存粟米不堪久貯且本年豁免之糧見應買補請將所餘之米卽照應買之數劃出以備支放俱從之十一月授綏遠城將軍十年調成都將軍十二年寧遠府界曲曲烏窩石等支生夷出巢焚劫清溪縣屬松坪土司馬林因改土歸流主使夷人滋事其黨馬應明等分投馬烈場唐家壩等處焚搶那彥寶偕總督鄂山提督桂涵剿賊於羊腦山追至老瓦巖殺賊甚衆馬應明復與馬林糾集四千餘人齊集几子山奔撲大營麾兵追逐賊漸遁去十三年二月督兵在峩邊堵截又飭建昌鎮堅守大樹堡聞山後香樹頂有賊屯聚移兵往剿賊匪踞山擲石我兵左右兜擊其阿吾一支千餘人前來攻撲官兵三路並攻餘匪逃竄清溪一帶漸卽肅清三月桂涵卒於軍那彥寶署提督事務進兵馬梁山等處賊蜂擁撲營我兵槍礮齊施轟斃無算賊勢漸窘逆首羅木則等始行投出隨將馬林所屬夷堡十一處燒燬時上已授楊芳四川提督前往接辦命那彥寶來京四月移營大樹堡駐劄獅子山梁擒獲馬林於黑嗎溪餘匪抵死抗拒調兵進剿屢有克捷奏入上命楊芳趕赴大營迅速蕝事七月來京署正黃旗蒙古都統九月奉旨那彥寶年踰七十著以原品休致十八年六月因前管理奉宸苑失察挪移挂欠錢糧

交部議處革職二十三年十一月卒

凱音布

凱音布富察氏滿洲鑲黃旗人嘉慶六年進士改翰林院庶吉士七年四月散館授檢討七月擢國子監司業八年四月遷右春坊右庶子十月轉左庶子尋充日講起居注官九年陞翰林院侍講學士十年轉侍讀學士十一年三月擢詹事府詹事兼公中佐領十二月陞內閣學士兼禮部侍郎銜十四年擢盛京禮部侍郎十五年調戶部侍郎十六年六月調禮部右侍郎授鑲黃旗蒙古副都統九月調吏部右侍郎教習庶吉士十一月調正紅旗滿洲副都統十七年六月充左翼監督十二月轉左侍郎十八年三月以承修秦陵寶城凱音布於原估外更奏膨裂多處上命副都統蘇楞額等詳勘尋覆勘除與原估相符外另有應行增修工段劾凱音布於承修工務未能覈實請嚴加議處尋議褫職諭曰秦陵寶城應修工段派凱音布敬謹承修凱音布於赴工請訓時並未諭將修工段之外另行查勘乃凱音布於到工後卽率意欲上寶城查勘其罪一也查勘後遂稱原估工外另有膨裂二十四丈有餘裂縫五道並有通身滿裂一道且稱上臺面輒塊間有沈

墊不平緣荷葉溝浸水所致言之駭聽其罪二也伊於奉派承修之先果聞知工段情形甚重何不於陛辭時先行奏明乃先無一言迨後浮開工段張皇入告而於實應增修之工轉未勘出並於召對時妄舉不經之詞云聞得牆身裂縫竟可用竹竿探試矢口漫說尤屬妄誕其罪三也有此三罪非革職可以蔽辜著發往盛京充當披甲以示嚴譴六月左翼監督文孚奏短收盈餘銀兩自請議處上以此次短收銀兩在凱音布經管期內命凱音布照數賠繳二十三年釋回二十四年以主事起用分戶部二十五年九月充工部寶源局監督十月超擢都察院左副都御史道光元年充十五善射四年三月升理藩院右侍郎七月授鑲白旗蒙古副都統尋調兵部右侍郎閏七月調刑部右侍郎八月轉左侍郎十二月以御史萬方雍奏參刑部誤引律例罪名失當降三級留任五年調吏部左侍郎正紅旗蒙古副都統六年充右翼監督七年八月署倉場侍郎十月議覆海運事宜於米石到津起卸後仍照上屆章程由直隸派委員弁分撥押運以專責成並嚴禁書役挑斥米色於輕重斛收之中藉端需索從之八年八月充順天鄉試監臨官以士子入場擁擠擦損試卷至三百餘本之多凱音布未能先事豫籌下部議處

十一月調盛京禮部侍郎十年三月因將軍奕顯演戲宴樂凱音布近在同城並未奏及部議鑄二級留任八月兼署刑部侍郎十一年正月調戶部侍郎兼管盛京內務府事務二月兼署工部侍郎七月調刑部侍郎九月召來京授刑部右侍郎十二月轉左侍郎十二年正月調兵部左侍郎二月兼正白旗滿洲副都統九月復調刑部左侍郎十三年四月因疏防官犯李相清越獄降四級留任十一月署察哈爾都統十四年實授先是察哈爾所屬右翼馬羣被災倒斃甚多凱音布奏請借帑撫卹得旨賞借銀二萬兩除買補馬匹外作爲被災官兵置產之費又未經買補馬匹銀一萬六千五百兩均由該官兵俸餉內坐扣予限十年扣繳完款至是奏言牧羣官兵均賴俸餉常差扣項較多未免拮据請將此項自十三年爲始按年先扣戶部馬價銀一萬六千五百兩二十三年完款後再接再扣口北道庫銀二萬兩款項至三十二年歸完以紓兵力從之十六年七月授都察院左都御史鑲藍旗蒙古都統九月充武會試監射大臣旋授成都將軍十八年奏剿辦夷匪請厚集兵力多籌糧餉以張撻伐諭曰四川夷匪連年出擾屢經降旨飭令該將軍總督或剿或撫認真妥辦乃因循數年糜餉老師凱音布始則隨同鄂山

將就了事茲復會同蘇廷玉冒昧陳請遽籌大舉此等小醜跳梁重煩兵力多糜糧餉殊屬不值且內地夷匪滋事從來無此辦法總緣積年經理不安日久愈費周章該將軍等種種紕繆實屬有幸任使著交部嚴加議處旋議革職上加恩降爲二品頂帶拔去花翎仍帶革職留任尋兼署四川總督十九年正月以降補臬司蘇廷玉亦因辦理夷務不善革職留任並褫花翎稟請代奏謝恩凱音布據情入奏上以蘇廷玉見任臬司本有奏事之責前降補臬司時曾經自行具摺凱音布不卽將原稟駁回據情代奏亦屬冒昧下部議處尋議降二級留任三月卒遺疏入諭曰成都將軍凱音布由左都御史擢任將軍宣力中外有年持躬清慎任事實心方資倚任茲聞溘逝殊堪矜恤著加恩照例賜卹准其入城治喪任內一切處分悉予開復應得卹典該衙門察例具奏尋賜祭葬子保麟理藩院筆帖式卓麟山東濟南府同知恩麟刑部學習筆帖式

舒通阿

舒通阿赫舍里氏滿洲正藍旗人西安駐防嘉慶元年由前鋒隨將軍恆瑞協剿川陝楚三省教匪屢著戰績四年補驍騎校五年遷防禦十年陞佐領十一年經

陝甘總督倭什布保送引見記名以遊擊用十八年九月直隸長垣教匪肆擾竄河南陷滑縣舒通阿隨西安副都統富僧德往討十月敗賊於曹起營周譚村等處乘勝進攻道口賊衆抗拒我兵越濠直入賊壘斃賊萬餘生擒三百餘旋抵滑縣適桃源賊來拒官軍兩面鈔截擊走之又剿賊於白茅莊俘賊日張法宗等四十七名時首逆李文成竄濬縣之司寨負隅死守我兵馳往合剿毀寨衝入李逆自焚死殲逆黨多名十二月於滑城西南角挖地道密置地雷乘機轟擊城裂舒通阿隨富僧德由東門入大軍先後策應執賊渠徐安幟戮賊萬餘人捷聞下部議敘旋以陝西匪徒萬五因木廠停工乏食糾衆煽亂復隨富僧德移師剿之十九年正月師次斜峪關偵聞萬五股匪將竄桃川遂於沙壩設伏賊至伏發擒斬四百餘人又剿龔貴股匪於三元壩賊搶上大山我兵槍箭齊發大破之二月吳抓抓股匪南竄黃官嶺我兵馳至翦子河迎頭截剿賊大潰誅吳抓抓於陣生擒僞元帥王占魁尋聞龔貴竄老林遂躡蹤跟追接戰於大凝溝陣戮賊日向小一龔逆就擒陝甘總督長齡上其功賞戴花翎二十年陞直隸喜峰路遊擊二十三年調正定鎮標右營遊擊旋調中軍遊擊道光二年陞保定營參將四年擢

督標中軍副將六年五月陞山東登州鎮總兵九月調直隸正定鎮總兵九年調甘肅西寧鎮總兵十二年七月黃河迤南加咱等族野番偷渡河北搶掠蒙古牲畜並拒傷追捕官兵舒通阿督率防河員弁分途偵緝遇賊於空刁年河奮勇剿擊斃賊二十餘獲牛羊匹馬千餘餘匪躡淺浮渡我兵設伏堵截復斃賊十餘人十月賞副都統銜充西寧辦事大臣十二月奏言馳抵河南傳集加咱等族千百戶示以兵威曉以利害勒限縛賊繳贓隨獲賊匪加洛等十三名以獻悉治如律疏入報聞尋授正白旗漢軍副都統十四年上以前後藏貢使中途屢被搶劫命偕陝甘總督楊遇春酌定永遠制宜章程旋奏該貢使堪布向由西寧口外草地行走歷年派員在通天河附近接送後經裁撤惟果洛克等族番既無鈴束又無恆業每藉打牲千百成羣窺伺搶劫而堪布及蒙古番兵人數本少包駝頗多行走未能迅速遇賊復不能抵禦似應官爲防護擬派察漢托洛亥防所官兵一百員名護送至扎素拉青海界外並諭知堪布等不准額外攬帶貨物以免逗遛庶得安速出境從之十五年偕楊遇春奏西寧口外察漢托洛亥地方額設駐防官兵一千二十四員名原以捍衛蒙古控制野番並於各該王公旗下每年派蒙古

兵五百名分爲四班以一百二十五名按季轉流隨同駐防官兵巡防習練武備嗣於道光十三年前任辦事大臣恆敬奏准將蒙古兵丁改爲兩班按年更換查蒙古生長口外自幼射獵爲生今使常川操演不惟鉛藥火繩無項可出且一年一換貧苦蒙古久曠游獵轉於生計不裕應請仍復舊章以免拖累而示體恤如所請行十六年卒子岳齡防禦孫德蔭繙譯舉人德鈺前鋒忠連忠溥德厚俱藍翎前鋒

海齡

海齡郭洛羅氏滿洲鑲白旗人山海關駐防由驍騎校於嘉慶十五年授直隸張家口協中營守備十八年五月調督標右營守備九月隨直隸總督溫承惠協剿河南逆匪李文成等屢著戰功下部優敘二十二年遷左營都司道光元年升宣化鎮中營游擊六年調大名鎮中營游擊八年八月遷八溝營參將十月調保定城守營參將九年署督標中軍副將十年實授十二年擢大名鎮總兵十三年調正定鎮總兵十五年總督琦善劾海齡性耽安逸不勤訓練請以副將降補得旨賞給二等侍衛充古城領隊大臣二十年八月授西安右翼副都統九月調江寧

副都統十二月調京口副都統二十一年英人犯浙江陷定海海齡奏請將沿海通商碼頭暫時封閉命欽差大臣兩江總督伊里布江蘇巡撫裕謙議奏伊里布如海齡議上斥之裕謙奏封港之議徒有礙於安分商漁而於杜絕接濟英船等弊仍未得其要領上韙其言命毋庸封港惟嚴飭文武員弁於商漁船隻出入實力稽察二十二年正月海齡奏旗營官兵防堵日久請備半年俸餉先由旗庫備借款內支用再由江蘇藩庫撥還詔如所請旋經兩江總督牛鑑等奏京口旗營官兵防守本境汛地例不准借支俸餉諭曰此項銀兩業經先由旗庫給發旗庫正款未便久懸始准於江蘇藩庫撥項歸款此外防守本境汛地官兵不得援以爲例海齡於旗庫正款未經奏明輒行動借著交部議處尋降二級留任六月英船由海溯江犯鎮江城陷欽差大臣耆英奏海齡自縊殉節並其妻及次孫同時自盡諭曰海齡爲國捐軀忠義可嘉著加恩照都統例賜卹并著派員尋覓該副都統及伊妻伊孫尸身妥爲盛殮查其見存子女一同護送回旗該副都統見有子幾人俟百日孝滿由該旗查明一併帶領引見候朕施恩俟軍務完竣該地建立專祠伊妻及伊次孫俱著附祀尋賜卹如例子謚昭節賞騎都尉兼一雲騎尉

世職襲次完時以恩騎尉世襲罔替並入祀京師昭忠祠九月御史黃宗漢奏海齡誤殺良民被民戕害上命耆英等詳細覆奏尋奏鎮江失守時海齡自縊被火延燒經領催德明等於灰燼中檢獲骸骨並原著葛紗袍襟委員確查殉難屬實并非民變被害惟不聽民逃難以致城陷慘遭蹂躪並駢誅形跡可疑之人辦理失當得旨海齡固守鎮江拏獲奸細辦理草率原有應得之咎惟既闔門殉難大節無虧著仍遵前旨照都統例賜卹旋經耆英奏尋獲海齡及伊妻次孫尸骸命耆英等派員護送回旗子宜蘭泰襲世職戶部員外郎宜紳泰藍翎侍衛孫清安襲世職三等待衛

袁登舜張喜

袁登舜原名陳先貴四川綏定府達縣人嘉慶六年由寧陝鎮中營步兵拔補馬兵十年奉派塔爾巴哈臺屯田十三年因叛匪蒲大芳等聚謀不軌糾約入夥不從隨經首告偕同官兵奮往捕獲甚屬出力奏入奉諭馬兵陳先貴由寧陝遣戍前往一聞蒲大芳等逆謀卽指名首告實屬能知大義著以把總超用撥歸烏魯木齊提標當差十五年補城守營左哨二司把總因呈明改復袁登舜本姓名道

光六年逆裔張格爾滋事派赴喀什噶爾偕剿城陷同濟木薩營把總張喜力戰
歿於陣事聞得旨均加恩賜卹廕雲騎尉世職袁登舜嗣無考張喜子松林襲喜
甘肅河州人由行伍歷本職

清史列傳 卷三十九

大臣傳續編四

成順

成順郭囉洛氏滿洲鑲黃旗人青州駐防由前鋒於嘉慶元年補驍騎校十一年陞防禦十六年陞佐領十八年九月直隸長垣教匪竄河南陷滑縣成順奉檄前往協剿十月隨直隸提督馬瑜由開州東明一帶進發偵賊屯潘章負隅抗拒我兵分爲四隊奮勇兜截執賊日翟元良等殲賊五百十一月賊由滑縣西南直撲大營成順偕協領哈哈岱防禦訥勒賀等設伏以待襲其不備鈔出營前掩殺斬級四百生擒賊七十餘人賊潰復於滑縣邊界之湯二莊東湖西湖三村糾衆嘯聚我兵四面圍攻燬賊巢賊窮蹙擒賊日孔傳文郭明山捷聞以應陞之缺陞用十九年陞協領道光二年擢荊州右翼副都統五年八月因佐領忠貴違例用刑責斃兵丁成順以未能先事豫防下部察議十一月奏領催依祿保開場聚賭嚴審問擬如律協領福多佐領特圖恩防禦福順驍騎校德克吉訥各有管轄之責

未能隨時稽察請鑄職並自請議處旨如所請六年奏報荊州大隄被水衝缺擅發五百里急遞上飭之七年偕湖廣總督嵩孚奏荊州駐防兵丁人數較多挑補無期請於綠營馬戰守三項兵丁缺出將駐防營願挑水陸之間散一體校閱分別挑補仍不得過本營十分之二以示限制下部議行九年三月奏荊州營額設礮位年久損壞請照直隸臺礮式樣改造四十位以重操防允之十二月湖南江華縣逆瑤趙金隴勾結廣東散瑤煽亂上命成順赴永州軍營剿辦事平撤回十三年十月調乍浦副都統尋奏請興修船隻以應秋操允行十二月以前在荊州副都統任內失察駐防營連年虧缺馬匹並將馬乾銀兩挪充公用降四級留任十五年因病陳請開缺命原品休致復以曾經出兵打仗著有勞績賞食全俸以養餘年二十年卒子英全防禦明霖協領明文防禦明善驍騎校孫伊翰筆帖式

常德

常德索綽羅氏滿洲正紅旗人嘉慶十年繙譯進士選補盛京戶部主事十八年調禮部主事二十一年京察一等擢員外郎充四譯館卿二十四年京察一等調戶部銀庫員外郎二十五年復帶引見奉旨記名以道府用道光元年三月補授

甘肅蘭州府遺缺知府旋陞直隸熱河道九月擢湖南按察使十一月調直隸按察使二年閏三月署布政使五月調山西按察使陞浙江布政使三年授太常寺卿四年賞給副都統銜作爲葉爾羌辦事大臣並賞戴花翎五年署喀什噶爾參贊大臣尋以奏報到任日期擅用四百里急遞嚴旨申飭嗣復以偵探賊匪各情由五百里奏入上以其並無緊要情事連發急遞革去副都統銜仍交部議處尋議降一級留任六年召來京八年賞藍翎侍衛作爲伊犁領隊大臣九年賞三等侍衛調補烏什辦事大臣十年喀什噶爾有安集延回戶勾結布魯特等入卡滋事並竄擾葉爾羌地界常德分撥兵回協辦防堵布魯特尋悔罪投誠常德查明滋事緣由並將見辦喀什噶爾英吉沙爾二城防守情形先後奏入報聞十一年二月賞給頭等侍衛調補葉爾羌辦事大臣十月調補烏什辦事大臣旋賞給副都統職銜授爲塔爾巴哈臺參贊大臣十二年二月調伊犁參贊大臣四月署伊犁將軍九月授正紅旗漢軍副都統遵旨會同伊犁將軍玉麟覈議巡邊章程奏言伊犁卡外特木爾圖淖爾在西南吹河在西北舊時係輪流查閱自嘉慶初年巡邊大臣在特木爾圖淖爾一帶巡查至今已閱三十餘年又查吹塔爾拉斯距

伊犁卡倫約在千里之外雖係準夷舊地爲伊犁屬境惟地處窻遠久爲布魯特駐牧誠如聖諭浩罕自以所占乃布魯特地方不知爲伊犁邊界此時南路貿易初通浩夷是否傾心向化尙須察看若必執此疆爾界之說連番赴彼巡查似非仰體聖主懷柔遠人之意應請循照向年規制以查至特木爾圖淖爾爲斷如所請行十三年正月補伯都訥副都統六月調補三姓副都統十月調補塔爾巴哈臺參贊大臣會浩罕胡什伯克遣師懇祈將近卡倫游牧之哈薩克等驅逐出境以便收取馬租常德會同伊犁將軍特依順保奏稱伊犁西卡外特木爾圖淖爾海迤西及吹塔爾拉斯等處游牧之哈薩克素畏浩罕強橫依附者甚多特木爾圖淖爾海迤東哈薩克公阿沁伯克所屬各愛曼之哈薩克俱知浩罕凌虐不肯依附而浩罕伯克貪黷無厭每欲收取馬租該哈薩克等卽逃避卡倫附近以爲護符今浩罕胡什伯克請將哈薩克等驅逐出境是欲易於勒取馬租此時若明言護庇哈薩克恐卽此構釁若竟置之不理儻胡什伯克前來生事該哈薩克等勢必聞風往卡內逃避彼時辦理更覺棘手莫若講明舊章以杜侵吞則哈薩克等不待護庇而自安矣上韙之十四年命來京十五年八月署理鑲黃旗滿洲副

都統尋署理鑲紅旗護軍統領鑲黃旗護軍統領九月調補鑲紅旗滿洲副都統稽察七倉大臣十二月補授山海關副都統十七年調江寧副都統十九年卒

烏珍泰

烏珍泰拜俞特氏蒙古正紅旗人烏魯木齊駐防由筆帖式於嘉慶十三年補驍騎校十四年陞防禦十五年陞佐領十八年遷前鋒章京十九年遷翼長二十四年陞協領道光六年逆回張格爾入卡滋擾烏珍泰籌辦後路糧運不辭勞瘁經都統英惠保奏送部引見命交軍機處記名十年安集延回匪糾同浩罕犯英吉沙爾喀什噶爾二城烏珍泰隨提督哈豐阿赴援行抵葉爾羌迤南適賊匪五六百人沿河抗拒官兵施放連環槍礮賊抵禦不及紛紛落水大敗之餘賊竄向東北烏珍泰帶領馬隊偵蹤追擊越日賊復於頭臺湖灘地方蟻集迎拒大軍三路夾攻烏珍泰由右鈔截殲賊百擒賊五十餘賊窮蹙竄入哈拉布扎什回莊我兵乘勝追躡燬其巢英吉沙爾喀什噶爾二城先後解圍捷聞賞加副都統銜十二年二月充葉爾羌領隊大臣六月浩罕伯克邁買底里遣使進表悔罪輸誠經烏珍泰偕葉爾羌參贊大臣璧昌等奏入上允其入卡貿易免納稅課復諭曰朕思

夷情叵測該浩罕卽懷德畏威出於至誠恐其中尙有別情或者外示恭順包藏禍心斷不可不豫爲防備務須遵照議定章程於各卡倫密加防範一切訓練巡緝當如浩罕未臣服時不可因幣重言甘稍存大意儻竟乘間竊發則我兵一呼卽至有備無患切勿因循玩泄以致措手不及該參贊等坐失事機能當此重咎耶十三年署喀什噶爾領隊大臣十六年署喀什噶爾辦事大臣十八年授庫車辦事大臣尋卒子永慶藍翎前鋒校

霍隆武

霍隆武巴雅克氏蒙古鑲紅旗人烏魯木齊駐防由委前鋒於嘉慶十八年補筆帖式二十年八月喀什噶爾逆回孜牙墩句同布魯特等犯卡滋擾先是西布察克布魯特比圖爾第邁莫特與孜牙墩暗結誓盟復先令回莊貿易民人高建洛來城稟報意圖掩飾霍隆武奉檄齎賞獎慰行至游牧處見其形色張皇兵械雜陳破其逆謀經伊犁將軍松筠擒圖爾第邁莫特廉得其實置之法九月孜牙墩竄據僞塔克山霍隆武隨幫辦大臣永芹帥師進剿殲賊五十餘生擒二十餘燬賊寨賊潰竄入山後石洞霍隆武復攀險峻直擣賊巢擒孜牙墩盡殲其衆事竣

敘功命以應陞之缺盡先陞用並賞戴藍翎二十二年擢驍騎校二十四年遷防禦道光三年陞佐領六年七月逆回張格爾糾衆煽亂霍隆武隨烏魯木齊提督達凌阿率兵往討九月馳抵阿克蘇時賊在渾巴什河南岸霍隆武隨達凌阿沿河駐會我兵追剿至沙坡伏賊突起抵拒官兵復鈔出沙岡夾擊之賊退追殺三百餘生擒五十餘七年三月大兵進剿喀什噶爾霍隆武奉檄駐巴爾楚克一帶防禦四月移駐葉爾羌八年張逆俘擒葉爾羌辦事大臣恆敬保薦防堵出力各員得旨霍隆武准其以協領卽補先換頂戴十年喀什噶爾安集延回匪復勾結浩罕布魯特爲亂霍隆武隨提督哈豐阿率兵往援尋以烏什毗連卡外布魯特地方檄令帶兵防守十一年陞協領十七年軍政卓異十八年賞副都統銜充伊犁領隊大臣二十年卒

賡音岱

賡音岱白佳氏滿洲正藍旗人烏魯木齊駐防嘉慶元年四月川陝楚教匪作亂賡音岱由委前鋒校隨都統永保出師湖北進攻保康之喇叭洞劉家集曲家灣等處屢著戰績六月賊屯棗陽之蔣家壩我兵由草市進剿賊大潰尋夜攻董家

岡張家壩一帶賊卡俱拔之焚其巢殲賊無算執賊目宋廷貴陳正五並夥賊一百餘人二年正月隨戶部左侍郎惠齡剿竄匪於鮑家坂獲賊渠劉起榮二月移攻新店擒賊首戴有成等三十七人三年二月竄匪由楚入川我兵追剿於茶夫壩花石盤白山寺等處疊有斬獲賡音岱俱在事有功十月補驍騎校五年隨參贊大臣那彥成擊賊於甘肅之牛蹏鎮禮辛鎮黃鶯鋪連克之七年陞防禦十三年遷左領十七年授委前鋒章京二十二年陞協領道光三年賞副都統銜並戴花翎充吐魯番領隊大臣七年三月以逆回張格爾作亂上命賡音岱移駐托克遜督辦糧運五月哈密辦事大臣恩銘奏以修整車兩原爲接濟前途運糧之用向由該領隊大臣接收轉解乃運至吐魯番托克遜無人接收據賡音岱等稱奉到揚威將軍長齡飭知此項車馬不必接收轉飭原兵直送大營見在暫寄該處收放礙難辦理上命賡音岱明白迴奏尋奏覆此項車馬並無長解之員芻牧不周恐多倒斃未敢接收至所稱長齡飭知係屬差弁訛言疏入諭曰哈密解送車兩雖經屢議改撥然旣解到吐魯番自應接收或解轉他處或留備兵差不得因長解卽行駁回如謂馬匹疲乏恐不適用豈令遠解大營轉可供驅策之理明係

賡音岱辦理不善藉詞推諉且既稱未奉長齡飭知又稱差弁訛傳何以駁令直解大營自相矛盾賡音岱前既存心諉卸迨奉旨查詢又不據實陳奏其前次解到車兩訖未咨報軍需局所司何事是誠何心賡音岱著拔去花翎仍交部議處尋議降三級調用上以賡音岱在托克遜經理糧運尙無貽誤改爲革職留任八年回疆勘定張格爾檻解京師接替護送諸臻妥協下部優敘九年以籌辦善後事宜賞還花翎十三年吐魯番孝義營把總史學顯自戕身死賡音岱聽信遊擊王洪謨捏報病故不卽委員驗訊駁查得旨賡音岱雖無故意瞻徇情弊實屬不諳表率降三級調用十四年補防禦十七年卒

圖明額

圖明額奚他拉氏滿洲鑲藍旗人由官學生考取繙譯生員嘉慶六年補工部製造庫庫使十四年補筆帖式十八年京察一等十九年陞都水司主事二十四年充十五善射道光五年京察一等陞員外郎十年京察一等記名以道府用尋陞製造庫郎中九年授甘肅蘭州道十三年大計卓異八月陞雲南按察使十二月授奉天府府尹十五年盛京將軍奕經奏獲賊匪張愾才等越邊偷入圍場施放

烏槍拒捕得旨民間私藏烏槍例禁綦嚴何以查禁未能淨盡沿邊圍場應如何嚴加防範著妥議章程具奏圖明額偕奕經酌議六條一嚴禁私造一搜查私藏一嚴拏供給賊匪口米一圍場添派委員嚴查一山犯加等治罪一疏脫賊犯之簽解兵役於本罪外加枷責下軍機大臣議行十六年九月偕奕經等奏參失察遼陽屬界匪徒演戲斂錢之各官並自請議處上嘉其所辦甚屬認真十二月授山西按察使十七年命留京以四五品京堂候補十八年賞頭等侍衛充葉爾羌幫辦大臣二十年三月偕葉爾羌參贊大臣恩特亨額奏獲興販鴉片人犯多名並究出吸食職官王傳心等又特參失察各官請革審均得旨嘉獎十一月偕恩特亨額查明巴爾楚克屯民子弟堪以募補換防兵丁糧缺請將內地換防兵丁減調二百名以節糜費並裁撤額派把總一員外委四員如所請行十二月授葉爾羌參贊大臣兼提督銜二十二年奏布噶爾伯克奪占浩罕地方差人進卡遞稟業經給發諭帖酌加賞資護送出卡上嘉之並飭探明起釁確情旋覆奏布噶爾伯克因負氣與浩罕用兵前既併吞浩罕地方嗣被希爾阿里奪回數處以致互爭諭曰卡外遠夷蠻觸相爭自當置之不問惟邊防卡倫必應加意防範毋稍

疏虞二十三年賞頭等侍衛回京當差二十六年因病開缺二十七年卒子裕文安徽安慶府同知

楊芳

楊芳貴州松桃廳人由行伍歷拔鎮遠鎮標千總嘉慶二年黔楚苗疆平以功陞台拱營守備時川陝楚三省教匪不靖分股滋擾三年隨副都統銜額勒登保敗藍號股匪張漢潮於南漳在事有功賞戴花翎隨入四川值巴州白號賊羅其清敗匿於濛子灘洞我兵直擣其巢擒其清四年擢平遠協都司旋擢下江營遊擊是年額勒登保爲經略大臣五年正月移師入甘三月陞兩廣督標後營參將四月白號賊楊開甲張添倫等東趨雒南芳隨提督楊遇春出龍駒寨扼之中途截擊斬級六百張添倫等懼而遁芳追之賊還戰芳躍馬射其前隊賊大潰不敢復東捷入賞誠勇巴圖魯名號六月黃號賊伍懷志等犯甘肅成縣提督穆克登布督芳等擊之七月芳遷廣西新泰協副將八月連敗賊於成縣階州賊渡白水河窺四川龍安旁入老林芳冒雨追賊及之於磨刀石灣手刃十餘賊矛傷足墜馬仍徒步殺賊復傷臂官軍乘之大敗賊衆射傷伍懷志上聞而嘉之詔問受傷狀

並下部優敘六年四月官軍擊襄陽藍號僞帥冉學勝失利賊趨甘肅額勒登保檄芳合進賊掠秦安清水擾隴川芳與護軍統領扎克塔爾以騎兵追擊賊東走靈臺不果還走華亭我兵馳至固原南向待之賊反奔芳輕騎摧其後隊賊渡渭而南官兵西防棧道東截江口賊布營於漢江南岸芳渡江轉戰斬級三百賊由平利突湖北不得入走洵陽洵陽高唐嶺張添倫在焉六月芳與副都統銜格布舍等破高唐嶺餘賊與冉學勝合東出楊柏坡芳等先至設伏以待殺賊七百餘時四川賊藍號李彬白號苟文明襄城賊白號高見奇姚馨佐等先後竄至平利既而李彬走歸南江張添倫隨之高見奇姚馨佐由川入寧羌額勒登保援寧羌屬芳等以南江之賊十月張添倫僞帥張良祖馬德清劉奇以千人東竄芳等遇於通江大破之俘三僞帥適高姚二賊亦折回南江芳與接戰於桂門關賊勢窮蹙殺馬塞道以走追及於黑洞溝擒賊日辛斗得旨嘉獎旋擢陝西寧陝鎮總兵十一月李彬東向太平芳出其前彬敗潛回通江分隊走巴州芳南追賊棄老弱而逸獲彬妻冉添璜者通江賊首冉添泗弟以衆附李彬既敗相失率矛手百人夜就彬於通江芳知之待於鎮龍關獲添璜矛手百人皆就擒上嘉其能下部議

敘七年巴州白號賊苟文明渡漢江偪寧陝賊目劉永受宋應伏分布秦嶺北芳由五郎口西向進兵殲宋應伏之衆過半劉永受遁芳追之賊東出孝義應芳遣將遮其前而自截其後賊被剿狂奔永受僅以身免旋爲寨民所殺七月苟文明授首額勒登保入楚檄芳搜剿陝西餘賊先後俘擒夥匪郭士嘉苟文學等賊黨潰散八年三月總督惠齡檄芳還搜南山芳由洵陽壩深入冒霧雨捫崖攀葛獮薙無遺惠齡奏入命軍機處記名俟蒞功加提督銜五月又分兵爲五大搜嶺南北七月經略參贊騰章告肅清是月芳復殺賊於月亮坪陝西賊垂盡忽有李彪者自太白山突出糾合餘賊苟文潤復擾洋縣芳以專剿山內餘匪未淨命將存記陞銜註銷芳尋進兵剿賊於鼇山賊南竄城固芳繞出其前賊乘夜入黃柏園我兵窮追之九月賊出景峪復由澇谷踰嶺而南芳率衆邀截弗及上以芳任賊出入自如嚴旨切責褫花翎額勒登保復劾其玩寇命摘去頂帶十月賊至洵陽芳迎剿於高橋溝賊竄漢南芳帥諸將馳追千五六百里莫能及上並責諸將剋期破賊時賊已偪川境會成都將軍德楞泰至陝自請追賊令芳歸防山內許之苟文明之死其黨苟朝九等逃於湖北九年三月復自竹谿入陝芳嚴兵爲備賊

將易服來關擒之遂於沿江設守密布竹籤茨捆於淺處以防潛渡積數月破賊賊走開縣終不得越漢江上加恩復其翎頂九月三省悉平罷兵軍興以來各路以鄉勇隨征多立功而習成獷悍賊勢既稠奏請賚遣之願入伍者聽而無業者轉爲盜李彪等所由復起也其入伍者寧陝鎮標兵皆鄉勇充之是爲新兵芳以主帥馭之寬十一年正月芳署固原提督副將楊之震代芳時新兵因月加鹽米銀不以時給鼓譟之震笞治之於是營卒陳達順陳先倫煽衆作亂戕之震其黨蒲大芳先送楊芳家屬出城而復從賊芳聞變馳赴石泉上以德楞泰爲欽差大臣督楊遇春等討賊芳坐所管兵丁叛逆革去翎頂八月賊大掠洋縣留壩脅衆萬計九月賊推蒲大芳爲魁攻孝義廳窺子午谷詔趣諸將進師楊遇春等由洋縣進發賊西圍鄠縣急芳馳救鏖戰終夜矛貫其臂旦日賊辨爲芳軍自引去鄠縣獲全賞還頂帶楊遇春督諸軍擊賊於方紫關官兵與賊多舊相識隔河而語戰甫合西安河州固原兵皆潰扎克塔爾被圍數重賊勢張甚將分突秦隴楚蜀踵邪匪故智芳單騎至賊壘宣朝廷威德說以利害萬衆錯愕芳故得蒲大芳心大芳感悔縛陳達順陳先倫乞降芳遂率大芳擊諸賊之不降者斬朱先貴千人

於江口賞還花翎十二月以方紫關之敗固原河州兵皆芳所轄詔治馭兵姑息
罪褫職遣戍德楞泰奏以芳接仗勇往籲懇聖恩准予釋回留於邊界營分效力
行閒疏聞諭曰楊芳由字識出身不十年擢至總兵勞績出衆卽朕亦素稔其名
德楞泰此奏自係爲愛惜人才起見俟過一二年後再行酌量加恩可也十二年
五月上加恩釋回交固原提督薛大烈差遣以守備千總酌量補用十月呈請回
籍省親諭曰該員呈稱母老懇賞假省親楊芳見以守備千總補用之員毋庸迴
避本省著加恩准其回至貴州交該督撫以守備千總酌量補用十三年補松桃
協千總十五年三月特賜三品頂帶補廣東右翼鎮總兵入覲賞還花翎十月調
陝西西安鎮總兵十六年丁母憂十八年十月服闋入都道出河南值天理教匪
李文成據滑縣倡亂芳請效力經欽差大臣那彥成奏留補河南河北鎮總兵隨
那彥成楊遇春等敗賊道口賞還二品頂帶十一月進圍滑縣賊目劉國明挾李
文成以出將西走太行芳與副都統特依順保以精騎邀擊之賊遁輝縣據司寨
芳等伏騎白土岡羸師嘗賊賊空壁來犯伏兵突起斬二千五百級得旨嘉賚是
戰也賊遇伏走山上殊死鬪官兵畏賊鋒有退者芳拔佩刀立斫數人衆效死遂

大捷乘勝壓賊壘益以火攻劉國明掖李文成上礮樓舉火自焚翌日致文成之屍於滑縣傳首山東河南軍威大振上慰悅加芳提督銜先換一品頂帶賞雲騎尉世職時滑縣猶未下而陝西三才峽賊又起官兵急攻滑縣爲地道以入賊覺而先備之芳至佯掘新道而仍穴其西南深入城際實火藥賊不之覺十二月十日地雷發城陷滑縣平殄賊二萬餘捷聞下部優敘復授西安鎮總兵十九年正月帥師入陝敗賊於沙壩賊目吳抓抓吳奇譚貴分竄黑河芳趨沔縣截之復走黃官嶺先以奇兵伏其前疾追夾擊梟吳抓抓吳奇於陣譚貴與僞帥張占鼈仍由沔縣還黑河追及於徐家溝占鼈執旗略陣芳揮兵立斬之賊大潰俘馘殆盡譚逸至黑河就擒奏入賞還誠勇巴圖魯名號下部優敘閏二月賊平調漢中鎮總兵二十年擢甘肅提督道光元年調直隸提督三年調湖南五年調固原時西陲逆回張格爾不靖張格爾者逆回博羅尼都孫薩木克子長於浩罕嘉慶年間漸引衆寇邊是年秋官兵出塞捕之失利六年六月遂連布魯特比阿坦台等及安集延之衆入犯喀什噶爾白帽回阿布都拉博巴克等附之連陷西四城命大學士長齡爲揚威將軍署陝甘總督楊遇春山東巡撫武隆阿參贊集兵進討芳

請行許之十月諸軍會於阿克蘇阿城西去三百里曰柯爾坪當往來要道賊目伊瞞以三千衆據守長齡使芳先取以進兵一鼓破之焚其南北莊安集延賊帥約勒達什來援芳斬約勒達什及伊瞞既克柯爾坪師行無阻上賞其功下部優敘七年二月芳與武隆阿進剿三戰皆捷直抵喀什噶爾渾河北賊背城阻河列陣二十里夜大風乃以疑兵循河而下大軍乘霧晦潛渡上游奮擊賊大潰長驅入城張逆以數騎遁獲其兄子及阿布都拉遂復英吉沙爾葉爾羌賊目玉努斯噶爾勒仍據和闐三月芳與戰於昆拉滿擒噶爾勒收復和闐玉努斯敗走上指授方略謂宜以奇兵出烏什草地斷賊去路長齡等言兵少不可分及是渠魁果逃上以責諸將和闐故霍集占巢穴是役賊守之固芳以偏師覆之昆拉滿之戰分軍繞賊後遂縛噶爾勒上特褒芳調度有方下部優敘並嘉賚焉六月議撤官兵之半詔楊遇春入關以芳代之時張逆竄塞外芳與楊遇春方出卡掩捕賊由木吉走拉克沙復奔達爾瓦斯楊遇春軍色勒庫爾芳軍阿賴皆邊浩罕騰檄諸部令獻賊七月上賞復四城功加騎都尉世職命在乾清門行走芳在阿賴以書抵長齡言賊遁愈遠軍懸絕徼道險餉艱諸夷貪賞妄報詞不足信九月有詔班

師而芳已於七月遇博巴克之衆追之入險布魯特大至衆寡不敵協領都凌阿戰歿芳斂軍依險步步爲營一日數戰卒拔全軍以出仍以失亡將士吏議當革職上寬之芳偕長齡等善後請清叛產籌興屯田增防兵減商稅革陋規改築喀城裁守卡侍衛後又偕欽差大臣那彥成定伯克補缺章程均如議行十二月懸賞購綫密探賊蹤聲言大兵盡撤以覘賊衆虛實時張格爾傳食諸部久益窮蹙亦意歲除官兵必不備也乃率布魯特五百騎以二十有七日再由開齊山路襲喀什噶爾長齡等整衆以待賊中途覺有變復奔出卡芳統師疾追一晝夜及於喀爾鐵蓋山殲其從騎殆盡餘賊擁張逆登山棄騎而走芳督所部將卒等擒之飛章告捷上宣示中外論功行賞有差封芳三等果勇侯賞用紫韁雙眼花翎御前侍衛上行走並賜其子承注爲舉人八年上御午門受俘大武告成加太子太保銜命圖功臣四十人於紫光閣芳列長齡之次楊遇春之前御製贊曰黔省之英自幼知兵戰功久著謀而後行柯坪和闐獨顯威名竭力追擒助大功成九年凱旋入覲得旨本日楊芳來京召對見其精神強健實深嘉悅楊芳宣力邊疆生擒巨憝茲當凱旋入覲允宜再沛恩施著加恩晉封二等果勇侯晉加太子太傅

銜在紫禁城內騎馬並賞給人灑四兩緯絲蟒袍一件大卷八絲緞袍褂料各一匹大卷江紬袍褂料各一匹大荷包一對小荷包四個用示朕懋賞酬庸至意尋賜食同樂園芳及長齡哈朗阿阿勒罕保俱與焉復以芳六十生辰御書酬庸錫羨額並福壽字各一方賜之十年十月以安集延流寓逆回博巴克等糾衆入卡倡亂復擾喀什噶爾葉爾羌等地命芳爲參贊大臣協同揚威將軍長齡往剿芳奏西陲用兵難於轉餉宜平日豫籌之請於喀什噶爾添築子城移建阿克蘇城因山據險別築城於巴爾楚克以連東西聲勢輕茶稅以廣招徠藉稅入以補軍食防兵分授地畝春耕秋斂十年生聚可省轉輸報聞十一月喀什噶爾參贊大臣扎隆阿以回子郡王伊薩克通賊入告命逮問於阿克蘇以長齡往鞠之芳與哈朗阿合疏請緩其獄上斥芳等偏袒扎隆阿十一年六月詔芳回固原及扎隆阿以誣伊薩克得罪芳亦坐草率入奏鐫級十三年二月四川清溪土千戶越嵩山內外峩邊河南北各夷蠡起滋事三月提督桂涵卒於軍以芳代涵諭以迅速妥辦毋許遷延芳至清溪及越嵩山外夷已平移師峩邊奏言越嵩等廳縣環涼山數千里山外漢夷雜處漢民佃種夷地或不與夷租或地成膏腴夷人奪地人

知山內野夷爲患不知事起山外熟夷也宜立法以杜釁端上是之卽任芳與按察使花杰籌善後峩邊河北夷叛據山崗地形奇險芳遣兵攻其旁崗自按中道擣賊穴擒斬夷酋鹿畜根木雞子桑樹格毛喀喀只格河北夷多乞降廓清二十四地引兵渡銅河而南上嘉其妥協六月奏師次河南十二姓熟夷皆降惟石圈子等野夷藏匿首惡侯開道催餉以進師七月奏石圈子夷日聞風知懼縛獻首逆呈繳器械夷境廓清振旅渡河上優賚之仍令道出越巒順剿山內猺夷九月奏夷酋悔罪自投縛送起事首逆嗎基則各支夷成就撫留兵千五百鎮之而還詔晉芳一等果勇侯從優議敘十四年七月峩邊夷雅扎等支復出肆掠有旨詰責芳尋擊殺夷首哈兒擒夷目雙甲等復奏十二支夷皆讐伏願各鈐束娃子以功下部議敘九月雅扎夷又擄民人要贖雙甲等將軍瑚松額劾芳辦理不善交部嚴議部議褫職奏入諭曰此案總未妥善毫無把握鋪張妄奏本應照部議革職姑念前在回疆著有勞績著降爲二等侯革退御前侍衛以總兵往甘肅候補十五年以疾乞歸許之十六年湖南鎮筵兵變迫脅鎮道借銀累萬起芳爲鎮筵總兵與總督訥爾經額等定善後章程一緩扣道標練勇借款一兵勇不准以客

民充補一豫借銀穀限一定制一辰沅道缺以本省知府陞補一拔補備弁屯長
嚴絕苞苴皆如所請十八年遷廣西提督旋調湖南二十年英人犯浙江定海復
至天津投遞書詞上命大學士琦善赴廣東查辦英人要求無厭且攻奪礮臺二
十一年正月上以英人逆天背理詔數其罪授御前大臣奕山爲靖逆將軍戶部
尙書隆文及芳參贊大臣發兵討之諭曰計楊芳到粵當在奕山隆文之前如有
可乘之機卽迅速進剿已而琦善奏英人獻出礮臺並遣人赴浙繳還定海乞准
其通商上以英人大逆不道不許惟命芳等兼程而進二月英人乘大兵未集悉
衆入犯虎門烏涌等地時提督關天培等力戰死之賊連檣進逼省城芳至奏言
省城完厚可保無虞諭曰見在逆船駛進內河卽屬深入重地若能斷其歸路前
後夾攻可期聚而殲旃兵貴神速楊芳自知若稍存觀望豈不大負委任又諭曰
楊芳久歷戎行受恩深重應守則守可戰則戰一切剿辦機宜朕亦不爲遙制也
尋疏陳購置竹木排桐油棉花等物以備攻剿英人聞之不敢近逼上以曉暢軍
務先聲奪人先交部議敍仍諭曰計日奕山隆文等抵粵大兵雲集必可分兵進
剿卽令奕山等抵粵稍遲所調官兵陸續趕到諒楊芳必能出其不意突用奇兵

爭先制勝朕日夜盼望捷音以紓廬念三月總兵長春擊沈賊船二上以調度有方下部優敘尋奏美利堅各洋商因牽累不能貿易並英吉利洋商情亦急迫乞均准其通商諭曰英之商船雖未助逆總係一國之人斷不准其通商著仍遵前旨奮力合剿朕拭目以俟捷音之至也又偕巡撫怡良疏請准令英人所屬之港腳商船在粵貿易上以其有意阻撓怠慢軍心交部嚴議並諭曰英人非大加懲創何以揚國威而除後患見在徵兵一萬六千有餘楊芳何以不痛加剿洗乃汲汲以通商爲詞是復蹈琦善故轍殊不可解尋議革職得旨竟予罷斥轉復置身事外著改爲革職留任閏三月奕山等師至合奏賊攻東西礮臺我兵擊沈其船一焚燬一均下部優敘疊旨勉以出奇制勝迅奏膚功四月英船退出虎門收復各礮臺奕山等奏請撤兵芳於是月以病乞休命安心調理六月諭曰楊芳久歷戎行懋著勞績見在病尙未愈若仍留廣東轉恐不能靜養著卽回湖南提督之任務當仰體朕心加意調攝報國宣猷日正長也八月回湖南任二十三年以老病陳請開缺上念其勞績令在籍支食全俸以養餘年二十六年卒芳自征三省邪匪卽荷恩賚所得玉鞬荷囊不可勝紀卒之日遺疏入賞銀五百兩經理喪事

諭曰楊芳服官四十餘年戰功卓著茲聞溘逝軫惜殊深著加恩照提督例賜卹伊長孫楊恩科次孫恩桓恩桐恩檀均著於及歲時送部引見尋賜祭葬如例予諡勤勇子承注官至刑部主事先芳卒

胡超

胡超四川長壽人由行伍於乾隆六十年隨重慶鎮總兵袁國璜協剿苗匪在秀山縣黃泥埡等處殲匪多名給七品頂帶尋隨成都將軍觀成協剿湖北教匪克鳳山縣集鼓寨嘉慶元年由楚入川剿達州教匪以陳崇德踞大寧縣老木園官兵由洗沙谿乘夜進攻超奮勇撲卡受刀矛傷給六品頂帶三年六月隨四川總督勒保攻東鄉白號王三槐股匪於雲陽縣安樂坪克圓覺灘超誠數級受傷四處八月大兵擒獲王三槐殲匪數千超列頭等功尋以勒保檄率鄉勇八百名隨副都統銜前內大臣德楞泰進剿十一月擒巴州白號首逆羅其清其書於方山坪四年殲通江藍號首逆冉文儔於麻壩寨超俱在事有功五年隨參贊大臣德楞泰由川入陝追剿太平黃號龍紹周股匪於老林賊恃衆迎拒超力戰俘誠多名受傷四處六年殲龍紹周於平利縣之盤龍山七年由陝入楚追剿襄陽黃號

樊人傑股匪於竹山縣馬鹿坪逼至平口河賊衆烏水遁超率勇截擊之俘馘二百餘名首逆樊人傑淹斃奏入賞戴藍翎八年閏二月復由楚入川追剿達州青號餘黨劉學禮於巫山縣賊踞老鴉寨抗拒超偕千總周應龍等以鄉勇二百八十名僞作賊夥入其隊爲內應大兵由鐙蓋窩進乘夜內外夾擊賊大潰追殲三百人俘七十人並獲賊目熊富等嗣以首逆劉學禮由大寧縣復竄湖北界屯竹山縣老林超隨參將馬文斌等追及之偵知劉逆擁百餘匪匿埡口頭冒雨先馳入其巢兵勇繼進賊衆潰一人袍服殿後一人顧呼劉元帥速走超知是首逆也迅追六七里刺其股劉逆猶力鬪超偕鄉勇胡貴等環擊乃踣馘之並顧呼之賊黨魏習獲焉經德楞泰入奏賞銀百兩並命以千總卽用尋補四川大昌營千總五月搜剿餘匪疊有斬擒復由川入楚於興山縣白家河擒獲襄陽藍號趙鑑之姪趙聰觀等賞換花翎六月於歸州大江北岸及白石崖方尖山等處搜剿多名並擒獲賊目傅綱於柳池九年正月以巴州白號苟文明餘黨苟朝九擁衆竄匿川陝界老林超隨都司高星文等率鄉勇五百名協剿二月賊由平谿河竄藥扒超隨高星文等冒雪霧夜行林箐間直擣賊巢賊困鬪勢甚鷓張適副將吳廷剛

等由西北路齊進賊不能支乃大潰追奔至日連堽路仄冰滑未能仰攻賊亦旋遁四月賊復由打鼓坪竄望觀臺老林其地係川陝界嶺延袤數百里蹊徑險仄馬不能馳超隨副將閻俊烈等率兵勇三千五百名裹糧步行擊之八月陞西陽營守備九月以苟朝九未獲偕守備謝金章搜緝於開縣馬家營一帶十月殲賊目魏思述於石堽子先是思述習教謀逆兄子藍翎千總魏忠才發其奸拘眷屬斃於獄思述潛身苟朝九營適忠才偕同隊六人奉檄往撫苟逆思述銜前恨悉被戕至是超知係思述欲生致之以洩忿直前扭擊思述猶以佩刀迎刺超遂摔之於地殲焉奏入諭曰守備胡超搜出賊匪魏思述係戕害鄉勇軍功魏忠才等之賊被刀扎四傷始得就殲實屬可嘉著遇有應陞之缺卽行陞用十年陞巫山營都司凱撤抵任十一年陝西寧陝鎮兵叛四川總督勒保檄往會剿事平回川又隨剿達州匪徒王得先等於瓦石坪十五年署重慶鎮標右營都司十六年署中營中軍遊擊尋復署右營都司十八年二月隨巡外委劉先進藉端詐賊超以備賞巡兵爲名輒自收存迨聞有上控之信始退還寢事經總督常明訪聞查辦先於軍政案內奏參革職九月河南滑縣教匪李文成等滋事命直隸總督那彥

成爲欽差大臣偕陝甘固原提督楊遇春剿辦超投效軍營十月單騎入賊壘與數十匪搏戰斬賊目二擐其旗又截擊於濬縣中市馘數十級並奪獲礮械時賊踞道口四出劫掠超率兵於胡家營三家村等處截殲千餘名進攻道口率馬隊先驅殲十餘匪大兵繼進遂克之追殲四千餘名並擒獲賊目黃興相等又於桃源等處擊殲多名那彥成等上其功以開復原官請允之十二月進攻滑縣伏地雷火發城陷大兵乘之搜戮無算並擒獲首逆徐安國牛亮臣等那彥成等以超屢戰奮勇奏聞是月補陝西涇州營都司十九年正月以陝西南山木廂匪徒麻大旗等倡亂隨楊遇春進剿行抵胡家堡距賊衆所踞桃花坪僅二十餘里率馬步兵乘夜進比至賊已遁追十餘里馘百餘級偵知賊全股屯秦州柏楊嶺其地近傍老林兩山夾峙賊分踞山巔大兵復乘夜進比至嶺下天猶未曙賊恃衆下壓被我兵奮擊馘二千餘級勢少卻迨天明大兵分隊由左右山梁鈔襲超隨楊遇春由中路仰攻見山前賊隊有二人冠服督戰遂偕都司趙起貴等距躍先登殲之賊驚潰大兵乘勝齊進追殲二千七百餘名並俘八百三十餘名訊知山前督戰者麻大旗及賊目劉二也又於老林搜獲六百餘名二月龔貴股匪竄隴州

聞大兵追剿與向小一股匪合屯東河橋將由階州入川大兵分三路總兵特依順保掘利橋都司劉夢熊截三岔超隨副將何占鼇等由中路乘夜亟進比至東河橋賊猶未遁相持逾時超偕遊擊劉印景等繞左山梁襲之賊驚潰馘五百餘級俘四百餘名追奔至利橋特依順保迎擊之劉夢熊亦自三岔回擊三路齊攻殲向小一於陣馘二百餘級獲龔貴及其妻龍氏並賊目龍維通等三百餘名時參將王得勝等殲賊目張占鼇於徐家溝追擊餘匪至先坪老林適超偕署都司孫光烈署守備楊殿元等分路咸集腹背夾擊賊不能支追奔至石家嘴與副都統銜達斯呼爾岱等遇又合兵奮擊馘四百餘級俘三百九十名奪獲旗械無算賊悉平陝甘總督長齡等上其功命以遊擊陞用並賞勁勇巴圖魯名號三月補甘肅固原城守營遊擊二十三年署陝西西鳳營參將二十四年署秦州營遊擊道光元年四月陞甘肅蘭州城守營參將五月署陝西循化營參將二年青海野番肆擾抗不回巢超以總督長齡檄隨總兵馬騰龍等率兵由貢額爾蓋向押馬圖一帶進剿三月戰於博洛托亥馘百數十級賊大潰截獲牲畜四千九百有奇四月追至烏蘭哈達賊猶踞險抗拒我兵步行仰攻適遊擊萬彪等率兵至併力

合擊馘九十級俘二十七名獲牲畜四千六百有奇復逐北至喇凍雪嶺乘夜襲其帳馘百八十級獲牲畜六千有奇尋各路將餘匪剿逐殆盡長齡等以超身先士卒督戰甚力奏聞得旨著以副將遇缺卽補先換頂帶三年補甘肅永昌協副將經總督那彥成以番務甫竣奏暫留循化署任籌辦善後事宜允之十二月抵永昌任四年駐防西寧察漢托洛亥六年二月署鎮海協副將時回部逆裔張格爾復勾結安集延布魯特入卡滋事七月超以欽差大臣署陝甘總督楊遇春檄隨赴軍營十月張逆陷喀什噶爾等四城遣其酋伊瞞等糾南北莊回匪三千扼柯爾坪以阻進剿之路安集延匪徒復由葉爾羌應援超隨提督楊芳進攻之抵和色爾湖距柯爾坪六十餘里賊來襲超等奮力擊走之馘三十餘級翌日留都司孫旺等駐和色爾湖以斷後副護軍參領倭靈額等攻南莊超督隊攻北莊賊出二千餘衆迎拒勢甚鴟張超下馬持矛身先步戰立刃數人參將存住等繼之短兵相接戮匪過半餘向南莊逸適南莊亦被剿逐北兩軍夾擊盡殲其衆並戮賊目伊瞞等於陣奪獲牲畜無算柯爾坪之路以通揚威將軍長齡等上其功賞加總兵銜七年二月大兵自阿瓦巴特等回莊三戰三捷進至渾河沿賊衆憑河

築土岡列陣以待薄暮潛渡襲我左軍營超等擊走之是夜風猛甚嚮晨全師乘風躡渡入其壘賊驚潰沿途追殲殆盡直徧喀什噶爾城克之張逆先期遁五月四城俱克復以利闡逸匪千餘遁匿色勒庫爾卡倫超偕參將王登科等追至瑪雜馘百餘級俘三十五名復鈔新地溝截擊盡殲其衆並戮賊目左霍爾等奏入命以總兵陞用尋復下部優敘十二月補四川重慶鎮總兵以留營未赴任是月張逆糾馬步五百餘匪仍由開齊山竄阿爾圖什復謀滋事以回衆不附折回喀爾鐵蓋山超偕提督楊芳追及之殲其衆張逆猶擁三十餘騎見官兵徧近棄馬登山超偕都司段永福等亦舍騎而上躡山巔張逆將自剄超奪其刀擒之並賊目八名餘悉就戮八年正月捷聞賞加提督銜並騎都尉世職七月入覲上以超屢著戰功生擒首逆命在乾清門侍衛上行走並賞蟒衣料袍褂料大小荷包飲至與宴八月繪像紫光閣御製贊曰雄勇超羣名實克稱步戰柯坪殲賊取勝鐵蓋追馳奉將軍令手縛逆酋推恩功定是月署直隸古北口提督九月署陝甘固原提督十一月補漢中鎮總兵九年陞甘肅提督具摺陳謝諭曰汝其善體朕意潔己率下認真整飭營伍斷不可稍存恃功之心或致縱佚仍當一力慎勉尋奏

抵任又諭曰整飭營伍訓練士卒汝原熟悉然必要行之以誠實持之以久遠無論人材事務不可崇尚虛文總期功收實效十年八月安集延餘匪句結浩罕復入卡搯擾官兵迎剿被害遂圍喀什噶爾英吉沙爾城並分掠葉爾羌之色呀庫勒將取道樹窩子直撲阿克蘇以阻西四城援兵後路陝甘總督楊遇春檄超率兵四千馳往協剿超率前隊行抵察巴爾楚克亦欲取道樹窩子先解喀什噶爾圍以道塹多伏孤軍難於深入俟所隸諸鎮兵咸集改由葉爾羌大道迅赴救援十一月抵英吉沙爾圍已解沿途搜剿餘匪直逼喀什噶爾城賊聞風遁圍立解其薩漢莊竄匿千餘匪復分兵三路追剿俘戮殆盡先是超抵察巴爾楚克時以所隸諸鎮兵未集欲待其至然後發經欽差大臣協辦大學士威勇公長齡以遷延奏劾部議褫職至是相度機宜以速補遲臺路既清二城之圍亦解超所奏聞屬實上嘉其有膽有識恩予免議十二年凱撤回任十三年調陝甘固原提督十四年以甘肅皋蘭縣匪徒鄭曼年糾衆滋事坐失察鐫級留任十六年十月以前任古北口提督時失察營兵王文魁習教復鐫級留任十二月入覲上垂問陝甘軍務甚悉命在御前侍衛上行走二十年陝甘總督瑚松額奏陝西漢山山境遼

關界連川楚超籍隸四川前從征南山有年地理民情具悉請敕往周巡並閱陝西漢中營伍如所請行二十一年二月抵漢中閱操畢乞假就近回川省墓允之八月英吉利船沿海駛擾超遵旨率陝西兵二千名赴直隸山海關防堵行抵榆次縣以浙江鎮海縣失守命超爲參贊大臣偕揚威將軍奕經赴浙剿辦尋復遵諭留防天津九月偕直隸總督訥爾經額籌畫機宜奏請扼要駐葛沽以爲策應允之十月授欽差大臣偕御前大臣郡王僧格林沁等查閱直隸山東沿海形勢並設礮演放各事宜事畢回葛沽營復偕訥爾經額請賞防兵及陝勇棉衣上如所請並賜裘一襲二十二年英人就撫撤防歸伍下部議敘並賜文綺四端二十五年正月調甘肅提督六月西寧野番滋事署西寧鎮總兵慶和被戕超督兵赴永固進剿以餉運屢被番劫且所轄肅州鎮兵延玩不遵約束經署陝甘總督惠吉奏劾部議褫職上加恩改留任八年無過方准開復十一月以所轄甘涼營馬缺額未經隨時咨報部議鑄三級調用復加恩改留任二十六年五月上以超辦理番務懈弛命陝甘總督布彥泰查奏尋奏入諭曰胡超有統領邊疆彈壓番夷之責乃去秋由永固進兵之際輒調極遠之漢中官兵故爲延宕以遂其苟安之

計本年林則徐密咨派兵赴野馬川一帶地方堵截又不能卽行調往節次徒事添兵並未辦有成效著交部嚴加議處部復議褫職諭曰胡超著卽革職因念該提督曾經出師著有微勞著仍留騎都尉世職交布彥泰差遣委用以觀後效十月以病乞休允之二十七年布彥泰閱固原寧夏營伍以歷任提鎮操防懈弛追論其咎下部議處上仍留其世職二十九年予食半俸是歲卒子允林湖北鄖陽府知府候選道襲騎都尉世職允權議敘都司銜

段永福

段永福陝西長安人原籍四川嘉慶二年三省教匪不靖由鄉勇隨征出力拔補外委八年隨總兵楊芳剿辦三省餘匪四月行至神凹老林分路窮搜斃賊數人五月探知賊在房麻子一帶永福首先搶上山梁立斃十餘人十二月至龍窩梁頂永福以搜捕出力賞戴藍翎旋拔千總十八年直隸教匪滋擾永福隨陝甘提督楊遇春馳赴大名府剿辦探得賊匪分屯附近各村前往追捕連獲勝仗餘匪竄歸道口復分東西兩路而來官兵迎頭剿殺斃賊一千四百餘名生擒一百四十餘名永福以在事有功得旨賞換花翎十一月探知賊衆屯聚輝縣山內司砦

我兵併力攻擊追殺數里十二月進攻滑城用地雷轟擊南門共斃九千餘人生擒二千餘人並擒賊目牛亮臣徐安國等奏入得旨以應陞之缺陞用先換頂帶時陝西郿縣等處饑民滋事永福復隨楊遇春先赴隴州棧西剿辦十九年正月訊知賊匪李大旗楊小一與麻大旗劉二合股我兵追至柏楊嶺賊恃衆抗拒永福等分帶馬隊兩路進攻斃麻大旗劉二賊衆驚潰捷入上以永福陞補陝安鎮左營守備二十三年因失察西洋人在境潛住部議降調上加恩改爲降二級留任道光四年五月擢甘肅張義營都司六年八月逆回張格爾滋事永福隨陝甘提督楊芳馳赴協剿七年二月進攻洋阿爾巴特賊匪占據沙岡我兵三路迎擊斃賊萬餘奪獲器械無算復追剿於沙布都爾莊大破之旋偵知賊衆十餘萬人在阿瓦巴特回莊負隅抗拒官兵前後兜剿乘勝直上沙岡分投追殺至洋達瑪河一帶搜剿殆盡三月由渾河北岸進攻賊躡淺潛渡我兵連夜追擊取道喀城四面圍剿喀城克復奏入賞給利勇巴圖魯名號時張逆乘閒逃逸十二月我軍跟蹤追捕剿至喀爾鐵蓋山賊勢窮蹙永福帶兵擁上山巔生擒首逆捷聞賞給雲騎尉世職以參將卽行陞用並賞給翎管扳指荷包等物繪像紫光閣九年

補甘肅烏魯木齊提標中軍參將旋調陝西撫標中軍參將十一年授甘肅永固城守營副將十四年四月丁母艱十五年九月陝西巡撫楊名颺據呈奏請以永福情願在陝入籍下部議准十月服闋陝甘總督瑚松額以永福在甘日久熟悉邊情奏請將永福留甘肅委用諭曰前任甘肅永固協副將段永福准其仍赴甘肅委用候有副將缺出卽行奏請補用十七年補陝西靜寧協副將十八年署寧夏鎮總兵十九年補貴州安義鎮總兵二十年二月入覲來京十二月英人滋事調赴廣東因轟擊敵船得力奉旨從優議敘二十一年上命永福馳驛前往浙江隨同揚威將軍奕經辦理軍務二十二年擢廣西提督旋調浙江提督九月病卒諭曰浙江提督段永福由鄉勇出身累次出兵著有勞績前因從征回疆生擒逆裔張格爾克歲大功特加陞擢本年由廣西提督調任浙江提督方資倚畀遽聞溘逝深堪惋惜著加恩照提督例賜卹任內一切處分悉予開復並賞銀三百兩發給伊家屬祇領治喪所有應得卹典該衙門照例具奏尋賜祭葬如例予諡勇毅

齊慎

齊慎河南新野人嘉慶元年川陝楚教匪煽亂慎以武生團練鄉勇投效軍營隨直隸提督慶成擊黃號賊首齊王氏於湖北襄陽縣之葉家店受矛傷五年五月追剿白號伍懷志股匪於陝西鎮安縣之大中溪以功補直隸倒馬關外委九月敗黃號辛聰股匪於寧羌州螞蝗溝遷易州營把總六年十月白號股匪西走廣元寧羌等處官兵追及流沙坡賊潰復折回拒鬪慎擊之擒首逆楊開甲之子楊麟生敘功以千總陞用旋補大名協左營千總十一月隨總兵豐紳擊白流賊首高見奇獲之賞戴藍翎七年四月白號偽先鋒丁佳蘭等由通江竄陝西境官兵扼之於塔佛寺分三路進剿慎擒斬十餘名餘匪走紫柏山五月裹糧冒雨前進降其偽先鋒伍金華令爲嚮導獲賊日康三殲偽總兵張昌元等奏入以守備陞用十月擊賊於竹山縣之雞骨梁受矛傷八年四月剿川省竄匪於燈盞窩殲偽先鋒張老么賞換花翎六月仙女山及平陽壩之賊竄據房巫交界之大草塘慎帶兵登山斬偽先鋒劉世榮賊大潰九月陞陝西鎮右營守備十二月隨總兵劉瑞剿賊於曹家壩射殲賊日一十九年正月賊由東多羅河遁入老林慎駐兵太平河遏賊東奔七月隨副將吳廷剛沿平溪河鈔擊竄匪俘馘五十餘人十年川陝

零匪廓清賞加都司銜遇缺卽補尋補紫陽營都司十一年八月寧陝叛兵陳達順等攻撲石泉縣城慎擊卻之九月擢陝西鎮右營遊擊十八年九月河南逆匪李文成等陷滑縣分屯桃源各處慎隨陝西提督楊遇春往剿十月抵新鄭蹙賊於衛河西岸截其歸路賊渡河將南竄復由衛河驅至道口東與官兵夾擊之遂克道口敗桃源援賊兵進次滑營未定城內出賊萬餘來劫鏖戰竟夜遲明復出賊二千與外合慎躍馬橫衝之賊陣中亂大奔潰已而遇賊於陽武之延州集賊日乘車來慎發銃斃之餘皆走李文成與其黨劉懶明屯司寨爲負岫勢慎由淇縣大廟山口入毀寨垣焚碉樓無得脫者敘功賞健勇巴圖魯名號並賜翎管鼻煙壺小刀銀牌十二月官兵圍滑以地雷轟墮其城慎先登壘受石傷遂復滑縣捷聞以副將陞用先換二品頂帶會陝西三才峽廂匪滋擾慎隨楊遇春帶固原蘭州兵回陝十九年正月進兵隴州剿麻大旗劉二股匪抵柏楊嶺兩山夾峙林箐深密賊據其上官兵分左右上山由中路仰攻斬麻大旗劉二於陣時寨家山餘匪竄女兒壩慎由佛爺坪截剿殲擒殆盡閏二月陞延綏鎮神木協副將五月陞西安鎮總兵二十三年調陝安鎮總兵道光元年擢甘肅提督二年剿捕青海

口外野番屢有斬獲餘賊竄雪山一帶慎督兵追擊斬剛咱族大頭目乙旦木斃賊黨二百餘人擒噶布古等十六人上嘉之賞玉柄小刀松石壽字翎管白玉搬指大小荷包六年六月逆回張格爾叛陷喀什噶爾等四城七月伊犁將軍長齡以哈密爲新疆咽喉奏派慎帶兵駐劄應援各城嗣又以阿克蘇爲回疆適中要區奏調防守八月抵哈密慎以都齊特軍臺被焚參將王鴻儀等被圍甚急飛催各路策應將所帶甘涼兵三千留六百名駐守哈密餘兵派將領管帶前進並籲請效力討賊上嘉其急公命馳往阿克蘇俟楊遇春大兵雲集相機進剿九月丁父憂諭曰甘肅提督齊慎久歷戎行素稱勇幹見已馳抵阿克蘇隨同長齡等剿辦逆回當軍務喫緊之時驟難更換齊慎受恩深重亦必不肯以私情廢公遽請回籍著仍留軍營帶兵進剿無庸開缺俟軍務告竣再令回籍補行守制旋經長齡代奏請假成服諭曰齊慎行抵庫爾勒地方聞知伊父病卒請賞假七日成服假滿卽馳抵阿克蘇聽候調遣齊慎急公圖效著加恩賞銀二百兩令程祖洛由河南藩庫提交該提督家中以爲治喪之資並著長齡傳旨嘉獎七年二月駐兵烏什卡外偵知附逆之奇里克愛曼布魯特比庫圖魯克謀劫烏什慎密派弁兵

往緝獲之並其弟色第克等七人凱撤進關十月請假回籍守制八年假滿入覲賞文綺復以回疆底定在事功臣大學士公長齡等四十人繪像紫光閣慎與焉御製贊曰新野武侯滑縣擊賊提督兩省忠誠報國烏什防邊擒剿出力大頭目誰庫圖魯克九年調直隸提督十年閱古北口外營伍先後扈蹕謁東陵隨圍十一次十二年因病陳請開缺調理諭曰齊慎前在楚省軍營兩受矛傷滑縣首先登城石傷尤重實爲奮勇出力直隸提督任內整飭營伍訓練操防俱臻妥協茲因傷溼復發一時未能就痊著允所請准其開缺回籍安心調理一俟病痊卽來京另賞差使十三年三月諭河南巡撫楊國楨曰前任直隸提督齊慎上年因病請假回籍見在調理日久自必就痊著派員前往看視傳旨詢問該提督如宿疾已痊著卽迅速來京陛見四月在籍奉旨仍授甘肅提督十六年調四川提督十七年六月行至涼州舊疾復發請假調理諭曰四川提督統轄全省營務最關緊要齊慎操守清廉訓練認真朕所深知是以將伊調補四川提督用資委任茲該提督因駭疾復發懇賞假數月調治著毋庸限以假期卽於途次安心調理准其緩程行走赴任辦事以示體卹八月抵四川會馬邊雷波夷匪滋事十一月督兵

進攻屢戰皆捷擒夷目多人毀其巢並救出被虜民人二百七十餘名得旨嘉獎
十八年二月調雲南提督十二月仍調四川提督十九年五月越巂夷匪出巢搶
掠借四川總督寶興剿平之先是慎借寶興以馬邊越巂等五廳縣夷匪不時出
擾會議防邊章程奏入上命於各省撥銀一百萬兩爲經費之需以期一勞永逸
八月借寶興覆奏防禦夷匪練兵爲要此次添糧募勇已先期於各鎮協營應裁
糧缺均勻酌抽其應移駐將弁亦擇其熟悉夷情者派令任事第當此積疲之後
必須提督親往督操其築堡設汛及編立團練各章程亦須文武會辦上命慎親
往督操認真校閱並親赴各處督率鎮道將一切應辦事宜妥爲經理二十年英
人犯順命慎爲參贊大臣馳赴廣東借靖逆將軍奕山等剿辦四月抵廣東率川
兵五百駐佛山鎮防堵五月以參贊大臣楊芳患病命慎移駐省城軍營十二月
諭曰該將軍等擁兵坐視株守省城何時方可蕝事著奕山齊慎祁墳各抒所見
不必會商分摺密奏尋慎奏已將水戰器械製齊見在挑選兵勇俟新正風順水
陸並進上以慎及奕山祁墳所奏雖主戰主守不同而毫無確見嚴飭之二十二
年正月仍爲參贊大臣迅速馳往湖北崇陽縣剿辦匪徒抵九江適崇陽亂平諭

令馳驛兼程前赴浙江會同揚威將軍奕經等辦理洋務既抵浙命往曹娥江並上虞等處會同防剿旋移駐江蘇鎮江六月英人闖入大江犯京口慎奮勇督戰節次擊退英船突有敵軍由西北登岸慎率將弁迎敵斃敵目一殲三百名敵復以車載礮上岸由閒道撲北門分股攻西南兩門城內漢奸舉火應敵鎮江遂陷慎收集潰兵退守新豐鎮自請從重治罪上命帶罪立功以觀後效旋督兵潛赴鎮江摸樁打仗斃敵多名十月奕山奕經等被逮諭曰齊慎帶兵前赴江蘇不能保守鎮江事後又未能用兵收復亦有應得之咎著交部嚴加議處尋議革職得旨齊慎於廣東被圍時駐劄佛山且到浙在後迨鎮江失陷尙能設法摸樁殺斃多名尙可稍從末減著加恩改爲革職留任八年無過方准開復尋以英人就撫回四川任二十四年二月巡查營伍三月行次馬邊廳卒遺疏入諭曰四川提督齊慎服官四十餘年歷次軍務無不在事馳驅戰功卓著自簡任四川提督以來訓練操防尤極認真方資倚畀遽聞溘逝殊深軫惜著賞加太子太保銜照提督例賜卹任內一切處分悉予開復伊孫候選知縣齊偉著於服滿後送部引見所有應得卹典該衙門察例具奏尋賜祭葬予諡勇毅子重義二品廕生戶部候補

主事孫偉湖北大冶縣知縣俸候選同知健候選通判

羅思舉

羅思舉四川東鄉人嘉慶元年川陝楚教匪不靖達州首逆徐添德東鄉首逆王三槐等糾衆嘯聚陷東鄉思舉以鄉勇隸署四川總督侍郎英善軍營隨往協剿二年三月賊撲萬古樓卡座思舉併力轟擊賊敗走退屯精忠寺思舉復從山後撲入賊營與官兵三面攻擊克之六月賊衆敗走前河會湖北襄陽首逆齊王氏姚之富由豫竄川合爲一股雲陽教首高名貴屯聚陳家山復糾衆應之思舉誘賊出巢奮勇截殺擒高名貴等四百餘人捷入賞戴藍翎以千總卽補尋補四川夔州協右營千總三年七月進攻安樂坪擒賊渠王三槐八月東鄉股匪冷添祿屯祖師觀負隅拒守我軍乘夜由蛇皮峯攀援潛上直抵賊巢思舉首先跳越壕溝拋火焚巢賊驚潰乘勢大敗之連奪魚鱗口銅鼓包一帶賊卡奏入以應陞之缺陞用九月賊退據祖師觀山梁官兵分道夾擊思舉從山左潛登撲開賊卡殲賊四百擒百餘旋因克安樂坪功以守備陞用十二月老觀嶺賊匪潛來撲卡思舉豫爲設備賊至槍箭競發斃賊三十餘零匪奔竄是月補綏寧協右營守備五

年正月東鄉股匪張子聰屯據馬鞍山恃險抗拒思舉由郎家洞分兩路夾擊殺賊九十餘擒賊日賀國泰等六人捷入賞換花翎九月東鄉股匪度向瑤向豐城塞竄逸思舉迎頭截擊殲賊四百擒賊日郝長壽等一百餘十月陞陝西安城守營都司六年二月通江藍號股匪陳朝觀襄陽白號股匪魏學盛等由楚折竄竹園坪思舉探蹤鈔截斃賊二百餘餘匪走土地壩大山梁我兵乘勝追剿忽有援賊三千來應思舉衝入賊隊奮勇鏖戰戮偽總兵陳天奇於陣捷聞以應陞之缺陞用三月四川總督勒保以大功將次告薨奏請鼓勵賞蘇勒方阿巴圖魯名號旋擢四川松潘鎮標中軍遊擊四月攻賊於雙龍碕奪卡三五月襄陽藍號匪衆向平利縣之大渝河逃竄思舉設伏以待賊至伏兵突出奮力兜剿執偽元帥鮮奇文偽總兵艾廣雲偽先鋒張士龍並殲賊五百餘六月東鄉白號首逆湯思蛟劉朝選走東湖我兵偵蹤截剿擊敗之於溫水溝八月巴州白號股匪由楊柳壩竄核桃壩思舉帶兵截殺大敗其衆九月巴州白號首逆苟文明由陝竄楚屯紮老鴉鋪意圖攻撲新寨思舉帶領馬隊由銅關堡進攻截其後路敗之於楊柳田十月改攻迴龍溪十二月克瓦山溪獲賊日苟明獻苟文舉是月陞山西北樓營

參將七年正月追剿度向瑤股匪於風洞子二月賊由大堰坪犯洞寨思舉帶兵鈔截大敗之三月擊賊於萬樓四月移攻蔣家灣殲其衆五月由龍洞趨渡口崖擒僞總兵唐仕鳳僞先鋒楊士祥六月剿賊於團城擒白號僞先鋒袁登朝僞總兵白如亮及首逆湯思勝之弟湯思瑤餘賊遁麻柳壩我兵乘勝鈔襲擒斬殆盡七月偵知白號賊首劉朝選糾合各股餘匪屯聚小神堂思舉迎頭截殺敗之於仙女溪賊潰我兵躡尾緊追執劉逆於鞞底山下部議敘尋移兵雲陽一帶老林擒剿零匪八月克藍廠溝九月追賊於康家溝擒僞總兵羅道雲僞先鋒沈文學韓勝等二十六人殲斃甚衆十月擒白號首逆張簡於陳家坪思舉均在事有功得旨褒嘉十一月擒賊首唐明萬於石柱坪捷入諭曰唐明萬係積年著名首逆羅思舉緊躡賊蹤臨陣生擒奮勉出力著交部議敘並賞給白玉四喜搬指一箇大荷包一對小荷包二箇十二月敗賊於袁家坪八年正月搜捕零匪於觀音崖老龍洞孫家漕一帶疊有斬獲閏二月擒賊目袁克恭等三十六人於趙家觜三月遇賊於火天岡敗之四月零匪嘯聚菜子坪思舉乘夜圍剿悉就殲擒五月獲賊於花藥山六月由羅溪洞躡蹤追剿敗之七月克黃楊坪十月追賊於瑪瑙溪

十一月零匪分竄油房溝泥埡黑峒溝柯家坪一帶思舉帶兵偵緝擒斬多名九年正月擊賊於高峯寨殲之二月追餘匪於白筍坪十二菴石渣河打鼓坪等處疊有斬獲九月擒僞總管伍應榜於紅花溪尋陞太平協副將十年正月敗賊於洋峪塘五月殲僞元帥王世貴僞總兵謝應洪於十里坪上以王世貴爲著名首逆日久稽誅思舉探蹤會哨奮力迎敵將該逆及謝應洪一併殲斃嘉之六月連克白果壩黃安壩零匪搜斬淨盡十二月大功告成凱撤回營太平協距東鄉在五百里內思舉請照例迴避四川總督勒保以思舉於太平一帶老林最爲熟悉奏請留任以資巡緝允之十一年綏定逆匪王得先等煽亂思舉帶兵協剿全數撲滅下部優敘十二年陝西瓦石坪叛匪韓金堂等糾衆滋擾思舉帥師往剿斬賊渠韓金堂周士貴於陣平之上以思舉不分畛域迅獲大勝賞加總兵銜十八年陝西岐山縣三才峽木廠匪徒萬五等脅同饑民肆行劫掠上命四川提督多隆武駐兵川北遇有竄匪入川督同思舉截剿十年正月思舉帶兵分布婁隘盡力迎截賊不得入川境安堵九月擢甘肅涼州鎮總兵十月調四川重慶鎮總兵二十年瞻對逆首洛布七力恃強劫奪抗拒官兵思舉帶兵剿辦殲洛布七力及

其妻洛布竹馬子溫布阿更並大小頭目十七人下部議敘道光元年正月陞貴州提督五月調四川提督十月調雲南提督五年調湖北提督十二年正月湖南江華縣逆獠趙金隴脅衆煽亂拒傷官兵上以思舉久歷戎行命馳往協剿二月抵永州聞賊勢益起提督海凌阿及副將馬韜遊擊王國華守備吳鑑力戰死新田縣知縣王鼎銘亦同時陣歿思舉以徵調官兵未能卽至賊北竄九嶷南奔兩粵聚則易殲散則難撲於大兵未集之先檄調弁兵分道防堵遏其要路三月趙逆復折回新田之楊家鋪其黨趙文鳳糾衆二千與之合屢犯桂陽意圖北竄思舉帥師合力兜剿敗之於羊泉焚其巢殲賊三千餘擒逆子趙幅金等及逆黨五十餘人捷入得旨褒嘉下部優敘五月餘黨悉數殲除大兵凱撤諭曰逆獠趙金隴聚衆滋事傷及大員官兵朕調派羅思舉等前往剿辦茲據奏賊匪全殲該逆罪大惡極必應生擒解京盡法懲治方足以彰國憲而快人心今據稱殲斃未能生擒不滿朕望惟此番剿辦一切機宜俱臻妥速且調度有方深堪嘉尙羅思舉著賞戴雙眼花翎並賞一等輕車都尉世職尋廣東獠匪趙子青廣西獠匪盤均華糾合餘黨連犯楚境均經我兵殲擒盡置之法七月思舉偕尙書禧恩將軍瑚

松額等會議江華善後事宜臚陳九條一籌撫卹一重官守一勤巡哨一清叛產一嚴保甲一查搖俗一懲奸棍一收火器一獎義勇均如所請行二十年卒遺疏入諭曰羅思舉由鄉勇出身在四川陝西等省軍營效力經朕擢任提督道光十二年因剿辦搖匪出力賞給世職並賞戴雙眼花翎前後帶兵剿賊屢著戰功自調任楚省以來控制撫綏均臻妥善方資倚任遽聞溘逝殊堪軫惜著賞加太子太保銜照提督例賜卹任內一切處分悉予開復並賞銀三百兩治喪應得卹典該衙門察例具奏尋賜祭葬予諡壯勇子本鎮襲世職

張必祿

張必祿四川巴州人嘉慶元年川楚教匪不靖必祿由鄉勇隨川北鎮總兵朱射斗剿辦徐天德王三槐股匪二年二月克東鄉四月克金峩寺毀其巢旋進攻王家寨連奪茨菇梁等處賊卡擒斬甚多敘功給六品頂帶閏六月隨朱射斗進攻方山坪賊巢復躡踪追剿屢敗之毀其營九月剿冉文儔羅其清等股於巴州連敗之芝頂山石笋塘四年正月攻克麻壩寨擒冉文儔三月追剿包正洪股匪於萬縣康家坪又於石峩山夾擊戮千數百匪六月擊賊於開縣九龍山復冒雨追

奔敗之於雲陽縣小毛坪包正洪殪必祿均在事有功受槍傷奏入賞戴藍翎五年隨四川提督七十五剿龍安府屬一帶竄匪接戰於摩天嶺必祿復受槍傷換五品頂帶六年五月追湯思蛟等股至雙龍洞賊踞亮垭子山梁侍衛武隆阿等率同必祿督兵搶上短兵相接賊大潰復馳擊之連破賊卡八月苟文明分股賊匪經官兵擊敗於核桃壩復奔牛磊口必祿擒賊目苟潮明苟文懷又追敗之於王道河必祿戰必深入賊陣屢被賊矛傷股總督勒保上其功命量予陞拔尋陞直隸提標中營把總七年五月苟逆匪衆擾陝境秦嶺一帶自太平峪化嶺灣東竄必祿迎頭截擊戮三十餘人賊折而西旋於太平峪追剿俘十二人卽用爲前導向老林窮追於密箐中陡遇伏賊僞先鋒王世貴立斬之七月苟文明踞花石巖必祿率兵勇仰攻受石傷仍奮擊之賊大潰苟文明墜崖下殲焉經略額勒登保奏聞得旨以守備陞用八月補蔚州營守備九月搜剿南山一帶零匪斬馘甚夥並擒賊目苟文清苟起立等十一月賊向窩橋溝一路東竄必祿追至張九溝擒李奎芳等九名夜搜賊於天牢地方深林中獲藍永才明日追至安溝口又獲徐學忠八年正月賊復由秦嶺老林西越太白山潛遁必祿以陝甘總督惠齡檄

偕總兵李應貴兜截擒十餘賊追奔至太平腦遇賊數十人自深箐中突出迎擊之立斃四人餘匪竄太白河復躡蹤追擊屢有斬獲十一月賊竄川陝交界之瓦石坪西代池其地林深雪積止通樵徑賊衆憑高遠望見我兵雲集向雞公山梁下伏匿必祿帶兵乘夜疾進於黎明抵山頂卽乘勢下壓大敗之仍偕各營分路追剿九年七月賊由三岔谿竄踞鳳凰塞必祿由塞右進與各路合力攻擊擒斬賊目及餘匪數十人賊潰散又深入窮搜剿除殆盡是年三省教匪平八月調四川越嵩營守備十七年軍政卓異十八年陝西青藍紅線各號股匪滋事擾漢江南北必祿隨成都將軍賽冲阿等剿辦十九年追剿線號苗小一等匪於洋線碾子溝賊踞山梁抗拒我兵分兩翼仰攻必祿偕參將朱承受等從左路擊破之賊合紅號匪衆竄寨家嶺必祿復由小王廟鈔出嶺右督兵力攻賊不敢拒四散狂竄苗逆率餘黨竄月亮坪必祿等追至多所斬獲擒賊目李大旗何貴苗小一亦被殲山下旋將零匪悉數殲擒四號殲除淨盡捷聞賞換花翎以都司陞用先換頂帶二十年補維州左營都司二十二年寧越夷匪滋事必祿以總兵常明檄帶兵赴剿由普雄過河取道上下落姑入波落老林山徑險仄夷匪伐木塞路官兵

併力開道以進逆夷於雲霧山巴租峽口等處恃險抗拒相持兩日必祿密選敢死士從旁路攀藤附葛繞至山巔舉火夷大駭大隊繼至斬級數百逆夷潰散遂入其巢毀寨落三百餘間其夷日阿癡先匿林叢內尋亦就獲事平得旨以應陞之缺陞用二十五年調重慶鎮標右營都司道光三年陞太平營遊擊六年回部逆裔張格爾糾衆入犯連陷喀什噶爾英吉沙爾和闐葉爾羌四城參贊大臣武隆阿以必祿諳練勇往檄赴軍營七年三月大兵進發逆回遣其黨數萬在洋阿爾巴特莊外列陣沙岡迎拒我兵分三路進攻必祿隨參贊楊遇春鈔擊其左大破之賊衆潰竄復跟追三十餘里殲賊萬餘俘三千二百有奇揚威將軍長齡等奏入賞勵勇巴圖魯名號時喀什噶爾等城以次克復張逆遁上復命提督楊芳爲參贊大臣帶兵追捕七月必祿隨至卡外於塔里克達巴罕地方有馬步二千餘匪由北山溝內突出我兵迎擊賊敗退山梁依險拒守必祿偕副將郭繼昌等率健卒乘夜潛繞賊後伏值進攻之際由後路突起兜擊斬千餘級尋以克復和闐並追殲賊目玉努斯等功賞加副將銜八年回疆平以豫保引見命交軍機處記名旋陞提標中軍參將十年擢貴州靖江協副將十二年四月調赴湖南隨提

督余步雲剿江華縣猺匪時賊踞羊泉地方官軍四面圍攻必祿帶兵擊其西連敗之毀其巢俘馘甚衆首逆趙金隴殲焉下部優敘嗣粵猺趙仔青復竄湖南於江華濠江沖糾二千餘人在大小林岡劫掠欲斷官軍糧道必祿帶將弁偵探至銀匠沖賊踞山頂下壓必祿奮力指揮迎擊殫黃衣賊目十餘人賊潰復於麻江擒趙仔青及逆屬數人餘匪就殲經欽差大臣宗室禧恩等奏保賞加總兵銜八月隨禧恩移師廣東剿辦連州排猺賊踞大掌嶺後山聞官兵至由林分股撲出必祿等迎頭轟擊又乘夜撲營復擊敗之旋進攻陽公歧賊寨必祿由左山梁與諸軍合擊賊大潰剿撫兼施逆猺悉定奏入得旨以總兵卽補並下部優敘十二月授廣東高州鎮總兵十五年調四川建昌鎮總兵十六年四川總督鄂山查閱夷地情形奏請增改善後事宜上命與必祿悉心籌議十七年九月馬邊雷波等廳屬夷匪糾衆劫掠官軍兩路赴剿必祿帶兵進攻馬邊一路由走馬坪直至老林連破夷寨其大峯頂地方勢尤峻險聚匪衆多復奮力攻克之殲擒夷目並餘匪多名十一月進兵天喜會合大軍併力逼攻涼山克阿哈等支夷寨下部優敘又以哦雷等支寨落繁多衆尤兇悍必祿督兵先驅直入匪衆恃險抗拒我兵奮

勇仰攻擣其巢穴大破之羣夷震懾十八年正月成都將軍凱音布等奏入賞加提督銜旋陞四川提督七月夷匪復出沿邊滋擾上命偕凱音布相機妥辦毋致釀成邊患九月奏夷匪經節次剿捕見已斂戢地方均臻安謐諭曰嚴飭員弁實力巡防各要隘毋令竄入內地十一月以夷匪仍未安靜剿辦失宜下部嚴議部議褫職得旨仍留四川交總督寶興差委十九年帶兵巡歷沿邊各要隘布置嚴密夷匪無隙可乘邊民漸安二十年督修防邊碉堡營房各工事竣寶興奏請鼓勵加恩以千總遇缺卽補尋補緜州營千總時英人不靖犯廣東海口攻奪礮臺上命奕山爲靖逆將軍討之必祿遵旨赴營差委旋陞梁萬營都司二十二年英人陷鎮江犯金陵上命必祿馳赴江蘇交該督撫差委復授建昌鎮總兵二十四年陞雲南提督二十五年永昌回民滋事必祿督率兵練分路進擊殲逆回馬大並夥匪數千又追至小松寨等處疊次剿戮回匪乘夜潰散上嘉其先事準備大挫賊鋒下部優敘二十六年必祿年力衰邁命原品休致復以曾經出師屢著勞績賞食全俸以養餘年三十年九月廣西會匪肆擾修仁荔浦等處詔起必祿迅往會剿仍以提督補用十一月行抵潯州卒經廣西巡撫鄭祖琛奏入諭曰前任

雲南提督張必祿由義勇出身歷在四川陝西回疆湖南廣東各處軍營打仗疊蒙皇考厚恩賞給巴圖魯名號由專闕擢至提督旋因年老休致在籍支食全俸本年來京朕見其精力尙健暫准回籍以備召用嗣因廣西匪徒滋事特令馳往會剿仍以提督候補念其久歷戎行深資倚任乃昨據鄭祖琛馳奏該提督帶兵赴粵在途患病猶復力疾前進甫至潯州病竟不起覽奏實深悼惜著加恩賞加太子太保銜照提督例賜卹歷任一切處分悉予開復應得卹典該衙門查例具奏其靈柩由粵回籍並著沿途地方官妥爲照料伊子捐職同知張由基恩廕生張由庚均俟服闋後由吏部帶領引見候朕施恩尋賜祭葬予諡武壯子由基捐職同知由庚一品廕生

李國棟

李國棟貴州威寧州人父自新原任貴州安籠鎮標右營守備從征金川陣亡國棟襲恩騎尉世職入本省撫標效用乾隆五十三年補清江協右營左哨千總六十年貴州逆苗石柳鄧湖南逆苗石三保聚衆肆擾隨雲貴總督福康安帥師往剿屢著戰績嘉慶二年三月貴州南籠狝苗王囊仙等煽亂國棟隨雲南鶴麗鎮

總兵官德英額帶兵剿捕隸遊擊雙林軍關嶺爲南籠出入要路賊踞險抗拒國棟隨雙林由阿滿寨懸崖而下潛出賊後擒斬無算五月賊圍新城掘官兵進剿之路我軍縱礮遙擊陽作進攻分兵從下游躡渡潛襲其後賊潰新城圍解疾引兵進發賊踞南籠城西之碧峯山負嵎抗守我兵分路夾擊燬賊寨二十三殲擒甚衆國棟敘功居最擢定廣協左營守備八月攻克洞灑首逆王囊仙韋朝元皆就擒狎苗平時川陝楚三省教匪不靖分號滋擾十二月檄赴四川軍營三年三月東鄉白號首逆王三槐等竄踞雲陽縣之安樂坪國棟率兵進擊斬俘甚夥四月敗賊於儀隴之孫家梁八月於達州寶寧順慶廣元一路追剿賊匪疊有斬獲九月巴州白號首逆羅其清等屯踞大鵬寨我軍由高梁寺史家壩分路進剿克之四年襄陽藍號首逆張漢潮竄至陝境國棟躡追入陝屢戰有功擢四川提標前營都司五年四月追剿白號餘匪高二馬五至甘境賊南竄秦州屬之文縣河邊躡淺渡河攻撲卡狼寨土堡並掘官兵徑渡國棟豫領弁兵各攜槍礮隱伏河北登樓山我兵半渡賊分股來撲國棟於半山列隊連環轟擊賊卻我軍共濟併力夾攻敗之五月追捕黃號股匪楊開甲等至陝西之洋縣殲開甲等賊目龐洪

勝並生擒其子龐有兒等多名經略大臣額勒登保上其功得旨李國棟著陞補雲南撫標右營遊擊六年六月黃號股匪伍懷志率餘黨竄至舊縣關意圖東遁爲官軍所遏復西竄入秦嶺之巔藏深林密箐中國棟率精銳裹糧追躡士卒皆攀援直上奮勇截擊殲賊三百餘擒懷志於七十二峪捷入賞戴花翎十一月白號股匪高見奇竄入紫陽之三星寨半山屯劄我兵奮勇衝擊國棟於右首山梁伏兵以待賊至槍石並發擊敗之乘勢壓下山梁併力圍剿擒見奇及僞元帥周萬友等八名下部議敘七年正月檄赴川陝楚三省接壤之斑鳩關帶兵駐劄扼賊往來之路疊有斬擒五月偵探黃號股匪王國賢由漳洛河竄來國棟帶兵迎剿至湖北竹山之大溪河俘馘多名八年大功戡定檄調協剿零匪由陝西南山一帶搜捕入川殲擒甚夥九年正月零匪屯聚盤河腦老林國棟帶領兵勇鑽林越箐直搗賊巢賊聞聲外撼憑高抗拒我兵奮勇仰攻賊窮蹙復據險爲南奔計國棟躡蹤追剿二月賊由菜子壩折向後坪東竄於百里荒十二庵追及之賊復抵死下撲我兵奮勇衝擊殲其衆三月賊向馬溪客僧河潛逃又敗之於腰磨廠蝦蟆石餘匪遁入化龍山之天工堰嘯聚復率勁旅三千輕騎躡追賊竄于澗坪

克之六月由開縣屬之紅尺壩追賊至陝西平溪河擒僞先鋒羅思蘭等多名餘賊悉平八月凱旋回營十二年署元江營參將十五年陞威遠營參將二十年署楚雄協副將二十一年補維西協副將二十二年臨安江外夷匪高羅衣等謀不軌擾及元江雲貴總督伯麟檄國棟帶領兵練由西路協剿偵知賊匪屯踞水卜竜山梁我兵取道進攻北至百勝寨山腰突有賊數千分爲三股徑撲官軍國棟亦分三路迎擊槍礮齊施殲賊四百餘賊潰乘勝躡追至水卜竜山梁焚賊寨六斬級五十二並奪獲器械無算首逆高羅衣竄觀音山之宗哈寨負險踞守國棟督率弁兵由黃毛嶺進發會合遊擊方振奎併力攻剿賊嘯聚山梁抵死抗拒我軍奮勇搶上槍礮轟擊勢賊窮蹙羅衣及其甥朱木頭悉就擒捷聞下部優敘二十三年授臨元鎮總兵官道光元年正月永北廳屬夷人與漢民構釁四川會理州夷匪梅依老十乘機煽惑招集芴芴裸獾數千焚掠阿喇山舊衙坪村寨二月國棟奉檄帶兵赴大姚一路進剿三月偵聞賊踞拉古地方爲巢克之賊遁入鴿子山復帶兵搜捕斬戮百餘擒首逆陳添培賊目楊進寶馬金才等八名奪獲器械無算乘勢由他鑪山箐進攻直抵賊巢俘斬多名生擒賊目陶顯貴等雲貴總

督慶保上其功下部優敘五年擢雲南提督七年查閱本標營伍劾守備楊得日雲騎尉鄧中彥把總李朝相等弓馬庸弱降革勒休有差十六年調補浙江提督十八年卒於任遺疏入諭曰浙江提督李國棟久歷戎行屢經出師懋著勞績經朕擢任提督方資倚任茲聞溘逝殊堪軫惜著加恩照提督例賜卹任內一切處分悉予開復應得卹典該衙門察例具奏尋賜祭葬諡襄恪子應瑞見官廣西候補府經歷

劉允孝

劉允孝甘肅肅州人由武舉入營效力嘉慶四年隨征川陝楚三省教匪屢著戰功拔補甘肅鎮海協標永安營千總五年陞永固協標平川堡守備十八年九月直隸長垣教匪煽亂延及河南陷滑縣城允孝隨固原提督楊遇春帥師往剿十月馳抵衛輝偵知賊衆分屯丁欒集我兵合力兜擊斬馘六百越日進攻道口克之毀其巢殲賊萬餘十二月克復滑城擒首逆牛亮臣徐安國匪黨盡殲捷入命以應陞之缺陞用先換頂帶適陝省南山匪徒滋事延擾隴州香泉等處十九年正月復隨楊遇春進剿桃花坪大敗其衆追躡至柏楊嶺其地兩山夾峙倚傍老

林我師分路仰攻殲賊首麻大旗斃賊千七百餘奪獲器械無算二月剿沔縣股匪龔貴等於三元壩允孝首先迎擊槍箭齊施賊潰走塘子口我兵據山下壓首從悉就斬獲論功賞戴花翎十月補永昌協標張義營都司道光四年擢湖北荆門營遊擊五年調漢陽城守營遊擊十年陞提標中軍參將十二年二月湖南江華縣猺匪趙金隴糾衆倡亂隨湖北提督羅思舉馳往協剿三月趙逆竄新田之楊家鋪賊黨趙文鳳與之合夜犯桂陽意圖北竄大軍截殺於羊泉允孝由東南面進擊晝夜圍攻燬其巢殲賊三千餘殲趙逆於陣生擒逆子趙幅金幅銀及賊黨五十餘人捷聞賞志勇巴圖魯名號並以副將儘先陞用先換頂帶尋凱撤回營十三年陞直隸督標中軍副將十五年擢天津鎮總兵官十八年帶兵搜獲洋船夾帶鴉片煙土十餘萬兩上嘉其辦理認真下部優敘二十年授湖北提督二十一年崇陽逆匪鍾人杰等聚衆戕官建立僞號連陷崇陽通城二縣並遣匪黨肆擾通山各縣城允孝偕湖廣總督裕泰督兵會剿二十二年正月由西泗橋進兵遇賊於西嶺槍礮齊發併力窮追乘勢抵薄刀嶺賊驚竄遂奪其卡并連克小嶺界頭卡捷入上以允孝調度有方下部議敘旋由石盤山五路進發接戰於黑

橋殲賊三百餘匪衆屯白蟻橋拒守我兵奮勇衝殺斬級五十生擒首逆鍾人杰等並夥匪就殲上嘉其調兵防剿謀勇兼施賞換雙眼花翎三月鍾人杰等檻送京師治如律允孝子耀武隨同剿賊總督裕泰上其功得旨劉耀武以營千總發往原籍補用並戴藍翎五月以英吉利船攻犯寶山命允孝調署江南提督防禦江省六月英人入犯京口允孝帶兵往救嗣因鎮江府城失守自請從重治罪上加恩令戴罪立功以觀後效旋因病陳請開缺允之八月卒年六十七諭曰前任湖北提督劉允孝由武舉出師川陝等省經朕擢任提督本年剿辦崇陽匪徒蕨功迅速賞戴雙眼花翎旋因派令防堵江省積勞成疾已有旨准其開缺回籍調理遽聞溘逝悼惜殊深著加恩照提督例賜卹任內一切處分悉予開復應得卹典該衙門察例具奏伊長子把總劉揚武著以千總陞用次子候補千總劉耀武著以千總卽補用示朕推恩延賞至意尋賜祭葬如例諡果恪子揚武耀武均候補千總

王得祿

王得祿福建嘉義人乾隆五十一年臺民林爽文等倡亂陷嘉義城得祿以武生

捐資募勇從官軍克復縣城授把總五十二年九月林復圍城得祿隨總兵柴大紀督兵固守以功加千總銜十一月將軍福康安帥師渡臺救援嘉義圍解得祿帶領義民搜捕大坪頂等處餘黨疊有殲獲賞戴藍翎五十三年擊之於琅嶠焚其寨擒羽黨莊大田臺灣平敘功賞換花翎並五品頂帶六十年遷福建督標右營千總嘉慶元年五月調督標水師營千總十月出洋巡緝遇賊於獺窟得祿首登船獲首逆吳興信等八人二年閏六月在斧頭外洋擒盜莫阿三等燬其舟八月擊沈盜船於竿塘洋斃賊十餘擒賊二十餘三年追賊洪接等於白犬洋盡殲之奪獲船隻礮械下部議敘四年升南澳鎮左營守備六年獲盜陳高等二十餘人於金鄉洋七年二月擢金門鎮左營遊擊時洋盜蔡牽朱潰等分擾各洋勢張甚得祿隨浙江提督李長庚擊之五月擊蔡逆於東滬洋沈其船二獲賊目徐業及其黨百餘人十一月遇盜船於崇武洋擒呂送等三十餘人下部議敘九年隨總兵羅江太擊賊於虎頭山洋面沈其船一餘盜逃竄得祿奮力追躡奪獲船隻礮械火藥甚多十年五月蔡逆竄澎湖之虎井洋偪岸欲登我兵迎擊克之八月陞署澎湖協副將九月遇蔡逆於水澳洋面擊之燬其船二殲賊百擒朱列等二

十餘人十一月蔡逆竄臺灣勾結岸匪圍困府城李長庚檄得祿守州仔尾以斷岸匪之援十一年正月敗賊於柴頭港二月乘勝破州仔尾賊巢斬獲匪黨以未獲其酋禡頂帶仍責令戴罪立功五月蔡逆復窺鹿耳門得祿率兵船首先衝入賊隊獲船十沈船十一擒賊目林略傅琛及其黨二百餘殲賊千七百人捷聞賞加總兵銜十二年擢福寧鎮總兵時蔡逆由竿塘西竄得祿擊走之十二年六月調南澳鎮總兵七月追擊渠盜朱潰於雞籠洋斃賊七百獲船十四十一月偵知朱潰賊黨在宮仔前鰲壳澳一帶遊駛我師追躡至古雷洋得祿手發一矢射殪賊目朱金復擲火斗焚燬賊船俘賊目張祈及夥賊五十餘奏入賞玉搬指荷囊並下部優敘十三年正月授浙江提督六月調福建水師提督偕總督阿林保奏言臺灣北路守兵單薄請改興化協左營守備爲水師移駐滬尾以延平協左營守備移駐艋舺管轄陸路弁兵從之九月獲白底賊船一擒林兼等三十餘人十四年四月擊鳳尾幫船殲其渠乘勝追蔡逆於海壇洋斬俘甚衆八月剿蔡逆於定海之漁山轉戰至黑水洋圍蔡逆船併力攻擊賊不能遁決死戰鉛丸盡以番銀作礮子得祿中礮傷仍揮兵火其尾樓復斷其舵賊船覆蔡逆及逆屬並落海

死奏人諭曰蔡牽在洋肆逆十有餘年往來閩浙粵三省擾害商旅抗拒官兵實屬罪大惡極王得祿協力奮追殲除首惡額角手腕各受重傷仍奮不顧身趕攏賊船致該逆登時落海厥功尤偉著加恩晉封子爵並賞戴雙眼花翎十五年殲餘匪於東槎外洋十六年搜獲海盜黃治羽衆鄭選等於烏坵嶼十七年吳屬黃茂等賊匪在洋肆劫官運臺穀被掠降旨申飭時得祿親率舟師追剿賊窮蹙旋於烏坵獲賊目周興等四十餘人十八年以鹿耳門鹿仔港俱多暗沙不利巨艦奏請做同安梭式以爲守做八槳艇式以爲巡底平腹寬深淺可涉從之又奏閩洋大盜皆係瀕海匪徒鈔掠內港聚黨入海欲靖洋盜之源巡港爲要應添造小哨船十隻以資巡緝又奏福寧鎮水師左營所轄北接浙江東對臺灣爲商船必經要道應於提標所募水兵內撥三百名並於福寧鎮右營及督標水師營撥千總把總外委七員歸入左營於緝捕尤爲有益又奏閩安協及銅山營舊隸金門鎮水陸程途相距遙遠聲勢渙散請以閩安協隸海壇銅山改屬南澳均如所請行二十三年入覲上以得祿前在海洋著有勞績照一品廕生例給其子一人五品職官二十五年擢浙江提督道光元年因病陳請休致允之十二年臺民張丙

搆亂得祿赴嘉義各村勸諭固守並親督家屬獲要犯張紅頭等賞加太子少保銜十八年嘉義縣亂民沈和等糾飢民搶掠得祿輸糧練勇協力守城晉太子太保銜下部優敘二十一年英人擾廈門命得祿駐守澎湖協同防堵二十二年卒遺疏入諭曰原任浙江提督王得祿自乾隆年間募勇從征著有勞績嘉慶初年改用水師歷討閩浙粵洋海寇身經百戰疊建勛勞蒙皇考擢升提督錫封子爵嗣因病乞休兩次在籍幫同剿平騷亂上年逆夷在閩滋擾該提督親練壯勇協同堵剿方冀爲國宣勞長承恩眷茲聞溘逝軫悼實深著加恩追贈伯爵晉加太子太師銜照提督例賜卹賞銀五百兩經理喪事應得卹典該衙門察例具奏尋賜祭葬予諡果毅子朝綱舉人山東濟東泰武臨道朝綸戶部員外郎襲子爵

關天培

關天培江南山陽人嘉慶八年由行伍考取武生拔補外委歷陞千總十七年遷揚州營守備二十五年調奇兵營守備道光三年超擢蘇松鎮標左營游擊四年陞川沙營參將六年遷太湖營水師副將十月以督護海運出力下部優敘七年擢蘇松鎮總兵十三年署江南提督十四年授廣東水師提督十五年四月偕兩

廣總督盧坤奏查虎門礮臺籌議增修請添鑄六千斤以上大礮四十位酌派各臺應用並將南山礮臺前面餘地添築石基建設月臺礮位橫檔背面山麓及對岸盧灣山腳各建礮臺一座其沙角大角兩處作爲瞭望探信之臺自南山礮臺起至大虎礮臺分作三股防堵一聞信礮卽分上中下三路轟擊得旨允行閏六月復會奏整頓捕務並請增改營制一南雄州韶州府屬與湖南連界河道應添汛防一惠州府連平州宜移設員弁一廉州府屬臺汛兵丁應水陸互易並勻撥弁兵巡防一瓊州府屬之儋崖二州應添設巡洋兵船下部議行十六年四月偕總督鄧廷楨奏防夷經費請於每年二月杪八月初分飭本標將備率親兵五百餘名分赴威遠鎮遠橫檔大澆永安鞏固六處練習礮準其大角沙角礮臺等處共兵六百四十名每次操演以十日爲度計每年需用正項及另加賞犒銀共六千七百餘兩均由鈔產變價生息及裁撤巡船節省項下撥給從之十八年英吉利日馬他倫私進澳門託言稽查洋商事務妄遞無稟字信函天培斥以不遵定制抗禮傳書親督將弁將馬他倫逐出銅鼓外洋十九年三月會同欽差大臣林則徐查禁英人躉船鴉片煙土勒繳二萬二百八十三箱計二百餘萬斤取具各

國切結存案得旨交部議敘六月督造排樁鐵練安置橫檔山前海面較狹之處並於威遠礮臺迤西添築大礮臺一座以資防禦奏入報聞十一月英船駛入省河踞官涌天培率兵擊走之時英艇全數屯尖沙嘴乘勝掩擊均退出外洋諭曰此次攻擊英船提督關天培奮勇直前身先士卒可嘉之至著賞給法福靈阿巴圖魯名號仍交部從優議敘以示獎勵二十一年正月英人攻占沙角等礮臺諭曰英人到粵以後日肆猖獗經朕嚴諭該省嚴密周防相機剿辦該文武大員宜如何妥爲布置本日據琦善馳奏該處沙角礮臺竟被占奪大角礮臺亦爲攻破並有戕傷將弁搶奪師船之事關天培身任提督統轄水師平時旣督率無方臨時又蒼黃失措著先行革去頂帶仍令戴罪立功以觀後效二月英船擁入三門口衝近排樁斷其練樁盡拔以火箭燬官廠民房天培督兵擊退會南風作英船復以大隊圍橫檔永安兩礮臺先截援道乘風施礮風益猛礮臺陷進攻虎門天培督兵據礮臺拒戰自己至西兵潰天培親熱大礮火門透水礮不得發英人自臺後上天培格殺數人槍箭雨至負創奮鬪力竭歿於陣事聞諭曰英軍攻擊虎門礮臺及烏涌卡座廣東水師提督關天培被害殊堪憫惻著加恩賜卹三月諭

曰昨因虎門失守提督陣亡降旨令兵部議卹茲據該部議奏關天培除照例賞給銀兩准予世職外著該督撫查明伊子孫幾人均於服闋後送部帶領引見候朕施恩該員統領士卒爲國捐軀著卽在遇害地方建立專祠以慰忠魂而彰節義尋賜祭葬入祀昭忠祠諡忠節七月復諭曰關天培次子關從龍見年已十八歲著於服闋後送部引見伊母吳氏年逾八十著地方官每月酌量給予銀米以養餘年子從龍襲騎都尉安徽候補同知

陳化成

陳化成福建同安人嘉慶二年由行伍捕洋盜出力拔補額外外委三年以擒獲接濟蔡牽礮械之奸匪七人又在賊仔澳洋面首先躍上盜舟擒殺三十人補外委五年捕盜於東澳黑水外洋四礮外洋六年捕盜於竿塘下日洋面俱有斬獲又攻殺蔡牽幫匪於白犬外洋被刀傷額七年遷金門右營把總五月隨遊擊王得祿攻捕洋盜孫太等化成獨躍上高大賊船槍礮連環進擊斃盜無算盜船傾折落水十月焚盜舟於橫山洋面獲邱成夥匪三十四人八年捕盜於大板之四嶼洋面十年閏六月隨水師提督李長庚追攻蔡牽於浙江青龍港洋面大有斬

獲十月陞南澳鎮右營千總十一年蔡牽竄至臺灣化成攻擒其幫匪於洲仔尾又攻盜於崇武外洋水澳三盤外洋十二年二月追躡賊踪由閩洋至粵洋化成首先衝逼蔡牽坐船深冒矢石被火斗燒傷兩足四月攻賊於目門洋面十一月攻賊於浮鷹洋面擒獲無數槍傷左手十四年陞銅山營水師守備十五年七月擒盜於烏邱外洋十一月擢海壇鎮右營遊擊十七年二月擒獲黃茂幫匪於沙洲嶼四月擒斬劉貴夥盜於柑桔外洋十八年五月署銅山營參將十月署水師提標中軍參將十九年正月燬白底匪船三隻於前村社擒賊四十人二月捕盜於柏頭鄉閩二月捕賊於秧厝社皆潛蹤疾馳乘其不覺罕有逸脫者其在秧厝社所獲之郭宇疊次將兵船米械接濟外盜飽受賊贓尤爲稔惡由閩浙總督汪志伊以稽誅日久奏明卽予斬梟二十年陞烽火門參將二十一年署水師提標中軍參將二十三年澎湖水師副將缺出閩浙總督董教增疏言澎湖四面環海於汪洋巨浸之中兀然孤立內爲廈門之屏障外爲臺郡之咽喉堵禦巡緝撫綏彈壓悉關緊要非熟習海面情形諳曉風雲沙線才識兼優緝捕奮勉者弗克勝任陳化成在閩粵洋面手擒盜匪四百八十餘名屢次斬取賊目馳奪盜舸並赴

臺灣殺賊歷著戰功曉暢水師緝捕勤奮熟習外海風土情形以之陞補澎湖水師副將可期勝任提督王得祿亦稱見在閩省水師人員陳化成最爲結實可靠嗣以籍隸本省與例未符格於部議不行二十四年陞浙江瑞安協副將旋以丁憂仍回烽火門參將任道光元年署閩浙總督顏檢以化成熟諳水師才具練達在洋緝盜屢次受傷實爲勇往特疏請陞澎湖水師副將允之三年二月調臺灣水師副將八月擢廣東碣石鎮總兵尋調福建金門鎮總兵六年臺灣嘉義彰化亂民糾衆焚掠抗拒官兵化成帶兵由鹿港進口會同福建水師提督許松年等三面兜剿旋署福建水師提督移署臺灣鎮總兵八年閩浙總督孫爾準疏劾巡防疏懈之水師備弁上以化成緝犯多名功過相抵免其議處十年擢福建水師提督十一年臺民張丙等滋事化成籌備兵船藥械以佐軍務十二年七月英吉利船駛入閩浙各洋及江南山東洋面命化成督率水師認真巡邏儻有經過閩洋之英船卽嚴行堵截無令北駛十月嘉義亂民滋事化成帶兵渡臺協剿十三年因金門廈門沿海奸民私造快槳小船暗藏礮械伺劫商民販運違禁貨物其疾如飛難於擒緝而同安縣屬之潘塗官潯柏頭等鄉尤爲賊藪化成會同鎮道

剋期搗穴四面兜擒人船俱獲閩浙總督程祖洛疏聞上以獲船數十隻而獲犯止三名恐尙有餘船窩頓復飭化成堵拏十四年化成偵賊無備水陸兼馳將潘塗官潯柏頭三鄉匪巢全行焚拆多獲船隻匪犯並將附近之陳頭等八鄉按戶清查窩巢盡燬十五年偕程祖洛奏巡洋舊制專責金門鎮總兵而越界總巡海壇洋面未免呼應不靈南澳一鎮分隸閩粵不惟洋面寥闊而巡閱章程兩省互異恆有顧此失彼之虞臺灣協鎮總巡之期每年八月閩安副將每年四月亦覺勞逸懸殊應更定章程均勻周匝並由水師提督揀派將弁分作三班作爲委巡益昭嚴密下部議行十七年英吉利兵船遊駛閩安五虎外洋閩安副將周廷祥遏之英領換坐小船入口投稟請將漳浦難民帶回化成偕閩浙總督鍾祥遣官諭止並疏言海面難民應照例譯訊護送赴粵轉令回國今譯訊未供係該國之人而英稟亦未將難民姓名指出殊難憑信見飭押小船令回大船已於卽日一同開行向東南大洋而去疏入報聞十九年九月緝盜於東椗外洋擒獲甚衆時英船復在洋面遊駛時或拋泊化成屢擊退之十二月調江南提督二十年三月署閩浙總督吳文鎔奏查上年十月閒有英船三隻停泊梅林洋面經調任水師

提督陳化成督帶舟師驅逐仍然拋泊卽令各船整備礮火聯踪駛進連環轟擊英船一面掛帆一面用礮抵敵隨拒隨走情形狼狽立向外洋逃駛兵船尾追不及尋聞浙總督鄧廷楨亦奏言嘉慶十九年以前閩洋從無外船遊駛其後鴉片漸行漳泉奸民勾引遂公然駛至文武員弁庸懦者不敢攻擊番船陽收持重之名貪黷者甚且包庇漢奸陰享分肥之利奸民固屬罪魁水師亦多泄視迨嚴禁鴉片皇上天威震疊始有攻擊英船之舉上年十月十二月本年二月屢經調任水師提督陳化成與金門鎮總兵竇振彪督率戰哨各船開礮轟擊英船先後逃逸疏入均報聞五月偕協辦大學士兩江總督伊里布閱視吳淞上海各營六月英軍犯舟山化成馳抵吳淞口擇東西礮臺要害處依塘列帳爲守禦計二十一年正月命裕謙爲欽差大臣赴鎮海軍營攻剿諭化成以江蘇海口紛歧見經裕謙布置周密著會同程裔采小心籌備又屢諭裕謙會同化成實力巡防勤加哨探八月英人肆擾定海上以江蘇寶山等處緊要命化成偕江蘇巡撫梁章鉅相度布置務使水陸交嚴九月偕梁章鉅奏稱委員赴湖北採購精鐵先將廢礮改鑄數百斤及二三千斤礮位得旨迅速鑄造演試如有調撥卽飛速解往二十二

年兩江總督牛鑑奏吳淞海口地方緊要已於東西礮臺及東溝分紮四營作爲遊兵奇兵期於彼此接應諭曰該督仍當嚴飭陳化成王志元督飭弁兵操演晝夜分班瞭望防守毋稍疏虞倘英人來時須靜守勿動俟其礮火將竭大船漸近度我礮力可及再覷定準頭衆礮環發萬一豕突登岸守塘與接應之兵四路齊出連環夾擊當可一鼓成擒二十四年四月英船犯乍浦牛鑑奏督飭化成駐守海塘聲勢聯絡吳淞之東西礮臺均宿重兵並伏兵爲應援堵截計得旨當慎之又慎切勿自恃無虞嗣牛鑑屢以會同化成添設礮位掘置濠溝稽察漢奸申明紀律激勵將士各事宜次第入告俱得旨獎勵五月英舩駛至江境牛鑑親往寶山海口會籌戰守疏稱化成心如金石士肯用命寶山民情甚屬固結奉硃諭官好方能得民心必收衆志成城之效旋由牛鑑疏報周歷海塘會晤陳化成據云化成束髮從軍以來經歷海洋幾五十年海上防禦全憑礮力此身在礮彈中入死出生難以數計如刻下之布置精密可期必獲勝仗詎料初八日卯刻驟聞塘岸礮聲臣卽親往督戰遙見敵船巍如山立桅懸巨礮直向化成營中施放隨兵多被擊斃臣竟不死於賊燄經將士扶回化成在塘力戰手然巨礮轟壞英船三

隻擊斃英人無數旋礮箭雨集化成猶有進無退遂被礮陣亡事聞諭曰英人突集船隻攻犯寶山江南提督陳化成督率弁兵在塘堵禦相持七日之久開礮轟壞其船三隻傷斃數十人該英人輒將巨礮施放致將土塘轟裂捍蔽無資該提督陣亡縣城旋亦失守覽奏曷勝悼惜陳化成久歷海洋素昭忠勇此次臨敵亦極果敢竟爾捐軀允宜特沛殊恩以慰忠靈陳化成著照提督賜卹例仍加恩賞銀一千兩並查明該故員子孫幾人據實具奏併於殉難處所及原籍各建專祠靈柩回籍時著各該地方官妥爲照料旋賜卹如例予諡忠愍賞騎都尉兼一雲騎尉世職襲次完時以恩騎尉世襲罔替十二月閩浙總督怡良等以查明陳化成子孫五人奏聞諭曰陳化成之子陳廷芳著照例承襲世職陳廷棻著賞給舉人一體會試伊孫陳振世著俟及歲時由該督撫給咨送部引見用示朕篤念忠貞賞延後嗣之至意子廷芳襲世職

祝廷彪

祝廷彪四川雙流人乾隆五十六年由行伍從征西藏廓爾喀以功補崇化營額外外委六十年隨剿黔楚逆苗出力嘉慶元年正月遷懋功協外委三月進擊長

吉山貴道嶺等寨賊苗廷彪在事有功賞戴藍翎二年川楚陝三省教匪不靖廷彪隨欽差領侍衛內大臣額勒登保出師進剿旋陞督標左營把總三年陞建昌鎮右營千總四年陞重慶鎮右營守備五年四月隨額勒登保在陝境大小中溪追躡股匪張漢潮夥黨俘馘甚衆殲其渠五月擢貴州上江協左營都司六年二月隨提督楊遇春追剿賊匪於戴君嶺擒白蓮教匪首王廷詔賞換花翎八月擢甘肅提標右營遊擊七年二月廷彪偕參將吳廷剛擊股匪劉永受遇之於光頭山餘賊竄入深林我師折回桃川之沙壩適額勒登保追躡苟文明股匪於桃川廷彪率兵勇奮力合剿賊大潰奏入上嘉之四月擊賊於平安寨廷彪設伏於長溝黑夜掩殺中矛傷仍奮勇督師前進併力鏖戰殲僞先鋒苟文清於陣七月追擊賊渠苟文明誅之於花石巖並執賊目陳彬等十四人下部優敘八月追剿股匪苟文齊及之於鼈鍋山擒之並殲賊目張芳吳廷召等二十餘人九月擢提標中營參將十月剿賊於黃楊壩賊匪張世雲糾衆屯北溝口廷彪乘夜抵賊屯襲其不備賊驚竄我兵合力攻撲大敗之十二月調陝西西安城守營參將八年正月賊復向小岔溝老林一帶奔竄我兵窮追賊潰二月股匪苟朝閣竄至八寶寨

藏匿老林我師分道迎擊並設伏扼其要路賊渠殲斃賊目汪四墮崖死得旨嘉獎三月苟朝閣餘匪與各股賊匪合隊東奔廷彪與副將呢瑪善等率兵合擊殲之於白果園擒僞元帥冉璠下部議敘五月在房竹一帶搜捕餘匪復擊賊於鐵廠老林十一月連攻股匪餘黨於梧桐坪濫泥壩十二月賊擾孟石嶺廷彪偕總兵王兆夢參將劉健標堵截於支河口九年二月偕副將閻俊烈追剿餘賊賊匿滄石河復有竄匪由青草坪至八仙河我兵迎擊匪衆抗拒滄石河匿匪復聞聲來助前後夾衝廷彪等亟分兵禦之賊並潰散四月零匪遁入望觀臺老林地川省界嶺之中延袤數百里高峻七八十里路徑險仄馬不能行廷彪偕閻俊烈參將羅思舉帶兵裹糧徒步入山由大小梁石梅子跟踪搜捕七月隨楊遇春連攻餘匪於鳳凰寨壩口馬鞍山疊有斬獲十年以三省肅清敘功加副將銜十一年擢陝西漢中城守營副將十二年陝西瓦石坪叛匪周士貴等滋事廷彪往捕敗之於陽平擒其渠賞迅勇巴圖魯名號並下部議敘十三年調永順協副將十四年擢甘肅寧夏鎮總兵十六年調陝西西安鎮總兵十八年陝西岐山縣三才峽匪徒萬五等嘯聚廷彪帶兵由石泉取道西江口進至永平追及之賊據左右

山梁我兵奮勇直上乘勢撲殺殲獲多名十九年股匪陳四竄吳家堡廷彪率兵冒雪由木瓜園進攻直搗賊巢殲獲七百餘人執僞元帥尹朝貴陳四走黃草坪負岫抗守廷彪等三路前進乘夜追及賊屯燬其巢南面逼臨大河我兵復東西截堵賊勢窮蹙殲擒六百餘人越日陳四由黃草坪繞赴石泉廷彪追及於手扳崖老林賊詭稱投誠廷彪設伏擒陳四殲其衆捷入諭曰祝廷彪將起事首逆督兵生擒實屬奮勇出力著加恩賞加提督銜仍交部從優議敘二十年擢湖南提督道光元年坐失察兵丁王汝元辱官滋事部議降三級調用上加恩改爲降四級留任三年召來京另候簡用四年三月賞頭等侍衛仍兼提督銜在大門上行走十二月授陝西西安鎮總兵十五年擢貴州提督十八年調浙江提督二十年六月英吉利犯順圍定海城廷彪坐籌備不力褫職上命暫留本任以觀後效十二月諭曰祝廷彪年已七十五歲精力就衰著卽休致回籍二十二年卒子昌奎安徽英山縣知縣咸豐三年剿賊陣亡賞雲騎尉世職

余步雲

余步雲四川廣安州人嘉慶三年由鄉勇隨剿川陝楚教匪積有戰功賞戴藍翎

歷拔把總千總五年五月擊伍金柱股匪於桐木溝敗之六月以殲張漢潮餘匪出力下部議敘八月陞直隸蔚州路東城守備六年五月陞四川北鎮標右營都司六月冉學勝股匪竄踞平利之高唐嶺步雲潛赴近嶺之太平寨密結寨民使殺賊大軍乘夜進攻賊大潰步雲復從河溝鈔擊餘匪斬級三百餘七年正月偕參將朱槐都司魏尊德等疊敗李彬匪衆於通江之平合子蕭家坡復追至南江之太平山李彬以隻身遁適辛聰股匪由廣元竄至登碑埡屯紮步雲等分兵兩路乘夜進擊賊竄踞五寶山梁復合力圍攻遂擒辛逆奏入賞換花翎四月偕副將張瑗追敗苟文明股匪於新開山九月隨總兵楊芳追剿僞先鋒藍永樂於牛欄溝腦又屢敗賊於琵琶嶺鐵廠溝十月追賊於千岔河五大谷等處殲擒賊目張隆苟正伏等八年疊次敗賊於閃電谿仰天窩謝家壩當陽坡擒僞先鋒劉世榮等九人十年三月擒僞總兵苟子潤於寒谿溝十二月調鎮標左營都司十三年六月隨總督勒保征馬邊夷匪移師進擊嶺夷敗之於鹽井谿日暮結營夷衆乘夜分起攻撲弩箭如雨刀斫鹿角柵勢甚兇悍步雲率千總馬萬年等迎擊殲十餘人餘賊帶傷逸翼日又戰於雪都都敗其衆七月嶺夷既定進討曲曲烏

涼山大小木桿等支皆有功以遊擊陞用先換頂帶十四年補黎雅營遊擊十九年隨成都將軍賽冲阿防剿陝西木廂賊匪偕參將朱承受等轉戰西鄉洋縣間乘勝追剿連敗之於店子河寨家嶺擒逆首羅懷命以參將陞用時漢江南北漸次肅清惟苗小一股經官兵剿敗竄女兒壩將遁老林步雲等帶兵躡追至洋縣之碾子溝遇另股餘匪占踞山梁步雲偕朱承受等左右攻擊大敗之旋追苗逆於月亮坪偕總兵吳廷剛等兩路夾擊逆衆殲焉賽冲阿上其功賞銳勇巴圖魯名號旋經四川總督常明奏留四川陞補二十年中瞻對叛酋洛布七力侵陵土司拒傷汎弁步雲偕朱承受等由下瞻對之女郎橋渡河與總兵羅思舉會於河西進攻卻玉寨洛布七力焚死以功授成都城守營參將尋陞阜和協副將二十一年丁母憂服闋二十五年復補阜和協副將道光元年擢重慶鎮總兵六年逆回張格爾入卡滋擾陷喀什噶爾等四城步雲以參贊大臣楊遇春檄統帶川兵協剿七年二月官兵星馳進發賊衆數萬於洋阿爾巴特莊迎拒我兵分三路攻擊賊大潰追殺三十餘里進抵沙布都爾及阿瓦巴特莊連戰皆捷師次渾水河賊憑河列陣勢張甚步雲遣善泅者二百人晷渡撲其營復遣馬兵一千沿河

下游作欲渡勢以牽賊隊大軍潛從上游躡渡出其不意突攻之賊大敗走乘勝薄喀什噶爾城卡併力圍攻復其城三月偕提督楊芳等移兵剿和闐賊賊目玉努斯等率衆於昆拉滿地方拒戰步雲以步隊居中與楊芳等四路合擊戰方酣東南沙山後突出賊騎五六百飛馳助戰我兵奮擊大敗之俘馘三千餘人遂復和闐下部優敘時玉努斯先經擊敗遁去步雲偕總管額爾古倫追捕獲之於葉爾羌所屬故瑪地方奏入賞加提督銜閏五月凱撤論功復下部優敘並賞乾清門侍衛十二月陞貴州提督八年入覲賞大緞荷包旋以張逆就擒回疆底定繪像紫光閣御製贊曰少懷忠義奮力隨營攻堅破陣屢立勳名川兵六千將之西行和闐賊首追之獲生十年回逆復擾邊步雲自請帶兵協剿上弗許下部議處部議降調上念步雲武職且曾效力回疆與無因瀆請者有閒加恩改爲降三級留任十二年三月調湖南提督時江華逆搖趙金隴句結廣東散搖脅衆煽亂步雲帶貴州兵馳往會剿四月賊竄踞羊泉地方步雲帥師會諸軍合力圍攻大敗之殪賊數千擒逆屬趙幅金及賊目趙文鳳李德明等五十餘人下部議敘五月復偕提督羅思舉等督兵四面進攻燬其巢首逆趙金隴就殲匪衆掃除淨盡捷

聞諭曰此次剿辦一切機宜俱臻妥速調度有方深堪嘉尚余步雲著賞加太子少保銜會粵搖趙仔青復糾匪二千餘犯永州之藍山等處謀斷官軍餉道步雲率兵兜剿敗之於濠江冲擒其渠楚搖悉靖適廣東連州排搖乘間竊發命步雲調署廣東提督馳往剿辦七月馳抵連州搖衆聞大兵雲集伏不敢出我軍分屯隘口聲勢連絡潛遣兵於火燒坪大掌嶺兩排山口設伏計誘斬獲千餘擒賊首鄧三盤文理等餘賊竄入陽公岐負固抗拒八月偕總兵曾勝等分路進兵攻克之大掌嶺各排搖目皆縛獻首逆粵境肅清諭曰余步雲前在湖南認真剿辦及調任廣東奮勇出力一切機宜均臻妥協著加恩賞戴雙眼花翎並賞給一等輕車都尉世職方趙金隴之倡亂江華也上命戶部尙書禧恩等視師湖南旋赴廣東督辦排搖至是事平步雲偕禧恩等會籌江華善後事宜一籌撫卹一重官守一勤巡哨一清叛產一嚴保甲一察搖俗一懲奸棍一收火器一獎義勇又請移提標右營守備駐錦田前營把總一員駐大橋隸永州遊擊管轄改永明中軍守備爲分防城汛仍歸遊擊管轄增步守兵四百名裁馬四百十四匹所餘馬乾銀兩卽按給增設兵丁又改江華嶺東營守備爲題缺隸永州遊擊管轄辰州分防浦

市汛守備爲部推卽抵嶺東營守備缺均如所請行十二月軍政屆期下部議敘十五年正月調四川提督時川省防剿雅札支夷命步雲卽赴峩邊軍營比至總督鄂山等已奏報平定六月偕鄂山奏戡定十三支夷地善後章程列款以聞十一月峩邊廳民人徐國林赴都察院呈訴兇夷焚搶兵撤復來狀步雲以未能查明奪俸十六年調雲南提督以馬邊猺夷出巢滋事留川剿辦十七年偕四川提督齊慎總兵張必祿等率兵擣天喜涼山皎米各夷巢疊有斬獲事竣下部優敘十八年正月調貴州提督八月調福建陸路提督時貴州仁懷縣匪徒謝法真穆繼賢袁明倫等聚衆倡亂步雲率師討之賊暗掘地道礮傷我軍步雲偕布政使慶祿籌添鐵裹土囊及火攻器具竭一晝夜力燬賊巢俘馘千餘法真等皆就擒捷聞賞加太子太保銜仍下部優敘步雲自剿辦回匪猺匪以來疊賞玉韞荷囊翎管等件四次十九年二月四川總督寶興奏步雲籌辦夷務未能妥善並以馬邊之役守備薩爾吉等從戰有功步雲漏未奏保劾其控馭失宜下部議處尋降四級留任七月抵閩二十年三月英吉利船犯福建之榆澳步雲偕水師提督程恩高擊卻之下部議敘六月英人擾浙江陷定海縣命步雲由福建帶兵赴剿並

諭曰行軍之道謀略爲先紀律之師以一當百收復之策務須通盤籌畫確有把握謀定後戰時英人聲言繳還定海以老我師步雲雖奏請調兵而輕信其言遷延不進師久無功十二月諭令回閩旋調浙江提督二十一年正月上命江蘇巡撫裕謙爲欽差大臣赴浙防剿適英人繳還定海裕謙授兩江總督命卽赴任以定海應辦事宜交步雲偕巡撫劉韻珂經理步雲遂駐兵鎮海防守嗣英船由閩洋北駛裕謙遵旨復至浙奏步雲難資得力未及更易而英人猝至八月復攻陷定海總兵王錫朋葛雲飛鄭國鴻俱戰歿九月鎮海寧波相繼失守裕謙死之步雲由寧波退至上虞駐曹娥江二十二年四月諭曰浙江提督余步雲朕畀以海疆重任上年定海失陷總兵王錫朋等帶領各路官兵轉戰六晝夜之久該提督並不督兵應援以致孤城失守迨至鎮海寧波接踵失事總督及總兵等先後殉難余步雲輒敢節節退避當鎮海寧波未失之時與定海尙隔海洋若使鼓勵士卒奮勇當先嬰城固守地勢旣據上游精兵復聚重鎮何至四路潰散頃刻不支總緣該提督平時旣訓練無方臨事復貪生畏敵首先退縮大懈軍心作此厲階罪難擢髮早經降旨飭令揚威將軍奕經查明屢次退敗情形按律治罪比因軍

務喫緊查訪非倉猝所能遂先其所急暫緩逮問乃軍營將弁兵丁等相率效尤紛紛潰散總因余步雲身爲提督屢失城池並未查究遂人人各懷倖免之心不思破敵之計遷延觀望坐失事機若再不整飭紀綱大申軍令何以輓惡習而振軍容余步雲著卽革職鎖拏解京交軍機大臣會同刑部審訊治罪五月押解到京經軍機大臣等依律擬斬監候聲明情節較重請卽行正法復命大學士九卿科道再行詳議具奏十二月覆奏仍照原議定擬諭曰余步雲當英人滋擾浙江之時與裕謙防守鎮海乃定海被擾總兵王錫朋等轉戰六晝夜之久余步雲並不督兵應援以致孤城失守三鎮陣亡已屬罪無可道然使鎮海寧波保全無事則失救定海之罪尙可稍從寬貸迨英船駛入鎮海余步雲身在行閒旣不能衝鋒迎擊復不能嬰城固守鎮海失守退入寧波寧波失守退保上虞以一品武職大員身膺海疆重寄從未殺獲一賊身受一傷畏死貪生首先退縮以致帶兵將弁相率效尤奔潰棄城直同兒戲每一念及憤恨實深且廣東之關天培祥福江蘇之陳化成福建之江繼芸皆以提鎮殉難卽定海失陷總兵王錫朋葛雲飛鄭國鴻力戰陣亡鎮海寧波失事總兵謝朝恩被礮擊落海身死裕謙以文員督師

殉節獨余步雲係本省提督乃竟志在偷生覩顏人世儻不寘之於法不惟無以肅軍政而振人心且何以慰死節諸臣忠魂於地下余步雲著照大學士九卿科道等會議卽行處斬以伸國法朕辦理刑名悉本欽恤各省應死重囚苟有可原情節無不予以生全況係一品大員豈忍遽加誅戮以余步雲之見敵輒退首作厲階實屬法無可貸不能不明正典刑也步雲遂棄市

唐際盛

唐際盛原名心舜貴州丹江廳人由行伍拔補丹江營外委遷黃平營把總乾隆六十年正月貴州逆苗滋事焚掠松桃廳正大營湖南永綏苗匪應之唐心舜隨總兵珠隆阿援正大營連戰城下二月圍解隨參將劉廷奇迎饗運遇賊於馬脛塘豹子場擊走之復由正大營截擊長坪賊解嗅腦圍又隨總督福康安解松桃園四月破黃瓜砦進擊大小蜡耳山梁燬賊卡四復攻克蘇麻等寨六月攻克老旺砦換千總頂帶七月攻老西砦長哨營及猿猴狗腦等砦克之九月破高多砦擒首逆吳半生補古州鎮中營千總駐馬鞍山防堵嘉慶元年九月思州府清溪縣教匪不靖隨提督花連布赴小竹山進剿擊賊於墮河坡山梁獲賊目楊通建

等奉旨千總唐心舜首先殺賊著以應陞之缺陞補進攻榔木坳毀石城數座遂由黃家地後山梁攀崖越嶺乘夜攻賊穴拋擲火彈心舜首先躍登大鬼坨擊殺數賊官兵繼之賊大敗擒首逆高承義及姚世高等盡獲其黨十月以功進貴州撫標左營中軍守備賞戴藍翎賜翎管扳指十二月隨雲貴總督勒保赴湖北剿辦教匪二年正月擊賊於長陽黃柏山旋因貴州南籠狝苗不靖回師赴剿三月由鎮寧進攻關嶺連戰兩晝夜抵大坡嶺心舜同遊擊宋延清雙林分兵繞出關嶺後與大軍夾擊殲賊無算遂克關嶺換都司頂帶別攻巴隴坤下之冒雨攻克下山塘四月解新城圍趨南籠襲望城坡破碧峯山擒賊目梁廷松等七名及漢奸李茂梁五月克水煙坪擒賊目黃阿固黃昌雲六月連克阿魯溝卡子河進解南籠圍賞換花翎閏六月隨貴州按察使常明副將施縉攻克九頭山七月克安有山梁八月同都司田朝貴帶兵潛赴樓下河圍燒西固大砦擒首逆楊明乘勝直搗賊巢破洞灑當丈兩處賊砦擒首逆韋七結鬚進攻北鄉巴林四面兜圍賊殊死戰心舜馳入賊陣斫賊砦大紅龍旗仆賊驚潰官兵乘之擒首逆王抱羊分兵搜剿馬乃坤等處餘匪狝苗平奉旨交部議敘尋賜奮勇巴圖魯名號三年正

月心舜隨總統勒保剿萬縣邪匪擒賊目梁雲松伍一凱旋賜喜字玉扳指侍川賊白號首逆王三槐冷添祿與青號徐添德屯聚開縣臨江市分擾新寧心舜隨勒保擊敗之於安豐砦賊走達州與藍號冉文儔合二月授貴州平遠協中軍都司擊賊達州獲賊目田在朝冉文諤三月賊走儀隴四月追收之於茨頂王三槐遁據安樂坪冷添祿據祖師觀連月圍攻中槍傷七月同貢生劉星渠設伏安樂坪巖洞門之右各路兵既合伏兵起以火箭燒賊砦王三槐遂出就縛而冷添祿仍據祖師觀圍攻不下十二月授雲南督標左營遊擊冷添祿圍急竄新寧心舜隨總兵百祥追擊中石傷四年正月勒保爲經略心舜從擊黃號賊王光祖於新寧敗之是月都統德楞泰擒冉文儔於通江三月冷添祿爲參贊額勒登保所殲五月擊敗白號賊張金魁於太平羅文壩九月心舜隨提督七十五擊賊於雲陽開萬等處連有斬獲五年正月藍號冉添元合白號黃子聰黃號徐萬富等五萬人渡嘉陵江西犯心舜帶兵由梁山入竹赴綏州截擊二月與參贊德楞泰軍合三月隨德楞泰破賊於梓潼馬蹏岡擒冉添元復敗賊於新子店斬白號賊雷世旺賜玉煙壺閏四月隨德楞泰連敗白號賊於忠州梁山五月追擊於達州劉家

溝中槍傷七月藍號賊屯聚南江蒼溪界之九龍場襲擊之生擒三百餘九月擊青號賊王珊於水田並擒其帥李思槐十一月隨四川總督勒保擊白號賊楊開第於儀隴斬之六年正月徐萬富與其黨樊人傑合藍號賊冉添士犯廣元欲渡嘉陵江心舜隨翼長薛大烈邀擊於儀隴斬徐萬富奉旨議敘三月隨總兵張志林剿楊開第餘黨追擊於南江趕溪場獲僞總兵馬大勇七月敗青號賊於東鄉擒添德弟添壽八月敗藍號賊於通江擒冉學勝賜水晶煙壺十月敗白號賊湯思蛟劉朝選於乾溪十一月同遊擊夏雲龍剿王珊餘黨於大竹觀音橋斬僞總兵宋國品牌頭孫大礮復敗青號賊於忠州白石鋪擒僞元帥何贊十二月追賊至長壽江北廳界之桶井賊遁古路坪距桶井四十餘里兩山對峙地勢險隘心舜同張志林乘夜踰山進擊賊驚竄殲獲二百餘擒賊首張長德僞總兵何祖明疊奉旨議敘是年以命名不協諭令改名遂改名際盛七年正月際盛剿青號王登廷餘黨於達州莫家溝擒賊首王得僞總兵王梁松二月剿徐添德餘黨於檀木場追至觀音山擒旗手張文明復殲青號旗手李士賢於開縣黃土壩旋隨提督豐仲赴川北剿白號張添倫魏學勝餘黨四月殲賊於廣寧界之五郎溝五月

殲藍號楊步青餘黨於石灰窯時川中餘匪分竄老林或百餘人或二三十人不復成股際盛同夏雲龍在川北搜剿十二月授雲南東川營參將八年二月殲賊於鐵船山四月歲功回雲南九年九月署曲尋協副將十年六月授甘肅瑪納斯協副將十六年六月擢巴里坤鎮總兵官十七年際盛遣守備朝哈泰同千總白璽貴領饜蘭州以所得養廉易金三十兩屬朝哈泰寄其母適總督那彥成母生日際盛送蠟燭鳩杖爲壽後朝哈泰爲提督劉芬參革朝哈泰疑際盛所爲因訐際盛私用兵饜買黃金二百兩餽總督那彥成二十年五月奉旨巴里坤總兵唐際盛著解任交高杞嚴審尋訊明定讞朝哈泰坐誣遣戍伊犁際盛以違例革職道光二十三年卒子定魁見官凱里營額外外委

葛雲飛

葛雲飛浙江山陰人道光癸未科武進士以營守備用改外海水師發浙江試用七年署黃巖鎮中營守備七月巡海至北澤外洋時夜昏晦突遇盜船雲飛滅鎗息鼓令軍士持短兵作商船呼權聲以誘賊賊至一一手縛之遂獲大盜陳兆龍等九人十月護理中營游擊八年補温州鎮標中營守備九年署提標右營游擊

十一年回温州任署定海鎮標中營游擊八月升黃巖鎮標右營游擊十三年正月署乍浦營參將四月獲劇盜鴻金等於澚山洋面十四年四月獲劇盜程興龍等於大羊山洋面十五年六月閩浙總督程祖洛以雲飛熟悉閩浙洋面情形疏請陞補福建烽火門參將閏六月署浙江瑞安協副將七月獲鹽匪陳起韞等於兩頭洞洋面瑞安外洋有山曰南麂周十五里距內地一百五十里游民雜處名爲種地實則通盜銷贓屢致巨案雲飛嚴行驅逐燬除庵廟盜藪一清十六年陞瑞安協副將十七年閩浙總督鍾祥以雲飛年壯才勇練習水務獲盜著績不染虛浮習氣保舉堪勝總兵十八年三月署定海鎮總兵官八月回瑞安協任十九年三月授定海鎮總兵官丁憂回籍二十年六月英軍突至定海失守巡撫烏爾恭額以書邀雲飛至鎮海會商戰守策旋以雲飛精明曉暢實可協同出力入奏閩浙總督鄧廷楨奏言當此需才孔殷之際鎮臣葛雲飛精明強幹見在雖未服闋而軍務爲重覈與古人墨經從戎金革無避之義相符請令署定海鎮總兵先後皆奉旨俞允雲飛訪知英人中僞軍師安突得狡黠善謀到處輒圖其山川險阻密授計於壯士包祖才遂擒之二十一年正月因廣東已給英人地貿易議將

安突得等交還卽收回定海城池欽差大臣伊里布令雲飛前往交割雲飛帶兵至定海傳諭先退定海後交還俘虜英人則欲我先交俘虜雲飛堅持前議整軍以待英人如期交割而去四月服闋實授定海鎮總兵八月英人樸鼎查再犯定海十二日巳刻英船二十九隻突入竹山門雲飛時在土城防守手然大礮擊斷頭桅英人膽落竄出吉祥門闖入大渠門窺東港浦雲飛已先令游擊張紹廷迎頭截擊英船驚遁奏入得旨嘉獎賞加提督銜十三日丑刻英船復闖入小竹山直撲土城雲飛開礮轟擊英人退去時鄭國鴻王錫朋兩鎮駐城內雲飛以本鎮駐城外至是事急兩鎮亦出城王錫朋領壽春兵守曉峯嶺鄭國鴻領處州兵守竹山門雲飛駐半塘土城之中當敵衝十四日巳刻英船連檣駛至竹山門我兵用擡礮屢擊之自己至戌全幫竄去英人以五奎山正對土城於十五日上山爲營雲飛乘其未集親開大礮擊燬帳房船隻時有紅衣酋執旗指麾以礮仰擊斃之英船遂蒼黃逸去十六日敵匿五奎山後以礮仰天隔山而擊雲飛亦隔山擊之十七日子刻大霧人而不相見敵出不意結陣直逼土城以兩大船載火藥聯以鐵索雲飛從暗中飛礮擊之藥發船燬船中五六百人殲焉巳刻敵肉薄攻曉

峯嶺曉峯嶺失連攻竹山門亦失王錫朋鄭國鴻皆力戰死之敵遂萃於土城時土城兵調守各地麾下僅二百人雲飛知事不可爲出敕印付營弁手刀入敵中轉鬪二里許格殺無算不防竹山之麓有敵目從高阜以長刀斫雲飛劈去頭面之右半雲飛戴血擊敵敵皆辟易乃以火槍圍攻被四十餘創復中礮礮彈巨如碗自背洞胸雲飛植立竹山門巖石而死定海義勇徐保夜得雲飛屍於十八日辰刻負至鎮海奏入於苦戰六晝夜句奉硃批揮淚覽之又諭曰據裕謙奏此次轉戰六晝夜擊焚敵船惟葛雲飛所練親兵最爲得力陸路殺賊之壽春處州官兵均極勇敢剿殺英人一千數百名該頭目驅使閩粵漢奸捨死登岸衆寡不敵以致失事該總兵等奮勇殺賊效命疆場深堪憫惻除照例賜卹外加恩各賞銀五百兩由各原籍藩庫給發並著該省督撫查明該故員子孫幾人據實具奏葛雲飛鄭國鴻王錫朋俟定海收復後建立專祠靈柩回籍著地方官妥爲照料復以雲飛前經賞加提督銜命卽照提督例賜卹予諡壯節入祀昭忠祠二十二年命賞給葛雲飛長子以簡文舉人次子以敦武舉人二十四年四月奉旨葛以簡准其兼襲騎都尉又一雲騎尉以直隸州知州儘先補用葛以敦以營守備儘先

補用以簡見官甘肅階州直隸州知州

鄭國鴻

鄭國鴻湖南鳳凰廳人父廷松湖南鎮筵鎮標千總隨征鳳凰廳逆苗歿於陣賞雲騎尉世職國鴻襲焉嘉慶八年湖南永綏廳苗隴六生等倡亂國鴻糾鄉勇協剿出力拔補永綏屯守備二十二年遷湖北黃州協都司道光元年擢提標中軍參將四年遷廣西平樂協副將五年調湖北竹山協副將尋護理鄖陽鎮總兵七年因前官湖北參將誤領已減公費銀降三級調用尋捐復原官九年補浙江湖州協副將十七年調湖南寶慶協副將二十年擢浙江處州鎮總兵會英軍竄擾浙江陷定海縣國鴻協力防守二十一年二月收復定海欽差大臣伊里布檄國鴻與定海鎮總兵葛雲飛壽春鎮總兵王錫朋各統所部兵分守縣城及海口要隘八月英船再犯定海攻竹山門國鴻等督兵然大礮擊斷其首船大桅英人卻走奏入得旨嘉獎嗣復攻竹山礮國鴻用擡礮轟擊殺敵無算敵閒道薄五奎山我兵追燬其營帳又斃敵數十其攻縣城者葛雲飛擊敗之焚其火藥船壘戰累日敵不得逞乃分衆爲三挾土寇同時進攻國鴻等悉力截戰時敵衆二萬我三

鎮兵僅四千天久雨援兵阻風浪不能至國鴻等往來泥淖中激厲將士槍礮至熱不能用猶奮擊不已土寇潛導敵升曉峯嶺俯攻縣城城中力不支遂陷各要隘相繼失國鴻在竹山門望見敵勢瀰漫知事不可爲以印授軍校單騎赴敵身被數十餘創與葛雲飛王錫朋同日死之奏入諭曰此次轉戰六晝夜陸路殺敵之壽春處州官兵均極勇敢剿殺英人一千數百名因該頭目驅使閩粵漢奸舍死登岸衆寡不敵以致失守覽奏爲之墮淚該總兵等奮勇殺敵效命疆場深堪憫惻除照例賜卹外加恩各賞銀五百兩並著該省督撫查明該故員等子孫幾人據實具奏葛雲飛王錫朋鄭國鴻俟定海收復後建立專祠尋賜卹如例入祀昭忠祠賞騎都尉世職襲次完時以恩騎尉世襲罔替孫鏗銛均賞給舉人鏗兼襲世職二十五年復命鏗以六部七品小京官用咸豐元年御史宗稷辰奏請於國鴻原籍建立專祠允之

王錫朋

王錫朋順天寧河人嘉慶十三年武舉充兵部差官期滿以營守備用捐陞遊擊道光元年選陝西固原城守營遊擊歷署撫標左營遊擊神木協副將六年六月

署慶陽營參將時逆回張格爾入卡滋擾陷喀什噶爾八月陝甘總督楊遇春檄錫朋協剿七年隨陝西提督楊芳至大河拐昏夜遇賊斬獲甚多又敗賊於洋阿爾巴特斬首萬餘級擒六千餘殲頭目邁曼底阿渾等五名復敗賊於沙布都爾回莊追剿西北林子應援賊匪共斃賊四五萬人射殺大頭目色提巴爾第等逆回復糾合餘燼於阿瓦巴特衆至十餘萬負隅抗拒錫朋隨揚威將軍長齡分隊接戰殺賊二三萬人擒二千餘陣斬頭目阿瓦子邁瑪底等二名賊復營於渾河沿對岸亘二十餘里築土岡列槍礮乘夜擊放我軍據上游渡河越土岡橫擊斬賊數萬追至喀什噶爾攻破東門張格爾之姪托里和卓殲焉擒張格爾之妻及其姪阿里雅汗並安集延大頭目推立汗薩木汗回子頭目阿布都拉等奏入賞戴花翎復隨參贊大臣楊遇春提督楊芳收復英吉沙爾葉爾羌兩城隨楊芳敗賊於昆拉滿擒頭目噶爾勒克復和闐追擒逆渠玉努斯於故瑪池賜小刀貂尾八年陞湖南臨武營參將十二年三月以逆獠趙金隴作亂總督盧坤提督羅思舉檄錫朋領鎮筸兵從永州小路探剿山深箐惡冒雨徑入直抵石灰坪距羊泉八里旣敗賊於溫家園遂逼近羊泉道口杜其出沒應援之路賊詭言投誠羅思

舉知其詐督攻益力錫朋率兵奮擊斃賊四千餘趙金隴就戮擒賊黨趙金旺趙文鳳又獲逸賊潘有才等於高山坪搜殺餘匪二千於楊家園奏入賞銳勇巴圖魯名號五月廣東徭匪趙仔青等竄入藍田寧遠盧坤檄錫朋星夜追撲與永州鎮總兵曹勝合擊賊於濠江口又逐賊於銀匠冲時大兵用礮均爲梁埂所格錫朋手執長矛帶兵馳躍擊殺僞總兵趙文興賊窮蹙欲由葛藤衝竄回廣東錫朋兜剿之於麻岡衝擒趙仔青八年升寶慶協副將時湖南徭匪已清廣東徭匪仍熾錫朋與曾勝俱調赴連州剿八排苗屢戰皆捷賞加總兵銜十三年升福建汀州鎮總兵十六年丁父憂十八年服闋授安徽壽春鎮總兵二十年六月英軍陷定海檄赴江蘇吳淞寶山會同江南提督陳化成防禦礮擊大小英船各二八月欽差大臣伊里布檄赴寧波會英人乞撫錫朋撤師回壽春任二十一年八月英將樸鼎查再犯定海錫朋仍調至浙江與定海鎮總兵葛雲飛壽春鎮總兵鄭國鴻分地列營英船集五奎山錫朋守九山門爲各營救援累戰輒勝嗣英船乘大霧分撲三總兵軍錫朋馳救曉峯嶺而遣弁策應竹山門錫朋左衝右突斬獲無數英人大隊繼進所部武舉朱匯源差官呂林環外委劉桂五夏敏忠張魁甲等

先後戰歿英人恃衆進逼錫朋猶手刃數人卒以衆寡不敵遇害欽差大臣裕謙奏入諭曰見在葛雲飛鄭國鴻屍身業已從厚殯殮王錫朋屍身尙無著落覽奏爲之墮淚該總兵等奮勇殺賊效命疆場深堪憫惻除照例賜卹外加恩各賞銀五百兩並著該督撫查明該故員等子孫幾人據實具奏葛雲飛鄭國鴻王錫朋俟定海收復後建立享祠王錫朋仍於原籍立祠錫朋屍身旋經尋獲閩浙總督劉韻珂以聞命照葛雲飛鄭國鴻之例補給銀五百兩以示優卹嗣兵部奏請賜卹又諭曰王錫朋屢著戰功被害尤慘著加恩照提督例賜卹尋賜卹如例子諡剛節入祀昭忠祠賞騎都尉兼一雲騎尉世職襲次完時以恩騎尉世襲罔替子承泗承瀚均賞給舉人承泗襲世職二十三年引見命以直隸州知州卽選承瀚引見命以六部小京官用承泗山西隰州直隸州知州承瀚工部主事

張士秀

張士秀甘肅西寧人由行伍迭次派往青海緝捕番賊於道光二年補大通營額外外委十五年遷提標右營經制外委二十一年擢巴暖三川營把總二十三年西寧野番經官兵於上年捕逐出卡仍潛匿近柯柯烏蘇等處往來滋擾四月士

秀隨總兵徐華清督隊行抵柯柯烏蘇偵知賊衆所踞黑底俄博地方懸崖陡壁惟折由河沿乃得進徐華清佯令軍中備皮筏明日渡河先於是夜四更簡精銳兵丁四百名取道河沿直擣賊巢賊番始猶恃險抗拒我兵撲近山梁賊乃紛紛逃竄迨各路兵集奮力合追悉殲之惟時柯柯烏蘇山腦尙有賊番數百人盤踞五月徐華清率張士秀等由東南石峽兼程前進賊據山梁以待自辰至午相持良久我兵勇氣百倍直衝而上賊不能支乃大潰殲賊二百餘人餘皆墮崖而斃奪獲牛馬器械無數士秀屢次在事有功奏入賞戴藍翎尋署鎮標前營千總二十五年署西寧鎮總兵慶和於夏季出卡會哨距察漢俄博三十餘里突有野番抗拒慶和率士秀等奮擊賊衆四面合圍我兵寡不敵衆士秀隨慶和同歿於陣奏入諭曰慶和在金羊嶺打仗被圍張士秀竭力救護扎斃數賊因勢孤俱被戕害可嘉可憫著照千總例議卹尋賜祭葬賞雲騎尉世職子鵬襲

清史列傳 卷四十

大臣傳續編五

潘世恩

潘世恩江蘇吳縣人乾隆五十八年一甲一名進士授翰林院修撰嘉慶三年三月大考一等陞侍讀十月擢左春坊左庶子署日講起居注官四年正月遷翰林院侍講學士三月充會試同考官轉侍讀學士咸安宮總裁五月陞詹事府少詹事充日講起居注官六月陞詹事八月提督雲南學政十月陞內閣學士兼禮部侍郎銜仍留學政任具摺陳謝硃批少年得進崇階又係鼎甲宜愛惜聲名切勿恣志前程遠大莫貪小利秉此寸忱以匡朝政勉之慎之六年擢禮部左侍郎仍留學政任七年回京歷署兵部左右侍郎尋調兵部右侍郎兼署戶部左侍郎八年四月以續行繕辦四庫全書命偕禮部尙書紀昀等經理七月充教習庶吉士八月以兵部題本內擡寫錯誤部議褫職上加恩改爲留任九年正月上御重華宮茶宴世恩恭和御製詩章賞如意荷包等件旋署戶部左侍郎二月上幸翰林

院賜宴聯句世恩恭和御製詩章頒御製味餘書室全集及諸珍綺賜之五月充考試試差閱卷大臣六月轉兵部左侍郎仍兼署戶部左侍郎七月充浙江鄉試正考官尋調戶部左侍郎提督浙江學政接印奏謝硃批實心勉力整頓士習汝係大員不應緘默兩浙吏治民風洋匪情形俱應隨時密奏十一年五月調吏部右侍郎六月轉左侍郎俱留學政任十二年回京署戶部右侍郎九月充教習庶吉士十一月充續辦四庫全書總裁文穎館總裁十三年三月署翰林院掌院學士殿試讀卷官朝考閱卷官考試試差閱卷大臣六月署刑部左侍郎七月署戶部右侍郎八月充順天鄉試副考官十二月復署戶部右侍郎十四年二月以文穎館全書告成賞加二級三月署刑部右侍郎四月充朝考閱卷官五月命查三庫閏七月署戶部右侍郎十五年六月復署戶部右侍郎八月提督江西學政十七年召來京擢工部尙書十八年九月調戶部尙書仍署工部尙書旋署吏部尙書十二月充經筵講官十九年二月署武英殿總裁旋以全唐文繕刊告成三月復署吏部尙書四月充庶吉士散館閱卷大臣五月充國史館總裁復署武英殿總裁六月丁母憂二十一年服闋未回京卽以父年老具摺告養硃批忠孝二字

不可歧視知所先後則近道矣復諭曰潘世恩奏請終養又因伊子中式舉人具摺謝恩伊係一品大員自應親身來京具摺陳謝卽因伊父年逾七旬欲求終養於到京召見時據實陳情朕必俯允所請今伊摺內祇云體察伊父精神迥不如前並非疾病沈篤刻不可離潘世恩來京往返不過月餘反憚於跋涉輕率陳情殊乖人臣之義著降爲侍郎准其終養俟養親事畢來京以侍郎補用道光四年丁父憂七年四月服闋五月署工部左侍郎尋授吏部左侍郎充國史館副總裁十月擢都察院左都御史八年四月充考試試差閱卷大臣七月以回疆蕩平獻俘禮成並與凱旋筵宴八月署吏部尙書九月署翰林院掌院學士十月充武會試正考官署禮部尙書經筵講官九年四月充殿試讀卷官朝考閱卷官復署翰林院掌院學士十月復署禮部尙書十一月賜紫禁城騎馬十二月充經筵講官十年九月陞工部尙書仍兼署左都御史十一年四月充考試試差閱卷大臣五月轉吏部尙書十二年正月兼署工部尙書二月復署翰林院掌院學士三月充會試正考官四月充考試試差閱卷大臣八月兼署工部尙書十月充教習庶吉士十三年四月超授體仁閣大學士管理戶部事務充國史館正總裁五月調管

兵部事務朝考閱卷官六月充教習庶吉士七月大考翰詹閱卷大臣命查三庫
十二月充文淵閣領閣事十四年正月命在軍機大臣上行走賜第圓明園四月
充考試試差閱卷大臣十五年正月充翰林院掌院學士上諭事件處充經筵日
講起居注官二月授東閣大學士管理工部事務四月充殿試讀卷官朝考閱卷
官考試試差閱卷大臣七月復改管戶部事務十六年正月充上書房總師傅三
月充會試正考官四月偕大學士公長齡等議覆鴻臚寺卿黃爵滋條陳漕河積
弊一嚴查匪徒混冒糧船水手滋擾並申嚴運官州縣處分一嚴查幫丁需索陋
規貽誤限期一嚴查沿河員弁怠玩誤工標兵廢弛闕額一嚴查河廳劣幕把持
浮估冒開工項一嚴查沿河匿報淤蕩屯留匪類得旨允行五月充朝考閱卷官
九月圓明園不戒於火世恩以迅赴救熄加三級十七年正月賞太子太保銜京
察屆期上以世恩克勤克敬不愧贊襄下部議敘四月充考試試差閱卷大臣十
八年四月充殿試讀卷官朝考閱卷官五月晉武英殿大學士十二月七十生辰
御書熙載延祺額弼亮宣猷襄密勿靖共介福錫康彊聯及珍綺等件賜之並諭
曰大學士潘世恩在內廷宣力有年端方勤慎遇事細心現屆七旬精神彊固加

恩賞戴花翎以示優眷謝恩時上復手賜玉管花翎十九年二月上謁東陵命留京辦事四月充考試試差閱卷大臣八月充順天鄉試正考官二十年正月京察屆期上以世恩矢慎矢公贊襄攸賴下部議敘時兩廣總督林則徐等議覆御史駱秉章條陳洋務並奏籌章程五條上命軍機大臣議奏世恩等疏言招徠之道得其情而後可以服其心而制馭之方峻其防而後可以祛其弊未有內治不嚴而能使外夷畏威奉法者也該督等所議定章程五條或爲變通舊例或循守成規通商所以裕民貴興利而除弊撫近卽以柔遠在因時而制宜應如所請行之以實持之以恆則夷情悅服而海防肅清矣允之三月充會試正考官四月充考試試差閱卷大臣二十三年正月京察屆期諭曰大學士潘世恩夙夜在公勤勞備至朕難以言喻下部議敘二月復諭曰大學士潘世恩年逾七旬嗣後朕御門辦事著加恩免其入班其該管衙門應行帶領引見之日亦著免其帶領以示朕體恤耆臣至意四月戶部銀庫虧空案發世恩以前查庫部議褫職上加恩改爲留任尋以罰賠銀兩全繳恩予開復八月諭曰大學士潘世恩年逾七旬襄贊綸扉精神彊固十年以來夙夜趨公宣勤佐治朕心嘉悅之至允宜特沛殊恩以節

勞勩著加恩在紫禁城乘轎用示朕優禮者臣至意十月以子曾瑋應順天鄉試有被控屬託謄錄之事世恩坐管教不嚴降三級留任二十四年二月偕戶部尙書敬徵等奏請查墾甘肅新疆等處地畝以裕邊儲疏言甘肅口內口外地處邊陲兵食所需爲費甚鉅近年以來疊據伊犁將軍奏報開墾荒地四十三萬畝有奇按戶陞科已著成效其甘肅各州縣及烏魯木齊所屬曠土必多儻能籌畫水利勸墾陞科日久儲蓄充盈以本地之利供本處之用即可減調餉銀更可節省採買並以額徵所餘津貼八旗支款實爲經久有益之舉應請敕下陝甘總督烏魯木齊都統體察情形遴委妥員隨時勘辦如所請行是月上謁東陵命留京辦事先是編修李汝嶠經世恩奏保入直上書房四月考試試差以懷挾奪職治罪世恩坐保舉不慎鐫級留任充殿試讀卷官五月充教習庶吉士二十五年十二月召見於養心殿上階失足傷脣齒上命嗣後進內時賜內監二人扶掖二十六年正月京察屆期上以世恩精勤襄贊一德一心下部議敘三月賞穿黃馬褂二十七年三月充會試正考官二十八年正月諭曰本年元旦淑氣清明和風翔洽現值諸方靜謐民物阜安從此仰荷天庥咸登壽宇因念在廷王大臣等有年屆

八旬贊襄盡職或歲逾七十亦皆精神彊固供職克勤故得以感召休徵作熙朝之人瑞允宜恩施特沛以昭優眷而迓祥和大學士潘世恩著晉加太傅銜並賞用紫纒十二月八十生辰御書壽字三朝耆碩額望重三公資燮理祥開八艷衍期頤聯句及珍綺等件賜之復諭曰大學士潘世恩由乾隆年間供職詞垣嘉慶年間洊擢尙書經朕簡任大學士軍機大臣充上書房總師傅襄贊綸扉宣勤日懋現在年登八秩精神彊固朕心嘉悅實深允宜特沛恩施以昭優眷伊孫潘祖蔭著加恩賞給舉人准其一體會試用示朕篤祐耆臣有加無已之至意二十九年正月京察屆期諭曰大學士潘世恩贊襄庶政矢慎矢勤年逾八旬精神彊固朕甚嘉焉著加恩從優議敘二月以奏保編修童福承入值上書房經給事中陳壇以童福承品行不端劾奏諭曰童福承身任詞垣不自檢束致招物議著不准其授讀潘世恩於師傅重選粗率不慎著勿庸充上書房總師傅並下部議處部議降三級調用上加恩改爲降四級留任自四月至五月因病三次請假諭曰潘世恩年逾八旬精神彊固向無疾病茲因上焦火盛腰脇作痛奏請賞假二十日若照常給假轉慮調理未能從容殊非所以示體恤潘世恩著毋庸定以假期俾

得安心頤攝俟病體全愈再行銷假入直以示朕眷念耆臣至意嗣疊次乞解職均溫旨慰留之十月諭曰本日據大學士潘世恩瀝情奏請開缺朕思軍機大臣夙夜在公勤勞較甚實非高年所宜潘世恩年逾八旬公勤素著若仍令其入直不足以示體恤著俟來歲春融赴閣辦事毋庸開缺以示朕逾格篤眷耆臣至意三十年三月應上登極求賢詔保舉在任在籍人員首以告病在籍前任雲貴總督林則徐歷任封疆有體有用所居民樂所去民思奏請徵召來京以備簡用並保前任福建臺灣道姚瑩等六月復以病久未痊具摺乞休諭曰潘世恩四朝舊臣敷歷有年經皇考宣宗成皇帝擢任綸扉夙夜勤勞益昭敬慎復命充上書房恩師傅前年壽躋八旬精神彊固蒙皇考恩賚便蕃並命朕撰製詩章用申祝慶上年元旦加恩耆舊諸臣特錫用紫纒晉銜太傅乃因夏間腰脇作痛漸形衰病懇請解退職任疊經溫語慰留並寬予假期解其樞務曲示體恤朕卽位後召對見其氣體尙未復元諭令安心靜攝仍兩次給假俾得從容調養茲復奏稱病體日久醫治未能速效力懇退休情詞肫切若不允所請轉無以安其心潘世恩著准其開缺以大學士致仕加恩賞食全俸用示朕篤念耆臣恩禮碩輔之至意咸

豐二年壬子科鄉試世恩以乾隆壬子科舉人例重與鹿鳴筵宴經順天府府尹奏諭曰致仕大學士潘世恩歷事四朝洊登揆席嘉謨碩學望重綸扉前於道光三十年間因老疊次乞休朕俯允所請賞食全俸令其在京就養現在年逾八秩重遇鹿鳴洵爲熙朝人瑞允宜寵眷優加潘世恩著准其就近在順天府重與鹿鳴筵宴伊子太常寺博士潘曾璋並著加恩以六部員外郎用以示朕篤眷耆臣有加無已之至意二年禮部舉行癸丑科會試以世恩例得重與恩榮筵宴諭曰予告大學士潘世恩由乾隆癸丑科一甲一名進士歷事四朝洊登揆席年逾八秩望重士林洵爲熙朝人瑞茲屆咸豐癸丑科殿試之期例得重與恩榮筵宴業經朕親書瓊林人瑞四字匾額先期頒賜以示寵榮茲據禮部遵旨具奏朕心深爲嘉慰潘世恩之孫潘祖同著加恩賞給舉人准其一體會試以示朕篤念耆臣有加無已之至意四年卒諭曰予告大學士潘世恩立品端方學問醇正由乾隆癸丑科一甲一名進士授職修撰自翰林洊擢正卿皇考宣宗成皇帝深加倚畀超登揆席簡任綸扉總理部務入直上書房夙夜宣勤特命肩輿入直晉加太傅銜賞戴花翎並賞用紫纁賞穿黃馬褂恩眷益隆服官五十餘年小心謹慎克稱

厥職道光二十九年因腰脇作痛懇請開缺疊蒙恩諭慰留朕卽位後因其年逾八秩寬予假期俾得從容調養嗣因陳懇肫切勉從所請准其致仕並賞食全俸又因重遇鹿鳴恩榮筵宴疊加賞賚用昭篤眷方冀長承恩澤永享遐齡茲聞溘逝悼惜實深著加恩賞給陀羅經被派怡親王載垣帶領侍衛十員卽日前往奠醑並著入祀賢良祠任內一切處分悉予開復應得卹典該衙門察例具奏伊孫國子監學錄潘祖同著賞給進士准其一體殿試翰林院編修潘祖蔭著以翰林院侍讀候補監生潘祖保著賞給舉人准其一體會試用示朕軫念耆臣之至意尋賜祭葬予諡文恭子曾沂舉人內閣中書曾瑩進士吏部左侍郎曾綬舉人內閣侍讀曾璋刑部員外郎孫祖同翰林院庶吉士祖蔭進士戶部左侍郎

卓秉恬子纓

卓秉恬四川華陽人嘉慶七年進士改翰林院庶吉士十年散館授檢討十一年以恭繕高宗純皇帝實錄聖訓尊藏本命王大臣總校並九卿翰詹官分司校勘秉恬與焉十二年充陝甘鄉試副考官十八年轉山東道監察御史以直省編查保甲吏役藉端索詐奏請敕下京外各地方官親自編查並明示條約毋任胥吏

里長索詐歛錢尤之十九年閏二月奏河南南陽府屬辦賑未善饑民載道又以四川東北境連年歉收米價騰貴應設法撫綏均得旨著河南巡撫四川總督悉心飭屬經理五月以各案積壓不辦奏陳二條一嚴捕強竊以懲兇橫一速結訟獄以省拖累諭曰著該督撫通飭所屬於緝捕聽斷事宜力爲振刷俾盜風盡熄訟案日稀如因循怠玩仍蹈故習卽嚴加糾劾以肅官常八月疏言上年軍營保舉人員頗多冒濫如山東曹州府知府金湘係廣興案內被革發遣之員山左有名善奔競乃奏請捐復留陝補用直隸順德府知府趙對墀少年紈袴因需索屬員被革亦奏請捐復查從前剿辦三省邪教務將所犯情節詳細聲敘蓋於棄瑕錄用之中示以慎重名器之意茲金湘趙對墀獲咎悉屬營私卽予以自新酌量錄用已屬格外施仁何得遽請捐復仍膺方面之任應請嗣後封疆大吏保舉人員其聲名素好事屬因公者准照例捐復如因私罪降革聲名較劣之員概不得濫行瀆請庶於格外矜全之中仍寓綜覈名實之意上韙之九月奏言近日盜風未熄總由捕役與盜賊因緣爲姦捕役藉盜賊爲漁利之資盜賊仗捕役爲護身之計或夤夜竊取或攔路劫掠富戶不敢報貧民不敢控恐官不爲理或轉坐以

誣告盜賊積恨又將荼毒甚至不肖捕廳非惟不能緝拏而且因以爲利捕役取財於盜捕廳取財於役公然議定數目按月收受謂之月規若直隸之大名滄州河南之衛輝陳州山東之曹州東昌武定江蘇之徐州比比皆是於吏治民生大有關繫計惟封疆大吏嚴飭所屬實力稽察如捕廳捕役有扶同參盜實跡加等懲處得旨允行旋陞吏科給事中巡視山東濟寧漕務十二月奏言微山湖水向來接濟韓莊八閘及江蘇邳州一帶運河上年湖水短絀不敷挹注江境多方疏導始克濟運本年雖蓄水寬裕兩省仍當不分畛域加意撙節再邳州各閘事宜僅以一主簿兼管恐照料不周應請於河清河定河成等閘派員幫同管理下所司議行二十年四月以督轡南糧出山東境較上三年迅速下部議敘先是經省閘河以疏通泉源爲濟運第一要務秉恬履勘泰安兗州各屬泉源督署泉河廳通判劉執桓搜出新泉數十處至是東平泰安萊蕪泗水蒙陰新泰滕縣等七州縣復偕劉執桓繪圖分等申報新泉可經久者四十三處委員覆勘相符取名勒石奏請咨由巡撫彙冊咨部允之十一月巡視中城二十一年三月以緝獲私硝私鹽各犯加一級四月轉工科掌印給事中九月以查獲私刻時憲書各犯下部

議敘十一月陞鴻臚寺少卿二十四年擢順天府府丞稽察東四旗覺羅學二十五年奏川陝楚三省老林情形疏言查由陝西之略陽鳳縣迤邐而東經寶雞郿縣鞏屋洋縣寧陝孝義鎮安山陽洵陽至湖北之鄖西高山深谷統謂之南山老林由陝西之寧羌褒城迤邐而東經四川之南江通江巴州太平大寧開縣奉節巫山陝西之紫陽安康平利至湖北之竹山竹谿房縣興山保康千巒萬壑統謂之巴山老林其地遼闊而磽瘠徭糧極微江廣黔楚川陝無業之民給地主錢數千即可租種數溝數嶺僑寓其中歲薄不收則徙去謂之棚民所聚既多良莠莫辨遇旱澇時傭作無資一二姦民爲之倡蟻附蠶起該州縣以地方遼闊莫可追捕互相隱諱迨釀成大案卽以疏防參劾事已無濟且事連三省大吏咨商往返州縣奉文辦理恆在數月之後與其卽一隅而專謀之何如合三省而共議之擬於扼要之地專設大員控制見在陝西之陝安道四川之川東道湖北之安襄鄖荆道未嘗不分轄其地而任分則事難專一界分則官得推諉應請敕下三省督撫確勘情形變通辦理經四川總督蔣攸銛陝西巡撫朱勳湖北巡撫毓岱會議奏將三省邊境之同知通判知縣佐雜並守備千總改駐添設以資防察得旨允

行道光四年三月調奉天府府丞兼提督學政五月丁父憂六年服闋十年授太僕寺少卿十一年稽察右翼宗學十二年六月畿甸亢旱奏請平糶以濟民食七月五城設廠平糶命秉恬分司其事九月陞大理寺少卿疏言宗學按月考課而與考者寥寥推原其故一則年既及歲雖能文而例應出學一則無所獎勵縱應考而僅列虛名應請照各省書院章程每月定期考課責令總管副管知會在學及不在學而願考之宗室屆期齊集由查學人員出題面試會同閱卷分別等第出榜示知其連考三次優等者記名存檔俟本學總管副管缺出挨次補用俾宗室人員倍加鼓勵雖國家所尤重者清語騎射然澤以詩書亦能變化氣質於嘉惠宗潢之至意更無微不至矣經宗人府議專就左右兩翼在學各生按期月課有連次取列優等者記名存檔俟有本學副管缺出與照例揀選之宗室人員一體選補允之十三年二月都城外定福莊等處分設煮賑六廠秉恬奉命稽察龐各莊賑務三月擢太僕寺卿七月遷太常寺卿九月陞宗人府府丞十四年七月以陝西已革鹽知事銜生員徐登元京控安康縣知縣王以銘侵帑冒賑各款命偕刑部左侍郎恩特亨額赴陝查辦尋訊明徐登元多係挾嫌誣控惟王以銘辦

賑報銷前後不符城隍各工有失察鄉約苛派之事奏請分別治罪從之十二月
陞內閣學士兼禮部侍郎銜充文淵閣直閣事十五年閏六月充江南鄉試正考
官九月陞禮部右侍郎十六年三月兼署吏部右侍郎轉禮部左侍郎七月調吏
部左侍郎九月充武會試正考官十七年正月署兵部尙書八月提督浙江學政
十二月陞都察院左都御史召回京十八年三月復署兵部尙書五月陞兵部尙
書八月署兼管順天府府尹事務九月命卽兼理先是兵部以各省督撫提鎮大
員有統轄官兵之責挑選兵丁作爲親隨未經定有額數遵旨議奏總督提督親
隨准照將軍例挑兵丁十名巡撫總兵照副都統例挑兵丁六名上命軍機大臣
會同兵部再行妥議至是秉恬偕大學士潘世恩等奏言督撫職任綦繁有查閱
營伍巡視地方之責若照原議額數恐不敷用應請於臨時准其酌量添派以供
差遣事畢仍卽歸伍從之十一月賜紫禁城騎馬十九年二月以堂弟卓秉恬於
宛平縣民焦開碌等請借公項挖煤案內指官撞騙秉恬坐失於約束下部議處
五月以申嚴鴉片煙例禁借王大臣等議奏吸食窩販及栽誣罪名並員弁徇縱
處分共三十九條得旨允行七月命查三庫二十年正月充經筵講官二月調戶

部尙書兼署兵部尙書二十一年三月上謁東陵命留京辦事閏三月調吏部尙書授協辦大學士二十二年四月秉恬六十生辰御書福壽字及文綺等珍物賜之七月命查三庫二十三年四月以兩江總督耆英奏籌江防海防事宜二十八條遵旨偕軍機大臣各部臣會議略言據奏防守各條似已確有把握惟將士能否用命全恃平日恩威見敵如何決機尤在臨時措置如果隨機應變協力同心則自海入江層層門戶不難制其死命至慎選文武以安兵民消弭積匪以清萌蘖尤爲善後第一要務應卽責成該督等隨地隨時認真辦理如所議行九月充順天武鄉試監臨嗣以戶部庫虧案發秉恬坐查庫失察奪職留任並分別銀數勒限罰賠十二月將應賠銀兩限內完繳得旨開復二十四年三月奏改順天府寧河縣爲衝繁難沿海要缺在外揀調永清縣爲簡缺歸部銓選下部議行十二月授大學士二十五年正月充經筵直講授體仁閣大學士七月管理兵部事務十月御史張修育因覃恩賞各省耆民絹棉米肉奏請改給頂帶上命大學士及軍機大臣會議尋議言據奏此項每至層層剝削與其虛糜帑項徒便侵吞何若恩賜銜名彌彰寵異應如所請並分別年歲以示限制允之二十六年充玉牒館

副總裁二十七年五月以殿試傳臚捧榜遲誤奪俸一年二十八年罷管理兵部事務二十九年二月管理戶部三庫事務五月偕府尹陸應穀奏查勘順天府屬礦廠請嚴行封禁如所請行三十年三月署管理戶部事務充會試正考官六月充國史館總裁授武英殿大學士咸豐元年復管理兵部事務自道光十五年至是年歷充殿試讀卷官五次朝考閱卷大臣四次大考翰詹庶吉士散館閱卷大臣各一次考試漢教習漢中書閱卷大臣各一次考試試差閱卷大臣二次順天鄉試覆試會試覆試閱卷大臣各四次二年正月復罷管理兵部事務七月以前題定郡王載銓息肩圖經給事中袁甲三奏劾奪俸半年自道光二十年四月至是年八月恭遇上謁陵秉恬皆奉命留京辦事凡八次九月管理工部事務三年以捐備軍餉賞戴花翎四年稽察欽奉上諭事件處五年卒遺疏入諭曰大學士卓秉恬由翰林科道洊擢正卿晉秩綸扉允稱厥職朕御極後見其宣力有年老成持重方資倚畀茲因患病迭經賞假冀其調養就痊長承恩眷遽聞溘逝悼惜殊深著加恩追贈太子太保銜賞給陀羅經被派睿親王仁壽帶領侍衛十員卽日前往奠醊所有任內一切處分悉予開復應得卹典該衙門察例具奏伊孫監

生卓景濂卓景洵均著賞給舉人准其一體會試以示優待耆臣之至意尋賜祭葬予謚文端子樓吏部右侍郎椿一品廕生樓道光二十年進士改翰林院庶吉士二十一年散館授編修三十年充會試同考官旋因秉恬爲正考官命迴避無庸入闈咸豐元年充文淵閣校理二年五月大考二等記名遇缺題奏並賜文綺六月充日講起居注官十月以恭修宣宗成皇帝實錄將次告成議敘遇有應升之缺開列陞用三年三月奏京城錢鋪關閉甚多有礙民生財用情形請飭步軍統領及巡城御史諭令各安生業其有藉端關歇阡人乘機搶奪者分別科罪旨如所請四月京察一等覆帶引見記名以道府用七月奏請留京供職允之八月遷右春坊右贊善十一月疏請變通捐例以廣招徠一另開報效捐例照籌餉二卯再減數成一選補之法准壓各項舊班一捐輸之員覈其銀數多寡准捐免試俸及捐升銜封典以至加級紀錄一體減成照辦下部議行十二月捐備軍餉下部議敘四年二月超升右庶子五月遷大理寺少卿七月超擢內閣學士兼禮部侍郎銜九月稽察中書科事務十月升兵部右侍郎十一月調吏部右侍郎五年四月充考試試差閱卷大臣十一月丁父憂六年宣宗成皇帝實錄全書告成七

年四月國史館恭輯宣宗成皇帝本紀告成標均以以前充纂修總纂官先後各加二級八月卒子景澄山東候補知府景濂進士河南候補知府景涵兵部員外郎

文慶

文慶費莫氏滿洲鑲紅旗人曾祖溫福大學士祖永保兩廣總督俱有傳文慶道光二年進士改翰林院庶吉士三年散館授編修四年八月充日講起居注官陞翰林院侍講五年充山東鄉試副考官轉侍讀九年正月遷國子監祭酒八月陞詹事府詹事十年十月命稽查左翼覺羅學十二月充文淵閣直閣事十一年三月遷通政使司通政使五月充福建鄉試正考官十二年三月陞都察院左副都御史九月陞內閣學士兼禮部侍郎銜十月署禮部左侍郎充武殿試讀卷官十一月兼鑲白旗漢軍副都統十二月實授禮部右侍郎十三年正月以上年除夕保和殿筵宴帶領琉球朝鮮兩國使臣跪領賜酒班次先後錯誤下部議處四月調正藍旗滿洲副都統五月命總理孝慎成皇后喪儀六月偕惇親王綿愷等議奏軍民薙髮及停止宴會限制誤引百姓如喪考妣四海遐密八音之說下部嚴議降三級調用上加恩改爲降四級留任並諭曰文慶係翰林出身虞書二語深

切著明若竟不知則學問亦太淺薄若知而不言大臣遇此等事不肯開誠布公隨聲附和尤屬非是著革去副都統降爲三品頂帶十月充武殿試讀卷官十二月署刑部左侍郎十四年二月賞還二品頂帶兼正藍旗漢軍副都統三月署鑲藍旗蒙古副都統五月調正白旗滿洲副都統六月管理國子監事務十月充右翼監督署刑部右侍郎十一月充武英殿總裁十二月調吏部右侍郎十五年正月署工部右侍郎兼管錢法堂事務五月署正紅旗護軍統領十二月以孝穆成皇后孝愼成皇后奉安禮成加二級尋調戶部右侍郎兼管錢法堂事務十六年三月以御史許球奏參陝西巡撫楊名颺關防不謹牟利勒捐廢弛捕務各款違命偕戶部尙書湯金釗前往查辦五月通政使司參議劉誼奏請清查四川捐輸及軍需銀款與各州縣被參交審各案遵命偕湯金釗由陝赴蜀清查旋奏大竹縣知縣郭夢熊於差役釀命朦詳開脫廣元縣典史董秉義擅受縱差詐贓釀命知縣春明旣失察又率准攔驗巴縣知縣楊得質收受壽禮並違例科罰江安縣知縣夏文臻雖無劣跡不洽輿情資州知州高學濂薛濟清前任四川布政使李羲文前在峩邊軍營供張華靡迨凱旋趾高氣揚致招物議乖張任性並請嚴議

事詳湯金釗傳九月充總管內務府大臣偕湯金釗由蜀回陝復以楊名颺奏參署按察使督糧道李廷錫任性挾制廷錫亦稟揭研審一家四命案究出知縣郭思儀刑求逼供知府趙廷俊徇庇捏詳楊名颺因與趙廷俊同鄉屬爲設法消弭並遵諭將名颺乾沒工賑袒護同鄉各款查奏尋奏楊名颺於西嶽廟工含混巧飾且於臨潼富平等缺將同鄉謝長年等調補意存袒護得旨奪名颺職並解任其與廷錫參訐一款屢易供詞意圖抵賴復經文慶等奏尋以湯金釗留署陝西巡撫文慶遵旨由陝赴豫查明武陟縣知縣趙銘彝被參各款尙無貪婪劣跡惟於書吏偷減橋工虧欠錢糧各案將應訊之犯濫刑病斃復於民人誤賣官地之案違例科罰錢文其由修武調任武陟將修武之差帶赴新任隔屬充役亦屬不合十月奏請褫職允之十一月回京調戶部左侍郎十七年三月署吏部右侍郎五月兼右翼總兵六月命在軍機大臣上學習行走七月充國史館副總裁以步軍統領衙門主事音德赫前在司務任內於被參營員袁世魁揀選員缺時未將原案呈堂查辦至開送二參始行檢舉文慶坐失察下部議處八月充順天鄉試副考官十一月熱河新任正總管福泰奏庫存銀兩虧短命文慶前往偕都統宗

室耆英查辦尋查明歷任總管擅動生息項下銀兩未經報銷已革苑丞佟鏗苑副盛福伸等扶同弊混請將副總管榮桂及歷任總管恆榮等一併革職解交熱河訊結又奏未據報銷銀兩請分別追繳並將見存銀兩抵放官兵俸餉又以熱河園庭陳設業經歸併尊藏奏請撤減內外看管官兵均如所請行十八年正月命在軍機大臣上行走四月充殿試讀卷官朝考閱卷官閏四月充教習庶吉士文淵閣提舉閣事管中正殿圓明園事務罷武英殿總裁五月偕軍機大臣大學士穆彰阿等議覆兩江總督陶澍等豫籌積儲疏言據奏天庾正供設法辦理應請嗣後遇江南各省大熟之年糧價平減卽酌量採買委員由海運解惟米價尤須查明嗣後遇江南各省年豐穀賤之時應令該督等察看情形如何採買卽飭查市報糧價以制錢合照紋銀時價估報並估定上海運至天津由津運通腳價詳悉奏明請旨由戶部撥銀辦理九月朝陽門外尼庵挾妓飲酒案發文慶以內務府郎中文奇閒遊入座失於管束自行檢舉下部議處先是浙江乍浦副都統善英奏參杭州將軍桓格揀選佐領不擬正陪桓格奏稱防禦勒爾經阿等弓馬輒弱未經揀選俱召來京文慶偕大學士潘世恩尙書宗室奕紀遵旨考驗集訊

桓格於勒爾經阿等二員弓馬輟弱不照例參奏輒令具呈託病告退究屬非是善英接到告退咨文明知與例不符並不咨駁又屢催不覆率行具奏其居心實不可問奏請分別嚴議議處如所請行是月調鑲黃旗滿州副都統十月兼正藍旗護軍統領十一月賜紫禁城騎馬十九年正月調正黃旗護軍統領偕大學士潘世恩等遵旨議覆兵部奏籌各省督撫提鎮總管城守尉挑選兵丁充作親隨額數略言查文武大員職任繁簡不一除總督提督親隨兵丁請照原議挑取十名巡撫總兵挑取六名外其督撫職任較繁有查閱各營巡視地方之責若照原議額數恐不敷用應請於臨時酌量添派差遣事畢仍卽歸伍不得冒濫至京旗都統副都統前鋒統領護軍統領親隨兵丁各挑二名原足敷用其御前大臣隨扈有遞馬接馬差使向用所管各營兵丁跟隨亦毋庸增添惟管理各營大臣所用兵丁仍令隨時酌派期於敷用尤之十月熱河已革苑副盛福伸等虧短庫項限滿不完永遠監追未將原擬發遣等情聲明並文慶原審定擬承問奏對失實下部議處十二月罷軍機大臣上行走二十年六月充江南鄉試正考官以定草榜時將下江中卷誤註上江榜發查出上江正副榜各少中一名下江各多中一

名自行檢舉並監臨安徽巡撫程楙采嚴議十一月又以私帶湖南舉人熊少牧入闈幫同閱卷諭楙采查奏並命文慶明白回奏文慶自請嚴議得旨褫職二十二年六月賞三等侍衛充庫倫辦事大臣十二月內務府司員珽璋冒銷案發文慶以前充管理大臣坐失察革職留任仍罰俸一年二十三年四月召來京授吏部右侍郎七月充順天鄉試監臨官閏七月轉左侍郎八月以首場散卷遲誤並闈中水夫接遞牆外布卷委官不候轎門御史到齊遽行擊鼓開門致該犯聞拏乘間逸出下部議處尋兼正藍旗蒙古副都統充崇文門副監督十二月兼鑲藍旗護軍統領總管內務府大臣二十四年二月陞都察院左都御史兼鑲藍旗漢軍都統三月充會試副考官十一月復賜紫禁城騎馬十二月管理戶部三庫事務二十五年陞兵部尙書以駐藏大臣琦善參奏前任大臣孟保前任幫辦大臣鍾芳等濫提官物命赴四川借總督覺羅寶興成都將軍廉敬查辦尋按實奏請將孟保等分別嚴議議處又已革諾們罕挾嫌訐控琦善各款訊係全誣奏辦如律二十六年三月署翰林院掌院學士八月充崇文門正監督順天鄉試副考官二十七年五月復命在軍機大臣上行走罷兼管內務府事務八月命署陝甘總

督順道查辦河南賑務十月以考城縣知縣畢元善假手吏胥戶口浮冒奏請解任嚴辦署獲嘉縣鄒之翰辦賑遲誤長葛縣知縣彭元海署洧川縣周劼戶冊舛錯均請下部議處允之尋召來京二十八年正月署吏部尙書二月實授兼步軍統領總管內務府大臣罷軍機大臣上行走十二月充翰林院掌院學士日講起居注官二十九年十一月管理戶部三庫事務十二月孝和睿皇后升遐總理喪儀並恭辦昌西陵工程三十年正月宣宗成皇帝升遐命恭理喪儀二月充實錄館總裁五月充內大臣先是甘肅河州民人蘇生一以道士裝畫符咒水於本省及西口外藉醫惑衆二十八年改名黃魯香來京行醫文慶以骸疾延之診治並講按摩法二十九年改名薛執中復自江南抵京還俗裝擅議時政妄談休咎文慶偵知行蹤詭秘飭屬查訪未及拏究至是年六月經中城御史拏獲交部審辦供出前後職官延醫並捏有拜師取號等情文慶遵旨回奏言上年骸患溼疾曾延道醫黃姓診治適侍妾患急症診兩次俱見效當卽給銀二十兩川紬一疋謝之其所稱傳道等語伏思身心性命之旨卽在聖賢經傳之中雖窮理未精力行不逮斷不致向龔鄙之人屈身求教惟步軍統領職司緝捕而於此等屢次改名

易裝藉醫招搖之人未能及時拏究咎實難辭請嚴加議處七月讞定諭曰吏部尙書文慶延請該犯治病學習按摩身任步軍統領與戶部侍郎福濟既查知該犯詭秘情形商同緝拏何以不立時拏究其回奏不實不盡之處姑弗深究卽此遷延疏縱均屬有乖職守著卽革職毋庸再交部議咸豐元年賞五品頂帶仍恭辦昌西陵工程二年五月授內閣學士兼禮部侍郎銜七月以題定郡王載銓息肩圖下部議處十一月復擢戶部尙書十二月賜紫禁城騎馬三年九月署正藍旗漢軍都統十月兼鑲紅旗漢軍都統十二月以捐備軍餉下部優敘四年四月充內大臣閏七月管理國子監事務十月充翰林院掌院學士調鑲黃旗漢軍都統五年二月署正藍旗蒙古都統七月命在軍機大臣上行走八月署吏部尙書九月命以戶部尙書協辦大學士十月恭題孝靜成皇后神主禮成賞加太子太保銜十二月授文淵閣大學士管理戶部六年四月充朝考閱卷官五月管理三庫事務六月充實錄館監修總裁上書房總師傅自道光十二年至是年歷充會試覆試閱卷大臣一次朝考閱卷大臣三次監修總裁正副總裁暨提調纂校收掌繙館閱卷大臣二次考試試差閱卷大臣三次大考翰詹閱卷大臣一次武殿

試讀卷官三次教習庶吉士二次庶吉士散館經筵講官三次十一月宣宗成皇帝實錄聖訓告成下部議敘並賞御用袍一件賞加一級尋改武英殿大學士是月卒遺疏入諭曰大學士文慶人品端粹器量淵深辦事精勤通達治理渥承皇考宣宗成皇帝知遇由翰林洊陟卿貳在軍機大臣上行走緣事罷斥旋即起用擢任正卿朕御極之初復因案獲咎念其平日服官謹慎特命督辦昌西陵工程悉臻妥協擢授戶部尙書正值辦理軍務籌畫度支克盡心力上年秋復命爲軍機大臣旋授大學士仍管理部旗事務夙夜宣勞深資倚畀茲以偶染微疴給假調理方冀卽日就痊茲聞在園寓溘逝悼惜殊深昨已賞給陀羅經被並派員勒載治帶領侍衛十員前往奠醊本日披覽遺章彌深軫惻著加恩晉贈太保照大學士例賜卹並賞給廣儲司銀一千兩准其入城治喪本月二十六日朕親臨賜奠任內一切處分悉予開復應得卹典該衙門察例具奏用示朕眷念蓋臣至意又諭曰大學士文慶溘逝業經降旨優加賜卹昨日朕親臨賜奠見其遺孤幼穉親支人丁稀少殊深愴感因思文慶人品醇正奉職勤能宣力有年靖共夙夜著加恩入祀賢良祠伊子監生善聯俟及歲時由該旗帶領引見伊弟已革都司文

玉現在遣戍著卽釋回以示朕眷念蓋臣推恩優渥至意尋賜祭葬予諡文端子善聯禮部郎中

裕誠

裕誠佟佳氏滿洲鑲黃旗人父舒明阿襲一等公爵杭州將軍裕誠由廕生於嘉慶十四年授三等待衛道光元年授二等待衛四年擢頭等待衛六年襲一等公爵賞散秩大臣在乾清門行走七年七月授正紅旗漢軍副都統十月授內閣學士兼禮部侍郎銜十二月充左翼監督八年逆回張格爾就擒裕誠以在奏事處接遞文報交部議敘十年六月調鑲白旗滿洲副都統八月充崇文門副監督九月補武備院卿十一年正月兼鑲藍旗護軍統領十月授兵部左侍郎十二年正月調工部左侍郎二月調右侍郎兼管錢法堂事務四月充繙譯會試副考官十三年四月調正白旗護軍統領命恭理孝慎成皇后喪儀五月偕惇親王綿愷等議奏軍民薙髮及停止宴會例義未協並妄引經百姓如喪考妣四海遏密八音之語下部嚴議尋降四級留任奪護軍統領退出乾清門行走十四年正月復調工部左侍郎四月兼正藍旗護軍統領十一月赴盛京恭勘永陵及福陵工程十

五年閏六月調正黃旗護軍統領九月上謁陵禮成下部優敘是月上閱視兩翼八旗護軍等步射正藍旗弓力過弱以裕誠未能認真訓練命鐫級留任十二月孝穆成皇后孝慎成皇后奉安禮成加二級十六年四月充繙譯會試副考官五月上祀天神壇以對引失儀奪俸十七年調戶部右侍郎兼管錢法堂事務十八年四月授總管內務府大臣閏四月奏戶部寶泉局鑪役史瑞等脅衆停鑪罪狀查辦如律尋管奉宸苑造辦處總理工務處事務五月兼鑲紅旗蒙古都統仍兼散秩大臣七月管理圓明園事務九月歷充武闈監射考取國子監助教大臣十一月賜紫禁城騎馬擢都察院左都御史陞兵部尙書兼鑲紅旗滿洲都統調正白旗漢軍都統十九年四月甄別不職之兵部郎中慶綱等奏請勒休上韙之五月遵擬已撤護衛曾授誥封者補官章程請頭等護衛以副驍騎參領用二等護衛四品典儀以印務章京用三等護衛五品典儀以驍騎校用於撤出後均先令回旗學習行走責成該都統等考察如果留心旗務奔走勤奮者俟本旗出缺後候旨補用從之七月景陵茶膳房失火工部郎中宗室敕功等承審失入交吏兵二部嚴議裕誠等議律輕縱降四級留任尋歷充稽察三庫大臣崇文門監督二

十年正月管太醫院茶膳房精捷營事務五月上駟院員外郎兼正白旗佐領德春於領催接替時回明隱匿錢糧僅令裁汰並不呈堂查辦裕誠坐失察奪俸十一月以恭理孝全成皇后喪儀下部議敘二十一年正月管理戶部三庫事務二月廣儲司被竊裕誠坐失察鐫級留任尋獲賊犯恩予寬免十二月以失察庫員辦理折賞緞疋舞弊降級留任二十二年三月上幸南苑諭曰京師南苑爲我朝肄武習勤之地前因圍場牲畜寥寥將該管大臣議處改派載銓裕誠管理奉宸苑事務本年朕駐蹕南苑行圍所至漸復舊規該王大臣等經理認真著有成效甚屬可嘉裕誠等均著加恩交該衙門議敘九月兩廣總督祁墳奏稱粵海水師乏員請於陸路及世職人員隨營武舉內擇其諳曉洋面事宜者調飭出洋試驗補用裕誠遵旨議奏略云外海水師與陸路不同今因水師乏人應准其於陸路將備內酌保遊擊都司各一員守備千總各二員仍令帶赴外洋試驗一年期滿後果能殺賊立功熟諳水性准該上司出具切實印結保題遇缺輪用與陸路呈改各員統較題准先後日期挨補至雲騎尉恩騎尉及隨營武舉如果熟悉水性願改水師者應准隨時呈改果能擒賊立功熟諳水性武舉按三年期滿世職按

五年期滿覈計題准先後日期輪缺補用如所請行十一月以造辦處新造礮位不能如式降級留任十二月復以總管內務府任內失察庫掌璉璋等假印冒領革職留任仍罰俸一年時兩江總督宗室耆英奏陳水師營將備應照例專取槍礮而略騎射並請將赴部之員先行閱看鳥槍下部妥議裕誠等奏言沿海省分考驗水師專以練習槍礮爲要務一切洋面事宜或善操駕舟楫或能緝匪擒賊或慣遭風涉險均於平日逐一考驗分別等第弁兵隨時存記遇有缺出按照等第揀拔將備隨時報部註冊遇有缺出亦援照咨部記名之案於題本內切實聲明如係例應引見之員請由部臣先行閱看鳥槍如果精熟有準再准帶領惟是陸路施放鳥槍與駕舟楫不同全在帶領巡哨各員隨機應變應由山東江蘇浙江福建廣東各督撫提鎮嚴飭所屬勤加訓練於考拔弁兵時卽以講求水務爲去取於題陞將備時亦以講求水務爲黜陟如此認真辦理方於水師有益上躋其議二十三年四月戶部銀庫庫丁張成保偷盜庫銀裕誠坐失察議降一級調用上加恩改爲降二級留任是月盤查庫款計短銀九百二十五萬二千餘兩裕誠以見任管庫大臣革職留任八年無過方准開復尋命審辦庫案明定罰賠期

限及嗣後盤查章程九月充滿洲繙譯鄉試正考官二十四年十月以失察太監李得喜私創暢春園官土山蓋屋下部議處十一月祁墳奏廣東瓊州廉州等府近接外洋有匪徒在交界地方劫掠經越南國會同擒拏請嗣後偵有匪蹤卽知會該國一體堵緝下部會議裕誠以夷夏之防宜謹於未事若以中國應捕匪犯輕用外人兵力既於體制未協且恐沿邊將士恃有外人協緝廢弛捕務於海防轉無裨益奏寢之二十五年調工部尙書仍兼署兵部尙書四月以銀庫罰賠銀兩全繳恩予開復充盤查三庫大臣尋以兵部違例派署掌印又於司員索詐書吏未能據實參辦降五級調用九月授太僕寺少卿二十六年授察哈爾副都統二十七年陞都統先是察哈爾八旗蒙古官兵都統及副都統隔年輪查每旗僅選兵數十名以備校閱餘均係該總管按月操演隔年查旗之舉徒滋糜費奏請改於查驗軍政之年該都統等輪流出口全數校閱此外年分責成各該總管認真經理切實呈報得旨允行二十八年三月擢荊州將軍十月調成都將軍十二月署四川總督二十九年二月雲南富民縣知縣廣利因受本籍職員劉元吉銀兩恐其告發誣捏以燒香結盟情事經總督程喬采訪查入於甄別案內以府經

歷縣丞降補廣和疑係布政使趙光祖詳揭因摭款誣訐命裕誠前往審辦尋鞫實治罪如律九月召回京三十年七月授兵部尙書總管內務府大臣九月宣宗成皇帝梓宮奉移慕陵禮成加二級復賜紫禁城騎馬自道光十八年至是年疊次充經筵講官咸豐元年正月調戶部尙書三月兼正白旗漢軍都統五月命以兵部尙書協辦大學士六月授內大臣八月充崇文門監督署吏部尙書閏八月充滿洲繙譯鄉試正考官二年正月授文淵閣大學士三月宣宗成皇帝永遠奉安禮成命裕誠恭題神主賞太子太保銜又以恭理喪儀慕陵值班賞加三級四月歷充庶吉士散館閱卷大臣殿試讀卷官九月擢文華殿大學士命遣官賜祭祖塋十一月管理理藩院事務充臨雍進講大臣三年三月孝和睿皇后永遠奉安禮成賞加一級又以恭題神主賞御用袍一件時粵匪竄入江南援師雲集裕誠請推廣恩給勸捐裕餉從之四月署理藩院尙書六月充國史館總裁仍管三庫事務充崇文門監督十二月以歷次報捐軍餉交部議敘四年二月刑部主事王式言承審命案聽囑失入裕誠以會審大臣草率擬奏下部議處四月充閱兵大臣十月管光祿寺上駟院事務十一月充文淵閣領閣事五年正月伊犁將軍

奕山請酌裁伊犁鎮總兵以領隊大臣兼任裕誠偕軍機大臣議以邊疆重鎮設立已久更易舊制流弊滋多奏寢之三月偕恭親王等遵議陝甘總督易棠奏請裁變馬廠疏云甘省馬廠設自乾隆年間非徒以孳生之馬撥補營缺可以節省價銀亦以秦隴爲形勝之區而內地又惟甘肅可設馬廠原備一時緩急之用今以撙節經費遽議裁撤於馬政實有妨礙應寢其議從之七月恭理孝靜成皇后喪儀尋調正黃旗滿洲都統十月恭勅慕東陵工程十一月孝靜成皇后梓宮奉移慕東陵暫安禮成加一級六年四月充庶吉士散館閱卷大臣殿試讀卷官十月充玉牒館督催官十二月補正黃旗領侍衛內大臣調正白旗領侍衛內大臣七年二月充上書房總師傅是月孝靜成皇后永遠奉安禮成加三級先是內務府承襲世職幼官向不入官學肄業及歲時不分優劣概准支食全俸裕誠以爲不足以廣造就請照八旗定例歸入兩翼官學肄業以昭畫一如所議行六月以捐輸採買米石交部議敘八年正月京察屆期上以裕誠宣力有年靖共在位下部議敘二月以順貞門不戒於火迅卽撲熄加二級五月卒遺疏入諭曰大學士裕誠植品醇正辦事勤能器量淵深老成練達由廕生侍衛嘉慶年間卽在乾清

門行走疊蒙皇考宣宗成皇帝擢至正卿供職內廷緣事降調復任都統將軍朕御極之初內用尙書晉秩綸扉仍兼管內務府大臣管理都統旗務敷歷中外懋著勤勞前以微疴給假調理方冀就痊正資倚畀茲聞在園寓溘逝悼惜殊深著賞給陀羅經被命恭親王奕訢帶領侍衛十員卽日前往奠醊加恩晉贈太保照大學士例賜卹准其入城治喪並賞銀一千兩本月二十二日朕親臨賜奠任內一切處分悉予開復應得卹典該衙門察例具奏用示朕眷念耆臣至意又諭曰大學士裕誠溘逝業經降旨優加賜卹本日朕親臨賜奠見其遺孤幼穉殊深愴感因思裕誠人品醇正敷歷中外奉職勤能著加恩入祀賢良祠伊子堃林俟及歲時由該旗帶領引見以示朕眷念蓋臣恩施優渥至意尋賜祭葬予謚文端孫克昌襲一等公爵

琦善

琦善博爾濟吉特氏滿洲正黃旗人祖恩格得理爾以率屬投誠功世襲一等侯爵父成德熱河都統襲侯爵琦善由廕生於嘉慶十一年以員外郎用分刑部十三年補官十七年陞郎中十八年京察一等十九年二月擢通政使司副使十月

授河南按察使時汝寧光州一帶教匪滋事擾及安徽湖北琦善先後獲犯七百餘巡撫方受疇上其功賞戴花翎二十二年以秋審案內罪名失入降一級留任二十三年四月署布政使五月陞江寧布政使九月調河南布政使二十四年三月陞巡撫時南陽儀封汛武陟馬營壩相繼河決命偕署吏部尙書吳璥等堵築十月以督催物料遲緩奪花翎二十五年三月馬營壩合龍而儀封南岸三堡漫口至一百三十餘丈上以琦善堵禦不速革職命以主事銜仍隨吳璥等辦理六月賞四品頂帶授河南按察使復以蘭儀漫口案內漏參署開歸道南河同知王仲淮經巡撫奏參降二級留任九月調山東按察使道光元年五月賞三品頂帶六月遷福建布政使調山東布政使尋陞巡撫二年丁父憂百日孝滿仍署山東巡撫尋襲一等侯爵四年二月館陶縣北界紅花隄缺口欽差大學士戴均元議從下游疏挑新河並自缺口至入衛河處所築東西兩隄以免旁溢琦善奏言疏挑新河應先斷隄補培再於隄頭東西兩口盤作裏頭以禦漳水新河五支以外東西兩岸各築護隄並臨衛河築大隄以資捍禦得旨允行三月直隸清河縣匪徒馬進忠等在臨清州立號傳教琦善飭屬掩捕究出夥黨五百七十餘名上嘉

其詳慎妥速復賞戴花翎下部議敘四月奏恩縣四女寺支河淺狹請將沿河工段展寬加深俾漳衛二水暢達又言曹州濟寧二府屬地勢低窪雖有微山獨山等湖受水而逐節淤墊未能流通勘明鉅野城武定陶魚臺金鄉嘉祥單曹等縣並臨清濟寧二衛應挑各河請動支司庫地丁銀雇民挑挖均兪允時河南高堰山圩石工爲暴風掣卸修隄辦賑需用浩繁琦善以山東界在鄰省請籌銀八十萬兩備撥上嘉其不分畛域辦理有方五年正月京察屆期上以琦善明幹有爲任勞任怨前辦馬進忠逆案不動聲色誅捕淨盡尤爲卓異賞加總督銜仍留署山東巡撫之任二月服闋以總督銜實授巡撫五月擢兩江總督先是高堰漫口清水洩枯前任總督大學士孫玉庭籌辦借黃濟運而運河受淤漕船仍形淺阻復請截留米石存儲准揚量爲平糶上以孫玉庭種種貽誤命琦善悉心查議至是疏陳盤運之法並黃運兩河淤墊情形請敕河臣周歷履勘豫籌隄防催築湖工早爲寬蓄並嚴定廳汛疏防處分如所議行是月兼署漕運總督九月以滇銅運船淺攔奏請起剝盤壩換船接運嗣因漕船滯運借署漕運總督穆彰阿江蘇巡撫陶澍會奏請將蘇松常鎮太四府一州應徵道光五年分新漕暫行海運並

議起運兌收及沿海水師會哨巡防各章程均下部議行又以運河淤淺借南河總督嚴烺漕運總督陳中孚請將外北廳浦家莊中河廳王家莊停淤段內酌估挑濬多作小壩雙金閘以上築攔河柴壩一道中留金門約寬三丈俾資收束邳宿等處運河向恃微山湖水接濟本年存水無多且地勢淺隘亦請加濬寬深並籌來歲新漕接運先期備辦各事宜均如所請六年二月覆奏言黃河八灘以下兩岸淤隄盡處接築長隄八灘以上坐灣過甚各處取直挑河並將兩岸隄工增高培厚下部議行七月奏河工積習相沿將珠玉玩好餽送上司夤緣投效以致工程草率請申嚴例禁上躡其言九月以江北各府州夏秋水潦收成歉薄請撥米平糶並招商給票免稅如所請行七年三月兩淮鹽政張青選疏請整頓漕務琦善遵旨會同查覈臚陳四事一先銷舊引以清界限一提完借款以資轉輸一暫加鹽斤以示招徠一清釐岸店以節浮費從之初黃流淤墊回空糧船阻隔河北琦善等議啟王家營舊減壩將正河大加疏濬至是以挑工完竣全黃輓歸正河減壩合龍穩固入奏報聞尋因減壩堵合後黃水倒漾水勢日見擡高復將禦黃壩封閉借河道總督張井等奏辦倒塘灌放之法並自請從重治罪命拔去花

翎戴罪自贖所有倒塘灌放各費著按成賠補尋命大學士蔣攸銛工部尙書穆彰阿往勘奏言琦善泥於逢灣取直成法以致黃水倒漾得旨交部嚴議議上諭曰琦善等定啟放王家營舊減壩之議朕不惜帑金悉照所議辦理乃始因湖水異漲大啟押壩迨宣洩不暢趕開減壩以爲迅啟禦壩暢洩湖漲之計致下游田廬淹浸居民蕩析已屬辦理不善然果能一舉奏效尙當權利害之輕重不復深責及至本年堵閉減壩而黃水仍未消落運道依舊不通並將下游挑工前功盡棄該督等不知集思廣益竟聽唐文睿一人謬論致誤事機捫心自問尙有何顏對數百萬災黎耶本應照部議卽予褫革姑念琦善平日辦事尙屬認真前在山東巡撫任內頗知整頓河務本係兼轄著卽開缺降爲二品頂帶來京另候簡用七月授內閣學士兼禮部侍郎銜八月署倉場侍郎旋授山東巡撫諭曰此係朕爲愛惜人才起見當益加奮勉於東省吏治民風實力實心妥慎經理九月兼署河東河道總督八年正月江西學政福申失察家人蕭三恣橫案發琦善前在兩江總督任內疏稱福申場規嚴肅關防慎密坐袒護同官降一級留任時盛京邊界有直隸山東流民占種官荒地畝積至二三萬戶俱由天津登萊青各海口小

船徑渡琦善遵旨議覆禁阻章程六條一商漁船隻申明定例曉諭一牌頭保甲
飭就近稽察一出口船商責成汛員查驗一審理詞訟州縣隨時盤詰一奉天等
處種地民人隻身回籍令呈明執照一奉天等處海口營縣飭一體稽察又議覆
御史常恆昌籌辦直隸山東河南三省會緝章程略言東省毗連直隸十五州縣
河南四縣其荷澤一縣則南界河南西界直隸犬牙相錯州縣政事繁冗佐雜各
有職守均難駐一處專管巡防計惟有扼要布置慎守本界遇匪卽拏擬令各州
縣選幹役十名撥營兵五名擇要駐緝其附近之分防佐雜汛弁遇有匪犯立卽
協拏總使本境之犯不能竄出他境不能竄入於各守本界中仍寓不分畛域之
意如所請行十二月以德州駐防滿營生齒日繁偕青州副都統國祥請援青州
成案由閒散壯丁內挑選餘兵操練每月給銀一兩以資造就而贍生計允之九
年擢四川總督十年兼署成都將軍十一年二月調直隸總督五月以永定河下
口水歸故道鳳河汛見無要工南八工下游爲衆水滙注之區遇有險要需員防
守請移鳳河汛把總及額設河兵駐南八工下游以重宣防七月請改豐潤等處
營田歸地方官經理均從之尋疏陳籌辦緝捕經費略言直隸近年劫案順天南

路最甚東路及西北路次之其廣平大名天津河間等府與河南山東接壤多積匪巨窩各營縣捕役兵丁往往得規包庇推原其故兵役僅額設工食其雇覓眼綫等用無項可支各州縣類多衝途瘠區勢不能捐資津貼遇有重大案件又不能懸示重賞使卽獲賊復慮解勘需費百端開脫甚至諱盜爲竊捕務廢弛擬請司庫節省馬乾營馬變價及廣恩庫支膳地租等款借銀十萬兩交典生息半還庫款半充緝捕經費以獲案多寡酌定兵役賞罰並州縣勤惰分示勸懲上嘉勉之八月入覲上念其宣力封疆有年復賞戴花翎先是直隸民人尹老須習教傳徒東豫兩省民多煽惑經河南巡撫訪獲逆帖奏交直隸查辦琦善飭屬拏獲僅憑一而之詞取供釋放尋由其黨王法中另案根究得實又不將承審各員查參內閣學士陳嵩慶奏請將琦善及失察各員下部嚴議御史裘元俊徐培深亦以爲言得旨革職留任並降爲三品頂帶拔去花翎十三年賞還頭品頂帶十四年七月以永定河南北各汛漫溢下部議處十月請修理張家口第二圈營房西北石壩並蒙古營西北添築虎皮石壩一道允之十五年孝穆成皇后孝愼成皇后梓宮奉移龍泉峪琦善以辦差妥協復賞戴花翎十六年上謁東陵薊州進西道

路修墊未平褫寧津縣知縣楊士昕職琦善下部察議六月校閱營伍以槍礮中靶分數不如弓箭之多疏言直隸兵額弓箭六成鳥槍四成與川陝等省鳥槍六成弓箭四成者不同其各營兵丁又不准支食馬糧與督標槍礮兵丁准拔補外委千把總者亦屬辦理兩歧擬請量爲變通將各營馬步箭兵擇弓強力硬者酌留四成其二成添習鳥槍如中靶有準更習馬槍至刀矛兩項令藤牌兵習練馬步箭兵願兼習者聽外委額外及馬糧缺出准一體拔補從之先是河間協副將向遵化經琦善奏保堪勝總兵至是向遵化在湖南鎮守鎮總兵任內以駕馭無方奪職琦善坐濫舉降四級留任七月命以直隸總督協辦大學士十七年正月給事中陳功奏京城右安門及黃村各處無業遊民演放鳥槍並直隸各屬火器傷人之案輒諱鳥槍爲竹銃規避處分琦善遵旨偕兼管順天府府尹何凌漢府尹曾望顏議覆略言搜查既恐紛擾徒恃出示又難家諭戶曉欲使民鼓舞樂從莫如官爲收買並陳編號存留嚴禁私造隨時稽察及地方官勸懲章程四條如所請行時京察屆期上以琦善辦事認真營伍整飭下部議敘三月丁母憂百日孝滿仍署直隸總督十八年二月擢文淵閣大學士仍留署任九月以申嚴鴉片

烟禁偕長蘆鹽政鍾靈議稽查天津海口章程七條一聞廣出洋商船由原籍廳州縣給與票照來津進口向文武衙門呈驗申報以備稽察一商船往返外洋所帶軍械進口後呈交大沽營守備營暫存俟返權領回以重海防一商船進口節節稽察以防偷漏一商船應令停泊空處不准挨近民房鋪戶以杜勾串一查驗貨物逐加簽探以防夾帶一海河兩岸居民鋪戶暨天津府城外行棧店鋪應立牌保以嚴糾察一上海沙船天津本處商船應一體搜查以杜接運允之十九年六月服闋復實授直隸總督時廣東申嚴鴉片烟禁各國洋商貨船俱出具並無夾帶切結惟英吉利人抗延不遵藉詞駛犯內洋各省海口戒嚴七月琦善赴天津籌辦防堵八月英船駛至天津海口投遞呈詞琦善爲乞恩通商並以聽受曉諭全行起旋回粵奏聞得旨嘉悅之至卽命爲欽差大臣赴廣東查辦九月署兩廣總督十一月兼署粵海關監督二十一年正月英人犯虎門連陷沙角大角礮臺奏入諭曰英人到粵以來日肆猖獗疊經嚴諭慎密周防相機剿辦宜如何妥爲布置本日據奏英人占奪礮臺並有戕傷將弁搶奪師船之事可見該署督於堵禦事宜全未預行籌備著交部嚴加議處尋以英人願獻礮臺並繳還浙江定

海縣城奏懇准其所請諭曰英人兩次在浙江廣東肆逆攻占縣城礮臺傷我鎮將大員荼毒生靈驚擾郡邑無論繳還定海獻出礮臺之語不可盡信即使真能退地亦祇復我故土其被害官弁罹難民人切齒同仇神人共憤琦善身膺重任不能申明大義拒絕妄求且屢奉諭旨不准收受夷書此時膽敢附摺呈遞代爲懇求是誠何心著革去大學士拔去花翎仍交部嚴加議處初英人圖在省城外香港寄居貿易琦善奏稱此地儻給與英人勢必屯兵聚糧建臺設礮覬覦廣東流弊不可勝言至是轉申請英人遂乘機竊據張發僞示脅民服從巡撫怡良等以聞諭曰此事並非奉旨允行何以該督卽令英人公然占踞覽奏殊堪痛恨朕君臨天下尺土一民莫非國家所有琦善擅與香港擅准通商膽敢乞朕恩施格外且妄稱地理無要可扼軍械無利可恃兵力不固民情不堅危言要挾不知是何肺腑辜恩誤國喪盡天良著卽革職鎖拿來京嚴行訊問所有家產卽行查鈔入官四月解交刑部六月閩浙總督顏伯燾奏稱節據探報英軍於四月間登岸據四方礮臺礮子直指貢院經廣州府知府余保純向英人面議息兵英領始索洋銀千萬圓繼定六百萬圓又須將軍參贊撤退方肯退出已由蒞運海關三庫

湊給時適有三元里等鄉數萬人圍困英領義律等功在須臾余保純出城彈壓民始漸解英軍復於議撫後拆大角沙角礮臺磚石移往香港起造碼頭視爲故物臣伏思上年八月英人赴天津投遞呈詞不過藉緩定海之師琦善被其頭目二十餘人嬉笑怒罵隱忍受辱天津道陸建瀛請盡數拘留令其繳還定海琦善以爲書生之見冬間裕謙於前署兩江總督任內懸重賞以購義律而伊里布在鎮海與之分庭抗禮幸衢州守備周光碧聲色俱厲義律乃不敢肩輿而入今年正月琦善又與之會飲蓮花城視爲固然總之廣東以虎門爲門戶自琦善弛備撤防開門揖盜虎門一失大勢已去今又與之香港且以數百萬圓拱手奉之是餒虎狼以肉而欲止其搏噬也旋經王大臣等定讞以斬監候議上九月恩予釋放發往浙江軍營效力贖罪尋改發軍臺二十二年賞四等待衛充葉爾羌幫辦大臣二十三年三月賞二品頂帶授熱河都統御史陳慶鏞以刑賞失措陳奏諭曰琦善韜略未嫻年力正強是以棄瑕錄用予以自新今據該御史剴切指陳請收成命朕非飾非文過之君用人行政一秉至公初無成見豈肯因業有成命自存迴護耶琦善著革職卽令閉門思過十月賞二等待衛充駐藏辦事大臣二十

四年奏言前藏向設夷情司員一員遇有事件由司員辦理近來生齒日繁案件日增請歸駐藏大臣查覈並酌改章程六條以聞又以乍了各汛喇嘛願採辦茶讓價出售江卡各汛有茶商往來請聽汛兵自向買取毋庸官爲經理均下部如所議行二十六年賞二品頂帶授四川總督二十七年以四川官多署任疏言文員調署紛繁不惟易存五日京兆之心卽書吏亦呼應不靈且屬員不免於難治之區營求趨避均已飭回本任至各鎮協營多係邊要其本缺輾轉委署於風氣操防兩無裨益亦概行飭回原營上躋之又查出營員留任當差有分食空糧夥糧之弊悉遣回任並將空糧夥糧考補允之二十八年二月御史戴綱孫奏四川囑嚕匪徒爲患請飭州縣團練琦善遵旨議奏團練害多益少惟力行保甲實爲緝盜良法如所議行六月諭曰琦善此次補授四川總督加意振作於吏治營伍緝捕各事宜能實心整頓不避嫌怨著加恩賞還頭品頂帶以示勉勵十月兼署成都將軍十一月復命協辦大學士仍留總督任二十九年閏四月中瞻對野番出巢滋事琦善飭漢土官兵擊走之殲其渠五月移師進剿野番震懾獻出所奪地土人民各土司仍各安住牧其接壤之卓巴塞爾塔野番亦經開導投誠奏入

上嘉其調度有方迅速歲功下部優敘九月調陝甘總督三十年五月兼署青海大臣時西寧河北番回頻年肆劫爲甘涼肅等處巨害琦善巡邊境派兵往捕賊已聞風竄去因督兵將海蘭住牧之雍沙番野番及黑城撒拉回匪痛加剿除十一月奏言黃喀窪番族悔懼該管喇嘛率屬縛獻賊犯一百數十名均經分別審辦西寧東路河北一帶番回及循化八工撒拉均已投誠上褒嘉之咸豐元年奏言黑城子地方舊有土城東面懸崖壁立西面大山環抱惟南北兩路有門從深溝而上勢極險峻非設兵控制難保回衆不復占住請撥西寧鎮標後營官兵分駐將舊土城修築完固並建蓋衙署兵房及塘房馬棚等項以資控制下部議行方琦善之剿辦番回也西寧辦事大臣哈勒吉那疏言番衆曾否爲匪從未據營員稟報該管蒙古郡王等亦呈訴該番素無行搶情事廷臣又以琦善於番賊逃匿後妄將熟番殺戮並刑逼被獲熟番供認句結等情具疏參劾上命正白旗漢軍都統薩迎阿馳赴西寧查辦至是查明率意妄殺刑求逼供屬實奏入諭曰琦善任情錯謬竟至於此實屬大負委任著卽革職由薩迎阿派員解京交刑部按照摺內所稱情節嚴行查訊定擬具奏二年四月訊明議上諭曰琦善辦理雍沙

番族並無搶劫確據輒行調兵剿洗已屬謬妄且並未先期奏明尤屬專權著發往吉林效力贖罪八月釋回十月賞六品頂帶十一月賞三品頂帶署河南巡撫時廣西洪秀全等竄湖南岳州河南戒嚴上命琦善馳抵楚豫交界督飭嚴防並飭直隸提督陳金綬統兵隨往尋賞二品頂帶十二月以捐備軍餉下部優敘旋賞都統銜授爲欽差大臣專辦軍務三年正月賊自武昌放船東下江皖待援甚急琦善尙未奏報何日前進上切責奪都統銜琦善尋由湖北江西沿途探進秀全已由九江連陷安徽江寧省城復分擾鎮江瓜洲儀徵及揚州府城三月諭曰逆匪連檣東竄疊次諭令琦善陳金綬督兵前進嚴防江北並分兵兼顧儀徵瓜洲一帶如果迅速應援猶可扼要堵禦何至賊匪竄入揚郡琦善前已革去都統銜此時若加重懲轉得置身事外著迅督大兵前往堵剿如再遲誤自問當得何罪尋偕陳金綬剿賊於浦口又移營雷塘渠連戰皆捷燬其營五處上嘉其初次接仗卽大挫賊鋒復都統銜並賞白玉搬指大小荷包等件時賊據揚城聞大軍至添兵救應琦善偕陳金綬移師分營於寶山司徒廟五戰皆捷得旨嘉獎復賞戴花翎旋乘霧進兵燬賊哨樓二座斃黃衣賊目及僞丞相林姓四月進攻城外

賊營燬其木城土壘尋以都統西凌阿帶黑龍江馬隊剿賊浦口失利琦善坐統率無方下部議處五月賊分股竄河南歸德一帶上以琦善督兵兩月有餘未能收復一城致賊匪旁竄重煩征調嚴旨切責之七月敗賊於三汊河及瓜洲儀徵八月賊自浦口駛入期與揚城賊合我兵於夜中乘風擊卻之十月於揚城外增築礮臺憑高下擊賊窮蹙思突圍出悉被截殺十一月賊又分股出瓜洲儀徵各賊亦出隊接應均擊敗之十二月剿匪於徐家集運河西岸六淺等處殲之尋以揚州鄉勇被賊襲潰城內賊全竄出併入瓜洲琦善以收復揚城奏聞諭曰揚城賊匪久思竄逸各路統兵大員宜如何嚴密設防乃因東面勇潰致令瓜洲賊匪聯爲一氣實堪痛恨琦善統領全軍不能及早克復揚州以致賊援麇至鄉勇潰散猶復以賊從東路竄出藉詞諉罪著革職仍責令迅將儀徵瓜洲逆匪剋日掃除並將江路運河派兵分投堵截時儀徵瓜洲三汊河均爲賊據琦善飭將弁先攻儀徵復其城疏入得旨瓜洲之賊尙未遠颺當乘此聲勢將盤踞各匪悉數剿辦毋留餘孽四年四月檄總兵葉長春等率艇船由焦山乘風上駛環攻金山賊巢進攻瓜洲由黃天蕩溯流直上燬賊船隻琦善督兵由三汊河前進亦有斬獲

六月疏陳水路各軍連日進剿燬賊糧船及艇師續獲勝仗並儀徵六合助剿情形閏七月卒於軍諭曰欽差大臣琦善嘉慶年間由部曹外陞司道洊歷封疆蒙皇考宣宗成皇帝畀以兼圻重任晉贊綸扉疊次獲咎旋即起用朕御極後因其在陝甘總督任內辦理番務未能允協加以嚴譴旋因粵匪肆擾特賞三品銜署河南巡撫並授爲欽差大臣賞都統銜督兵赴江北一帶進剿該大臣自抵軍營後屢獲勝仗賞戴花翎復因揚州竄出賊匪未能嚴防截剿革去都統銜近日進攻瓜洲賊巢復統領水師疊次獲勝一切調度均合機宜方冀其克復瓜洲肅清江而遽聞溘逝悼惜殊深琦善著追贈太子太保協辦大學士並賞總督銜照總督軍營病故例賜卹准其入城治喪任內一切處分悉予開復應得卹典該衙門察例具奏伊子員外郎恭釗筆帖式恭鏜百日孝滿後均著該旗帶領引見並查明琦善尙有幾子先行具奏用副朕篤念盡臣至意尋賜祭葬予諡文勤子恭釗甘肅鎮迪道恭鈞直隸試用知府恭鑫四川鹽茶道恭鏜奉天府府尹恭錯兵部員外郎恭鎭江西道監察御史恭斌試用同知恭銓候補縣丞孫瑞徵賞主事銜候選知縣

訥爾經額

訥爾經額費莫氏滿洲正白旗人嘉慶八年繙譯進士以主事用補妃園寢禮部主事十四年調工部主事十九年遷員外郎二十四年陞製造庫郎中道光元年授山東兗沂曹濟道二年六月陞湖南按察使九月以前在道員任內防汛出力下部議敘三年正月丁父憂百日孝滿署山東按察使以審鞠教匪馬進忠逆案得實賞戴花翎九月署布政使五年四月服闋實授六月署巡撫六年擢漕運總督七年奏陳糧船夾帶私鹽停泊逗遛不服搜查請先禁私囤以清弊源允之八年四月以全漕渡河完竣辦理妥速下部議敘十二月以江淮徐揚海州等屬安慶池太廬鳳潁泗等府州均有成災之區糧值驟昂請緩買旗丁行月口糧等米以恤丁力均從之九年授山東巡撫十年奏查明山東四女寺支河爲漳衛二水出路河身淤墊壩座亦俱墊塌應分別挖修又請濬東平州境內十清安流龍拱各河道均如所請行十一年四月疏陳東省漕務官引滯銷總由私梟充斥沂州府屬尤甚今議變通章程於莒州日照沂水蒙陰蘭山郯城等處召募殷商並委熟諳之員於各要隘稽察用杜私漏五月以濟寧曲阜二州縣並臨清衛各屯莊

被雹歉收請分別緩徵均允之十二年四月江南江淮等屬水災民食拮据請碾運倉穀以恤隣省下部議行五月英吉利船由江蘇駛入山東洋面訥爾經額疏言英船歷經閩浙江蘇曉諭驅逐尙敢乘風到東居心詭詐此時應先斷其北駛之路嚴禁沿海居民毋許私相交易一俟南風稍息卽令水師將備驅出東境又奏英船駛入內地必先由閩粵經過請敕下兩廣閩浙各督臣籌議俾免再行闖入上躔之八月擢湖廣總督十月奏勘明湖北漢川等州縣水淹歉收請分別蠲緩錢漕賑恤災黎允之十二月以湖北襄陽府老龍石隄爲全郡保障奏請籌款修理十三年正月奏修潛江縣護城隄工均報聞三月奏言湖北寶武局每年鼓鑄錢文採辦滇銅有需時日請改買商銅以濟滇運不及如所請行五月遵旨覈議湖南瑤地善後章程一准贖頂當山場田土以復瑤業一徧查瑤境流寓民人以杜擾害一嚴禁巧占樹木以保山利一勸種木棉以便服用一嚴束匪瑤使知儆畏一勸設義倉義塾以備接濟而資教化上納之十四年二月以湖北省武昌漢陽被水歉收米價增昂請借地丁銀派員分往湖南四川採辦米石減價平糶如所請行四月御史朱達吉奏湖北連年被水請疏通支河以資宣洩上命訥爾

經額查勘興修六月奏湖北沔陽天門境內有蹠支河一道又通順支河一道在漢陽縣所轄之純口地方係達江隘口應俟秋後水涸確估興挑允之先是貴州興義等府苗疆多有湖廣流民潛往租種山田上以愚民惟利是圖日久必滋爭奪命訥爾經額偕巡撫吳榮光會議章程至是遵議四條一嚴查流民來路以清其源一嚴禁流民去路以遏其流一嚴禁流民潛入租種一嚴禁湖面土棍漁戶勾引滋事奏入諭曰要在行之以實若一奏了事何益之有十五年四月奏查明湖南清泉縣書吏包完錢漕卽行懲辦諭曰嗣後徵收錢漕均由百姓循照舊章自行完納不准稍有增加該督等務當認真確查不可日久視爲具文十一月以所保廣東南韶連鎮總兵薩靈阿陞任後營務廢弛高州鎮兵萬榮父子同營有心蒙蔽鐫三級留任十六年正月復以湖南學政龔惟琳信用門丁索加棚規等款未能查明具奏鐫二級留任二月奏定雇募糧船水手章程應責成旗丁將本籍安分之人開明姓名年貌籍貫由運弁糧道驗充再仿照保甲之法將十船編爲一甲連環互結各給腰牌以便隨時稽察至出境之後責成幫弁總運約束巡查並令旗丁按日查點人數或某人上岸必知去向或某人溷入必究來歷有無

事故申報衛弁總運儻有滋事由弁員稟明糧道送地方官懲辦下部議行時新寧縣逆匪藍正樽聚衆滋事經官軍先後擒拏多犯而首逆未獲八月訥爾經額自請嚴議命革職留任十七年京察屆期諭曰湖廣總督訥爾經額兩省文武是其統轄乃么麼小醜日久不獲既失察於前復玩泄於後實屬無能著降補湖南巡撫時廣西會匪滋事訥爾經額以湖南永州桂陽等處與廣西接壤爲匪徒出沒之區奏酌定團練章程得旨允行方武岡逆匪之滋事也首犯藍正樽在逃有訛傳被鄉勇毆斃者訥爾經額率據入奏上以所奏不實交湖廣總督林則徐覈審奏入上以種種疑竇欲蓋彌彰褫訥爾經額職旋賞二等侍衛充駐藏幫辦大臣十八年賞頭等侍衛充西寧辦事大臣二十年二月擢熱河都統六月授陝甘總督八月署直隸總督旋實授二十一年正月奏英吉利船在山海關秦皇島海洋游駛命訥爾經額駐紮天津加意偵察又以山海關至天津一帶海口防堵均關緊要各處海口更恐英人出我不意登岸滋擾命密爲布置毋稍疏虞二月上謁西陵命訥爾經額隨扈旋疏陳防海情形略言英人所恃惟船與礮其船不畏風浪而畏礁淺瀕海各城外有淺灘十數里便不能駛近得旨著沿海各省督撫

酌量妥辦三月以海防需費浩繁請撥河南山西等省銀五十萬兩下部議行時英船復駛至福建廈門七月命訥爾經額馳赴天津嚴加堵禦九月奏籌辦防堵事宜請用掘穿設伏之策詔如所請十一月奏南路海口防兵見歸併祁口狼坨子齊家莊三處又天津城內議添新兵一千名得旨英兵登陸斷不能奔馳百餘里直犯府城是該處不必多設兵弁不若就河面寬窄形勢擇要設伏或誘之深入或扼其歸路使之首尾不能相顧必致潰散二十二年正月增設山海關新兵一千名請將駐防閒散挑補二成入伍從之九月以防堵認真賞太子太保銜十一月請於大沽海口設立海防同知天津河捕通判移駐蘆臺作爲撫民通判下部議行二十三年正月京察屆期上以訥爾經額辦理一切諸臻妥善下部議敘七月遵議疏陳屯田之法直隸礙難舉行至水利之說歷經試墾水田屢興屢廢由南北異宜民多未便上是之尋以永定河漫溢降一級留任二十四年五月直省南運河關繫漕運民田請籌款捐修允之六月奏請變通東陵後山巡防章程添設撥汛編查保甲禁武弁之濫刑申巡查之舊制下部議行二十五年以馬蘭鎮兵丁梁永順戕害本管職官未能據實奏辦下部議處二十六年正月京察

屆期下部議敘二十七年以直隸河間一帶鹽梟肆擾命嚴行查訪尋獲匪多名二十八人正月議奏江蘇蘇松太二府一州漕白糧米改由海運酌定章程五條一官剝船隻不敷添雇民船一將米石卸存無庸起岸露囤一剝船應加修堅固以昭慎重一官民剝船在津守候應給口糧以免苦累一天津交兌後責成經紀一手經理下部議行六月兼署長蘆鹽政三十年二月以直隸糧價增昂請暫行停止採買從之九月宣宗成皇帝梓宮奉移山陵訥爾經額以辦理妥協賞加一級咸豐元年奏勘明天津府靜海縣屬西鄉泊水以引河爲去路請照嘉慶年間舊章導水入子牙正河上躡之又以御史文光奏長蘆懸岸鹽額請照河南山東改歸官辦遵旨偕山東巡撫李德鹽政崇綸覆奏直隸懸岸無人肯認者皆由私充引滯所致若使梟販斂跡官引暢銷從前之民販未始不可經久卽日後之認商亦可不招自至下部議行二年正月命以直隸總督協辦大學士二月賜紫禁城騎馬三月慕陵奉安禮成加一級五月捐備軍需銀一萬兩下部議敘九月擢文淵閣大學士仍留直隸總督任三年二月請於河南交界地方舉行保甲聯莊團練積穀修城等事疏入諭以認真辦理四月遵旨查看熱河礦銅情形請先行

試探如所請行五月粵匪陷河南歸德府寧陵睢州蘭儀相繼失守上以直隸大名與河南接壤命訥爾經額扼要截剿堵其北竄之路前撲汴梁賊匪復由鄭州汜水一帶竄擾訥爾經額飭署河北鎮總兵花里雅遜布帶兵由長垣前赴延津渡口扼防署正定鎮總兵雙祿由磁州前赴安陽以南黃河北岸堵剿時賊渠李開芳由汜水渡河陷溫縣遂撲懷慶訥爾經額檄大名鎮總兵董占元署參將烏爾棍額帶兵截剿並請調盛京步隊吉林馬隊駐臨洛關是月命爲欽差大臣河南河北各路官兵統歸節制尋攻剿懷慶斃賊千餘擒僞丞相吉文元七月用地雷轟燬其柵賊驚竄懷慶解圍上以訥爾經額調度有方賞戴雙眼花翎並穿黃馬褂時賊由懷慶竄山西垣曲曲沃等縣訥爾經額飭官兵繞山路進剿諭曰賊竄晉省直晉均不得辭其責訥爾經額統領諸軍懷慶解圍是汝之功逆匪西竄是汝之咎賊尋由潞城竄入直隸臨洛關訥爾經額退至廣平府嚴旨切責尋革職命偕新任直隸總督桂良辦理防剿事務旋賊竄擾畿疆訥爾經額仍株守廣平上以其統轄全省貽誤事機降旨逮問尋議斬監候四年諭曰訥爾經額辜恩昧良一敗不振以致粵匪蔓延畿省卽立正刑誅罔屬罪有應得姑念其平日尙

屬勤能著暫免旬決五年遣戍軍臺六年釋回交桂良差委旋賞六品頂帶七年
二月命赴慕陵常川住班閏五月命以四品京堂候補九月卒子蘊秀內閣學士
兼禮部侍郎銜衍秀國子監祭酒

穆彰阿

穆彰阿郭佳氏滿洲鑲藍旗人嘉慶十年進士改翰林院庶吉士十三年散館授
檢討十四年三月陞右春坊右贊善五月遷翰林院侍講十五年五月充日講起
居注官六月充浙江鄉試副考官十六年轉侍讀十七年大考二等陞詹事府少
詹事十八年二月陞詹事十二月遷通政使司通政使十九年五月陞內閣學士
兼禮部侍郎銜六月以直隸通州一帶河淤滯漕命偕光祿寺少卿吳邦慶前往
督率通水道等剋期挑濬八月兼鑲紅旗蒙古副都統九月稽查中書科事務十
月陞禮部右侍郎調鑲紅旗滿洲副都統十一月署工部右侍郎兼管錢法堂事
務命偕工部右侍郎鮑桂星前赴通州查驗西倉米石十二月署刑部左侍郎二
十年四月署理藩院右侍郎十月署刑部右侍郎命協纂續編石渠寶笈十二月
刑部一日進立決本二十二件堂司各官俱坐因循積壓下部嚴議穆彰阿降三

品京堂候補二十一年二月補光祿寺卿五月陞內閣學士兼禮部侍郎銜十月
充玉牒館副總裁十一月兼正紅旗蒙古副都統二十二年三月陞兵部右侍郎
七月署正黃旗蒙古副都統兼署正黃旗護軍統領八月調正白旗滿洲副都統
十一月以玉牒館呈進漢字本貝勒綿志之女姓氏錯誤下部議處二十三年三
月命偕兵部尙書和瑛赴直隸保定審明僧人證法妒姦謀殺之案讞定如律五
月調刑部右侍郎充武英殿總裁七月歷署吏部左右侍郎鑲紅旗滿洲副都統
正白旗護軍統領右翼總兵九月調兵部右侍郎十月調工部左侍郎兼右翼總
兵二十四年正月命祭告長白山等處四月署翰林院掌院學士五月管理光祿
寺事務十月以文穎館不戒於火迅卽撲滅下部議敘十一月署刑部右侍郎十
二月署鑲黃旗滿洲副都統以滿洲正白旗進呈世職名單書寫錯誤下部議處
尋調正紅旗蒙古副都統二十五年三月調左翼總兵正藍旗滿洲副都統仁宗
睿皇帝升遐由熱河奉移梓宮還京穆彰阿以恭辦沿途橋道加一級十二月命
恭辦昌陵工程道光元年三月充總管內務府大臣賞戴花翎並以昌陵奉安禮
成加三級七月調戶部右侍郎兼管錢法堂事務署右翼前鋒統領稽查三庫二

年正月管理會同四譯館事務三月以前在工部侍郎任內失察辦工司員法克精額等朋比得贓銷算朦混部議降三級留任又以戶部會議倉場辦理以放代盤措置失宜降二級留任俱於次年元旦恩予分別減免六月充江南鄉試正考官三年三月充會試副考官四月轉左侍郎六月蒙古已革塔布囊布里訥什占地加租案發命偕都察院左都御史松筠赴熱河查辦翰實治如例並以熱河都統慶保辦理過當有乖體制請下部議處允之七月管理上駟院事務九月陞都察院左都御史四年二月陞理藩院尙書仍署左都御史並署鑲紅旗漢軍都統閏七月命恭辦寶華峪萬年吉地工程十二月兼鑲紅旗蒙古都統五年六月以江廣漕船滯運久逾到通期限命署漕運總督馳赴水次督押尾幫前進尋漕船全數輓出江境下部議敘十月以本年淮河盤壩剝運等用費俱係旗丁自行措辦奏請籌款津貼允之旋召回京十一月丁父憂賞銀三百兩十二月賜紫禁城騎馬六年二月署工部尙書時新漕試行海運命赴天津監收米石事竣上以其迅速歲事加三級七月復署漕運總督押回空糧船南下九月召回京十二月陞工部尙書七年正月兼步軍統領三月以南河辦工謬誤命偕大學士蔣攸銛赴

江南查看關孟兩灘新河舊河情形並履勘高堰一帶尋奏請將兩江總督琦善南河總督張井等分別嚴加議處仍責成琦善等虛衷商榷竭力補救隨時奏明妥辦允之旋回京五月命在軍機大臣上學習行走罷步軍統領七月調鑲白旗漢軍都統充崇文門監督九月疏陳海運章程八條一見行海運各州縣津貼既從減省其徵收民間漕糧不得藉口加折浮徵一米數既多雇用民船剝運由江省按照市價計日給費毋任胥役刁難剋扣一雇募沙船水手人等由江省查明或於運腳內撥出若干或於到津收買餘米內每石劃出若干作爲水手賞項或諭該商等加給身工務令一律踴躍一兌米時按船全數給與耗米到津收米時除有事故以耗米抵補外若無故短少卽嚴追懲辦一繹夫由江省按每石津貼繹費若干給沙船自行雇募若土棍把持卽訪拏嚴懲船多時剝運不及應分別載往北倉暫卸陸續起運一民船既可少雇困費自不多糜沙船起卸時由經紀眼同斛交剝船卽責令經紀等承運承交一剝船運腳由直督飭屬覈給如有攙和盜賣短少等弊官剝民剝一體治罪仍按數賠補一沙船起米完竣必窆土壓載方能出口由直督飭屬豫撥官地窆取毋任土棍指阻上聽其言下所司議行

是月以寶華峪工竣孝穆成皇后奉安禮成下部優敘十二月署步軍統領八年正月以逆回張格爾就擒奏捷賞太子少保銜充軍機大臣並下部照軍功議敘罷總管內務府大臣四月命在南書房行走八月恭送玉牒尊藏盛京並以明年東巡謁祖陵命查閱各處行宮橋道九月以寶華峪地宮浸水由地平工程辦理不善穆彰阿前接辦時不能指出部議革職上念其在工僅止一年改爲革職留任仍分賠工程銀兩九年三月充翰林院掌院學士尋兼經筵日講起居注官並署步軍統領八月隨駕詣盛京謁祖陵禮成加二級十年三月署鑲黃旗漢軍都統四月署總管內務府大臣五月至十一月兩署步軍統領七月署兵部尙書十月戶部假照案發以前在侍郎任內失察降四級留任嗣於次年上五旬萬壽併前革留處分恩予開復十一年四月命恭辦萬年吉地工程並諭萬年吉地命爲龍泉峪所有建立規模因地制宜俱從簡約六月管理戶部三庫事務七月署正白旗滿洲都統以江南河湖漫溢命偕工部尙書朱士彥等前往查辦甫抵清江浦卽遵旨回京八月調兵部尙書鑲白旗滿洲都統十二月仍調工部尙書十二年三月充會試副考官九月以江南桃源廳姦民陳端等偷窆官隄龍窩汛十三

堡河盜命赴南河借兩江總督陶澍查辦嗣首犯未獲先將廳汛員弁及從犯鞠訊奏請治罪十月御史瞿溶奏劾湖北巡撫楊懌曾等十款命穆彰阿赴湖北查辦其南河讞案及查勘工程交朱士彥及戶部左侍郎敬徵等辦理十一月授內大臣先是瞿溶接據假名湖北已革知縣左章炳列款致書率行奏劾適穆彰阿以提訊左章炳堅不承認入奏諭傳瞿溶詢悉前由至是借湖廣總督訥爾經額遵旨嚴訊並將瞿溶交出原書款單與左章炳所書履歷供詞覈對字跡不符遂以左章炳實未列款訐訴奏覆上命訥爾經額將匿名揭帖之人密緝嚴辦又以翰林院侍講學士蔣立鏞奏參湖北孝感黃陂等縣劫案疊出並江漢歲修隄工遷延各款諭交穆彰阿查辦十三年正月借訥爾經額查覆略言荊州隄工已於上年臘月水涸興修工竣孝感黃陂等縣自去秋捻匪竄擾業經營縣搜獲多名提省訊辦奏結見在尙無諱盜不報被控案據奏入卽回京道經河南復遵旨查明各州縣並無以豐報歉挪補虧缺情事俱報聞三月以失察銀庫郎中奎秀等得贓舞弊下部議處五月調戶部尙書十四年七月充閱兵大臣八月充順天鄉試正考官十一月調吏部尙書尋命以吏部尙書協辦大學士兼署工部尙書白

嘉慶二十三年至是年四充經筵講官十五年正月充文淵閣領閣事二月署步軍統領三月充會試正考官九月以恭辦龍泉峪工竣賞用紫纒並太子太保銜十二月以孝穆成皇后孝慎成皇后奉安禮成加一級十六年正月充上書房總師傅罷尙書房行走二月經筵誤班下部議處六月署步軍統領七月充國史館總裁充武英殿大學士管理工部事務兼署吏部尙書稽察欽奉上諭事件處九月以圓明園不戒於火迅卽撲熄加一級十月仍命在南書房行走十一月署正黃旗領侍衛內大臣調鑲黃旗滿洲都統十七年三月署直隸總督七月充玉牒館督催總裁崇文門監督十八年三月充會試正考官五月晉文華殿大學士八月丁母憂賞銀五百兩十一月管理三庫事務十九年四月署鑲白旗滿洲都統五月偕宗人府宗令肅親王敬敏等議奏鴉片煙吸食與販並官員失察胥役賄縱商船窩藏關津偷漏棍徒冒充官人姦民栽贓誣陷各罪名共三十九條如所議行六月四川總督寶興以川省賦輕近年夷匪不靖軍需浩繁援案奏請按糧捐貼穆彰阿偕軍機大臣大學士潘世恩等遵旨議覆略言軍需藉資民力不可率以爲常與其按畝加課爲補救之方曷若借帑生息爲經久之計請於各省秋

撥應報項下借撥一百萬兩以三十餘萬兩爲防兵經費其六十餘萬兩或發商
生息或置田收租所獲息銀以四萬兩爲常年經費其三萬餘兩按年提存司庫
歸還原借款項允之二十年正月管理理藩院事務七月署正黃旗滿洲都統二
十一年六十生辰御書壽寓延祺額表率羣僚資弼亮贊襄同德昇康疆聯句福
壽祿喜龍字及珍綺等件賜之時英吉利船滋擾浙江各海口戒嚴二十二年正
月命赴天津偕直隸總督訥爾經額籌辦防堵事宜十一月英人就撫訥爾經額
奏籌天津善後章程禦外八條清內七條經費一條偕軍機大臣大學士潘世恩
等遵旨議奏應如所請允之是年九月署戶部尙書二十三年正月戶部顏料庫
冒領案發坐失察降三級留任四月戶部銀庫虧空案發穆彰阿以前充管庫查
庫大臣褫職留任次年以罰賠銀兩全繳恩予開復先是英人疊次犯順欽差大
臣耆英由廣州將軍調任兩江總督先後辦理防剿均奏請議撫至是耆英仍以
欽差大臣馳往廣東籌辦通商章程尋奏稱粵海關原定稅則議增稅銀之貨五
十六種議減六十四種並原例未載新增十三種其福州廈門寧波上海亦按新
定稅則一體開關七月穆彰阿議從其請閏七月耆英疏陳整頓稅務九條穆彰

阿復奏請敕各省遵辦均從之初福建臺灣鎮總兵達洪阿臺灣道姚瑩以英人疊次窺伺臺灣飭員弁計誘沈其舟奮力斬馘奏獲優敘至是英人就撫訴稱前數次在臺洋遭風遇害達洪阿等係朦奏邀功命閩浙總督怡良渡臺查辦亦如英人所訴入奏上褫達洪阿姚瑩職命穆彰阿等會同審訊八月穆彰阿等訊擬奏上上以達洪阿等在臺有年尙有微勞足錄業經革職著毋庸議先是耆英奏陳意大里亞通商章程四條意大里亞僦居澳門輸稅地租遇有修造請領牌照立法具有深意未可聽其任便修造所稱澳門土稅不必定以擔數是否指販貨之多寡抑論收稅之輕重令耆英查明聲覆二十四年正月耆英奏各國領事皆文移往來獨意大里亞仍照舊章事轉窒礙各國興造議定三巴門圍牆爲界不妨寬其禁令若仍領牌照彼將有詞侵軼恐不成事體至限定擔數杜弊適以滋弊不如寬其限制就販貨之多寡驗明抽稅猶可冀日有起色穆彰阿奏從其議二月署步軍統領正白旗滿洲都統是月上謁東陵命留京辦事四月翰林院編修李汝嶠考試試差以懷挾奪職治罪穆彰阿曾疏薦李汝嶠入直上書房坐保舉不慎鐫級留任二十五年三月充會試正考官八月充崇文門監督二十六年

三月扈駕詣南苑行圍賞穿黃馬褂九月署步軍統領十月充玉牒館督催總裁
二十八年二月上謁西陵命留京辦事三月恭修玉牒告成賞緞匹二十九年二
月以奏保翰林院編修童福承入直上書房經給事中陳壇以童福承品行不端
劾奏上以穆彰阿於師傅重選粗率不慎罷上書房總師傅並降四級留任十一
月復充上書房總師傅自道光十一年至是年七屆京察穆彰阿均下部議敘三
十年正月文宗顯皇帝御極二月充實錄館監修總裁自嘉慶十九年十月至是
年四月歷充會試覆試閱卷大臣教習庶吉士各七次朝考閱卷大臣考試試差
閱卷大臣各六次庶吉士散館閱卷大臣五次殿試讀卷官武殿試讀卷官大考
翰詹閱卷大臣拔貢朝考閱卷大臣各一次九月宣宗成皇帝梓宮奉移慕陵禮
成穆彰阿以管理工部事務加二級十月硃筆罪穆彰阿者英曰任賢去邪誠人
君之首務也去邪不斷則任賢不專方今天下因循廢墮可謂極矣吏治日壞人
心日澆是朕之過然獻替可否匡朕不逮則二三大臣之職也穆彰阿身任大學
士受累朝知遇之恩不思其難其慎同德同心乃保位貪榮妨賢病國小忠小信
陰柔以售其奸僞學僞才揣摩以逢主意從前夷務之興穆彰阿傾排異己深堪

痛恨如達洪阿姚瑩之盡忠盡力有礙於己必欲陷之耆英之無恥喪良同惡相濟盡力全之似此固寵竊權者不可枚舉我皇考大公至正惟知以誠心待人穆彰阿得以肆行無忌若使聖明早燭其奸則必立寘重典斷不姑容穆彰阿恃恩益縱始終不悛自本年正月朕親政之初遇事模稜緘口不言迨數月後則漸施其伎倆如英船至天津伊猶欲引耆英爲腹心以遂其謀欲使天下羣黎復遭荼毒其心陰險實不可問潘世恩等保林則徐伊屢言林則徐柔弱病軀不堪錄用及朕派林則徐馳往粵西剿辦土匪穆彰阿又屢言林則徐未知能去否僞言焚惑使朕不知外事其罪實在於此至若耆英之自外生成畏葸無能殊堪詫異伊前在廣東時惟抑民以奉外罔顧國家如進城之說非明驗乎土匪天道下逆人情幾至變生不測賴我皇考洞悉其僞速令來京然不卽予罷斥亦必有待也今年耆英於召對時數言及英人如何可畏如何必應事周旋欺朕不知其奸欲常保祿位是其喪盡天良愈辯愈彰直同狂吠尤不足惜穆彰阿暗而難知耆英顯而易見然貽害國家厥罪惟均若不立申國法何以肅綱紀而正人心又何以使朕不負皇考付託之重歟第念穆彰阿係三朝舊臣若一旦寘之重法朕心實有

不忍著從寬革職永不敘用至伊二人行私罔上乃天下所共見者朕不爲已甚姑不深問辦理此事朕熟思審處計之久矣實不得已之苦衷爾諸臣其共諒之嗣後京外大小文武各官務當激發天良公忠體國俾平素因循取巧之積習一旦悚然改悔毋畏難毋苟安凡有益於國計民生諸大端者直陳勿隱毋得仍顧師生之誼援引之恩守正不阿靖恭爾位朕實有厚望焉布告中外咸知朕意咸豐三年捐備軍餉賞五品頂帶六年故子薩麟刑部員外郎薩徵禮部員外郎薩廉薩善候補筆帖式

宗室耆英

宗室耆英正藍旗人父祿康東閣大學士耆英由廕生於嘉慶十一年授宗人府額外主事十三年補經歷十八年四月陞副理事官十月陞理事官二十年充山海關監督二十四年六月陞內閣侍讀學士十二月遷太僕寺少卿二十五年五月擢內閣學士兼禮部侍郎銜六月兼鑲白旗蒙古副都統七月署鑲藍旗護軍統領八月署鑲白旗護軍統領十月管理圓明園事務道光元年署鑲紅旗護軍統領二年二月署右翼前鋒統領五月署鑲藍旗滿洲副都統十二月陞理藩院

右侍郎三年二月充左翼監督四月署鑲黃旗漢軍副都統調兵部右侍郎七月署鑲白旗護軍統領兼正紅旗滿洲副都統九月署正紅旗護軍統領時議墾雙城堡中左右三屯地畝四年正月命耆英護送京旗閒散戶口前往移駐四月奏查雙城堡情形有奉天旗下羈留者二百餘戶請令此項閒丁幫種地畝以省雇覓人夫之費從之七月兼正黃旗護軍統領轉左侍郎充國史館清文總校五年二月署左翼前鋒統領三月授總管內務府大臣四月調工部右侍郎兼管錢法堂事務九月充繙譯鄉試副考官六年八月充崇文門副監督九月調戶部右侍郎兼管錢法堂事務署左翼前鋒統領十二月宛平縣民人陸有章等呈請於宛平等五州縣開採銀礦旨不准行者英以戶部堂官不加體察隨同畫諾具奏降二級留任尋授左翼總兵七年三月署步軍統領五月實授九月署右翼前鋒統領十一月軍政屆期上以耆英辦事勤奮開復侍郎任內降留處分八年八月署鑲黃旗滿洲副都統尋陞鑲黃旗漢軍都統九月署鑲白旗漢軍都統十月賜紫禁城騎馬九年三月上閱巡捕五營官兵操演認真以耆英平日督率有方下部議敘五月以稽察什家戶口兵民及庵觀寺院鋪戶人等向歸一冊造報難以稽

察奏請嗣後各立專冊將旗民籍貫詳載隨時查明遷移住處至住持僧道以房租爲生並將客民籍貫備載取具住持甘給以便稽覈六月請嚴禁軍流及遞籍人犯脫逃來京以杜奸宄七月以八旗五營地方竊案較多請明立勸懲如一季內未獲在十案以上者將該管官議處並無報竊之案者將該營員議敘均如所請行九月充武會試正考官擢禮部尙書兼管太常寺鴻臚寺事務十一月授宗室總族長十二月管理太醫院事務十年二月署鑲紅旗滿洲都統九月署鑲藍旗漢軍都統十月戶部捐納房假照案發者英坐侍郎任內失察降爲二品頂帶留任十一年正月充經筵講官八月上五旬萬壽賞還頂帶開復降留處分九月署理藩院尙書十二年二月署戶部尙書四月署鑲白旗滿洲都統五月畿輔旱奏請察吏省刑以召祥和上納之七月充崇文門監督十一月授內大臣十三年復充經筵講官十四年正月京察屆期上以耆英管理步軍統領事務諸事認真下部議敘尋調鑲藍旗滿洲都統七月調工部尙書十一月調戶部尙書十五年閏六月總理工程處事務九月上親閱龍泉峪萬年吉地形勢規模整齊堅固耆英以前派相度地形賞太子少保銜下部優敘十六年六月廣東在籍已革郎中

盧應翔干預訟事瀆控不休命偕署吏部尙書朱士彥馳訊又以廷臣劾奏江西貪劣各員命耆英等於赴粵之先會同江西巡撫陳燮查辦七月調吏部尙書九月偕朱士彥奏查清江縣知縣孫慧焯挾勢借貸已革南城縣知縣黃宗憲於漏稅罰項並不詳報輒因修城挪用且辦理各案種種錯謬均按律定擬十七年二月偕廣州將軍蘇勒芳阿奏訊明盧應翔挾嫌唆訟屬實治如律先是太監張道忠因賭被獲耆英徇總管太監張爾漢屬託遽行釋放至是經刑部訊出上以耆英瞻徇卑鄙革去尙書都統步軍統領內大臣以侍郎降補十二月補兵部右侍郎旋陞熱河都統十八年閏四月授盛京將軍時各海疆嚴禁銷售鴉片直隸總督琦善奏閩廣洋船回空俱往奉天沿海地方販豆南旋本年天津所到洋船因查拏鴉片不能起卸勢必於他處另謀銷路上命耆英飭屬訪察十一月耆英奏稱洋船多由天津起碇並未到口諭曰該將軍所奏殊難憑信耆英係朕特簡畀以重任惟常激發天良嚴飭地方認真堵拏儻意存諱飾將來由他處訪獲訊明曾在奉天海口停泊惟該將軍等是問十二月奏稱鴉片商船販賣者多當以稽察海口爲要其陸路旱口難免私越偷漏之弊訪察宜周酌擬章程八條十九年

奏請將旗民十家聯保以憑稽察均允之二十年七月英吉利船駛擾浙江各海疆均辦防堵耆英奏旅順口爲水路衝衢當扼要籌備八月英船潛入奉天洋面諭曰此次英船儻有桀驁情形不准在海洋接仗正不妨誘之登岸聚而殲旃九月英船由復州開帆南駛自是疊諭加意巡防二十一年正月山海關秦皇島有英船往來命耆英等飭將弁勤加哨探二月耆英查明奉天所屬各城距海口里數並河海交滙之區繪圖奏聞旋以江蘇巡撫裕謙奏稱英船不畏風浪而畏礁淺南洋有石島之明險北洋多水淺之暗險可以擇要設防命耆英徧歷洋而酌量妥辦七月英船突入福建廈門八月陷浙江定海失守錦州山海關等海口戒嚴耆英奏明水路分防情形諭曰辦理均屬周妥不得以海口封凍稍存大意十月上以英船滋擾視水之淺深以爲進退諭耆英派員就海口詳細測量又以英人侵犯必將內地火藥槍礮焚燒得以肆行無忌復命耆英將應用火藥設法防範尋奏請酌給防兵棉衣炭薪以資禦寒允之十一月諭曰朕聞英船堅固惟於夜間從尾轟擊較可得力儻能雇善泅之夫多備木筏安置礮位令善泅者伏於筏下遇有洋船即可開礮轟擊是否可行耆英查明具奏尋奏稱見選精壯水

手密藏槍礮乘夜相機攻剿報聞二十二年正月調廣州將軍二月署杭州將軍旋授欽差大臣前赴浙江督辦洋務諭曰省城爲根本重地防堵有關緊要如兵力尙單應調本省及他省官兵卽斟酌調取四月御史蘇廷魁奏英吉利本國見爲鄰國攻破謀遁回救援上命耆英乘機進剿仍赴廣州將軍任旋以嘉興乍浦一帶尙須布置仍留浙江五月寶山失守命赴江蘇偕兩江總督牛鑑商辦防剿事宜時英船已越圍山關陷鎮江府命耆英扼要駐紮時揚威將軍奕經奏陳羈縻事宜交耆英妥商七月耆英亦奏請招撫諭曰英人叵測如所商在情理中該大臣儘可允諾儻仍不受撫惟小心守禦相機辦理尋將親往會議情形具奏諭曰該英人所請均已允准卽當迅速退出大江至此外一切緊要事件著責成該大臣分晰妥議永杜後患儻稍留罅隙日後有所藉口以致別生枝節是耆英等自貽伊戚不惟無以對朕亦無顏以對天下八月英人就撫耆英條陳善後事宜入奏諭曰此外尙有應行籌議耆英通盤酌覈勿滋後患惟該國通商嗣後若有欠項由內地著追一節斷不可行所稱英民止准在五口貿易一節亦應詳細寫明免得日後藉口影射朦混九月授兩江總督命籌江南江北通商事務並兼

籌浙江福建二省因地制宜之策十二月耆英奏言水師以操駕舟楫辨識風沙熟習槍礮爲要務近來員弁缺出專於弓箭內考拔以致弁員不習水務請嗣後水師員弁專取水務卽騎射生疏亦准錄用如所請行二十三年二月偕江蘇巡撫孫善寶漕運總督李湘棻酌定應辦事宜二十八條一蘇松鎮標各營應與毗連各營互相操巡以資聯絡一福山狼山營專管福狼一帶江面毋庸兼管腹裏汛地以專責成一京口左右二營應分防鵝鼻觚山關等處一高資營兵應分班操巡藉防盪山關一三江營守備應改爲內河水師以備操防一長江戰船見未造成應先製木筏以遏要害一總督應按年巡閱鵝鼻觚山關二次以免疏懈一鵝鼻觚山關外之江心河洲應預備兵礮以資策應一鎮江揚州之門戶應預備兵礮以扼要隘一江寧省城之門戶應預備兵礮以昭嚴密一吳淞口應預備防兵以重海防一吳淞上海後路應預備兵礮以資援應一江北後路應預備兵礮以防分擾一上海地方應移駐同知以資彈壓一提標右營遊擊應陞爲參將並加副將銜以崇體制而資董率一常熟昭文二縣向無城守官兵今擬移駐陸路千總並抽添弁兵以資防守一操練水師兵丁以備巡防一練習泗水兵

丁以收實用一提標副將應親身出洋江考校以杜儉安一陸路汛守兵丁應一體勤加操練以免缺額充數一裁酌外海內河水師營馬匹節省經費以資協濟一各營遺失器械應動款補製以資操練一沿海沿江及各汛地兵房應擇要修復以資戍守一慎選鎮將都守以杜攤派而聯兵情一慎選守令調和文武官員以資聯絡而免猜忌一消弭伏莽以固根本而免內訌下部議行三月命爲欽差大臣馳往廣東查辦通商章程尋奏稱於粵海關原定稅則議增五十六種議減六十四種並原例未載新增十三種其福州廈門寧波上海亦按新定稅例一體開關閏七月復臚列整頓稅務條款一粵海關原定稅額應暫歸五口勻攤一五口徵收西洋各國稅務請試行三年再行酌定一粵海關雜稅款目應行刪除一平餘備貢等款應歸額外盈餘開銷一粵海關酌留羨餘以備公用一四口應補徵內地各關湖絲稅銀一內地販賣茶葉湖絲綉緞不准由海運載一各國無涉之客稅應仍舊章辦理一各項浮費全行革除以杜弊端疏入下軍機大臣大學士穆彰阿等議行九月以美利堅等國赴浙江呈請通商遵議章程入奏允之二

十四年二月調兩廣總督並命以欽差大臣辦理善後及各省通商事宜十二月
奏廣東旗營專爲駐防省城而設所有城上神安礮臺請改歸旗營撥兵防守其
鳳凰岡礮臺旗營既難兼顧卽改歸綠營就近管理如所請行二十五年以兩廣
總督協辦大學士時比利時喀及丹麥等國先後求請通商命耆英體察情形妥
爲約束二十六年正月京察屆期上以耆英殫心竭慮坐鎮海疆下部議敘五月
奏言兩廣地處邊陲與黔省苗疆事同一律請嗣後各標協及內河外海水師缺
出將鳥槍兵丁與弓箭步兵輪流拔補允之八月上練兵儲餉事宜並繕呈唐臣
陸贄守備事宜狀命下各將軍督撫提督等咸錄一道置諸座右十二月奏陳英
人請於西藏定界通商上命耆英堅守成約毋爲搖惑二十七年三月英船突入
廣東省河堅求入城不獲尋由虎門退出耆英以疏防自請議處諭曰此次英船
突入省河以粵省兵勇調齊攻擊何難聚而殲旃此時旣已歸巢姑爲息事安民
之計惟桀黠性成不可不預爲防範尋諭以通籌大局計出萬全並命於廣西鎮
將中擇其實能訓練士卒者認真操演一遇調遣卽剋期就道毋致臨事張皇二
十八年五月入覲上以耆英久任封圻辦理諸務俱臻妥協賞戴雙眼花翎六月

命留京以協辦大學士管理禮部事務尋調管兵部事務署鑲黃旗蒙古都統八月充崇文門監督十月管理宗人府銀庫事務十一月擢文淵閣大學士兼鑲白旗滿洲都統賜紫禁城乘坐肩輿十二月命偕戶部右侍郎朱鳳標馳赴山東查辦鹽務尋偕巡撫徐澤醇會籌變通章程奏言東省鹽務受弊已深其引地票地或輾轉出租或認商抵欠或商逃引懸無人行運或子店關閉難禁食私且綱總易滋盤踞浮費貽誤正供積引以舊濶新認商以此冒彼種種情形甚於他省兩月以來確查遠近引地綜覈古今成法如課場地丁攤徵係雍正七年以後成案東省惟近海之安邱等十八州縣行之此外山河間阻西南各引地距場千有餘里販運不前若按畝攤徵則賦有加增而民多淡食設遇偏災不能不隨正供蠲緩至就場收稅其法始於唐臣劉晏近惟淮北河湖水運節節可通票鹽設局驗貨參用其意東省則水陸俱艱若行票招商恐致無人承領當此力求變通期於可久惟有先納課而急惟正之供參官運而無虛懸之引成本已減積欠可清加斤則商有餘貨減價則民多沾利認真整頓奉行得人庶可輓積習而振饑綱下部議行二十九年正月命赴浙江查閱營伍四月因病請假賞御用人夔十月充

考試國子監滿助教閱卷大臣十二月總理孝和睿皇后喪儀三十年正月宣宗成皇帝升遐命恭理喪儀三月奏言求治之道莫先於用人行政理財三大端用人之道明試以功人有剛柔才有長短用違其才雖君子亦恐誤事用得其當雖小人亦能濟事設官分職非爲衆人藏身之地能實心任事者雖小人亦當示以保全不肯任勞任怨者卽君子亦當另行委置行政之道在於得人迂腐之說無裨時務泥古之論難合機宜部屬得人則六曹政舉疆吏得人則四境蒙休牧令得人則與民休息武弁得人則戎行整肅至理財之道非人不理今天下應貢之賦歲有四千餘萬除去支用恆有盈餘何以近來不能遵額解庫以致庫項短絀若謂災緩所致而二百年來豈水旱偏災始見於今日究竟致絀之由非探本尋原不能通盤清釐與其於正賦外別費經營何如於正賦中覈實籌畫疏入諭曰大學士身居端揆一言一動皆爲舉朝所矜式凡所建白必須持正酌中方爲無忝厥職乃耆英前奏用人行政理財諸大端朕詳加披閱其於君子小人之論持論過備反謂小人且當保全君子亦恐誤事顯違古訓流弊曷可勝言似此率意敷陳殊於進言用人大有關係本應交部議處姑念此外所陳各條尙有切於時

務之處著加恩免其議處仍傳旨申飭自五月至九月疊次因病乞假十月硃筆
罪者英曰耆英之自外生成畏蕙無能殊堪詫異伊前在廣東時惟抑民以奉外
罔顧國家如進城之說非明驗乎上乖天道下逆人情幾至變生不測賴我皇考
洞悉其僞速令來京然不卽予罷斥亦必有待也今年耆英於召對時數言及英
人如何可畏如何必應事周旋欺朕不知其奸欲常保祿位是其喪盡天良愈辯
愈彰直同狂吠尤不足惜第念耆英雖無能已極然究屬迫於時勢著從寬降爲
五品頂帶以六部員外郎候補咸豐二年補工部員外郎三年九月粵匪北竄耆
英之子馬蘭鎮總兵慶錫奏稱父子兄弟願往軍前效力諭曰耆英著在巡防王
大臣處當差慶錫見任馬蘭鎮總兵職任緊要勿庸前往十二月以歷次捐備軍
餉賞四品頂帶五年慶錫以借貸屬員銀兩被劾諭曰耆英於慶錫在朝陽門外
違例設立馬撥並不阻止復令遞送信件實屬悖謬著革職圈禁八年四月英吉
利船駛入天津上命大學士桂良吏部尙書花沙納馳往查辦復賞耆英侍郎銜
前往辦理洋務尋桂良等奏令耆英回京上命耆英留津自酌辦法耆英旋奏稱
面陳機要不俟諭旨卽發五月諭曰耆英經朕棄瑕錄用委任辦理洋務乃畏蕙

無能大局未定不候朕旨擅自回京不惟辜負朕恩亦無顏以對天下實屬自速其死著僧格林沁派員將耆英鎖扭押解交巡防王大臣軍機大臣會同宗人府嚴訊尋訊擬入奏諭曰前據惠親王等奏請將耆英照軍法從事因命解京嚴訊嗣訊具供詞復令恭親王奕訢等秉公定擬茲據奏稱耆英不候諭旨糊塗冒昧酌擬爲絞監候朝審時入於情實所擬尙無不協惟其申敘獲咎之由殊非誅心之論不得不明白宣示耆英以負罪之員復加擢用原冀其收效桑榆於事有濟況該員陛辭時面奏力任其難看奴才造化若何似非昧良昏瞶者比且於四月二十七日抵津後卽有寄諭令其不必與桂良等附會稍涉拘泥俾其自展謀猷作爲第二步辦法朕用耆英不可謂不專保全之恩不可謂不厚及桂良等奏請令該員回京朕料耆英斷無不知之理尙恐稍掣其肘寄諭仍留津自酌辦法耆英若苟有天良能無汗流浹背乎詎該員拜摺後卽擅自回京藉稱面陳機要試問果有而陳何不單銜密奏又云難於形諸筆墨何以接奉留津之旨又恩恩具摺試問摺供之外尙有何機要乎屢次瑣瀆不過爲一首領計況該員供摺內非盡無可採之語未深悉底蘊者尙覺情輕法重不知所說辦法朕與諸臣早經議

及況出諸他人則可出諸耆英之口則不可何則蓋耆英乃局中人既有所見自可施爲豈同辦一事不能補救於事前徒有成說於事後若謂英人所忌懲辦正墮詭謀蓋耆英藉茲自白乃心不徒盡滌前愆且欲誘過於他人居心尤不可問自料擅離差次議止罷斥正遂其身謀優遊於家久蒙知遇忍出此耶且跡其心非特此也同桂良花沙納商允照會相對泣於窗下朝不知其夕死不聞其恪遵前旨另設良圖迨去津時與花沙納云恐此去人心惶惑作爲因差暫離津郡抵通接奉寄諭又不聞趕緊折回抽身惟恐不速等朕旨於弁髦處處巧詐有意欺罔卽立予駢誅百喙莫辭惟惠親王等原參未免過重卽肅順所奏仍擬正法亦未爲是朕之交議正因其罪重欲廷臣衡情酌斷暴白於衆若仍予正法何必解京又何必定擬且謂其苟延歲月儻以病亡獲保首領比擬更屬不倫此乃盜案斷語難妄加諸耆英朕數日詳酌欲貸其一死實不可得卽照奕訢等所擬朝審時必予句決尤覺不忍棄之於市不得已思盡情法兩全之道著派左宗正仁壽左宗人綿勳刑部尙書麟魁迅卽前往宗人府空室看朕硃諭傳旨令伊自盡以示朕飭紀加恩之至意耆英遂伏辜子慶錫馬蘭鎮總兵慶賢宗人府理事官

柏葭

柏葭原名松葭巴魯特氏蒙古正藍旗人道光六年進士改翰林院庶吉士九年散館授編修十年改名柏葭署日講起居注官十一年陞右春坊右贊善十二年二月遷國子監司業七月充山東鄉試副考官十六年陞翰林院侍講學士十七年二月陞詹事府詹事四月遷內閣學士兼禮部侍郎銜六月充江南鄉試副考官十二月稽察中書科事務十八年正月充文淵閣直閣事務七月兼正紅旗漢軍副都統十一月陞盛京工部侍郎二十年六月調盛京刑部侍郎九月兼管奉天府府尹事務十二月調刑部左侍郎兼正黃旗漢軍副都統二十一年署鑲白旗護軍統領二十二年調正白旗滿洲副都統尋以接纂大清一統志全書告成下部優敘二十三年四月調吏部右侍郎尋轉左侍郎閏七月調戶部右侍郎兼錢法堂事務十二月充諭祭朝鮮正使先是朝鮮例有饋送使臣贖儀柏葭偕副使副都統恆興固辭不獲至是差竣入都奏明請旨卻之二十四年七月署右翼總兵八月充崇文門副監督管理光祿寺事務二十五年授總管內務府大臣管理清漪園等處事務二十六年閏五月轉左侍郎兼管三庫事務六月充江南鄉

試正考官十月奏言江蘇完漕紳富謂之大戶庶民謂之小戶以大戶之短交取償於小戶因而刁劣紳衿挾制官吏大戶包攬小戶小戶附託大戶又有包戶名目以致畸輕畸重至旗丁津貼原有定額近來總以米色爲詞多方挑斥逐漸加增請敕下督撫認真查察儻有前項大戶小戶包戶各名目概行禁絕一律均收不准旗丁額外多索幫費如所議行二十七年五月管理圓明園造辦處事務十月命偕倉場侍郎陳孚恩前赴浙江查辦事件旋奉密旨徑赴山東盤查藩庫實存見銀並正雜各款及布政使王篤幕友王王熙違例充幕又查辦山東地方官玩縱盜賊措置乖方各節屬實奏巡撫崇恩等交部議處十二月充經筵講官二十八年六月署右翼總兵十月疏陳賑撫要需有關民瘼庫藏未裕請豫爲籌備十二月陞都察院左都御史充管溝渠河道並值年旗大臣二十九年二月署崇文門監督五月授鑲白旗蒙古都統十二月賜紫禁城騎馬三十年三月陞兵部尙書五月授內大臣七月調吏部尙書管理戶部三庫事務充翰林院掌院學士八月充經筵日講起居注官十一月署步軍統領先是各省官紳商民捐輸地方官及時覈實奏請分別獎敘繼而各省尋常捐輸之案有歷年久遠始行彙題請

敘者柏葭等奏請嗣後尋常捐輸以事竣之日起統限一年內由該督撫查明實於地方有益者覈實專案具題不准以無關緊要及累年零星捐項彙總請敘如一年內實有不能依限者准其咨展一年以杜冒濫而昭慎重如所議行十二月充文淵閣領閣事咸豐元年三月署實錄館總裁六月授閱兵大臣八月充順天鄉試副考官三年充教習庶吉士四年侍讀學士訥爾濟奏各部院書吏舞弊各情柏葭等遵議書吏之弊源固賴司員之稽察而司員之勤惰尤在堂官之勸懲請敕下各部院堂官督飭司員常常進署認真經理凡稿件之已辦未辦文移之應發應收令逐一登明號簿隨時稽察至於鈐印尤應防範周密其輪班值宿之員不准託故偷安使一切文案統歸司員躬親經理不假手書吏弊源自絕上聽之初盛京刑部侍郎書元奏參協領塔芬布佐領恩合父子狼狽爲奸於上年輕聽謠言擅調兵勇自護私宅致旗民惶惑幾至激變將軍奕興曲爲袒護等情上命柏葭馳赴盛京會同工部侍郎善燾等嚴行審辦尋鞠實奏聞得旨塔芬布發遣奕興革任又諭以平安峪吉壤本係陸應穀等選擇見派柏葭帶同陸應穀查勘遷安縣桑園山銀礦卽督同前往平安峪覆加相度詳細履勘並山向水法一

切形勢繪圖貼說具奏九月調鑲黃旗漢軍都統十一月以前在鑲白旗蒙古都統任內揀選承襲佐領錯誤罷總管內務府大臣降補都察院左副都御史署理藩院左侍郎十二月授馬蘭鎮總兵兼總管內務府大臣五年五月擢熱河都統時熱河疊有大夥匪徒入山滋事上命柏葭督飭官兵認真搜捕尋奏言熱河地方將惰兵疲州縣官素不講習公事欲鼓鑄大錢行使則民皆罷市並有礦匪糾衆占踞山場委員侵蝕商項等語諭柏葭督飭地方官確切查辦設法剷除仍須相機辦理至鼓鑄大錢自應體察情形妥爲籌辦先是蒙古地方有金銀等礦該王公等奏請開採上恐於游牧有礙諭柏葭會同該王等親行履勘詳加體察如堪開採即將一切章程妥議具奏十月柏葭等會奏擬於分水嶺上修砌界牆設立界址以示限制所有經費皆由商人捐辦並應遵照奏定蒙古章程辦理下部議行十二月授戶部尙書正黃旗漢軍都統六年十一月命在軍機大臣上行走賜紫禁城騎馬十二月授翰林院掌院學士旋命以戶部尙書協辦大學士七年充經筵講官八年五月充國史官總裁文淵閣領閣事八月充順天鄉試正考官九月授大學士管理兵部事務充稽察欽奉上諭事件處十月授文淵閣大學

士旋以本年中式舉人平齡墨卷內字畫舛誤甚多經磨勘應議旋據御史孟傳金以本科取中舉人士論未協奏上命將試卷覆勘諭曰本年鄉試主考同考各官荒謬已極覆勘試卷應訊辦查議者竟有五十本之多其正考官柏棻著卽行革職聽候傳訊尋經怡親王載垣等奏訊明柏棻聽信家人靳祥之言將同考官編修浦安房內羅鴻繹試卷取中等情得旨靳祥著卽交出歸案審訊旋命將柏棻等交刑部圈禁靳祥死於獄九年載垣等以會審科場案內各員定擬罪名具奏諭曰科場爲掄才大典交通舞弊定例綦嚴自來典試大小諸臣從無敢以身試法輕犯刑章者不意柏棻以一品大員乃辜恩藐法至於如是柏棻身任大臣且係科甲進身豈不知科場定例竟以家人干請輒卽撤換試卷若使靳祥尙在加以夾訊何難盡情吐露既有成憲可循朕卽不爲已甚但就所供情節詳加審覈情雖可原法難寬宥言念及此不禁垂淚柏棻著照王大臣所擬卽行處斬柏棻遂伏法十一年穆宗毅皇帝御極御史任兆堅奏大臣伏法情罪未當懇加恩昭雪諭曰科場條例至爲慎重如果主司舞弊營私自應明正典刑但亦必臧證明確罪當情眞方成信讞若如所奏柏棻一案全由載垣等深文周内置柏棻於

重典藉以盜竊政柄若日久不予昭雪何以持刑憲之平此案卽著禮刑兩部會同將原案悉心確查秉公詳議具奏同治元年議上諭曰此案柏葭聽信家人斬祥之言輒將浦安房內試卷取中是其聽受囑託罪無可辭惟承辦此案之載垣端華等因刑部無僅聽囑託明文輒稱未便妄議定擬比照交通囑託賄買關節之例擬以斬立決覈其情節尙不至此總由載垣等與平日挾有私讎欲因擅作威福又竊窺皇考痛恨科場舞弊明知必售其欺竟以牽連蒙混之詞致柏葭身罹重辟恭讀是日皇考文宗顯皇帝聖諭有不禁垂淚之語仰見皇考不爲已甚之心今我兩宮皇太后政令維新事事務從寬大平允於柏葭正法一節反覆思維謂爲無罪實有不能該御史所請昭雪情罪之處未免措詞失當惟念柏葭受恩兩朝在內廷行走多年平日辦公亦尙勤慎雖業已置之重典亦當推皇考法外之仁柏葭之子候選員外郎鍾濂卽著該旗帶領引見尋賞鍾濂四品卿銜以六部郎中遇缺卽選見官光祿寺卿

葉名琛

葉名琛湖北漢陽人道光十五年進士改翰林院庶吉士十六年散館授編修十

八年授陝西漢中府遺缺知府尋補興安府知府十九年陞山西雁平道二十年
調江西鹽法道二十一年署按察使旋擢雲南按察使二十二年四月江西巡撫
裕泰以名琛在江省防堵捐資出力請獎下部優敘十月陞湖南布政使二十三
年三月調江寧布政使因迴避祖籍調甘肅布政使十二月丁母憂二十六年服
闋授廣東布政使旋命暫署順天府府尹充武鄉試校射大臣以武舉弓石力不
符下部議處二十七年抵廣東布政使任尋護理巡撫二十八年四月湖北解到
傳教洋人李若瑟囉沅勒納巴囉三名名琛會同署兩廣總督徐廣縉申列條約
奏交各國領事嚴加約束勿任復至內地報聞時湖南會匪教匪四起名琛委員
拏獲董言台等二十八名又續獲蒙其漢等二十七名訊知爲白蓮教餘黨復密
飭員弁將在逃餘犯購緝偵捕六月擢巡撫十月捐助湖北賑濟下部優敘尋英
人欲入內地廣東省城戒嚴二十九年三月名琛疏言臣等通盤籌畫內城外城
共十六門按門添兵內河外海共三十六礮臺按臺配兵並飛飭水師兵丁隨時
調遣臣等查英人本稱狡詐舉動尤爲叵測若不慎始慎終何以固藩籬而安祚
席自當設法嚴防不致疏虞又疏言竊查英人之欲進城其包藏禍心實有不堪

設想者明知入城一事萬民不願何以百計要求原欲使官與民強爲逼勒致民與官頓起離畔之心該英人從此收買人心庶幾唾手可得幸而廣東之士農工商無不同仇共憤是以該英人不敢與民爲難但思與官爲難也領事文翰總因二十七年定約甚堅曉瀆不已若不立爲阻之令其覷破機關則得隴望蜀伊于胡底而匪徒專盼許其進城得以乘機煽惑焚燒洋樓劫搶洋貨姦人並起省城香港勢必同歸於盡不獨有乖守土之義更何得爲柔遠之謀總之該英人入城如果得失參半不妨暫示姑容無如有害無利斷難隱忍坐視疏入上深然之四月偕徐廣縉陳奏略曰查文翰有定欲進城之議嗣因省城官民齊心保衛防禦森嚴加以衆紳公啟勸導深知衆怒難犯遂爾中止嗣英人徧告各國罷議進城仍求照舊通商臣等查英人所繫戀者惟貿易則所以鈐制之者亦惟貿易英人頻年驕縱從未稍受裁抑今既力窮而思所變計自當乘勢而予以轉關當囑委辦洋務之紳士等密令衆商與之申明約束既不進城自可通商何時反覆卽行停止於羈縻之中仍寓裁制之意仍飭水陸一體嚴防城廂保衛如前慎密總使無隙可乘庶幾有威可畏疏入硃諭所辦可嘉之至朕心甚慰如此棘手之事卿

不動聲色使彼自屈較之軍功尤堪嘉尙嗣因英人不敢入城偕徐廣縉疏言接據文翰照覆見經議定以後再不辯論進城之事見在貿易如常中外均頗安靜臣等備文照會宣布皇仁外國商人一體保護感洋商之心正所以寒文翰之膽臣等仍當督飭文武安民綏外靜以制動奏入諭曰洋務之興將十年矣沿海擾累糜餉勞師近年雖略臻靜謐而馭之之法不得其平流弊愈出朕深恐沿海居民蹂躪之虞故一切隱忍待之蓋小屈必有大伸理固然也昨因英人復伸粵東入城之請督臣徐廣縉等連次奏報辦理悉合機宜本日由驛馳奏該處商民深明大義捐資禦侮紳士實力助勦入城之議已寢英人照舊通商中外綏靖不折一兵不發一矢該督撫安民綏外處處皆抉根源令英人馴服無絲毫勉強可以歷久相安朕嘉悅之忱難以盡述允宜懋賞以獎殊勳葉名琛著加恩賞給男爵准其世襲並賞戴花翎以昭優眷發去花翎著葉名琛祇領尋得旨以一等男爵世襲閏四月復奏夷情略曰伏查洋人居心叵測其在本國縱有夙嫌而在內地則恐傷其類又未嘗不狼狽爲奸何敢開門揖盜致墮詭謀伏讀溫諭以見在城內居民恨之切骨惟恐其不受創該督等所稱轉圜之處似不出於民而出於商

竊惟廣東之商多係土著其外省來此貿易者並無多人商與民固不能分而爲二也儻該英人竟敢豕突狼貪原不難制其死命惟可已則已各留轉圜地步然尤在平日修明武備固結民心使操縱之權胥由內地庶外人漸息鷓張有備乃可無患則用威正不如養威也五月奏保襄辦夷務文武員弁及紳士等獎敘有差先是陽山英德等縣匪徒聚衆戕官名琛咨署提督祥麟並檄調鎮將等帶兵進剿六月以首犯就擒下部優敘七月給事中曹履泰以英人馴服奏請籌議善後事宜名琛疏言英人三次潛混入城均大受懲創見值保衛森嚴更不敢輕爲嘗試惟稽察之道固貴隨時而操縱之權總求在我則武備實爲第一要也九月派員購運洋米赴浙拯荒三十年正月復密陳夷情曰臣訪知美法各領事見約文翰同致書於英吉利王以自罷議進城貿易漸旺可見不尋嫌隙利益顯然是安心通商衆國僉同尤當恪遵恩訓固結民心以安民爲綏遠庶靖內而捍外三月署欽差大臣兩廣總督五月奏洋匪搶劫疊次剿捕殲擒一千數百名洋面肅清六月又奏言英人恃其火輪船肆擾海外及各國靜與相持遂廢然而返此次文翰駛往上海明知其假巡查爲名別有覬覦俟其回港如有商辦之件必當恪

遵指授相機妥辦不慮其狡焉思逞也奏入奉硃諭洋人詭譎性成卽或別有要
求卿等亦必有定見尤須敬慎乃心俾民心益固則彼計自蹙尋奏文翰回港安
靜如常七月廣西遊匪竄入廣東名琛檄員弁追捕擒首犯李士奎十月兼署廣
東陸路提督復奏廉州擒獲匪黨並英德剿辦情形又檄官兵夾攻翁源匪徒十
一月復飭文武攻捕南韶一帶土匪均擊敗之時上以福建舉政黃贊湯安徽布
政使蔣文慶漕運總督周天爵前後疏奏豫籌海防外命各督撫體察布置名琛
疏言羈縻外人之術在使彼之理屈而我之理伸惟是事期有備原在得人欲求
體用兼賅者殊難其選祇可因材器使至於漢奸多係沿海遊民當隨時查禁懲
辦若省城爲華洋雜處全在控馭得宜卽上年英人復請入城城內外聚有萬之
衆無不志切同仇是團練具有成規無事則相安有事則相衛也卽洋人偶生妄
念竟以必不能行之事先爲嘗試而在我有貞固不搖之勢彼亦廢然思返若祇
一味遷就則得寸思尺伊于胡底蓋防外首在固民所謂積至數十年不敢遽逞
者直窺我封疆之臣優劣何如耳十二月奏言南海等六縣沙地坍塌漲靡定未能
一律成熟請仍照歲額徵輸以紓民力又賊聚連平州屬九連山一帶檄員弁分

道擊之擒斬四百餘人咸豐元年二月以廉州平塘行鹽辦課舊商斥革新商未充致巡丁歇業流而爲盜請招商試辦以顧引餉而清盜源如所請行四月奏剿英德匪徒先後拏獲二千餘名首要各犯無一漏網地方肅清得旨嘉獎下部優敘又剿欽州土匪斬俘百餘名焚其巢五月奏廣寧賊匪分股竄回飭官兵擊敗之時劉八股匪竄合浦之竹根坡復退據東館墟凌十八會匪聚化州之平定墟復據清湖墟名琛以聞命廣東廣西兩省合力痛剿七月南海縣暨東莞縣士子藉口義倉經費及抗糧兩案倡議罷考名琛先訪主謀者褫其衣頂其餘安分諸生請准其一體鄉試時廣寧夥匪全股殄滅儋州土匪劉文楷復勾結黎人滋擾官兵日久無功奏劾總兵黃慶元等畏縮貽誤請革職拏問允之八月進剿會匪凌十八於羅鏡連破數墟賊大潰閏八月廣西南寧太平一帶巨匪顏品瑤伏誅飭提督陶煜文等分途剿擊餘匪九月何名科等股匪滋擾信義縣境官兵進攻敗之於劉坡餘匪悉遁何名科竄廣西名琛復派遊擊劉開泰等越境窮追擒何名科斬之十月逆匪凌十八陳二吳三等分爲三股竄據羅鏡檄陞任高廉道宗元醇等輪流進攻並探知吳三陳二與凌十八有隙率黨潛逃官軍豫設伏兵將

陳凌兩股截回羅鏡吳三直奔八字嶺官兵前後夾擊將吳逆全股殲滅奏入上嘉其功賞加太子少保銜又奏儋州匪徒首夥全獲土黎肅清十二月奏剿新鋪逆匪顏品喜顏三等二年五月奏剿那練賊首李士青等均擒之斬於軍前嗣以徐廣縉赴廣西辦理軍務命接辦羅鏡剿捕事宜名琛行抵羅定旋奏籌辦情形上韙之七月擒斬羅鏡首逆全股蕩平捷聞諭曰覽奏深慰朕懷羅鏡凌十八股匪與洪秀全會匪聲勢相倚曾在金田入會黨衆心堅擾及兩省抗拒一年之久實屬罪大惡極經該督撫先後籌剿不遺餘力得以掃數殲擒洵足伸國法而快人心葉名琛接辦後調度有方辦理甚屬妥速著加恩賞加總督銜仍交部從優議敘尋署兩廣總督時辦理羅鏡善後事竣正擬凱旋探知湖南道州逆匪逼近廣東交界隨調兵勇防堵並星夜回省控制一切九月奏曲江匪徒擾及仁化樂昌乳源等縣經提督崑壽等帶兵圍剿上命名琛馳赴南韶一帶督兵殲除十二月又奏西路各匪藏匿曲江縣之羅坑山崑壽等帶兵進攻焚其巢餘匪竄逸其南竄之匪經署守備涂得照等截殺其北竄者與江西接壤經南贛道周玉衡等馳剿上命不分畛域一體搜捕旋擢兩廣總督三年二月剿辦東西兩路並江西

交界各匪疊獲勝仗殲擒一千餘名旋以續捐軍餉下部優敘五月奏剿擒長寧匪徒多名其江西交界股匪復派守備任士魁等各處圍剿大挫賊鋒七月奏江西龍南賊匪擾入連平州境經崑壽派兵合擊漸就殄滅嗣以惠州府屬龍川縣及東江一帶匪徒糾衆戕官調潮州鎮總兵壽山督兵進剿四年四月遊匪闖入博羅縣城飭署惠州府知府陶澐等擊退之五月奏賊攻潮陽惠州協副將膺保等力戰死之六月賊陷高明檄官兵前後夾擊斬賊目杜錦剛七月新江白土匪徒陷肇慶調將弁督兵擊之賊復陷鶴山及開平縣均派兵進攻復其城又清遠匪徒陷廣寧復檄兵圍剿克之破其巢閏七月廣州土匪肆擾漸逼省城偕將軍穆特恩等督同文武戰守兼籌九月剿辦省城北路股匪七戰皆捷破佛嶺市賊營暨毗連二十餘里之賊巢悉行焚燬十月省城西北兩路賊匪據橋頭市石井等處遣廉州營遊擊曾廷相等敗之賊從北路突出官兵分道擊之沈其船殲除過半番禺境內匪徒駕舟分竄圖闖駛省河調員弁堵擊賊遁還十一月附省各匪糾黨萬餘人仍屯石門各鄉經官兵合擊大小二十餘戰賊大潰殲斃無算水陸解圍時近省之賊盡起分股據佛山鎮陷龍門從化東莞陽山河源增城封川

各縣城韶州府賊陷海豐開建各縣復圍府城潮州府賊破惠來竄歸善擾陸豐肇慶餘賊據府城陷德慶州名琛分檄員弁各路攻剿將府州縣城先後克復擒斬甚衆五年五月奏廣東軍務未竣請將乙卯科文武鄉試展至咸豐六年補行從之八月奏廣東匪首梁培友竄廣西撲潯州復遣將弁帶船勇馳剿是時英領圖北上名琛遵旨回省辦理各情節因奏探知英領包玲美領麥連已先後回港終未提及天津之事時值附省各口匪船猖獗該領事隱生窺伺每親看接仗復暗濟逆匪礮藥臣察其詭計隨時偵探以備不虞近復密購該領事鈔出各條不勝髮指如華洋相爭一款總由洋人欺壓民人難堪以致激於公憤該夷遂謂地方官審斷不公勢必欲官與民相爲離間從此得任所欲爲又聞欲免欠稅一款洋商出口進口貨無可稽漏者頗多至四年由該領事官代理能否按數交納尙未可知至於覈減尤於各稅務大有關係法人所重惟天主教查自道光二十六年准其在五口傳教從此內地會匪相習成風一經查拏多稱教內之人連年倡亂卽由廣西上帝會而起上帝會乃天主教之別名凡有各省會匪教匪捻匪如響斯應此兵燹所由起也臣惟當恪遵訓諭堅持定約斷不敢稍存遷就尤不得

偶疏防範九月奏擒斬洋匪李亞快等二百人又奏克復韶州府屬樂昌乳源仁化等縣尋命以兩廣總督協辦大學士十月因剿捕惠州餘匪被匪鈔襲劾福建臺灣鎮總兵呂大陸等下部議處旋兼署廣東巡撫時賊擾新會縣境剿獲數千名地方以安又賊陷豐順飭官軍紳練等擊之俘斬二千二百餘人十二月擢體仁閣大學士仍留總督任六年二月奏高州廉州兩府地方肅清見辦善後事宜三月以雇募紅單船赴江南助剿需費較繁率屬倡捐銀兩下部覈獎四月奏捕獲澳門洋匪搜擒英德餘匪及會辦湖南交界各股匪七月奏援剿江西逆賊克復雩都上猶縣城贛州府城解圍又奏堵剿廣西潯州土匪擒斬一萬四千餘人又奏賊陷和平經崑壽督兵由河源一路進剿復其城七年四月奏廣西佃匪據橫州各境擾及廣東廣州之合浦等處遣高廉道蔡徵藩等督兵越境進剿先後攻破匪巢六十餘處擒斬渠魁餘匪悉平五月奏援剿江西南贛匪徒於樓梯嶺及潭口等處克之又奏江西信豐竄匪擾及南雄交界飭官軍奮擊敗之並援剿信豐立解城圍閏五月以率屬捐備軍餉諭戶部查覈獎敘九月奏肇慶府城據賊經廣東按察使沈棣輝及高要縣知縣黃慶護等先後進攻擒斬首夥賊匪三

萬有奇克復郡城十月奏廣西股匪陷南寧府城復敗竄橫州及靈山各境皆飭
兵勇奮擊復其城十二月奏江西敗匪竄入廣東境經官兵水陸圍剿擒斬四千
六百有奇賊遂退尋以英人要求無厭名琛未卽應又未設備英人因突入省垣
給名琛入洋船開駛而去經將軍穆克德訥巡撫柏貴等連銜馳奏諭曰葉名琛
以欽差大臣辦理洋務如果該領事非理妄求不能允准自當設法開導一面會
同將軍巡撫等妥爲撫馭乃該領事兩次投遞將軍督撫副都統等照會該督並
不會商辦理卽照會中情節亦祕不宜示遷延日久以致英人忿激突入省城實
屬剛愎自用辦理乖謬大負委任葉名琛著卽革職九年英人歸其尸據云在五
印度城內不食死署廣東巡撫畢承昭上其事報聞

K820.49

2

2573255

文藝叢書

清史列傳

清史列傳卷四十終



21101000158025

100-856